



11



14-2.c.2

DE LA
SOVVERAINETE
D V R O Y.

PAR MESSIRE CAR. LE BRET,
*Conseiller ordinaire de sa Majesté en ses
Conseils d'Estat & Privé.*



BIBLIOTECA VAS.
ROMA
VITTORIO EMANUELE



A P A R I S,
Chez IACQUES QUESNEL, rue saint Jacques,
aux Colombes, près saint Benoist.

M. D C. XXXII.
AVEC PRIVILEGE DV ROY.

12 25 22



A Monseigneur le Marquis
DE CHASTEAV-NEVE,
GARDE DES SEAVX
de France.



ONSEIGNEVR,



*Deux raisons particulieres
m'obligent de vous dedier ce traitté de
la Souueraineté du Roy. L'une, d'autant
qu'elle est le principal objet de la charge
eminente que vous possédez si dignement:
L'autre, pource que vous deffendez ses
droicts, avec autant de Zele & de courage,
que le merite de vostre naissance, la vinaci-
té de vostre esprit, l'integrité de vos mœurs,
& l'experience que vous avez en toutes sor-*

â ij

E P I S T R E

tes d'affaires vous releuent au dessus de la pluspart de vos Predecesseurs. Aussi la iudicieuse eslection, que le Roy a faicte de vostre personne pour remettre ceste haute dignité en son ancienne splendeur, a esté suiuite de l'applaudissement general de tout le monde. Car c'est sans doute que comme le Soleil est plus ardent, & jette vne lumiere beaucoup plus esclatante, lors qu'il est monté au plus hault du Ciel: de mesme les dignitez deuenent plus authorisees, plus puissantes, & plus illustres, quand elles sont esleuees sur des vertus éminentes comme les vostres. I'ose me promettre que cet ouurage vous sera d'autant plus agreable, que peu d'Autheurs se sont occupez sur ce sujet. Platon & Aristote, les plus celebres Politiques de l'Antiquité, ont traité de l'Estat Monarchique, & remarqué les manquements qui s'y rencontrent: mais ils n'ont rien dict des droicts legitimes du Prince souuerain. Samuel mesme lors qu'il establit les Roys en la Iudee, se contenta de représenter au peuple les actions violentes qu'ils exerceroient sur eux, sans rien prescrire des iustes prerogatiues de la Royau-

EPISTRE

*té. Et bien que Iustinian eust promis d'en traic-
 ter dans le corps qu'il a faict compiler des
 loix Romaines, toutesfois il n'a employé ses
 soins qu'à faire expliquer le droict des parti-
 culiers, & n'a laissé que fort peu de choses des
 droicts publics de l'Empire. Ceux qui sont
 venus depuis, s'ils ont parlé de ceste matiere,
 ç'a esté avec si peu de certitude, qu'on ne peut
 pas tirer beaucoup d'instruction de leurs es-
 crits. Pour moy ie me suis étudié de recueil-
 lir en ce volume tous les droicts & les privi-
 leges de la souveraineté Royale : & i'estime
 les avoir appuyez de raisons, d'exemples, &
 d'authoritez suffisantes, pour les maintenir
 contre ceux qui les voudroient usurper, ou
 débattre iniustement. Tout ce que ie crains,
 c'est de n'avoir pas traicté un si noble sujet
 avec tous les ornements qu'il merite. Mais
 comme le prix de l'or ne consiste pas tant en
 l'artifice de celuy qui le met en œuvre, qu'en
 la qualité de sa matiere : I'espère aussi que
 l'utilité de cet ouvrage suppléera à tous les de-
 fauts qu'on y pourroit remarquer. Du moins
 j'auray ce contentement en mon ame, d'avoir
 seruy le Roy selon la capacité qu'il a plu à*

EPISTRE

Dieu me donner , & une particuliere satisfaction , de vous avoir tesmoigné l'e-stime que 'ie fais de l'honneur de vostre bien-veillance. Je m'efforceray de la conseruer partous les deuoirs que vous pouvez attendre de celuy qui est ,

MONSEIGNEVR

Vostre tres-humble ser-
uiteur LE BRET.



T A B L E
DES CHAPITRES
DV PREMIER LIVRE.




	<i>VE c'est que la Royauté. Chapitre i.</i>	
	page 1	
	<i>Que c'est que la souveraineté, & que sa premiere marque est de ne dependre que de Dieu seul. chap. ii.</i>	9
	<i>De l'erreur de ceux qui disent que la France doit dependre de l'Empire. chap. iii.</i>	15
	<i>Des loys fondamentales de la Monarchie Françoisse. chap. iv.</i>	23
	<i>De la Maiorité des Roys en l'aage de quatorze ans. chap. v.</i>	37
	<i>Des femmes des Roys, & de quels droicts elles jouissent, mesme durant leur viduité. ch. vi.</i>	42
	<i>Des enfans & des freres des Roys, & de leurs droicts & prerogatiues. chap. ix.</i>	49
	<i>Qu'il n'est permis aux Princes du Sang, & grands Seigneurs du Royaume de se marier, sans le consentement du Roy. chap. viii.</i>	58
	<i>Qu'il n'appartient qu'au Roy de faire des loys dans son Royaume, de les changer, & les interpreter</i>	à iiii

Table des Chapitres.

rer. chap. ix.	64
si le Roy peut faire des loys en matieres Ecclesiastiques. chap. x.	75
Que le Roy peut enjoindre aux Prelats de tenir leurs Synodes. chap. xi.	82
Que les Ecclesiastiques nonobstant leur qualite, ne laissent pas d'estre sujets du Roy, & ses insticia- bles. chap. xii.	88
Que les terres de l'Eglise sont sujettes à la Souveraineté du Roy. chap. xiii.	100
Des Decimes que l'on paye au Roy sur les reuenus des Benefices. chap. xiv.	108
Que l'on ne peut bastir de nouveaux Monasteres, ny instituer de nouvelles congregations sans la permission du Roy. chap. xv.	115
Du pouuoir qu'ont les Roys sur les Benefices Ecclesiastiques, & de la Regale spirituelle dont ils jouissent. chap. xvi.	121
De la nomination que le Roy fait au Pape des premieres dignitez de l'Eglise. chap. xvii.	129
De la Collation des Benefices appartenants au Roy comme Patron & Fondateur. chap. xviii.	135

Table des Chapitres du second Liure.

Q u'il n'y a que le Roy qui puisse instituer des officiers, & donner des Commissions extraordinaires. chap. i.	141
Des Officiers de Judicature. chap. ii.	151
Qu'il	

Table des Chapitres.

Qu'il n'appartient qu'au Roy de declarer & de faire la guerre, & des Offices Militaires. ch. iii.	162
Des Officiers de Finances. chap. iv.	168
De la Venaliré des Offices. chap. v.	176
Des commandemens & des Rescripts du Prince souverain, & de l'obeïssance qui luy est deuë par ses Officiers & ses Ministres. chap. vi.	188
Qu'il n'y a que le Roy qui puisse faire des nobles. Chapitre vii.	202
Qu'il n'appartient qu'au Roy de naturaliser les estrangers, & des droicts qu'il a sur eux. ch. viii.	215
Qu'il n'appartient qu'au R. y de legitimer les bastards, & des droicts qu'il a sur eux. chap. ix.	229
Qu'il n'appartient qu'au Roy de faire battre monnoye, & quand, & comment il peut la changer. chap. x.	244
Quelle puissance, & quels droicts le Roy a sur la mer. chap. xi.	260
Des fleuves navigables, & des droicts que le Roy a sur iceux à cause de sa Souueraineté. chapitre xii.	277
Des grands chemins, & des droicts que le Roy a sur iceux. chap. xiii.	285
Du droict de marque, & Represailles, & qu'il n'appartient qu'au Roy de les octroyer. chapitre xiv.	297
Qu'il n'appartient qu'au Roy d'instituer des Postes & d'autres droicts Souuerains. chap. xv.	304

Table des Chapitres.

Table des Chapitres du troisieme Liure.

D <i>V</i> domaine de la Couronne. chap. i.	321
Que le Domaine n'est point subiect à la prescription. chap. ii.	337
Des Forests, & bois de haute-futaye, & des droicts que le Roy a sur iceux. chap. iii.	348
De la chasse, & que c'est au Roy d'en ordonner. chap. iv.	363
Que les places fortes sont tousiours exceptées des alienations du Domaine de la Couronne; & qu'il n'appartient qu'au Roy de les bastir, les reparer, & les garder: ny de faire aucuns œuvres publics, sans sa permission. chapitre v.	377
Des droicts qui appartiennent au Roy sur les mines & les metaux. chap. vi.	38
Qu'il n'appartient qu'au Roy de leuer deniers sur ses suiets par forme de Tailles, Aydes, & Gabelles. chap. vii.	395
Qu'il n'appartient qu'au Roy de donner immunité, & exemption de Tailles, Aydes, & Subsidies, chapitre viii.	411
De la difference qui est entre les bien-faicts du Roy, & les priuileges qu'il octroye. chap. ix.	418
Du Fisque, & de son droict de Protopraxie ou preference, & d'autres priuileges qui luy appartiennent. chap. x.	425
De la saisie Royale, & comme l'on entend ce qu'on	

Table des Chapitres.

dit communément que le Roy plaide la main garnie.	
chap. xi.	441
Des droicts que le Roy a sur les biens vacants par	
desherance ou autrement. chap. xii.	448
Des biens des condannez, & des droicts que le	
Roy a sur iceux. chap. xiii.	468

Table des Chapitres du quatriesme Liure.

D Es sceaux du Roy, de leur autorité & de	
leurs droicts, & en suite de la dignité de	
Chancelier & de Garde des Sceaux. chap. i.	477
Du dernier ressort, & que c'est vn des principaux	
droicts de la Souueraineté. chap. ii.	490
De la puissance du glaive que le Roy a sur ses sub-	
jets. chap. iii.	503
De certains cas dont la cognoissance n'appartient qu'aux	
Officiers du Roy. chap. iv.	517
Du crime de leze Maiesté. chap. v.	527
Qu'il n'appartient qu'au Roy de donner des Remis-	
sions, des Graces, & des Abolitions. ch. vi.	556
Qu'il n'y a que les Roys & les Princes souuerains	
qui puissent traicter par Ambassadeurs, & des	
droicts & priuileges des mesmes Ambassadeurs.	
chap. vii.	592
Des contractz, des traittez, & des confederations des	
Princes souuerains, & quand ils s'en peuuent de-	
partir. chap. viii.	604
Si le Roy est obligé de payer les debtes de son prede-	

Table des Chapitres.

ceffeurs , & si apres les changemens qui font arri- uez en vne ville, les suruiuans sont tenus de payer les debtes qui ont esté auparauant contractées au nom du public. chap. ix.	621
En quel cas le Prince souuerain peut disposer de biens des particuliers contre leur gré. chap. x.	632
De l'assemblée des Estats Generaux & Prouvinciaux, & qu'elle dépend de la seule auctorité du Roy. chap. xi.	640
Des Vniuersitez, & qu'il n'appartient qu'au Roy de les fonder & les establir. chap. xii.	647
Des foires & des marcheZ publics , & qu'ils ne se peuuent eriger que de l'auctorité du Roy. chap. xiii.	672
Qu'il n'appartient qu'au Roy de faire des reglemens generaux pour la police du Royaume. chap. xiv.	683
Que les Roys sont sujets à la puissance & à la in- stice de Dieu. chap. xv.	683

L'Imprimeur au Lecteur.

Ce liure ayant esté imprimé durant l'absence de l'Au-
theur, il s'est coulé vne infinité de fautes, de virgules
& de points inutiles: i'en ay fait le recueil des plus remar-
quables à la fin de cet œuvre, ie vous supplie donc, auant
que de passer outre, de jeter la veüe dessus, pource qu'au-
rement vous rencontreriez plusieurs passages qui n'au-
roient point de sens, ou qui pourroient vous arrester à cau-
se de leur obscurité.



LIVRE PREMIER,
DE LA
SOVVERAINETE
DV ROY.

Que c'est que la Royauté.

CHAPITRE I.



ESTANT proposé de représen-
ter en cet ouvrage en quoy cō-
siste la Souveraineté du Roy:
il me semble que ie ne le puis
commencer plus à propos que
par la description de la Royau-
té: Il seroit mal-aise d'en rapporter vne plus
accomplie que celle que nous donne Philon
Juif en ses liures de la vie de Moyse, quand il
dit, qu'elle est vne suprême puissance deferee à
vn seul, qui luy donne le droict de comman-

A

2 DE LA SOUVERAINETE' DV ROY,
derabsolument, & qui n'a pour but que le re-
pos & l'vtilité publique. Iugeant par là que
deux choses sont necessaires pour l'establis-
sement d'une Royauté legitime: l'une, l'autho-
rité souveraine, pour se faire obeyr par les peu-
ples qui luy sont sousmis: l'autre, qu'elle se
doit proposer pour sa fin principale de pro-
curer par toutes sortes de moyens le bien de
ses subiets.

C'est ce que Dion Chrysostome nous a naïf-
vement représenté, quand il nous l'a depeint-
te sous la figure d'une Deesse, qu'il appelle
Βασιλέα, que le grand Hercules vit assise
dans un throné, tenant un sceptre à la
main, accompagnée d'un venerable vieillard,
qui sembloit faire la charge de son premier
Conseiller: Et de trois autres Diuinitez qu'il
nomme *Δίκη*, *Ευνομία*, *Ειρήνη*, la Iustice, la Loy, &
la Paix: Nous voulant monstrier par toutes ces
circonstances, que la principale marque de la
vraye Royauté, est d'auoir une autorité, &
une puissance absoluë, dõt le throné & le sce-
ptre sont les Symboles: qu'elle ne doit rien en-
treprendre, que par l'aduis de personnes sa-
ges & experimentees dans les affaires, &
qu'elle doit estre soigneuse d'establir de bon-
nes & saintes loix, pour maintenir ses peu-
ples en paix, & leur faire ressentir les effects sa-
lulaires de sa Iustice.

Delà vient qu'Amian Marcellin, dit qu'il n'est autre chose, que *cara salutis aliena*. Pour monstrier que le principal office du Prince est de se despoüiller de ses propres interets, retrancher de ses plaisirs, se dérober à soy-mesme, pour se donner entierement au public, & faire en sorte que, *Omnium domos, illius vigilia; omnium otium, illius labor; omnium delicias, illius industria; omnium vacationem, illius occupatio defendat*. dit le Philosophe Seneque.

C'est ce que les Anciens voulurent faire reconnoistre à leurs Roys, lors qu'ils les appellerent tantost Pasteurs, & tantost Peres des peuples, comme les Hebreux qui les nommerent *Abimelech*, qui signifie Pere-Roy, pour les aduertir que leur deuoir est de veiller sur leurs subjets; avec la mesme diligence que les Pasteurs veillent sur leurs troupeaux: Et de procurer leur bien avec le mesme zele, & la mesme affection que les Peres procurent celuy de leurs enfans. *Hoc quod parenti, etiam principi faciendum est.*

Aussi n'ont-ils esté créés que pour ce sujet; car les premiers hommes se voyans exposez aux iniures de leurs ennemis; que les plus riches abusoient de leur autorité, & que les loix estoient mesprisées & foulées aux pieds; par les plus puissants: Pour remedier à ces maux, ils establirent des Roys, & leur don-

4 DE LA SOUVERAINETE' DV ROY,
nerent la souueraine autorité sur eux. C'est
ce que veut dire Tacite quand il parle de l'esta-
blissement del'Empire en la personne d'un
seul : *Neque prouinciae illum statum abnuebant , su-
specto Senatus , populi que imperio , ob certamina po-
tentium , & avaritiam magistratuum , inualido legum
auxilio , quae vi , ambitu , postremo pecuniâ , turba-
bantur.*

Combien ceux-là donc attirent-ils de mal-
heurs & de vengeance du Ciel sur leurs res-
tes , qui abusans d'une puissance si auguste &
si diuine, se jettent dans toutes sortes de licen-
ces & de debordemens ; & qui dans la Royau-
té, *illorum crudelitas indemnatos necandi*, dit Pacatus
en son Panegyrique à Theodose, *cupiditas priua-
ta rapiendi , libido honesta fœdandi , impunitatem requi-
runt* ; & qui au lieu de soulager leurs subiects,
les abandonnent à toutes ces calamitez & ces
miseres ; que Tacite & quelques autres ap-
pellent elegamment , *Flagitia dominationis ,
aberrationes regni , vitia imperij , & principatûs labe &
corruptelas.*

Nos Roys ont eu cet aduantage, que iusques
à present ils ne sont point tombez dans ces ex-
tremitez ; au contraire, ils ont gouverné leur
Royaume avec tant de douceur & de mode-
ration ; ils ont esté si soigneux d'observer ce
sage aduis, que Plinè dône à Trajan : *Caue dū prin-
ceps sis , ne sis Domino locus* ; que raremēt ils ont dōné

fujet à leurs peuples de se plaindre de leur gouvernement. Que si quelques-vns d'entre eux ont esté contraincts de recourir à des secours extraordinaires, ils y ont esté forcez par la necessité, dont la puissance est si absolüe, que persõne ne se peut dire exempt de son empire. *Abominanda necessitatis amarissima leges, & eruculentissima imperia, multa non intellectu tantum, sed etiam auditu graua perpeti cõgerunt.* Il n'y a iamais eu que Moyse, entre tous les Princes de la terre, qui ait peu s'affrâchir de la rigueur de ses loix, & qui n'ait iamais rien leuë sur son peuple: Aussi auoit-illa verge de transmutation, dont il se seruoit pour tirer l'eau de la pierre, & faire descendre du Ciel, tout ce qui luy estoit necessaire. Mais tous les Roys ne receuans pas de Dieu vn secours si prompt, & si fauorable en leurs affaires, ils se trouuent en des occasions tellement pressées de la necessité, qu'ils sont contraincts avec regret de se seruir de remedes inusitez pour se garantir des malheurs dont elle est ordinairement accompagnée.

Hors ces mauuaises rencontres, il n'y a point eu de Princes en l'Vniuers, qui ayent traitté plus doucement leurs peuples, que nos Roys. Aussi certes ils ont pour ce sujet merité du Ciel des graces si particulieres, que S. Gregoire auoit accou-

6 DE LA SOUVERAINETE' DV ROY,
 estonné de dire en leur Iouange, qu'ils surmon-
 toient d'autant plus les autres Princes Chre-
 stiens, que les Chrestiens surpassoient en pro-
 bité de vie tous les infideles. Ce qui a doné su-
 jet à plusieurs graues autheurs de dire, que la
 Maiesté Diuine auoit estably ce Royaume, au
 lieu de celuy de Iuda, suiuant ceste Prophe-
 tie de Daniel : *Suscitabit regnum aliud, quod in ater-
 num non dissipabitur.* Et de fait, il n'y a iamais eu
 Monarchie, qui ait duré si long-temps en sa
 splendeur, ny qui dans l'estat où elle est à pré-
 sent, se puisse promettre à l'aduenir plus de
 gloire & de felicité, que celle de la France. Car
 bien que sa fortune ait esté souuent agitée par
 de furieuses tempestes qui luy ont esté sou-
 uent suscitées, ou par l'enuie de ses voisins, ou
 par la propre malice de ses peuples : toutesfois
 Dieu l'a tousiours releuee au dessus de l'orage,
 & l'a rendue plus puissante qu'elle n'estoit au-
 parauant. Si bien qu'un signalé persónage de ce
 siecle a dit avec raison, *Magna regni Gallorū for-
 tuna, sed sæper in malis maior resurrexit.* Et no^s deuõs
 esperer qu'elle ne pourra iamais estre ébrulée,
 tandis que nos Roys continuëront de main-
 tenir en son lustre la Religion, de cheir leur
 peuple, & de leur faire part de la felicité que
 Dieu leur donne : *Illius enim magnitudo,* dit Sene-
 que, *stabilis fundatæque est, quem omnes tam supra se-
 esse, quam profesciunt, cuius curam. excubare pro su-*

Iure singulorum, atque vniuersorum, quotidie experimur.

I'estime qu'ils ne peuuent leur donner de plus certains tesmoignages de leur affection, qu'en se rendans soigneux de deux choses. La premiere, de faire exercer sainctement la Iustice, d'empescher que les Magistrats n'abusent de leur autorité : & de defendre les plus foibles contre l'oppressiō des plus puissans, qui se font maintenat la Iustice à eux-mesmes, avec toute sorte de violence, *Iura negant sibi data, nihil non arrogans armis.* Car c'est principalement pour ce sujet que les Roys sont instituez de Dieu: c'est ce qu'il leur recommande plus particulièrement, comme le tesmoigne le Prophete Ieremie chapitre 22. D'où vient que Pierre de Bloys, escriuāt à Henry Roy d'Angleterre, en l'Epistre 95. luy disoit : *Qui dat Regibus diuitias terræ, ab eis non postulat aurum vel argentum, sed vt audiant causam populi, & arguant pro mansuetis terris.* Aussi nous voyons que l'Escripture saincte, comme remarque S. Gregoire en ses Morales, appelle le Tribunal où Salomon rendoit la Iustice, *Turrineburneam*, pour monstrier que le thrōne des Roys, doit seruir de refuge, & de fortresse à tous ceux qui se mettent à l'abry de leur protection, & qui ont recours à leur Iustice.


La seconde est de leur donner la paix, *inqua omne bonum includitur*, dit S. Augustin. Car outre

8 DE LA SOUVERAINETE' DV ROY,
qu'elle est la source de tous les biens qui
rendent les hommes heureux , elle est
encore la mere des loix , la nourrice des
bonnes mœurs , & le seul obiet de la
Iustice. Ce qui porta les anciens à les reuerer
toutes deux dans vn mesme Temple , sur vn
mesme autel , & avec mesmes ceremonies,
comme s'ils l'eussent appris de ces paroles sa-
crées , *Iustitia & pax osculatae sunt*. C'est la fin où
les bons Roys doiuent rapporter tous leurs
conseils: c'est le principal but qu'ils se doi-
uent proposer en toutes leurs actions ; à l'e-
xemple de Dieu mesme, lors qu'il dit , *cogito co-
gitationes pacis , & non afflictionis*. D'où vient que
Dauid voulant instruire son fils , comme il se
deuoit comporter pour acquerir la bien-vueil-
lance de son peuple, ne luy recommande autre
chose que de rechercher la paix , *Inquire pacem,
& persequere eam* : ayant mesme voulu qu'il fust
appelé pour ce sujet, Salomon, c'est à dire Roy
de paix; comme estant le plus glorieux tiltre
que l'on puisse donner aux Roys, & qui les fait
le plus cherir & reuerer des hommes.

Que

Que c'est que la Souveraineté, & que sa premiere marque est de ne dependre que de Dieu seul.

CHAPITRE II.

 PRES auoir monsté en termes generaux, que c'est que la Royauté, quels sont ses dévoirs, & le but qu'elle se doit proposer en tous ses desseins.

La suite du discours m'oblige de traiter maintenant de la Souveraineté. Car bien que de sa nature elle soit à la Royauté ce que la lumiere est au Soleil, & sa compagne inseparable ; Toutesfois depuis que la fortune s'est meslée des affaires humaines, elle a par ses continuelles reuolutions tellement peruertie l'ordre des grandeurs & des puissances de la terre, qu'il est maintenant bien difficile de cognoistre qui sont celles que l'on peut dire proprement souveraines : Quant à moy, j'estime qu'on ne doit attribuer le nom & la qualité d'une Souveraineté parfaite & accomplie, qu'à celles qui ne dependent que de Dieu seul, & qui ne sont subjectes qu'à ses loix.

C'est par cette marque que l'on doit distinguer les puissances absolument souverai-

B

nes d'auec celles dont le pouuoir est limité : Et bien que toutes les seigneuries qui donnent del'autorité sur les hommes, tirēt leur origine d'un mesme principe : ainsi que dit ce grand Apostre, *Omnis potestas à Deo est* : Neantmoins quand elles sont dependantes & subiettes ad'autres puissances superieures, comme sont les feudataires, celles qui doiuent tribut, ou qui sont sous la protection d'un autre, l'on ne peut pas dire qu'elles soient pleinement souueraines.

C'est pourquoy l'on tient que les Roys de Naples, de Sicile, d'Aragon, de Pologne, de Sardaigne, de Corse, des Canaries, de Hierusalem, & d'Angleterre mesme, n'ont iamais esté absolument souuerains, pource qu'ils releuoient par hommage lige de l'Eglise Romaine, & luy payoiēt vn certain cens annuel : Car le vasselage, specialemēt quand il est lige, fait cesser la souueraineté, qui ne peut aucunement subsister avec les seruices, les droicts, & les hōneurs, qu'on est tenu de faire aux Seigneurs de qui on releue, d'autant que tous ces deuoirs denotent vne subjection qui lie & qui oblige la personne. D'où vient que par les maximes pratiquées en telle matiere, l'on doit rendre toutes ces soumissions en personne, & non par Procureur : ce qui est bien esloigné de la qualiré d'un Souuerain.

Les Potentats d'Italie, & d'Allemagne, ne peuvent non plus estre mis au rang des Princes souverains, pource qu'ils sont Vassaux de l'Empire, que plusieurs d'entre eux sont comme du nombre des domestiques de l'Empereur, & prennent la qualité de Boutilliers, d'Escuyers & d'Eschansons, & que tous se qualifient Vicaires de l'Empire, qui sont des tiltres incompatibles avec la Souveraineté.

Plusieurs graues Autheurs adioustent encore, que si les Roys par le serment qu'ils font à leur sacre, s'obligent enuers leurs subiects en des choses qui derogent aux droicts de la Souveraineté; qu'on ne peut pas les tenir pour Souverains : & rapportent pour exemple le Roy de Dannemarch, qui en la solemnité de son couronnement, promet en pleine assemblée de ne faire mourir, ny confisquer aucun homme noble, & qu'il en laissera le iugement au Senat : Que tous les Gentils-hommes auront Iurisdiction & puissance de condamner à mort leurs vassaux, sans appel : Qu'il ne prendra point de part aux amendes, ny aux confiscations, & qu'il ne pourra contreuenir à toutes ces choses sans le consentement de son peuple : certes il y a grande apparence de soutenir que ce Roy ne soit pas entièrement Souverain, puis que par ce serment il remet à ses vassaux les principaux droicts de

12 DE LA SOUVERAINETE' DV ROY,
la Souueraineté. Dequoy l'on peut inferer
que nos Rois ne tenās leur sceptre que de dieu
seul, n'estans obligez de rendre aucune souf-
missiō à pas vne puissance de la terre, & jouis-
sans de tous les droicts que l'on attribue à la
Souueraineté parfaite & absoluë, qu'ils sont
pleinement Souuerains dans leur Royaume:
Et c'est pourquoy dans leurs lettres ils pren-
nent ce tiltre, Par la grace de Dieu, Roys de
France; sans que pas vn de leurs subiects, de
quelq; dignité qu'il soit, se le puisse attribuer,
qu'à peine de crime de leze Maieſté: comme
il arriua du temps de Charles VII. à vn Com-
te d'Armagnac, pour auoir esté si temeraire de
prendre cette qualité dans ses tiltres.

Il est bien vray que quelques-vns, vou-
lans flatter les Papes, ont mis en auant que
nos anciens Roys ont autrefois recogneu te-
nir leur royaume de l'Eglise de Rome, pource
que Clouis le premier Roy Chrestien, fit pre-
sent au Pape Hormisdas d'une Couronne
d'or, que luy & ses Successeurs appellerent
depuis *Regnum*; Que Charlemagne rendit ce
mesme honneur à l'Eglise, lors qu'il comman-
da qu'on luy payast tous les ans quatre besans
d'or: & que du temps de Gregoire VII. l'on
tolera qu'il se fit vne leuée d'un denier sur
chaque maison, au profit de l'Eglise Romaine,
qui s'appelloit le Denier saint Pierre.

Mais c'est se tromper lourdement, de vouloir induire de ces exemples, que nos Roys ayent autresfois soumis au S. Siege le temporel de leur Royaume: Car tout le monde sçait qu'ils ne donnerent ces presents à l'Eglise de Rome, & ne permirent que l'on fist ces leuées leurs sujets, que pour tesmoigner le respect & la deuotion qu'ils portoient à S. Pierre & à ses successeurs, & pour les assister en leurs necessitez: cōme ils ont tousiours fait heureusement toutes les fois qu'ils en ont esté requis. Aussi les saincts Peres ne l'ont iamais autrement entendu: comme le Pape Innocent III. le témoigne en termes exprés, au ch. *Per Venerabilem Extra. Qui filij sint legitimi*: où parlant du Roy de France, il confesse ingenuement qu'il ne releue de personne pour ce qui est du temporel: *Insuper, dit-il, cum Rex superiorem in temporalibus minime recognoscat, sine iuris alterius latione, in eose Iurisdictioni nostræ subijcere potuit.* Que si quelques vns d'eux ont voulu passer plus outre: Ou leurs Successeurs ont aussi-tost reuoké leurs decrets, comme fit Clement V. par l'extravagante, *Mernit. Extra. de priuileg.* celuy que le Pape Boniface VIII. publia contre le Roy Philippe le Bel, par lequel il assujettissoit le temporel de la France au S. Siege: Où en même temps les plus grâdes lumieres de l'Eglise ont crié contre telles entreprises: & entre les au-

14 DE LA SOUVERAINETE' DV ROY,

& entre les autres S. Bernard, lors qu'àu liu. ii. de la consideration, chap. 6. qu'il dedie au Pape Eugene, il luy parle en cette sorte, *habent hic infima, & terrena iudices suos, reges & principes terra: Quid fines alios inauditus?* & au mesme liure: *Lex Domini est in Euangelio, reges gentium dominantur eorum, vos autem non sic:* & peu apres, *fama Apostolica hæc est: ministratio indicitur, interdicitur dominatio:* c'est à dire, sur le temporel des Roys.

Telle a esté l'opinion de la Primitiue Eglise, d'où vient que Tertulian faisant la description de l'honneur que les Chrestiens rendoient aux Empereurs, confesse en son Apologie chap. 33. que pour la Seigneurie temporelle, ils releuent immediatement de Dieu seul, *temperans Maiestatem Cesaris infra Deum, magis illum commendo Deo, cui soli subijcio,* & au ch. 30. il dit la mesme chose, *sentiunt Deum esse solum, in cuius solius potestate sunt, à quo sunt secundi, post quem primi, ante omnes, & super omnes Deos:* Aussi le Pape Anastase dans Burchard les appelle Lieutenans de Dieu sur la terre, *quos Deus praesidere iussit in terris.* Et S. Hierosme expliquant ce passage du Prophete Royal, *Tibi soli peccavi,* dict que ce grand Roy vsa de ces termes, *quia supra Regem solus Deus.* Nos Annales nous tesmoignent que la France a tousiours eu ce mesme sentiment, quand elles nous recitent ce qui s'est passé sur ce subiect du temps de

Charles le Chauue, de Philippe Auguste, de Philippe le Bel, de Charles VI. & de Louys XII. où l'on dit que nos Ancestres se sont genereusement opposez, lors que l'on s'est efforcé d'assujettir en quelque sorte la Souueraineté temporelle de cette Couronne, la plus ancienne, & la plus illustre de la Chrestienté, pour la faire dependre d'autre puissance que de Dieu seul.

De l'erreur de ceux qui disent que la France doit dependre de l'Empire.

CHAPITRE III.



Je ne puis passer sous silence l'erreur de la plupart des Docteurs Allemans, qui ont osé mettre en auant que la France dependoit de l'Empire; s'estans fondez sur l'opinion de Bartole & d'Alciar, qui ont esté si temeraires de dire dans leurs escrits sur la loy *Hostes*, ff. de *capitiis*, qu'il falloit tenir pour Heretiques tous ceux qui soustien-droient le contraire. Le premier fut induit à publier ceste faulseté, pour auoir esté an-nobly par l'Empereur Charles IV. Et le se-cond se porta à cette flatterie, pour auoir

B. iiii.

16 DE LA SOUVERAINETE' DV RØY,
receu quelque augmentation de ses gages;
oubliant, par vne extrême ingratitude, les
bien-faits qu'il auoit receus de la France. Mais
leurs raisons ont esté trouuées si foibles, qu'ils
en ont perdu beaucoup de leur reputation,
& que leur proposition s'est cōuertie en risée.

Car premierement ils se fondent sur ce que
l'Empereur Iustinian s'est qualifié Seigneur
de tout le monde, en la loy *Bene à Zenone, C. de quadr. præs.* & qu'en la loy *2. §. penult. C. de ver. iure enucl.* il se dit Souuerain de l'Asie, de l'Europe & de l'Afrique, s'estant mesme fait peindre, tenant en sa main gauche, *πῶλον, id est, Orbem*, comme le remarque Procope, *lib. 1. de adific. Iustin.* Ils appuyent encore leur dire sur l'autorité du Iurisconsulte *Macianus*, qui en la loy *deprecatio, ff. ad leg. Rhod. de iactu*, rapporte vn escrit de l'Empereur Antonin, où il s'appelle luy-mesme *Κόσμος κύριος*: c'est à dire, Seigneur du monde. Mais qui ne sçait que cette enonciation est entierement fausse, & qu'elle se démēt elle-mesme en plusieurs autres lieux, comme en la loy *postliminium, ff. de captiuis*, & en la loy *Cunctos, C. de summa Trin.* & en la loy *Mercatores, C. de commerc. & mercator.* où les Empereurs recognoissent qu'il y auoit en la terre plusieurs Roys, dont les vns estoient amis de l'Empire, les autres ses confederez, & les autres ses ennemis: dont il resulte que c'estoit vne pure
vanité

vanité de mettre en auant que toute la terre fut soubmise à leur obeyssance : d'autant que personne n'ignore que du temps d'Auguste, l'Empire des Romains auoit pour bornes du costé de l'Orient le fleuve de l'Euphrate : du Midy, les Cataractes du Nil, & le Mont Atlas : de l'Orient, l'Océan : & du Septentrion, le Rhin & le Danube : & qu'il s'en falloit presque les vingt parts de la terre, que tout ne dependist de leur Seigneurie. Aussi s'est on mocqué de ce qu'ils se firent nommer, *Mundi Domini, & lex maris*, & quelques vns d'entre eux, *Domini Dominorum, & gloriosissimi gloriosissimorum, & potentissimi potentissimorum*.

Et bien qu'autrefois les Romains eussent par la force de leurs armes reduit sous leur puissance vne bonne partie des Gaules : Neantmoins il est aussi veritable, qu'estans fauorablement secouruës par les François, elles recouurerent leur ancienne liberté, par les mesmes voyes qu'elles l'auoient perduë : A l'exemple de celuy qui par l'inondation des eaus, ou par quelque autre rauage du Ciel, a perdu la iouyssance de sa terre, s'entre en sa premiere possession, si tost que les eaus sont retirées, & que l'empeschement de sa iouyssance est osté, bien qu'il eust duré plusieurs années.

Mais ne sont-ils pas encore plus plaisans,

C

18 DE LA SOUVERAINETE' DV ROY,
lors qu'ils fondent leur opinion sur ces deux
textes de l'Escripture sainte; l'un qui fait
mention de *edicto quod exiit à Cesare Augusto,*
ut describeretur vniuersus Orbis; & l'autre où le
Fils de Dieu commande de rendre à Cesar
ce qui appartient à Cesar; & à Dieu, ce qui
appartient à Dieu. Inferant de là que Iesus-
Christ auoit approuué cette souueraineté
de l'Empereur sur toute la terre: & qu'il n'a-
uoit recognu que deux seules puissances :
l'une au Ciel, qui est celle de Dieu; & l'autre
en la terre, qui est celle de l'Empereur.

Mais c'est abuser trop licencieusement de
ces paroles sacrées, en leur donnant vne in-
terpretation du tout esloignée du sens de
l'Auteur. Car quant au premier, l'Euan-
geliste ne veut que raconter nuëment par
forme d'histoire, ce qui se passoit en la Ju-
dée sur l'exécution de l'Edit de l'Empereur
Auguste, lors de la naissance du Fils de
Dieu, sans autre dessein que de continuer
sa narration.

L'autre est semblable, pource que Iesus-
Christ estant'enquis, s'il falloit payer le tri-
but à Cesar, il demanda à quel coin estoit
marquée la monnoye qu'on luy presentoit :
& puis ayant sceu que l'Image de Cesar y
estoit grauée, il respondit, qu'il falloit ren-
dre à Cesar, ce qui appartenoit à Cesar.

Et peut-on mettre en auant rien de plus absurd, que d'inferer de là, qu'il ait voulu dire, que tout le monde deuoit recognoistre l'Empereur, & luy payer tribut? car ces mots de *Orbis*, & de *Cesar*, en ces passages, s'entendent seulement de ce qui estoit lors sous la domination de l'Empereur Romain, qui s'appelloit *Cesar*: C'est le mesme sens qu'on donne à la Constitution de l'Empereur Antonin: par laquelle il ordonna, *ut quotquot in Orbe Romano essent, ciues Romani efficerentur*: c'est à dire, de ceux qui estoient en l'obeyssance de l'Empire Romain, & non des Parthes, des Perses, & de tous les autres peuples qui ne recognerent iamais leur Seigneurie.

Dauantage, il y a long-temps que cét empire Romain a resseny, comme les autres Estats, la rigueur du temps, & qu'il est entierement aboly, suiuant la Prophetie de Daniel, lors qu'au Chapitre II. il prëdit la fin de ces quatre redoutables Monarchies des Assiriens, des Perses, des Grecs, & des Romains.

Et bien que lors de l'establissement de l'empire d'Allemagne, on feignist vne translation de celuy de Constantinople, pour en induire vne continuation, ainsi que le veut dire le Chap. *Venerabilem ex. de elect.*

Neantmoins, comme j'ay dit, ce ne fut qu'une fiction, veu quel'Empire de Constantinople, qui estoit lors entre les mains d'Irene, tres-sage Princeſſe, dura long-temps depuis. Ce qui fait croire que ce fut vne institution nouuelle que le Pape fit, pour gratifier Charlemagne, en luy donnant vn tiltre d'Empereur, ſans Empire: Car il ne fut rien adiousté à ce qu'il tenoit, comme Roy de France; & la pluspart de l'Empire d'à present, n'est composé que d'un partage d'un Fils de France; où meſme les anciens Emperours Romains n'eurent iamais aucune puissance: Il est à croire que le Pape prefera Charlemagne à tous les Princes de l'Europe, pource qu'il iouysſoit alors de la Lombardie; & qu'il pouuoit plus puissamment empescher les Emperours Grecs de passer en Italie pour troubler leur repos, & se rendre abſolus dans la Ville de Rome.

Auſſi l'on ne void point par les hystoires, que ny Charlemagne, ny pas vn de ſes ſucceſſeurs Roys de France, & Emperours d'Allemagne, ayent fait cognoiſtre par la moindre action, que leur volonté fut que la France dependist de l'empire. Au contraire, nous liſons qu'après que ce Prince eut conquis la grande Germanie, il l'appella France Orientale, pour monſtrer que ſon inten-

tion estoit de la comprendre sous la Couronne de France, tant s'en faut qu'il pensast d'y nir la France à la Germanie, & l'assujettir à vne autre Seigneurie: et il seroit absurd d'en iuger autrement, veu qu'il estoit parvenu à l'empire par la valeur des François.

Et d'ailleurs il n'y a personne qui ne voye, que l'empire d'Allemagne n'est qu'une foible image du Romain, car proprement il n'est plus qu'une Aristocratie, dont l'Empereur est le Chef, & qui est esleu par ceux-mesmes qui le peuuent desmettre: comme ils le pratiquerent autresfois enuers Adolphe, Ouancelot, & quelques autres Empereurs; Dont il resulte, qu'il seroit sans apparence, que nos Roys, qui donnent la qualité de Princes aux autres, fussent en quelque sorte dependans de celui que les Princes peuuent desfaire.

Ce que Charles le Sage voulut faire paroistre à l'Empereur Charles 4. son Oncle maternel, lors qu'il vint en France pour le visiter. Car il commanda bien qu'on luy fist des entrées magnifiques par toutes les Villes, mais que ce fust sans luy porter le poisse, sans sonner les cloches. Les Officiers qui alloient pour le recevoir, luy disoient qu'il fust le tres-bien venu dans la Ville du Roy, & ceux de Paris luy offrans leurs moyens & leur ser-

22 DE LA SOUVERAINETE' DV ROY,
uice, adjousterent: Car le Roy nous a com-
mandé d'ainſi le faire: ils yſoient de ſes com-
plimens, pour monſtrer à l'Empereur qu'il
n'auoit aucune autorité, ny ſuperiorité en
ce Royaume; & dequoy il ne s'offenſa nul-
lement.

Auſſi nos Roys ne les ont iamais recon-
nus, ſi ce n'eſt pour l'ordre de la dignité, &
pour la preſeance aux ceremonies publi-
ques: ce qu'on fit entendre à l'Empereur
Sigismond, lors qu'eſtant en France il vou-
lut eriger en Duché le Conté de Sauoye:
Car les Officiers du Roy ſ'y oppoſerent, &
il fut contraint de ſortir hors le Royaume,
pour vſer de ſon autorité Souueraine en
cét acte ſolemnel.


C'eſt pourquoy Philippe le Bel erigeant
le Parlement de Paris, fit deſenſes tres-ex-
preſſes, qu'on ne donnaſt aucune force aux
loix Romaines, ny aux conſtitutions des
Empereurs: permettant bien de ſ'en ſeruir,
non comme de loix, mais comme de raiſons
eſcrites: Et pour ce ſujet il commanda aux
Reſcteurs de l'Vniuerſité de Paris, de ne plus
ſouffrir que le droit Romain y fuſt enſeigné
publiquement.

En quoy il imita l'exemple d'Alaric Roy
des Gots, qui defendit, ſur peine de la vie,
d'oppoſer le Droit Romain à ſes Ordonnan-

ces. Les Roys d'Espagne, Estienne, & Alphonse X. firent le semblable, afin d'oster l'impression que quelques Officiers de l'Empereur faisoient dans les esprits de leurs sujets, que l'Empereur dependoit de l'Empire, comme Oldrade le remarque en l'un de ses Conseils. Tenons donc pour chose tres-constante, que nos Roys ne recognoissent aucun Superieur que la Majesté Divine.

*Des loix fondamentales de la Couronne Souveraine
de France.*

CHAPITRE IV.

ES anciens Legislateurs auoient cette loüable coustume, quand ils establissoient quelques nouuelles Republiques, de proposer en mesme temps au peuple de certaines loix fondamentales, qu'ils iugeoient estre necessaires pour en affermir la durée, & de leur faire entendre que leur estat ne periroit iamais, tandis qu'ils seroient soigneux de les obseruer exactement: & pour les exciter à les recevoir avec plus de respect & de submission, ils les faisoient publier en pleine assemblee de toute la ville, en presence du Senat, des Prestres, & des Au-

C iij

24 DE LA SOUVERAINETE' DV ROY,
gures, qui les consacroient avec beaucoup
de religieuses ceremonies, que Denis d'Hali-
carnasse décrit particulièrement au liure 10.
de ses Antiquitez Romaines, quand il parle
des loix des Decenvirs.

Il semble que nos Ancestres ayent voulu
suivre leur exemple, lors que dès la naissan-
ce de cette Monarchie ils publièrent la loy
Salique, sur laquelle, comme sur vn solide
& assésuré fondement, ils affermirent l'e-
ternité de leur Empire: elle fut conceüe en
ces termes: *de terra verò Salica, in mulierem nulla
portio hæreditatis transit, sed hoc virilis sexus acquirit,
hoc est, filij in ipsa hæreditate succedant: & ce nom luy*
fut donné par les François Saliens, qui en-
trèrent les premiers dans les Gaules, pour en
chasser les Romains: ou bien elle fut ainsi
appellée de ces mots Allemands, *Sal & Sala:*
c'est à dire, *Anla;* comme le remarque Auen-
tin, quand il dit, que *lex Salica, terra Salica, Sa-
lica prædia, Salici clientes,* sont nommez de la
sorte, pource que *ad aulam regiam spectant:* D'où
vient que maintenant en Allemagne, ils
nomment encore, *Salbuch, hoc est Salicum codi-
cem,* le registre des terres du Domaine & de
leurs reuenus: De façon que la terre qu'ils
appelloient Salique, estoit proprement cel-
le qu'ils auoient conquise sur leurs enne-
mis, & qui estoit affectée pour l'entrete-
nement

nement de la Cour des Roys. Or des termes & du sens de ceste loy, l'on tire trois maximes qui sont comme autant de fortes colonnes, sur quicette Monarchie est fermement appuyée. La premiere que ce Royaume se confere par droit successif: La seconde que les femmes sont incapables de paruenir à la Couronne: Et la derniere, que les masles succedent indefiniment, & en quelque degré de parenté qu'ils soient éloignez.

Quant à la premiere, bien qu'Aristote la combatte au 2. de ses Polit. lors que faisant la comparaison de l'Estat de Sparte, où le Royaume estoit hereditaire avec celui de Carthage, où il estoit electif, il prefere celui-cy & blâme l'autre par l'apprehension qu'il se donne, que d'un bon Roy, il ne vienne à naistre un mauvais fils: ce qui peut souuent arriuer dans les familles Royales, où les ieunes Princes sont eleuez dans la licence, & dans la liberté; Et que plusieurs voulans appuyer l'opinion de ce grand Politique, rapportent les anciennes coutumes des peuples de la Germanie, qui estoient pour leurs Rois les plus vaillans de toute la noblesse: comme le pratiquent encore à present les Polonois, & la pluspart des Royaumes voisins: & que pour confirmer leur dire ils se seruent de l'exemple des Veneurs, qui come dit Plutarque, desirans auoir un chien ge-

26 DE LA SOUVERAINETE' DV ROY,
nerveux, non tã quod ex generoso cane natũ est, quãtũ ca-
nem ipsum generosum, quarunt: & de celle de l'Em-
pereur Galba, qui s'esleuoit au dessus de ces
predecesseurs, que de ce qu'il auoit choisi vn
successeur d'entre les plus sages & les plus ca-
pables citoyens de la republique, & non pas
dãs sa maison cõme auoit fait l'Emp. Auguste.

Toutesfois l'experience nous a fait voir,
qu'il est beaucoup plus assure de receuoir
vn Roy de la main de Dieu, que de celle des
hommes: c'est à dire, par succession, plustost
que par election; à cause des grands desor-
dres qui arriuent, tandis que l'on est occupé
à la recherche d'un Prince agreable à tout le
peuple: Car qui peut ignorer que durant cõt
interregne, la porte ne soit ouuerte à toutes
sortes d'injustices & de violences? combien
commet-on de meurtres, de vengeance, &
d'assassinats, comme il se void à Rome du-
rant la creation des Papes: les loix estans
alors sans vigueur & sans force, abandonnées à
la licence des plus scelerats. Ce que cete loia-
ble coustume de Pologne nous resmoigne,
où durant le temps de l'eslection du Roy
l'on punit doublement les crimes. Mais
qui ne sçait les exactions, ou plustost les ex-
tortions, dont les Princes qui sont esleus sur-
chargent leurs subiets, se voyans dans l'im-
puissance de pouuoir transmettre leurs sce-

ptres à leur posterité. Et d'ailleurs que ne font les Grands qui aspirent à cette dignité? est-il rien de si sacré, ny de si saint, qu'ils ne violent, pour paruenir où ils desirent?

Ce Royaume s'est tousiours preserué de tomber dans tous ces malheurs, par le moyé de ce droict successif, qui rend nos Roys comme immortels en France, & qui empesche que la Iustice, & l'autorité Royale, n'y reçoient iamais aucune eclipse.

Et ie diray en passant que ceux-là sont ridicules, qui ont escrit; que ce Royaume sembloit estre electif: pourcequ'au sacre des Roys, les Euesques de Laon & de Beauuais ont accoustumé de les esleuer de leurs chaires, & de demander au peuple, s'il les accepte pour leurs Roys; & qu'apres auoir receu le consentement de l'assistance, l'Euesque de Rheims reçoit d'eux le serment accoustumé. Car l'on obserue cete ceremonie nō pas pour faire eslection du Prince, mais pour presenter au peuple celuy que Dieu luy donne pour son Roy, afin qu'il luy face l'honneur & l'hommage qu'il est obligé de luy rendre: Et pour remarquer aussi la difference qu'il y a entre vn Roy legitime, & vn tyran: celui-cy s'introduisant dans le Throne Royal par force & par violence, & celui-là avec l'aplaudissement & le gré de tous ses subiects.

Il ne puis estre aussi de l'aduis de ceux qui soustiennent que les aînez en matiere de Royaume, ne doiuent point estre preferez aux puisnez, & que l'on doit laisser au Pere la liberte d'élire celuy de ses enfans qu'il iugera le plus sage, le plus vertueux, & le plus capable de gouverner son peuple. Car bien que pour confirmer leur opinion, ils rapportent les exemples de Dauid, qui prefera Salomon à tous ses autres enfans, bien qu'ils fussent beaucoup plus aagez : De Roboam qui establit dans son trosne Abias le cadet de sa maison, pource que, *Sapientior erat, & potentior super alios filios suos*, cōme il est dit au liu. 2. du Paralip. chap. 11. Et de celle de Iudas, que son pere choisit, pour commander aux armées à cause de sa valeur & de son experience au faict des armes, bien qu'il fût le plus ieune de tous ses freres, comme il se voit dans le liure 2. des Maccabees.

Toutesfois l'on respond que *jus & ordo nascendi*, que la nature nous enseigne, veut que l'aîné soit tousiours preferé à ses plus ieunes freres, en la succession de la Couronne.

C'est pourquoy nous voyons en la Genese Chap. 49. que Iacob donne ses particuliers Eloges à Ruben son fils aîné. *Ruben primogenitus meus, prior in donis, major in Imperio.*

pour monſtrer que le commandement doit toujours demeurer à l'aîné, ſi ce n'eſt que par ſes vices & ſes deportemens il ſe ſoit rendu indigne de toutes les prerogatiues que ce droit d'aîneſſe luy donne : Ou que Dieu par vne expreſſe reuelation l'ait autrement ordonné, comme il eſt arriué en tous ceux que nous auons rapportez, ainſi qu'il eſt plus particulièrement exprimé au liure 1. Chapitre 5. du Paralipomene.

Cela ſ'eſt toujours obſerué comme vne loy generale, non ſeulement parmy le peuple de Dieu, mais encore par toutes les nations de la terre. Ainſi nous liſons que les Atheniens, les Macedoniens, les Meſſeniens, les Epirotes, les Spartains, les Egyptiens, donnoient toujours le commandement aux aînez de la maiſon Royale. Les François, les Eſpagnols, les Anglois, les Eſcoſſois, les Cymbres, les Gots, & les Vandales, dit Procope. au liure de la guerre Perſique, gardoient cét ancien vſage en la ſucceſſion du Royaume. Et l'on a toujours remarqué que toutes les fois que l'on a voulu violer cét ordre eſtably par la nature, il en eſt en meſme temps arriué des

30 DE LA SOUVERAINETE' DV ROY,
parricides , des fraticides , & de sanglantes
guerres ciuiles. Dequoy les Histoires ancien-
nes nous rapportent les funestes exemples
de Numitor & d'Amulius , d'Hircanus , &
d'Aristobolus , d'Atreus & de Thiestes , &
particulierement nos Annales nous mettent
deuant les yeux les morts tragiques de Chil-
debert I. de Childeric II. de Chilperic II. &
de plusieurs autres , qui s'estans efforcez de
rauir le sceptre à leurs aînez , ou aux legiti-
mes Successeurs de la Couronne, ne iouïrent
pas long-temps de leurs injustes vsurpations,
& perirent miserablement.

C'est pourquoy plusieurs tiennent que
Hugues Capet, pour empescher que l'on ne
tombast plus dâs ses mal-heurs, ordonna par
vne loy expresse , que les aînez succède-
roient tousiours à la Couronne , à l'exclusion
de tous leurs autres freres.

Aussi nous voyons que le Roy Robert son
fils , voulant mettre en pratique cette Or-
donnance, fit couronner de son viuant Hen-
ry son fils aîné , bien que sa femme Con-
stance s'y opposast formellement, qui vouloit
qu'on luy preferast Robert le plus ieune, qu'il
le aimoit plus tendrement que tous ses au-
tres enfans. Et depuis en suite de cette loy
l'on a tenu pour vne maxime inuiolable , que
les Rois mesmes ne peuuent des-heriter leurs

aînez, ny ceux qui leur doiuent succeder: La Couronne leur estant acquise dès leur naissance par droict d'hoirie, comme il fut décidé pour le Daulphin Charles, quand son Pere le Roy Charles V I. le priua de la succession du Royaume, pour en inuestir Henry Roy d'Angleterre.

Quant à la seconde maxime que l'on a tirée de cette loy Salique, qui exclud les femmes du droict de succeder au Royaume: elle est conforme à la loy de nature, laquelle ayant créé la femme, imparfaite, foible & debile, tant du corps que de l'esprit, l'a soubmise sous la puissance de l'homme, qu'elle a pour ce subiect enrichy d'un iugement plus fort, d'un courage plus asseuré, & d'une force de corps plus robuste. Aussi nous voyons que la loy diuine veut que la femme recognoisse & rende obeïssance à son mary, comme à son chef & à son Roy: Et tant s'en faut qu'elle luy donne aucune authorité dans les Empires, & dans les Royaumes; au contraire l'on voit dans Isaïe chap. 3. que Dieu menace ses ennemis de leur donner des femmes pour maistresses, comme vne insupportable malediction.

C'est pourquoy toute l'antiquité a grandement blasmé les Lacedemoniens de ce

32 DE LA SOUVERAINETE' DV ROY;
qu'ils se laissoient commander par leurs femmes : bien que l'une d'entre-elles , voulant répondre à ce reproche, dit qu'il estoit raisonnable qu'elles commandassent aux hommes , puis qu'il n'y auoit qu'elles qui engendroient des hommes. Je sçay qu'Aristotele veut aucunement excuser au liure de ses Politiques, quand il dit que les hommes vaillants & bellicieux sont d'ordinaire adonnez aux femmes; à cause que le sang qui les eschauffe à la guerre , est le mesme qui les excite à l'amour ; Et que pour ce subiect ce mesme peuple adoroit vne Venus armée pour la Deesse tutelaire de leur ville.

Mais en fin ce grand Politique est contraint d'aduouier que c'estoit vn notable défaut dans cet Estat, bien qu'il fust d'ailleurs tres-bien policé; leur opposant l'exemple de nos anciens Celtes , qui bien qu'ils fussent nez à la guerre, & qu'ils ne respirassent que l'exercice des armes, neantmoins tant s'en faut qu'ils se soubmissent à leurs femmes: au contraire, ils auoient sur elles vne puissance absoluë de la vie & de la mort , comme Cesar mesme le remarque au liure 6. de la guerre des Gaules.;

Le vray motif qui porta nos ancestres à faire ceste Loy Salique, ce fust qu'apres auoir conquis toutes les Gaules, ils iugerent prudemment

demment; que pour se conſervier en la poſſeſſion d'un ſi riche païs , ils auroient beſoin de Roys & de Princes guerriers & bel-liqueux ; c'eſt pourquoy ils exclurent les femmes de la ſucceſſion de la Couronne, comme n'eſtans pas propres au maniement des armes : d'où vient meſme que les conſtitutions feudales les declarent incapables de la ſucceſſion des fiefs, d'autant qu'ils ont eſté eſtablis pour la recompenſe des hommes , qui ſont ſervie à la guerre ; à quoy elles ne ſont point employées , *famina à feudi ſucceſſione remouentur : quia in comment. ad lib. feud. neque ſaidam leuare , neque pugnam facere poſſunt , id eſt, quia bello gerendo idonea non ſunt*, dit vn ancien interprete au rapport de Cujas.

Et cōbien que pluſieurs reuoquent en doute cēt article de la loy Salique, pource qu'il eſt extraict du tiltre de *Allodys*, où il n'eſt point parlé ny de Royaume , ny de fief ; neantmoins c'eſt vne objection captieuſe, & perſonne n'ignore qu'anciennement l'on faiſoit touſiours vn meſme iugement de la ſucceſſion des Royaumes , & des terres al-
lodiales, qui ne releuoient que de Dieu & de l'eſpée. Ce que l'vſage a confirmé depuis l'origine de ceſte Monarchie, non ſeulement pour le regard des filles , mais encores pour les maſles deſcendus des filles, qui ont eſté

34 DE LA SOUVERAINETE' DV ROY,
 tousiours exclus de la succession de ceste no-
 ble Couronne, bien qu'ils fussent les plus pro-
 ches parens du dernier Roy : Ce qui s'est prat-
 iqué sur l'exemple des fiefs, à qui les enfans
 des filles ne peuuent succeder, comme il se lit
*lib. 2. feud. tit. 11. ad filias seu nepotes, vel proneptes,
 vel ex filia nepotes, seu pronepotes, successio feudi non
 pertinet, proles enim femini sexus, vel ex faminino sexu
 descendens adhuiusmodi successionem aspirare non potest;*
 C'est ce que le Docteur Balde veut dire sur la
*loy consulari ff. de senatoribus si filia Regis Francorū non
 succedit in regno, ex rationabili consuetudine Franco-
 rum, filius eius, scilicet dominus Rex Anglia inclite
 recordationis, in regno Francorum nullum ius pretende-
 re potuit: quia in causato non potest esse plus virtutis,
 quàm procedit ab influenti potentia causæ.*

Et l'on ne void point que ce droict ait va-
 rié, ny en la premiere, ny en la seconde li-
 gnée de nos Roys, & moins encores en la
 troisieme; car bien que depuis Hugues
 Capet, la succession de la Couronne soit
 escheuë par sept fois en collaterale; neant-
 moins les masles, venus de masle en masle,
 ont tousiours esté preferez aux autres pa-
 rens plus proches, à cause qu'ils estoient
 ou femelles, ou venus de femelles: d'au-
 tant que, comme j'ay dit, la Couronne de
 France est vn fief masculin, & non pas fe-
 minin.

Et de faict l'on garde ce droict si exactement, que les terres que l'on donne aux filles de nos Roys, ou en dot, ou pour leur entretenement, ne sont possédées par elles en tiltre d'horrie ou de legitime, mais seulement en assignat : & dont encore la iouissance ne doit estre continuée outre la personne, & la vie des enfans qui ont esté procréés de leur mariage : comme du Tillet le monstre par plusieurs exemples au tiltre des filles de France.


Pour ce qui est de la derniere maxime que l'on tire de cette loy Salique, qui appelle les masles indefiniment à la succession du Royaume : elle semble auoir esté pratiquée en tous les autres Estats. Car bien que regulierement la consanguinité finisse au dixiesme, ou au septiesme degré ; comme dit le Jurisconsulte Modestinus *in l. non facile ff. de grad. & affi.* d'autant qu'apres vne suite de tant de generations, la nature ne cognoist plus de parenté : neantmoins cela ne s'est iamais gardé en la succession de ce Royaume, *que etiam si in millesimo gradu sit, iure gentilitatis defertur, quod in infinitum extenditur*, comme dit le Docteur Balde.

Ce qui s'est obserué de la sorte de toute antiquité, car nous lisons que ceux de Sparte ne receuoient point d'autres Roys que de la

lignée d'Hercules, qu'ils nommoient Heraclides : Et que les Epirotes n'admettoient pour Roys, que ceux qui descendoient de Pyrrhus, & qu'ils appelloient Pyrrhonites; bien qu'ils fussent esloignez à l'infiny du premier tige. Et l'on peut rapporter sur ce subiect cét exemple notable que nous voyons dans Quinte Curse, lors qu'il raconte qu'Alexandre admira la modestie de deux ieunes Gentils-hommes, à qui Hephestion auoit présenté le Royaume de Sidon, pour recompense de ce qu'ils l'auoient receu courtoisement en leur maison, *qui, facta ipsis potestate regnandi, negauerunt quenquam patrio more in id fastigium recipi; nisi regia stirpe ortum Admiratus Hephestio, magnitudinem animi spernentis, quod alij per ignes ferrumque peterent: vos quidem macti virtute, inquit, estote, qui primi intellexistis, quanto maior esset regnum fastidire, quam accipere. Caterum date aliquem regia stirpis, qui meminerit à vobis acceptum habere se regnum.* Ce qui monstre que de tout temps l'on a tousiours porté ce respect au sang illustre des Roys, de preferer à tous autres en la succession du Royaume ceux qui ont l'honneur d'en descendre, pourueu qu'ils ayent iouy des droits, des rangs, des priuileges, & des autres prerogatiues, qui leur sont attribuées; & que par leurs actions, ils n'ayēt point derogé à la grandeur de leur noblesse.

*De la Majorité de nos Roys en l'aage de
quatorze ans.*

CHAPITRE V.

 E s anciens Romains ayans reconnu par experience , qu'il estoit tres-dangereux de mettre la conduite des affaires publiques entre les mains de la ieunesse , firent des loix particulieres qu'ils appellerent *Annales* , pour regler en quel aage l'on pourroit entrer dans les charges publiques , & prendre le gouvernement de l'Estat.

Ils en publierent vne entre les autres qui deffendoit expressement de demander le Consulat avant l'âge de quarante-trois ans ; comme nous l'apprenons de Ciceron, lors qu'il dit en la cinquiesme de ses *Philippiques* : *Quid Alexander Macedo , cum ab ineunte aetate res maximas gerere cepisset , nonne tertio & trigesimo anno mortem obiit ? quæ est ætas nostris legibus decem annis minor quam consularis.*

Toutesfois s'il se presentoit quelqu'un , qui par vn priuilege de la nature fust avant l'aage legitime enrichy de toutes les qualitez necessaires : *Et cui virtutis esset celerior cursus.*

E iij

38 DE LA SOUVERAINETE' DV ROY,
quàm etatis, dit le mesme Ciceron, ou bien
 qui fust descendu de quelque illustre famil-
 le, ils auoient accoustumé de l'exempter de
 la rigueur de ces loix, se persuadants qu'il
 auroit receu vne meilleure instruction qu'un
 autre de qualité moins releuée. Ce qu'ils
 pratiquerent à l'endroiect de Coruinus, de
 Scipion l'Africain, de Titus Flaminus, d'O-
 ctavius, qu'ils créèrent Consuls, bien qu'ils
 ne fussent qu'en leur adolescence. Et c'est
 ce que Tacite remarque, lors qu'il dit au li-
 ure 3. de ses Annales : *Neronem è liberis Ger-*
manici iam ingressum iuventam, Tyberius cōmendauit
Patribus; utque à munere capefcenti viginti viratus sol-
ueretur, & quinquennio maturius quàm per leges
Quæsturam peteret, postulauit.

Le Roy Charles V. dit le Sage, porté de
 cette mesme consideration, fit ceste cele-
 bre ordonnance en l'année 1375. touchant
 la Majorité des Roys, par laquelle il les de-
 clare Majeurs, hors de tutelle, & capables
 de gouverner leur Royaume, si tost qu'ils
 auoient atteint l'aage de quatorze-ans.
 Ce qu'il fit prudemment, & avec iuste rai-
 son. Car l'on a souuent remarqué, que
 ces personnes sacrées, par vne faueur parti-
 culiere du Ciel, sont ordinairement enri-
 chies dès leur ieune aage de plusieurs ver-
 tus & belles qualitez, qui ne se rencon-

trient point aux autres de plus basse condition.

Nous lisons que Salomon n'auoit que vnze ans, lors qu'il donna cét admirable iugement entre ces deux femmes, dont parle l'Escripture sainte : Et Iosias n'auoit que huiët ans, quand il prit possession du Royaume de son pere, & eut le courage en cette tendre ieunesse de reſtablir la vraye religion, qui eſtoit preſque eſteinte parmy ſes ſubjects, & abolit entierement l'Idolatrie. Le grand Celta, dont les Celtes ont pris leur nom, n'auoit que neuf ans, lors qu'il prit en main le gouuernement de ſon Eſtat, & que par l'energie de ſes diſcours il tira de la Barbarie tous les anciens peuples des Gaules, comme Beroſe & Megasthenes le rapportent. Philippe, fils de Demetrius, ſe faiſoit admirer de tous ſes peuples par les ſages iugemens qu'il donnoit ſur toutes ſortes d'affaires, neſtant encore qu'en ſon adolescence, à ce que reſmoigne Polybe au liure 2. de ſon Hiſtoire.

Certes tout ainſi que Dieu, creant l'homme, s'eſt rendu plus admirable, & ſemble auoir apporté plus d'eſtude, plus de ſoin, & plus d'artifice en la ſtructure & compoſition de

l'œil, qu'en toutes les autres parties du corps; pource qu'il deuoit estre leur conducteur & leur guide: De mesme il enrichit plus particulièrement de ses graces & de ses faueurs les personnes sacrées des Rois; d'autant qu'il s'en veut seruir pour la conduite des autres hommes, & pour estre ses Lieutenans en terre.

D'où vient qu'Homere & Hesiodé appelloient les Roys *ἐκ δὲ θεῶν βασιλεῖς*, les disciples de Iupiter, & que Pindare mesme les comparoit à ces anciens Dieux, qui non seulement dès leur naissance donnoient des témoignages de leur diuinité, comme fit Hercule, qui estant encore au berceau, estouffoit les serpens, & remplissoit d'espouuente ses ennemis, mais encore qui paruenoient à la perfection par vn chemin beaucoup plus court, que les mortels, *ὡκαὶ δ' ἐπιγροῦσαν ὁδοὶ ἡδὴ θεῶν ἀράχους ὁδοὶ πὶ βαρχεῖται*, sur quoy ie composé autrefois ces vers.

*Et les Dieux croissent tost, ou pour le dire mieux
On ne peut iamais voir, autres que grands les Dieux,
Semblables à l'esclair messager du tonnerre
Qui vole en vn clin d'œil, des nuës iusques en terre,
Sa naissance & sa force il monstre en vn instant.*

Le Roy,

Le Roy Charles, incité par ses considerations, publia sa loy touchant la maiorité des Roys, si tost qu'ils seroient entrez dans la quatorziesme année de leur aage, croyant que quant bien le successeur de la Couronne seroit priué des qualitez necessaires pour commander & gouverner son Royaume, qu'il seroit tousiours assisté de son Conseil qui suppleroit à ses defauts, & qui agiroit avec d'autant plus d'autorité, que l'on executeroit au nom de la Maiesté Royale ses bonnes resolutions.

Mais le plus puissant motif qui porta ce sage Prince à publier cet Edict, ce fut pour preuenir les inconueniens & les miseres qu'on auoit veus arriuer auparauant par la conuoltise & l'ambition des Regens, qui furent autrefois si hardis que de prendre le tiltre de Roy, & de gouverner le Royaume en leur nom: ce qu'ils continuerent iusques au regne de Charles VI. qui leur defendit expressément de ne plus prendre ceste qualité, ayant veu par experience, durant son regne, que telles entreprises sur la Majesté Royale auoient causé mille calamitez en ce Royaume, & donné sujet à son peuple de dire avec ce Sage Roy: *Va terra, cui rex est puer.*

*Des Femmes de nos Roys, & de quels droictz elles
iouiſſent, meſme durant leur viduité.*

CHAPITRE VI.

B IEN que le Mariage introduiſe vne participation & vne communauté de toutes choſes entre les perſonnes mariées; neantmoins le commandement ſouuerain eſt tellement ſingulier, qu'il n'eſt communicable à perſonne. De là vient que aux lieux meſmes où la Gynæocratie eſt eſtablie, quand la Reyne vient à ſe marier, c'eſt le plus ſouuent à condition que ſon mary ne prendra point de part en la ſouueraineté du Royaume, comme il fut arreſté par le Contract de Mariage d'entre Ferdinand d'Aragon & Iſabelle de Caſtille: entre Marie d'Angleterre & Philippes de Caſtille, qu'on appelloit le mary de la Roynie: & entre Sigismond, Archiduc d'Autriche (qui depuis fut Empereur) & Marie de Hongrie, qu'on appelloit le Roy Marie: *Ea enim eſt conditio imperandi, vt non aliter ratio conſtet, quàm ſi vni reddatur*, dit Tacite au premier de ſes Annales. Ceſte meſme raiſon veut auſſi qu'aux Eſtats où les Monarchies ſont mafculines, que les

femmes des Roys s'abstiennent entierement du maniemment des affaires du Royaume, & qu'elles se meslent seulement de l'œconomie priuée & domestique de leur maison. Il seroit fort dangereux que les Femmes de ceste qualité eussent vne puissance égale à leurs marys, d'autant que leur naturel ambitieux ne les laisse iamais en repos qu'elles n'ayent vsurpé les aduantages du commandement souuerain, & reduit en fin leurs marys sous leur Empire. Dequoy nous lisons les exemples de Semiramis: & de ceste impie Iezabel, qui s'estant renduë par ses attraits maistresse de l'esprit de son mary, exerça dans sa Cour toutes les cruauitez & les tyrannies qui se peuuent imaginer.

L'Histoire Romaine dit le mesme de Livia, qui voulant commander à l'égal de son mary, arracha des mains du Senat, Virgulinia & Plancina, accusées de crimes capitaux. L'on n'en dit pas moins de Theodora, femme de Iustinian, qui pour auoir en public trop superbement menacé Narfes l'Eunuque, de l'enuoyer au Serrail, irrita tellement ce valeureux Capitaine, que pour se venger d'un si sanglant affront, il laissa perdre à son maistre les plus riches Prouinces de l'Empire. Mais qui ne sçait les troubles & les miseres que causerent autrefois dans ce Royaume.

44 DE LA SOUVERAINETE' DV ROY,
Fredegonde & Brunehaut , apres qu'elles se
furent emparées du Gouuernement de cet
Estat? & combien lit-on d'exemples de plu-
sieurs autres, qui pour auoir abusé de la fa-
cilité de leurs marys, ont attiré mille cala-
mittez dans les Estats où elles s'estoient attri-
buées trop de puissance?

Certes, la foiblesse de leur esprit ne leur
permet pas de demeurer dans la moderation,
lors qu'elles se voient élevées à ce haut de-
gré d'honneur. Elles se laissent incontinent
emporter à l'insolence & à la vanité qui leur
donne ceste presumption d'elles mesmes;
qu'elles estiment qu'on leur fait injure, si elles
ne commandent absolument : tescmoin ce
que dit vn jour l'Empereur Tibere à Agrip-
pine, *Si non dominaris, ô filiola; iniuriam te accepisse
existimas*, à ce que rapporte Suetone en la vie
de ce Prince.

La France est fort peu sôuuent tombée
dans de semblables malheurs: d'autant que
par les Loix du Royaume les Reynes ne doi-
uent point auoir de part au Gouuernement
de l'Estat, & n'ont aucune autorité dans le
public: si ce n'est que les Roys, apres auoir
recogneu leur prudence & leur sage conduit-
te, par vne faueur particuliere, ne leur don-
nent l'entrée dans leurs Conseils: comme le
pratiqua Charles V. enuers sa femme, en qui

il auoit vne telle creance qu'il la menoit ordinairement au Parlement, & luy donnoit seance aupres de luy. Philippes le Long rendit ce mesme honneur à Mahaut, sa belle mere: car il voulut qu'elle assistast au luge-ment de Robert, Comte d'Artois: & permit aussi à Marguerite sa fille, Comtesse de Flandres, d'estre presente à l'Arrest qui fut donné contre le Comte de Clermont. Et nous voyons dans nostre Histoire, que quand les Roys ont voulu entreprendre quelques longs voyages hors de la France, qu'ils ont laissé le plus souuent à leurs Femmes, ou à leurs Meres, la Regence & l'administration de leur Royaume, les faisans assister de quelques grands personages, pour leur seruir de conseil aux affaires d'importance; à l'imitation de cét ancien Osiris, qui desirant aller à la conqueste de l'Asie, donna le Gouvernement de l'Egypte à sa femme Isis, durant son absence, *adhibito in consilium Mercurio, atque in defensionem Hercule*, dit Diodore Sicule. Et l'on obserue encore à present (quand les Reynes ont donné tesmoignage de leur vertu & de leurs merites) de leur commettre la Regence & la Tutelle de leurs Enfans, iusques à ce que l'aîné ait atteint la quatorzième année de son aage. Dequoy nos Annales nous rapportent les exemples de la Roynne

46 DE LA SOUVERAINETE' DV ROY,
 Blanche, Mere de Saint Louys; de Blanche
 d'Eureux, vefue du Roy Philippes de Va-
 loys; d'Anne de France, fœur de Charles
 VIII. & encore de plusieurs autres. Mais il
 est neceffaire qu'elles ayent fur cela des Let-
 tres patentes, verifiées en la Cour: car la
 Tutelle de leurs Enfans ne leur appartient
 point, *iure proprio*, pour auoir esté ou Femme
 ou Mere de Roy. Elles ne laiffent pas toutes-
 fois (en confideration de l'honneur d'vne fi
 noble & fi haute alliance) de ioüyr de grands
 droicts & prerogatiues; iufques là, que plu-
 sieurs ont efcrit, qu'à l'exemple des Impera-
 trices Romaines elles estoient *soluta legibus*:
 ce que ie ne voudrois pas neantmoins foute-
 nir, si elles n'auoient vne Declaration ex-
 presse du Roy fur ce Priuilege; veu mefme
 que la Loy Romaine ordonne la mefme
 chose: *Princeps legibus solutus est; Augusta autem,*
licet legibus soluta non fit; Principes tamen eadem illi
tribunt privilegia quæ ipsi habent, dit Vlpian, in l.
 31. ff. de legib. dequoy l'on void des teſmoigna-
 ges en la loy *fiscus* & fin. ff. de iur. fisci, en la loy
quod Principi. & l. seq. ff. de leg. 2. D'où vient
 auffi que l'Empereur Theodose punit les
 habitans d'Antioche, pour auoir abbatu la
 ſtatue de Placidia ſa femme, du meſme ſup-
 plice que les coupables de crime de leze
 Majeſté au premier chef, comme le remar-

quent Theodoret & Sozomene.

Nos Roys n'ont pas esté moins curieux de releuer l'honneur de leurs femmes, par de semblables faueurs: car ils leur ont accordé presque les mesmes priuileges, que ceux dont ils iouïssent, comme de plaider par Procureur; d'auoir vn roole particulier pour leurs causes; de pouuoir retirer leur Domaine qu'elles auroient aliené; de recouurer leurs debtes & leurs finances, par les mesmes voyes, & par les mesmes contraintes; & en fin d'auoir pour leurs Officiers & domestiques les mesmes franchises, immunitéz & exemptions, dont iouïssent ceux du Roy: Ce qu'ils n'ont (comme i'ay dit) que par vne concession expresse du Prince, comme nous l'apprennent les anciennes Ordonnances, & particulièrement celles de François I. du 29. Septembre 1523. de Henry II. du dernier de Nouembre 1549. & du 3. Feurier, en la mesme année, & du Roy Charles IX. du 25. May 1566. Et bien qu'elles soient honorées de tous ces priuileges; neantmoins elles ont cela de moins que toutes les autres femmes; qu'elles n'ont point de communauté de biens avec les Roys leurs marys: d'autant que tout ce que les Roys acquierent tourne au profit de la Republique, qui est leur Espouse mystique, & la plus priui-

48 DE LA SOUVERAINETE' DV ROY,
legiéc: de façon qu'elles ne profitent rien de
leur Mariage, si ce n'est que les Roys, pour
tesmoignage de leur affection, leur facent
des presens de meubles, de deniers comptans,
ou de quelques acquests immeubles non en-
core incorporez au Domaine de la Couron-
ne. Leur Doüaire mesme, par l'Oïdonnance
de Blois, ne doit estre en terre, portant tiltre
de Duché ou Comté, que iusques à la valeur
de dix mille liures de rente; & encore à con-
dition qu'elles se contenteront de l'habita-
tion du Chasteau: & que les reuenus seront
receus par les Receueurs du Roy, comme
dit l'Art. 330. Et pour le surplus du Doüaire,
& autres conuentions matrimoniales, qu'ils
se prendront sur les Aydes, Tailles & equi-
ualens: en quoy l'on recognoist, que bien
qu'elles reçoient de grands honneurs de
leur Mariage; toutesfois elles n'ont de puis-
sance & d'autorité dans le public, qu'au-
tant que les Roys leur en donnent & leur
permettent.

Des

*Des Enfans & des Freres des Roys , & de leurs
droicts & prerogatives.*

CHAPITRE VII.



EST avec grande raison que plusieurs graues Autheurs ont appellé les Enfans des Roys, *Adminicula Augusti, Munimenta Imperij, Subsidia dominationis*: Car outre le contentement qu'ils donnent à leurs Peres, de ce qu'ils voyent en eux autant de successeurs de leurs Couronnes, ils leur seruent encores d'une protection assurée contre les conjurations. D'où vient que l'un de ces Autheurs disoit au Liure troisieme de ses Annales: *Plena Caesarum domus, iuuenis filius, nepotes adulti, moram cupitis Sciani adferebant*. Aussi l'Empereur Auguste ayant recogneu combien il estoit important aux Princes souuerains, d'auoir plusieurs Enfans, pour empescher les entreprises que l'on pourroit faire contre leurs personnes, enjoignit expressément à Tybere d'adopter Germanicus, *ve pluribus munimentis insisteret*, dit le mesme Autheur.

Et plusieurs Roys ont encore passé plus outre: car afin d'asseurer leur Sceptre à

60 DE LA SOUVERAINETE' DV ROY,
leur posterité, & pour retrancher les vaines
esperances des plus ambitieux, ils ont, à l'i-
mitation de Dauid, fait couronner leurs
enfans dès leur viuant, dequoy l'antiquité
nous rapporte l'exemple d'Artaxerxes, *Nihil
sibi ablatum existimans*, dit Iustin, *quòd in filium
consulisset imperium; sinceriusque gaudium se ex pro-
creatione capturum, si insignis Maiestatis sua viuis
in filio conspexisset.*

Mais d'autant que la nature ne garde pas
toufiours les Loix que Dieu luy a prescrites;
& qu'on a veu souuent que les Enfans des
Roys, apres auoir esté éleuez à ce haut de-
gré d'honneur, ont abusé de leur puis-
sance, & par vne extreme ingratitude ont plus
mal traitté leurs Peres, que leurs plus san-
glans ennemis; Dequoy nostre Histoire nous
donne pour exemple les cruels traitemens
que Louys le Debonnaire receut de ses en-
fans :

Ceste troisiéme Lignée, qui regne heureu-
sement aujourd'huy sur nous, rendüe sage
par ceste experience, pour preuenir de sem-
blables malheurs, a moderé la puissance de
leurs enfans : car on ne les a plus appellez
Roys, ny les filles Reynes, comme l'on fai-
soit auparauant, & les Peres ne se sont plus
despoüillez de leur viuant. Et bien que
le plus proche à succeder à la Couronne,

prenne ses qualitez, Par la grace de Dieu, Fils aîné de France, & Dauphin de Viennois, comme à Rome le fils aîné de l'Empereur se nommoit *Princeps Iuuentutis*, & en l'empire Grec *Δαυφίνης*, qui sont des termes, dont les seuls souverains peuuent vser, comme ne tenans que de Dieu; neantmoins ces tiltres ne luy donnent aucune part en la souveraineté durant la vie du Pere, suiuant ceste ancienne reigle, *Omniſque potestas impatiens consortis erit.* Et l'on ne luy permet de prendre ces qualitez releuées, que pour ce qu'il est heritier neceſſaire de la Couronne.

Je diray en paſſant que l'on ne doit pas trouuer eſtrange, que la qualité de Fils aîné de France ſoit miſe deuant celle de Dauphin; veu meſme qu'elle a eſté preferée à celle de Roy, comme il ſe void en ceux qui ont eſté Roys de Nauarre, deuant que d'eſtre Roys de France, qui mettoient en leurs Lettres le tiltre de Fils aîné de France, deuant celui de Roy de Nauarre.

En ſuite de cét vſage, lors qu'on leur a fait part des terres du Domaine de la Couronne, ce n'a plus eſté en tiltre de Royaume, mais de ſimple apanage ſeulement, tant pour eux, que pour leurs enfans maſles procreez en loyal Mariage; & à la charge de

32 DE LA SOUVERAINETE DV ROY,
reueſſion, la ligne masculine venant à man-
quer, & ſans pouuoir iouyr d'aucuns droicts
& prerogatiues de la Souueraineté, pour
eſtre inſeparables de la Couronne, *Et ne in
plures diuiſa Prouincia, claritas illius familia obſo-
leſceret*, dit Scaffinaburgensis.

Ce qui n'a pas eſté ſeulement obſerué à l'é-
gard des Enſans, mais auſſi des Freres des
Rois: car bien que la naiſſance & la nourri-
ture rendent les Freres aucunement égaux:
neantmoins leur Frere ainé venant à ſucce-
der à la Couronne, ceſte eminente qualité les
distingue de telle ſorte, que puis apres ils luy
doiuent rendre tout hōneur & tout reſpect,
comme à leur Roy, & à leur Seigneur: C'eſt
pourquoy l'Eſcriture Saincte remarque, que
ſi toſt qu'Adonias euſt eſté aſſeuré que ſon
frere Salomon auoit pris poſſeſſion du
Thrône de ſon pere, & qu'il eſtoit recogneu
de tout le monde, il le vint adorer comme
les autres ſubjects, *deſiſſo in terram vultu*, &
luy rendre l'hommage comme à ſon Roy.
Le meſme ſe raconte d'Armenes, qui ayant
ſçeu que ſon frere Cyrus auoit eſté procla-
mé Roy par ſon Pere, vint le premier de tous
les Grands du Royaume, luy iurer & luy pro-
mettre toute ſorte de ſouſmiſſion comme
à ſon ſouuerain Seigneur; & ſ'acquitta de
ſon ſerment avec tant de fidelité, que iuſq

ques au dernier soupir de sa vie, il seruir d'exemple à tous les Persans, d'une parfaicte obeïssance, aux commandemens de leur Prince.

Mais pource que ces exemples sont rares, & que la ialousie met d'ordinaire du desordre parmy les Freres, & les porte quelquesfois hors les termes de leur deuoir; comme il est arriué presque sous tous les Roys de la premiere Race, sous le regne de Charles le Chauue, & sous celuy de Henry premier: C'est pourquoy les sages Roys ont pris garde de ne leur point donner d'apanages aux frontieres, mais au milieu du Royaume; & aux endroits où il y auoit moins de fortes places: ne voulans plus tomber dans la mesme faute que fit le Roy Charles V. quand il donna à Philippes son Frere le Duché de Bourgongne pour son apanage, qui luy preparoit le moyen de s'accroistre, & de laisser ceste piece à ses Enfans; qui depuis abusans de leur trop grande puissance; causerent mille calamitez à ce Royaume. D'où vient que le Roy Louys XI. Prince tres-prudent; s'il y en eut iamais, disoit souuent, que c'estoit à tort qu'on auoit donné à Charles V. le nom de Sage; apres auoir manqué si lourdement contre ceste maxime si importante à l'Estat.

En suite de cela, l'on demande si les Enfans & les Freres des Roys, en consideration du Sang illustre dont ils sont issus, & qu'ils iouïssent de beaucoup d'immunitéz, de franchises & de priuileges, *sint soluti legibus*, aussi bien que les mesmes Roys. Quelques-uns ont tenu l'affirmatiue, & se sont fondez sur ceste genereuse repartie qu'Alexandre fit vn iour à Philippes son Pere: Qu'il estoit bien sous sa puissance paternelle; mais non pas sous son Empire Royal. Et sur ces paroles que le Fils de Dieu dit à saint Pierre, dans saint Matthieu: Que les Enfans des Roys estoient exempts des tributs qui se payoient en signe de subjection. Et en fin sur ce passage du premier des Roys, où il est dit, que Saül voulant faire mourir Ionathas son fils, pour auoir rompu le Ieufne contre son Edict, le peuple luy osta d'entre les mains, & empescha qu'il n'executast son Arrest contre luy.

Toutesfois la pluspart de nos Docteurs sont de contraire opinion, & soustiennent qu'il n'y a que la seule Personne du Roy, qui ne soit point subiecte à la rigueur des Loix, à cause qu'il ne peut executer sur soy-mesme les peines qu'elles ordonnent. C'est ce que veut dire saint Thomas, 1. 2. *quest* 96. *Princeps dicitur solutus à lege, quantum ad vim coactiuam*

legis; Nullus enim propriè cogitur à se ipso; lex autem non habet vim coactivam, nisi ex Principis potestate, Dont ils inferent que les Enfans des Roys ayans leur Pere au dessus d'eux, qui peut les contraindre d'obeïr à ses Ordonnances; & les punir quand ils les ont enfreintes & violées, qu'ils sont soumis à la Loy aussi bien que les autres subjects du Royaume; & pour confirmer leur dire, ils rapportent les exemples de Iudas, Prince du peuple, qui condamna à la mort Tamar sa belle fille, apres avoir esté aduerty qu'elle avoit forfait à son honneur, & qu'elle estoit grosse: Et de Brutus le premier Consul de Rome, qui fit mourir deux de ses enfans pour avoir conspiré contre la liberté de la Patrie. Toutesfois pour l'ordinaire l'on garde ceste difference entre les Enfans des Roys & Princes du Sang, & les autres subjects, lors qu'ils ont manqué contre leur deuoir; Que ceux-cy sont punis selon la rigueur des Ordonnances: mais l'on traite plus doucement les enfans & les Freres des Roys, pour le respect que l'on porte à leur pere: Et principalement l'on observe en France, qu'on ne les fait iamaïs mourir de mort violente.

Ce qui se pratique non seulement envers les Freres des Roys, mais encore envers tous

36 DE LA SOUVERAINETE' DV ROY.
ceux qui sont de la Maison de France, bien
qu'ils soient éloignez à l'infiny du premier
rige. C'est pourquoy Charles VII. apres
que le Duc d'Alençon eut esté condamné
par les Pairs à souffrir le dernier supplice,
pour ses rebellions & ses perfidies, il fit sur-
seoir l'exécution de l'Arrest, & moderant sa
rigueur, il luy donna la vie. L'on se con-
tente en telles rencontres, pour satisfaction
de leur faute, de les prier de leurs biens, de
leurs honneurs & dignitez : & d'imiter les
Perfes, qui au lieu de punir la personne des
Grands, se contentoient de foïetter leurs
vestemens en leur presence, pour reparation
de leurs crimes.

D'auantage, l'on doit remarquer, que bien
que les enfans & les Freres des Roys soient
respectez de tout le monde, & qu'ils iouys-
sent presque de semblables priuileges que
les Roys mesmes ; comme nous le voyons
dans l'Exode, chap. 12. où il est dit : Que le
fils aîné de Pharaon auoit sceance sur le
mesme Thrône de son pere. Neantmoins ils
n'ont aucune autorité dans l'Estat, non
plus que les autres subjects. C'est ce qu'An-
tigonus voulut faire paroistre à son fils, qui
le pressoit, pour sçauoir de luy quel ordre
il vouloit donner à la bataille : car au lieu
de luy respondre il le renuoya rudement en
son

son quartier, & luy dit qu'il attendist là son commandement, sans s'enquêter d'avantage de ses intentions. De façon qu'on les peut comparer à ces anciens Dieux, qui se contentoient d'estre reuerez des hommes, sans se mesler du gouvernement de cét vniuers, s'ils n'en auoient vn commandement particulier de Iupiter.

Toutesfois il est de la bien-seance, que les Roys, apres auoir recogneu leur prudence & leur bonne conduite, leur donnent de l'employ, & leur communiquent leurs Conseils: car voyans que l'on a de la creance en eux, ils se sentiront d'autant plus estroittement obligez à seruir avec fidelité leurs Majestez, qu'ils ont plus d'interests dans les affaires publiques, que les simples subjects du Royaume. Aussi nous voyons que saint Louys & Charles V. faisoient cét honneur à leurs Freres de leur donner la cognoissance de leurs principales affaires, & de les employer au gouvernement de leur Estat. Et nous auons veu de nos iours que Charles IX. se trouua bien d'auoir donné le commandement de ses armées à son Frere le Duc d'Anjou, qui le seruit si dignement contre ceux de la Religion, qu'il remporta deux batailles signalées de ces perturbateurs du repos public.

58 DE LA SOUVERAINETE' DV ROY,
Mais, comme i'ay dit, ils doiuent attendre
ceste faueur de la pure bien-vueillance des
Roys, & non pas la pretendre comme leur
estant deuë, ou se la vouloir vsurper par
force & par violence, lors qu'elle leur est
refusée : car ils se la doiuent proposer seule-
ment comme la recompense & le prix de
leur obeïssance, & de leur bonne affection
enuers les Roys leurs Freres.

*Qu'il n'est permis aux Princes du Sang, & grands
Seigneurs du Royaume, de se marier sans
le consentement du Roy.*

CHAPITRE VIII.

B IEN que par le droit naturel, il
ne soit rien plus libre que les Ma-
riages; & que l'on tienne, qu'on
n'est pas mesmes obligé d'obeïr aux loix qui
en restraignent la liberté; Neantmoins ceste
maxime n'a pas de lieu pour le regard des
Princes du Sang, & des grands Seigneurs
du Royaume : d'autant que par le droit de
la souueraineté Royale, il leur est defendu
de se marier, sans l'aduis & le consente-
ment des Roys; à cause du grand domma-
ge que peut receuoir le public, quand des

personnes si puissantes dans l'Estat, prennent des alliances mal à propos. Ce que Tacite a sçeu bien remarquer, lors qu'il parle du refus que fit Tybere à Agrippine, de la marier: *Non ignoro, dit-il, quantum è Republica petebatur.*

Que s'il est defendu aux enfans de contracter Mariage, sans le consentement de leurs peres; est-il pas raisonnable que les Princes soient obligez de rendre vn semblable deuoir à leur Roy, puis qu'il est le Pere du Royaume, le Chef, le Tuteur & le Protecteur des Princes de son Sang. D'auantage, si le Mariage a esté introduit, *ad instruendum seculum*, comme parle Tertullian, & *ad firmamentum familiae*, comme dit Africanus. N'est-ce pas principalemēt de celuy des Princes, que le Roy doit attendre ce support & cēt appuy de sa Couronne? Car c'est par le Mariage que le nom & la gloire des grands Princes se rend immortelle: C'est par luy, que leurs familles se font puissantes, & leurs Sceptres redoutables, *Matrimonium ad maiora nitenti decus, ac robur*, disoit Tacite. Et en fin c'est de luy, que par vn effect contraire, toutes sortes de malheurs & de diuisions arriuent en vn Estat, s'il n'est contracté avec toutes les solemnitez & les precautions qui sont necessaires pour le rendre legitime.

C'est pourquoy les Princes, & les Seigneurs de marque; ne doiuent poursuiure aucune alliance, sans la permission du Roy, & sans l'auoir auparauant aduertý : afin qu'il reconnoisse si elle leur sera vtile & honorable; & si elle peut estre auantageuse pour le bien de son Royaume. Que s'ils manquent à luy rendre cét honneur, il n'y a point de doute qu'ils se rendent coupables, & qu'ils meritent de receuoir de la punition d'un tel mespris: Ce que Denys Tyran de Siracuse fit bien ressentir autre-fois à Philistus, qu'il bannit de Sicile, pour auoir espousé sa niepce, fille de Leptines son frere, sans son congé, & sans luy auoir auparauant communiqué son dessein.

Mais il est principalement necessaire de redoubler ceste seuerité, quand l'on void que quelque Prince affecte vne alliance, pour se fortifier contre le Roy, & qui est capable de luy donner de la ialousie. D'où vient que nous lisons dans la sainte Escriture, que Salomon pardonna bien à son frere Adonias, de ce qu'il s'estoit fait proclamer Roy comme luy; mais que si tost qu'il demanda en mariage Abisag, il prit tant à cœur ceste hardiesse, qu'il le fit mourir sur le champ. Tybere prit de si mauuaise part la recherche que Seian faisoit de Liuia,

vefue de deux grands Princes, & qui auoit de grands fupports à Rome, qu'il luy fit cefte refponfe, pleine de mefcontentement, & qui refmoignoit affez fon foupçon : *Falleris, Seiane, fi manfurum in eodem ordine putas ; & Liuiam, quæ Caio Cafari, mox Drufo nupta fuerit, ea mente acturam, vt cum Equite Romano fenefcat*, dit Tacite au liure 4. de fes Annales. Et pour cefte mefme raifon Afinius luy fut tousiours fufpect, pour auoir efpoufé contre fon gré Vipfania, fille d'Agrippa, & qui auoit autrefois eflé la femme.

Que fi par les Loix publiques, il n'efloit pas permis aux Grands de l'Eftat, de tenir des Nauires en Mer, de fortir hors les limites de l'Empire, & d'edifier des fortereffes, fans le confentement du Prince, ou du Senat ; de peur qu'ayans ces forces en main, ils ne priffent occafion de troubler la tranquillité publique ; Il leur doit efre encore moins licite de faire la recherche d'un party, & de prendre vne alliance, qui puiſſe donner quelque ombrage au public, ſpecialement avec des Princes eſtrangers, avec qui le Roy ne feroit pas en bonne intelligence. Auffi nous lifons dans l'Hiftoire, que les Anciens ne laiſſoient pas cét attentat impuni. D'où vient que les Atheniens condamnerent Iphicrates, pour auoir efpoufé fans la permission

62 DE LA SOUVERAINETE' DV ROY,
de la Republique, la fille du Roy de Thrace.
Et Iosephe remarque que Solome fut accusée
deuant Herode son frere, de ce que sans
luy en auoir parlé, elle auoit voulu se marier
auec vn Syleus, qui estoit Gouverneur d'une
Prouince dependante du Roy des Arabes.

Et nous apprenons de nos Annales, qu'on
imputa à crime au Comte de saint Paul, de
ce qu'il auoit contracté mariage auec vne
des filles du Roy d'Angleterre, sans le consentement
du Roy Charles V. Et que l'on fit le procez au Duc d'Alençon pour auoir
traitté secrettement auec le Duc d'York, du
mariage de son fils auec la fille de ce Prince
Anglois, sans l'aduis du Roy Charles VII.
Et personne n'ignore qu'entre les chefs du
procez du Marechal de Biron, celuy d'auoir
recherché en mariage vne des filles du
Duc de Sauoye, à qui le Roy son Maistre
faisoit la guerre, estoit vn des principaux.

Le Prince souuerain auroit aussi vn iuste
sujet de mécontentement, s'il voyoit que
les Princes de son Sang, ou quelques autres
grands Seigneurs de son Royaume, voulussent
contre son gré, s'allier auec des familles
inégaies en Noblesse, en dignité, & en
moyens : Car ce seroit *deformare domum*,
comme dit le Poëte Romain : ce seroit *profa-*


nare genus suum, comme dit l'Eſcriture ſaincte : ce ſeroit , *Maculam iniicere gloria ſua* , comme dict S. Ambroïſe. Et en fin ce ſeroit affoiblir l'Eſtat , & auilir ſa grandeur , que de faire de telles alliances. C'eſt ce que le peuple Romain teſmoigna publiquement , lors que ils ſe mirent tous en duel , quand ils ſçurent que Liuia fille de Drufus , & qui auoit eſté la femme de Neron , s'eſtoit allée dans la famille d'un ſimple Cheualier Romain : *Quod Liuia, Druſi filia, quondam Neronis vxor, denupſerat in domum Rubellij Blandi, cuius auum Tiburtem Equitem Romanum plerique meminerant*, dit Tacite. Mais le plus grand inconuenient qui pourroit arriuer de tels mariages , c'eſt que dans vn Eſtat purement hereditaire : le Roy Pere pourroit méconnoiſtre les enfans qui en naiſſoient , & les declarer incapables de luy ſucceder ; *Cum & inuitis parentibus heredes non adnaſcuntur*, dit la Loy Romaine ; ce qui cauſeroit de grands deſordres dans l'Eſtat.

Nous pouons donc conclurre ce Diſcours par ceſte maxime Polirique, qui a eſté tenuë de toute l'antiquité , *Potentiorum tum demum legitima eſſe matrimonia, ſi ſint è Republica* : C'eſt à dire , S'ils ſont contractez avec l'auctorité du Prince ſouuerain , & s'ils ſont honorables & vtiles à l'Eſtat : qui eſt le but où doiuent tendre toutes les penſées , & toutes les

64. ^{DE LA SOUVERAINETE' DV ROY,}
affections des Roys , des Princes de leur
Sang , & de tous les Grands du Royau-
me.

*Qu'il n'appartient qu'au Roy de faire des Loix dans le
Royaume , de les changer , & les interpreter.*

CHAPITRE IX.

 E n'a pas esté sans raison que ces
deux grands personnages de l'an-
tiquité , Demosthene & Papinien,
ont autrefois desfiny la Loy , *Com-*
munis Reipublicæ Sponsio: Pource que quand les
peuples iouïssent de la puissance souuerai-
ne, c'estoit eux seulement qui auoient dans
leurs Republ. l'autorité de faire des Loix.

Mais depuis que Dieu a estably les Roys
sur eux , ils ont esté priuez de ce droit de
Souueraineté; & l'on n'a plus obserué pour
les Loix , que les Commandemens & les
Edicts des Princes , comme le remarque
Vlpian en la loy premiere , *ff. de Constitutione*
Principum.

Ce qui a esté iudicieusement estably: car puis
que les Roys ont esté instituez de Dieu pour
rendre la iustice à tout le monde , pour
main-

maintenir les peuples en paix, & pour conseruer l'Estat en sa splendeur : & qu'ils ne peuuent satisfaire dignement à tous ces deuoirs, sans l'establissement de bonnes & sainctes Ordonnances, qu'Aristote appelle à ceste occasion *συνελευσὶς πόλεως*, & Ciceron : *Fundamentum libertatis publicæ, fontem æquitatis* : n'est-il pas raisonnable qu'il n'y ayt qu'eux dans le Royaume, qui ayent le pouuoir de les publier, & de les faire obseruer par leurs subjects.

Mais comme c'est la chose la plus importante de tout le gouuernement politique : C'est aussi principalement en cela, qu'ils se doiuent conduire auec plus de circonspection, de prudence, & de iustice. D'autant que de la publication de mauuaises Loix, il est tousiours arriué dans les Estats vne infinité de seditions, de changemens, & de desordres. L'on a veu la Republique Romaine presque reduitte à deux doigts de sa perte, lors que les Gracches firent ces Loix seditieuses touchant la diuision des terres de la campagne : L'on a veu l'ancienne forme & la sincerité des élections corrompues, par la Loy que proposa Gabinius touchant les suffrages.

Mais sans aller chercher des Exemples dans les siècles passez, jettons les yeux sur

66 DE LA SOUVERAINETÉ DV ROY;
l'Estat d'Espagne, que l'on estime estre le
mieux policé de l'Europe; nous verrons que
certaines Ordonnances, que fit publier Phi-
lippe second, touchant la Gabelle; & l'esta-
blissement de l'Inquisition, ont esté comme
les feux qui ont excité toutes ces guerres
sanglantes des Pais-bas, qui durent depuis
soixante ans. Et si nous faisons vne curieuse
recherche de l'origine de tous les malheurs,
dont la France est de si long-temps affli-
gée, nous trouuerons qu'ils ne procedent,
que de quelques Edicts qui ont esté pu-
bliez, sans en auoir auparauant consideré les
consequences. Les Roys pourront euitier
tous ces inconueniens, si quand ils veulent
faire des Loix ils se despouillent de leurs
propres interests, & ne regardent que le
bien & l'vtilité de leurs peuples. Ayans de
si bonnes intentions, toutes leurs Ordon-
nances seront fondées sur la Iustice, &
meriteront par consequent d'estre receuës
avec vn applaudissement general de tous
leurs subjects.

Mais afin qu'ils puissent proceder plus
seurement en vne chose de si grande conse-
quence, il me semble qu'ils deueroient imi-
ter l'exemple de ces anciens Roys d'Israël,
à qui l'on presen toit, apres leur sacre, le
Livre des Loix diuines, pour les lire, & les

transcrire de leur main propre, comme il leur est commandé dans le 17. Chapitre du Deuteronome. Afin, dit saint Augustin, qu'elles leur serussent de modèle, pour former les Loix qu'ils iugeroient estre nécessaires pour le gouvernement de leur Royaume: Car s'ils veulent prendre la peine de suivre vn si excellent Patron, il est impossible qu'ils ne réussissent heureusement: *Quacumque enim leges videntur ad innocentiam pergere, de diuina Lege vixit antiquioris fortuna, mutatae sunt,* dit Tertullien en son Apologie.

Que s'il est nécessaire aux Princes & aux Monarques de se gouverner avec tant de prudence, quand ils veulent faire de nouvelles Loix; ils ne doiuent pas se conduire avec moins de retenue, quand il s'agit de changer les Loix ancienne. ont esté de tout temps obseruées dans leurs Estats: car si autre-fois plusieurs Republiques ont esté presque renuersées, pour auoir seulement changé quelques tons en la Musique, à ce que rapporte Platon: Combien de ruines & de bouleuersemens peuuent-ils arriuer dans les Monarchies, par le changement des Loix & de la Police ancienne? C'est pourquoy le Iuriconsulte Paulus donne ceste maxime dans le Digeste, au titre des Loix,

68 DE LA SOUVERAINETE DV ROY,
'Minime' sunt mutanda, quæ semper certam interpretationem habuerunt. Dequoy Cassius nous donne la raison dans Tacite au liure 14. de ses Annales, *Quia quæ conuerterentur semper in deterius mutari.* Et cela est tousiours veritable, lors que les Roys, sans sujet, & par vn vain desir de mōstrer leur puissance, chāgent les Loix que leurs ancestres ont heureusement obseruées.

Mais quand l'Estat languissant de leurs Royaumes desire pour sa guérison, que l'on change les Ordonnances anciennes; ou qu'il se presente occasion d'une plus grande vtilité: c'est alors qu'ils peuuent iustement les changer en d'autres meilleures, dit Vlpien en la loy *in rebus. ff. de constitut. Principum* C'est alors que *Antiquitas suo loco relinquenda est, & nouitas amplectenda si spem adferat vberioris fructus*, dit Ciceron en la troisième Oraison contre Verres: Ce que Hu Capet pratiqua vtilement pour ce Royaume, quand adres qu'il fut paruenü à la Couronne, il changea ceste Loy pernicieuse à l'Estat, qui appelloit également tous les enfans males à la succession du Royaume; & qu'il abolit la dignité de Duc de France, qui auoit esté institué au lieu de celle de Maire du Palais: pource qu'elle entreprenoit trop sur l'autorité souveraine des Roys, iusques à prendre en ses tiltres, Par la grace de Dieu, Duc de France, qui

sont des termes dont les seuls Souuerains peuuent vser, comme nous auons dit cy-dessus.

En toutes ces rencontres, il n'y a point de doute que les Roys peuuent vser de leur puissance, & changer les Loix & les Ordonnances anciennes de leurs Estats: Ce qui ne s'entend pas seulement des Loix generales, mais aussi des Loix municipales, & des Coustumes particulieres des Prouinces: car ils peuuent aussi les changer, quand la necessité & la iustice le desirent. C'est ce que dit le Iurisconsulte en la loy *Prator ait §. Diuus. ff. de sepulchro violat. Oportere imperialia statuta suam vim obsinere; & in omni loco valere.* Ils doiuent neantmoins proceder en cela avec de la retenue, pource qu'il n'y a rien dont les peuples soient plus ialoux, que de leurs anciennes Coustumes, dit Vlprien, en la loy *4. ff. de off. Proconsulis.*

Il n'appartient aussi qu'aux Princes d'expliquer le sens des Loix, & de leur donner telle interpretation qu'ils veulent, lors qu'il arriue des differents sur la signification des termes. C'est ce que dit la loy premiere, *C. de legib. inter aequitatem iusque, interpositam interpretationem nobis solis & oportet; & licet inspicere;* principalement lors qu'il faut expliquer vn cas general, & douteux, non compris dans le texte

70 DE LA SOUVERAINETE' DV ROY,
de la loy: Et que pour le definir, il est besoin
d'une Declaration en forme de Loy nou-
uelle, comme il est traicté *in l. si verò. §. de viro.*
ff. solus. matrim. & in l. commodissime. ff. de liber. &
posthum.

Mais le sage Prince doit prendre soigneu-
sement garde, en usant de ceste puissance,
de ne pas forcer le vray sens des Loix, &
de leur donner vne interpretation contraire
à la iustice, & à l'intention de leur auteur:
comme faisoit ordinairement l'Empereur
Tybere, qui pour ce sujet fut appellé *Calli-*
dus noui iuris repertor; pource qu'il tournoit
tousiours le sens des Loix à son auanta-
ge, & pour fauoriser ses desseins: ce qu'il
pratiqua en la cause de Pison: car voyant
qu'il ne pouuoit conuaincre ce criminel, si
l'on ne mettoit ses esclaves à la question,
& que cela estoit expressément defendu par
l'ancien Senatusconsulte: pour eluder la
disposition de ceste Loy, il les fit tous
affranchir, afin de les rendre capables de
tesmoigner contre leur Maistre. Il usa en-
core de ceste mesme subtilité, quand il vou-
lut faire mourir la fille de Seian; pource que
ayant sceu que par vne ancienne Coustume,
les filles vierges n'estoient point subjectes
aux peines capitales; pour tromper la loy,
il la fit violer, deuant que de la mener au

suppliee, à ce que dit Tacite au liure cinquième de ses Annales. Les Princes qui seront curieux de se rendre recommandables à la posterité, ne donneront iamais de semblables interpretations aux Loix ambiguës: mais ils observeront tousiours ce serieux precepte que donne le Jurisconsulte Celsus: en la loy *in ambigua. ff. de legibus: In ambigua voce legis*, dit-il, *potius accipienda est significatio, quæ vitio caret; præsertim cum etiam voluntas legis ex hoc colligi possit.*

Mais l'on demande, si le Roy peut faire tous ces changemens de Loix & d'Ordonnances, de sa seule autorité, sans en communiquer à son Conseil, ny à ses Cours souveraines. A quoy l'on respond, que cela ne reçoit point de doute, pource que le Roy est le seul souverain dans son Royaume; & que la souveraineté n'est non plus diuisible, que le point en la Geometrie. Toutesfois il fera tousiours bien seant à un grand Roy, de faire approuver ses Loix & ses Edicts par ses Parlemens, & ses autres principaux Officiers de la Couronne, qui sont obligez par serment de le servir, & de le conseiller avec toute sorte de fidelité. L'Empereur Theodose en usoit tousiours de la sorte, lors qu'il vouloit publier quelques nouvelles Ordonnances: car il desiroit qu'elles fussent auparavant

72 DE LA SOUVERAINETE' DV ROY,
examinées par le Senat, & quand ceste cele-
bre Compagnie les auoit approuuées, il les
faisoit obseruer par ses peuples. C'est ce qu'il
dit en termes expres dans la loy *Humanum*,
Cod. de legibus: où il proteste qu'il ne veut plus
faire de Loix, qu'avec ces formes & ces so-
lemnitez: *Scito igitur, Patres conscripti, non ali-*
ter in posterum legem à nostra clementia promulgan-
dam, nisi supradicta forma fuerit obseruata. Bene-
enim cognoscimus, quod cum nostro consilio fuerit or-
dinatum: id ad beatitudinem nostri Imperij, & ad
nostram gloriam redundare. Il n'y a point de
doute que les Loix qui sont receuës avec la
commune approbation de tant d'excellens
personnages, font vne plus viue impression
dans l'esprit des peuples, que celles qui sont
publiées sans toutes ces formalitez. Et c'est
pourquoy les Poëtes seignent, que Iupiter
mesmes n'ordonnoit rien d'importāce pour
le gouuernement de cét Vniuers, qu'il n'eust
pris conseil de ces Dieux, qu'ils appellent
Consentes. *Nec Joui quidem ipsi,* dit Seneque, *si*
aliquid fulmine percuti debet, suum consilium satis
est: admittit Deos authores. Aussi nous voyons
par nos Annales, que l'on obseruoit ceste
Coustume anciennement parmy nous: Car
les Roys ne faisoient iamais d'Edicts de con-
sequence, qu'ils n'eussent auparauant appel-
lé dans leur Conseil, les plus gens de bien
du

du Royaume, pour auiser & prendre garde
s'ils seroient vtils à leurs peuples. D'où
vient que toutes les anciennes Ordonnan-
ces portoient, qu'elles auoient esté faictes
de l'aduis des Princes du Sang, des princi-
paux Officiers de la Couronne, & de leur
Conseil.

L'on fait encore ceste demande, sçauoir
si les Cours souueraines ont aussi le droit de
faire des Loix. A quoy l'on respond, qu'el-
les peuuent bien faire des Reglemens pu-
blics, selon les occasions qui se presentent,
aux formes de la Iustice, & de la Police,
& par prouision seulement : mais qu'elles
ne peuuent rien definir par vne loy gene-
rale, mesmement contre les Loix & les
Ordonnances qui sont desia receuës : Et
c'est ainsi que l'on doit entendre & receuoir
en France ce mot du Iurisconsulte, *non ambi-
gitur Senatum ius facere posse* : C'est pourquoy
suiuant ceste mesme maxime, l'on a aboly
toutes les loix particulieres, que quelques
grandes maisons de ce Royaume s'estoient
données d'elles-mesmes dans leurs familles,
pour l'ordre de leurs successions, contre la
disposition des Coustumes des lieux où
leurs biens estoient situez. Et comme vn
seigneur de qualité m'eust vn iour demandé
sur ce sujet, si le Duc de Lorraine auoit

peu sans l'autorité du Roy, ordonner contre la Coustume des lieux, que son Duché de Bar seroit à l'aduenir vn fief masculin, pour en exclure les filles; comme il l'auoit fait du Duché de Lorraine sans l'autorité de l'Empereur. Je luy dis, que pour la Lorraine, il auoit peu faire ceste Ordonnance, sans auoir le consentement de l'Empereur, d'autant qu'il ne releuoit de l'Empire, que pour l'hommage seulemēt, & non point pour le ressort: ayant vn Parlement en Lorraine qui iugeoit souuerainement, & que estant pour ce regard absolu dans ces pays, il pouuoit publier telles Loix. & Ordonnances que bon luy sembloit: que Bartole, & plusieurs autres, estoient de cēt aduis, sur la loy *Omnes populi. ff. de iust. & iure.* Mais, quant au Duché de Bar, puis qu'il releuoit de la Couronne de France en hommage & en ressort; Il estoit, sans doute, que bien que nos Roys luy eussent accordé de grands droicts & priuileges, qu'il ne pouuoit y faire des Loix, ny introduire des Coustumes nouvelles, sans le consentement de sa Majesté, & sans estre homologuées en la Cour de Parlement, oüy son Procureur general; & que les Iuges du Royaume ne recognoissoient point d'autres Loix ny de Coustumes que celles que nos Roys auoient approuuées.

Que c'estoit l'opinion des Docteurs sur le §. *ex non scripto. Inst. de iure nat. gent. & ciu. & la loy 1. C. qua sit long. consuet.* dont ils exceptoient seulement les Coustumes, qui s'estoient introduittes peu à peu d'elles-mesmes par vn temps immemorial, suiuant la disposition du Chap. *super quibusdam. §. praterea. extr. de verbor. signif.*

*Si les Roys peuuent faire des Loix, en
matieres Ecclesiastiques.*

CHAPITRE X.

B IEN que le pouuoir des Roys ne s'estende principalement que sur les choses temporelles, comme nous l'apprenons dans le second du Paralipomenon, chap. 19. où l'on void que Iosaphat reformant la Police de son Royaume, donne au grand Prestre la cognoissance des choses qui appartiennent au seruice de Dieu, & se reserue seulement, & à ses Officiers celle des affaires ciuiles & politiques: *Amarias Sacerdos, dit-il, & Pontifex vester in his qua ad Deum pertinent prasidebit: porro Zabadias filius Ismabel, qui est dux in domo Iuda, super ea opera erit, qua ad Regis Offitium pertinent.* Et que pour ce sujet saint Ambroise eut raison de parler en ces

76 DE LA SOUVERAINETE' DV ROY,
 termes à l'Empereur Valentinian; *Noli te
 grauare Imperator, vt putes te in ea qua diuina sunt,
 aliquod ius Imperiale habere; ad Imperatores palatia
 pertinent: ad Sacerdotes Ecclesie; publicorum tibi ma-
 nium ius commissum est, non sacrorum. Can. conuenior.
 23. quest. 8.*

Toutesfois, puis que la garde & la pro-
 tection de l'Eglise est commise aux Roys,
 & que par leur serment, ils s'obligent de la
 defendre & de la conseruer de toute leur
 puissance; il n'y a point de doute, que pour
 ce qui touche ceste protection, ils ne pu-
 sent faire des Loix en matieres Ecclesiasti-
 ques: non pour definir quelque chose de la
 foy & de la doctrine, ny pour examiner les
 saincts Decrets de l'Eglise, mais pour les
 auetoriser & prester main-forte à leur exe-
 cution. C'est ce que l'Empereur Iustinian
 tesmoigne clairement en sa Nouvelle 137.
 quand il dit, *Si civiles leges, quarum potestatem
 nobis Deus pro sua in homines benignitate credidit, fir-
 mas ab omnibus custodiri ad obedientium salutem stu-
 demus, quanto plus studij adhibere debemus circa
 sanctorum Canonum & diuinarum legum custodiam?*
 C'est pourquoy l'Empereur Louys le De-
 bonnaire disoit de foy-mesme: *Admonitorem
 & custodem se legum Ecclesiasticarum esse, non aucto-
 rem;* Et l'Empereur Constantin auoit ac-
 coustumé de dire dans Eusebe, au liu. 4, ch.

24. de la vie de ce Prince, qu'il estoit Euesque hors de l'Eglise, voulant dire, que les mesmes choses que les Euesques faisoient dans l'Eglise par leurs Canons, leurs Decrets, & leurs Exhortations, il le faisoit hors de l'Eglise par ses Edicts & par ses Ordonnances.

Ce qui se void assez dans les Codes de Iustinian & de Theodose, dans les Capitulaires de Charlemagne, & de Louys son fils, & mesmes dans les Ordonnances des Roys qui leur ont succédé, qui sont toutes pleines de Reglemens & de sanctions seueres, pour conseruer non seulement la doctrine en sa pureté; mais encore pour entretenir l'ordre, la discipline, & la Police exterieure de l'Eglise, & pour l'œconomie, & la legitime distribution de ses biens & reuenus; ordonnant des peines, aussi bien contre les Ecclesiastiques, que contre les laïques, qui manqueroient à leur deuoir, & qui negligeroient de faire leurs charges; Imitans en cela l'exemple du Roy Ioas, qui voyant que les Prestres mesnageoient mal les deniers du Temple; pour punition de leur negligence, il leur en osta le maniement, & le commit à ses propres Officiers.

Certes, bien que les fonctions du Sacerdoce, & de la Royauté, soient distinctes & separées, celle là ne se proposant pour but

que le salut des ames, & celle-cy le bien public : Neantmoins quand l'occasion se presente de se prester secours l'une à l'autre, pour la conseruation de leur honneur, elles sont obligées de se rendre ces deuoirs reciproques, que les Philosophes Grecs appellent *ἑταῖριον*, suiuant ceste maxime generale de sainct Iean Chrysostome en l'Homelie 25. sur la premiere aux Corinth. *Hæc est Christianismi regula, hæc illius exacta definitio, hic est vertex super omnia eminens, publicæ utilitati ubique consulere.*

C'est par ceste consideration que l'on doit composer tous les differents qui arriuent souuent entre ces deux puissances : & que l'on doit trouuer iuste que les Roys s'entremettent de faire obseruer tout ce qui appartient à l'ordre, & à la discipline exterieure de l'Eglise, comme pour les formes requises en la celebration des Mariages, pour contraindre les Euesques, les Abbez, & les autres Ecclesiastiques, à se promouoir aux Ordres dans le temps porté par les Conciles, pour les contraindre de resider sur leurs benefices, pour faire obseruer les anciennes Coustumes de l'Eglise, & empescher qu'on n'en introduise de nouuelles : pour faire garder l'ordre en la seance, & aux sepultures : pour prendre garde que l'on

entretienne les fondations: pour maintenir les vrayz Titulaires, contre l'inuasion & la violence des injustes possesseurs des benefices: & en fin pour faire obseruer les Decrets des Synodes, tant generaux que particuliers, touchant les bonnes mœurs, & autres choses semblables, qui seroient souuent negligées & mesprisées, au grand scandale de l'Eglise, si les Roys n'interposoient leur autorité, comme l'Empereur Iustinian le declare en la loy *Nov. 120. C. de Episc. & cler.* qu'il fit contre ceux qui se marioient apres auoir pris les Ordres de l'Eglise.

D'où vient aussi que le Pape Leon écrivant à l'Empereur du mesme nom, luy donnoit cét aduis: *Debes Imperator incunctanter aduertere, Regiam potestatem tibi non solum ad mundi regimen, sed maxime ad Ecclesie presidium esse collatam.* A quoy l'on peut rapporter la réponse que fit Demetrius Chomatenus, in *Resp. Orient. Imperator vt communis ^{ἡγεμον} ἡγεμὼν, existens & nominatus, Sinodalibus præsist sententiis & robur tribuat, Ecclesiasticos ordines componat, & legem dei vira politicaque eorum, qui altari seruiunt.*

Aussi nous voyons que la pluspart des plus celebres Conciles de l'Eglise ont esté confirmez & publiez au nom des Empe- reurs & des Roys qui regnoient du temps qu'ils ont esté tenus. Ainsi le Concile de

80 DE LA SOUVERAINETE' DV ROY,
Nicée fut publié par Constantin : celuy de
Constantinople, par Theodose le Grand:
celuy d'Ephese, par Theodose le ieune: ce-
luy de Calcedoine, par Marcian : & celuy
qui fut tenu *In Trullo*, par Constantin Pogo-
natus. Et l'on doit remarquer, qu'en tous
les Edicts de confirmation de ces Conciles,
les Empereurs auoient de coustume d'y ad-
iouster outre la peine Canonique, quelques
peines seculieres, contre ceux qui y contre-
uiendroient, pour seruir de marque de leur
autorité souueraine en telles matieres.

En suite de ceste doctrine, il me sem-
ble que c'est sans raison, que Messieurs les
Euesques se plaignent de l'vsage des appel-
lations comme d'abus; veu que c'est par ce
seul moyen, que l'on conserue vne police &
vn ordre en toutes les rencontres des affai-
res, que nous auons cy dessus rapportées:
Et bien qu'elles n'ayent esté introduites
parmy nous, que sur la fin du regne de
Charles VII. Neantmoins on auoit au-
parauant accoustumé de prendre des Let-
tres, pour faire appeller la partie en con-
trauention à la Pragmatique; comme en
Espagne, quoy que ces appellations n'ayent
point de cours: Toutesfois, lors qu'ils
voyent vne contrauention aux loix & aux
formes qu'ils ont establies parmy eux, tou-
chant

chant la Police Ecclesiastique, ils pratiquent vne surseance d'execution des rescrits, & des Ordonnances, soit du Pape ou des Euesques.

C'est aussi sans sujet qu'ils font plainte de ce que sur ces appellations on les intime en leur nom: car s'ils s'acquittent dignement de leur deuoir, la Cour n'a-t-elle pas de coustume de les fauoriser en tout ce qu'elle peut: de les combler de toutes sortes de loüanges: Et de punir la temerité des appellans d'une double amende, avec vn blasme public? Et s'ils negligent leurs charges, ou qu'ils contreuient aux Saints Conciles, aux Decrets de l'Eglise, aux Edicts & aux Ordonnances de nos Roys, & aux Arrests de leurs Cours souueraines: Pourquoy ne sera-t'il pas iuste de les intimer en leur nom, comme l'on fait tous les autres Iuges; principalement quand il n'y a point d'autre partie? Les Promoteurs qu'ils veulent qu'on appelle en leur lieu, sont-ils suffisans de respondre de la faute qu'ils n'auront pas faiete? Ioinct que l'autorité souueraine du Roy seroit grandement blessée, s'il n'estoit pas permis d'vser de ceste procedure; car il est de son deuoir, de faire obseruer par qui que ce soit tous les Reglemens, dont nous venons de parler.

*Que le Roy peut enjoindre aux Prelats de l'Eglise,
de tenir leurs Synodes , suivant les
Conciles generaux.*

CHAPITRE XI.

IEN que mon dessein n'ayt point esté, de traiter particulièrement en cet ouvrage, de toutes les matieres Ecclesiastiques, dont le Roy peut cognoistre, & sur quoy il a droit d'ordonner & de faire des Reglemens: Toutesfois plusieurs fortes raisons m'ont porté de parler expressément de ce poinct si important à toute l'Eglise.

Premierement, pource que ie le voys contredit par quelques-vns, qui soustienent que le Roy n'a point de puissance co-actiue contre les Euesques, pour les obliger à tenir leurs Synodes; & que cela dépend de leur seule autorité. En quoy il me semble qu'ils se trompent; car puis que pour garder vne bonne police en l'Eglise, il est enjoint aux Euesques, par les Conciles generaux, de tenir leurs Synodes tous les ans, ou du moins de trois ans en trois ans: comme il est dit au Concile de

Laodicée, C. 40. au Concile de Nicée, C. 5. au Concile de Cartage, C. 21. au Concile de Tharascon, C. 8. & presque par tous les autres; qui doute qu'après tant de saints Decrets, il ne soit du deuoir des Roys, de faire obseruer cet ordre, & d'y adstreindre ceux qui le negligent, comme faisoit autrefois le grand Constantin: *Qui Ecclesia Dei peculiarem sollicitudinem impertiens*, dit Eusebe, *cum per varia loca exorirentur inter Episcopos dissensiones, ipse, seu communis Episcopus, à Deo constitutus, Synodos ministrorum Dei indicebat.*

Aussi nous voyons que plusieurs Roys pleins de zele pour la gloire & l'honneur de l'Eglise, ont suiuy l'exemple de ce deuot Empereur, quand ils ont iugé qu'il estoit necessaire de faire assembler les Euesques pour preuenir, ou pour remedier aux maux dont elle estoit menacée, & qu'ils vsoient mesme de commandement & de contrainte enuers eux. D'où vient que leurs mandemens estoient couchez en ces termes: *Visum mihi est & iussi*, comme il se lit dans Eusebe, dans Optatus Mileuitanus, & dans l'Epistre que le Pape Leon escriuit sur ce sujet à l'Empereur Theodose, où il luy parle ainsi: *Si pietas vestra suggestioni ac supplicationi nostrae dignatur annuere, ut intra Italiam haberi iubeatis Episcopale Concilium, citò poterunt omnia scandala quae in*

perturbationem totius Ecclesie sunt commota, refecati.
 Et dequoy nous auons encore de grands
 tesmoignages dans les Capitulaires de Char-
 lemagne, au liure premier, chap. 40. où
 ce pieux Prince ordonne précisément, *Vt*
per singulos annos Synodus fiat. Et au liure 5.
 chap. 42. il dit: *De Presbyteris; & Clericis, sic*
ordinamus, vt Archidiaconus Episcopi ad Synodum
conuocet, & si quis ire contempserit, tunc Comes in-
sione Episcopi monitus, eum distringere faciat, ita vt
sexaginta solidos componat, qui veniant in scellum
domini Regis. Ce qu'il repete au mesme liure,
 chap. 43. & en plusieurs autres endroits.

C'est pourquoy les Historiens de son
 temps luy donnent mille louanges, de ce
 qu'il auoit restably cét ancien vsage de l'as-
 semblée des Synodes, qui durant vn long
 temps auoit esté negligé dans l'Eglise. Et
 que, *per eas ad salutem toti orbi Christiano præ-*
luxerat, dit le Commentateur de Zonare, sur
 le Concile de Nicée, Can. 5. Et l'on void
 qu'en suite de ces saintes Ordonnances,
 nos Roys ont tousiours continué ce mesme
 soin enuers l'Eglise, comme il est porté par
 tous leurs Edicts; & spécialement par ce-
 luy de Melum, de l'an 1389. *Admonestons les*
Archeuesques; & Euesques de nostre Royaume; &
neantmoins leur enjoignons de tenir les Conciles Pro-
uinciaux, &c. Ce qui est aussi reïteré par ce-

Iuy d'Orleans, de Bloys, & de Moulins; dont il s'enfuit que quand les Euesques & les Metropolitains negligent de tenir leurs Synodes: que les Roys peuuent vser de leur autorité pour les y contraindre; c'est à dire, par saisie de leur temporel.

Je ne veux point entrer en la question, de sçauoir quelle puissance ont les Princes souverains touchant la conuocation des Conciles generaux: car l'on doit esperer qu'en ces rencontres ils seront tousiours en bonne intelligence avec le Sainct Pere; l'oseray neantmoins dire, que bien que regulierement les Conciles ne se doiuent celebrer qu'auec l'autorité des Papes: comme nous l'apprend Sozomene au liure sixième, chap. 7. de son Histoire Ecclesiastique, par la responce que l'Empereur Valentinian fit aux Euesques de l'Hellespont & de Bithynie, lors qu'ils le prierent de leur permettre de conuoker vn Concile contre ceux qui nioient la consubstantialité du fils avec le pere: *Mihi qui sum in sorte plebis, fas non est talia curiosius perscrutari, Sacerdotes quibus ista cura sunt, inter seipfos, quocumque voluerint loco conueniant.*

Toutesfois, s'il arriuoit (ce que Dieu ne permette iamais) que quelque Pape, par vne opiniastrété mal fondée, vint à mesprier la conuocation des Conciles quand la

86 DE LA SOUVERAINETE' DV ROY,
necessité de l'Eglise le requiert; il n'y a point
de doute, que les Princes Chrestiens l'en
peuvent solliciter, & mesme l'en presser,
comme il fut arresté aux Conciles de Con-
stance, où en la session 39. il est ordonné
d'assembler le Concile de dix en dix ans.

Et de faict, lors qu'il fut question de con-
uoquer les Euesques, & les Prelats du Royau-
me, pour prendre l'ordre du Roy, quand
ils allerent au Concile de Pise: les Lettres
patentes que le Roy Louys XII. enuoya au
Parlement pour cet effect, contenoient
ceste clause: *Auons vouloir & intention de re-
querir en bref nostre Saint Pere, d'ordonner & d'esta-
blir le Concile, au-moins de le consentir, ainsi qu'il est
tenu de faire.* Aussi voyons-nous que suiuant
ceste maxime plusieurs Conciles ont an-
ciennement esté conuoquez de l'autorité
des Princes souuerains, comme celuy qui
fut celebré sous le Roy Carloman en l'an
742. qui commence par ces mots: *Ego Car-
lomanus Episcopus, qui in meo regno sunt, cum Presby-
teris, ad Concilium & Synodum pro timore Christi
conuocaui.*

Les Princes Chrestiens deuroient tous
conspirer d'un commun consentemēt, à faire
observer de si saincts & de si vtils Decrets:
car bien que plusieurs soustiennent que ce
soit maintenant vne chose superflue d'assem-


bler des Conciles, tant generaux que provinciaux; pource que l'on ne peut plus rien adjouster de nouveau aux Reglemens de la police Ecclesiastique, apres tant de saintes Ordonnances, que les anciens Conciles ont faictes & publiees sur ce sujet. Neantmoins l'experience nous fait voir tous les iours, qu'à faute de s'estre seruis de ce souverain remede, vne infinité d'abus se sont glissez insensiblement dans l'Eglise, qui corrompent sa pureté, & qui ternissent entierement son lustre. *Frequens enim generalium Conciliorum celebratio agri Dominici cultura est precipua, que vepres, spinas, & tribulos hæresum, & errorum, & schismatum extirpat, excessus corrigit, deformata reformat, & vineam Domini ad frugem vberissima fertilitatis adducit*, dit le Concile de Basle en la Session premiere.

Et tout ainsi que le Soleil par sa presence chasse les tenebres qui couurent cét Vniuers; de mesme les Synodes où le saint Esprit preside, dissipent les desordres & les scandales qui obscurcissent la splendeur & la sainteté de l'Eglise. Et comme l'œil se guerit par ses larmes de la pluspart des maladies qui l'affligent: Ainsi l'Eglise remedie elle-mesme à ses propres defauts, par la severe correction, que l'on en fait en telles assemblées: qui est la chose la plus auanta-

88 DE LA SOUVERAINETE' DV ROY,
geuse qu'elle puisse mettre en vsage, pour
conseruer sa dignité, faire reuerer les Pre-
lats, & ses Eueques, & restablir en sa pre-
miere vigueur la discipline Ecclesiastique.

*Que les Ecclesiastiques, nonobstant leur qualité, ne
laissent pas d'estre subjects du Roy, & ses iusti-
ciables; & que comme la Jurisdiction Ecclesiasti-
que a esté establie par les Princes souuerains,
qu'elle leur est aussi subiecte, pour estre restreinte
dans ses limites, en cas qu'elle les outrepasse.*

CHAPITRE XII.

 OMBIEN que les Ecclesiastiques,
pour le respect que l'on porte à
leur profession, & pour la dignité
du grand Maistre qu'ils seruent, meritent
qu'on leur rende toutes sortes d'honneurs
& de reuerences: toutesfois en ce qui re-
garde la souueraineté du Roy, leur condi-
tion est presque égale à celle de tous les au-
tres subjects, suiuant ceste diuine parole
de l'Apostre, *Omnes animae sublimioribus potesta-
tibus subdita, sit*, qui par ce terme general ne
met point de difference entre les Ecclesiasti-
ques & les laïques.

Entre

Entre les marques de leur subjection aux puissances temporelles, celle d'estre leurs iusticiables est l'une des principales: Car depuis que les Princes souverains, & leurs Officiers ont embrassé la Foy Chrestienne, & qu'on n'a plus esté dans les termes de la defense que firent les Apostres, de recognoistre les Iuges Ethniques: les Gens d'Eglise ont esté sousmis à leur Iurisdiction, comme tous les autres du peuple. D'où vient que l'on void que dés la primitiue Eglise la cognoissance des crimes que commettoient les Ecclesiastiques, appartenoit aux Iuges des Empereurs, comme le declare Iustinian en la loy 33. *C. de Episc. & cler.* où il veut que le grand Preuost du Palais cognoisse des crimes qu'ils auroient commis dans la ville, & que les Presidens des Prouinces prennent la cognoissance de ceux qu'ils auroient commis ailleurs.

Ce que neantmoins il changea depuis, ayant laissé le choix aux accusateurs, de se pouruoir, ou pardeuant les Euesques, ou pardeuant les Patriarches, ou pardeuant les Synodes, ou pardeuant ses propres Officiers. Et apres encore pour establir vn meilleur ordre en telles affaires, par ses Nouelles 76. 83. & 123. il mit difference entre les crimes Ecclesiastiques; comme l'aposta-

22 DE LA SOUVERAINETE' DV ROY,
sie, l'heresie, la simonie, & le sacrilege;
dont il laissa la cognoissance aux Euesques:
& les crimes ciuils, comme l'assassinat, le
rapt, l'incendie, & les autres semblables,
dont il reserua la cognoissance à ses Offi-
ciers.

Il est vray que les Ecclesiastiques ont
tasché de temps en temps, de se soustrai-
re de la Iurisdiction des Princes tempo-
rels; iusques là mesmes, que souuent-
fois ils ont vsé de rigoureuses menaces
contre tous ceux qui les traduiroient de-
uant les Iuges seculiers, comme il se lit
dans le Concile de Constantinople, Can. 7.
dans le Concile de Cartage, Can. 107. dans
le Concile d'Agde, C. 32. dans le Concile
Mileuitain, C. 17. dans le Concile d'Ailes,
C. 10. dans le Concile d'Antioche, C. 12. &
dans plusieurs Epistres Decretales de diuers
Papes.

Mais neantmoins, les Empereurs ont ren-
du leurs efforts inutiles, les ayans tousiours
remis dans le deuoir & l'obeïssance qu'ils
leur deuoient, & reduits dans la mesme con-
dition que tous les autres subjects de l'Em-
pire, comme il se void dans les Constitu-
tions des Empereurs Valens, Anastase, &
Zenon, qu'ils ont publiées sur ce sujet.

A la verité, l'Empereur Theodose vou-

lant se monstret plus affectionné enuers l'Eglise, que ses predecesseurs, ordonna que les Ecclesiastiques ne pourroient plus estre distraits de la cognoissance de leurs Euesques, comme il se void en la loy finale, C. *Theodos. de Episc. Eccles. & Clericis, priuilegia Ecclesiasticorum omnium, qua saculo nostro Tyrannus inciderat* (c'est de l'Empereur Iulian qu'il veut parler) *prona deuotione reuocamus, scilicet ut quidquid à Principibus constitutum est, vel qua singuli quique Antistites pro suis Ecclesiasticis impetrarunt, sub pena sacrilegij, iugi solidata aternitati seruentur. Clericos etiam quos indiscretim ad seculares Iudices debere deduci infausus præsumpserat, Episcopali audientia referiamus. Fas enim non est vdiuini muneris ministri, temporalium potestatum subdantur arbitrio.*

Mais, on ne peut pas inferer de là, que quand il ne s'agissoit point de matieres purement Ecclesiastiques, que ce Prince ayt entendu affranchir les personnes de l'Eglise de sa Iustice, & de sa subjection

Il n'y a que les Euesques, qui par vn priuilege particulier sont exemptez de respondre deuant les Iuges seculiers, lors qu'ils sont accusez de quelques grands crimes : car la cognoissance en appartient au Pape, & l'accusé ne peut mesme decliner sa Iurisdiction, comme le tesmoigne saint Gre-

92 DE LA SOUVERAINETE' DV ROY,
 goire en l'Epistre. 33. liu. 4. lors qu'il dit:
Si Episcoporum causa mihi commissorum, apud piissi-
mos Dominos, aliorum patrocinio disponuntur, in-
felix ego in ista Ecclesia quid facio? sed ut Episcopi mei
me despiciant, & contra me refugium ad saculares
Judices habeant; Omnipotenti gratias ago; peccatis
meis deputo: hoc tamen breuiter suggero, quia aliquan-
tulum expecto, & si ad me venire distulerint, exer-
cere in eos distictionem Canonicam nullo modo cessa-
bo. Aussi le Roy Theodoric cognoissant qu'il
 ne pouuoit estre Iuge des Euesques, ren-
 uoya par deuant l'Eglise l'accusation que
 quelques citoyens de la ville d'Auguste
 auoient intentée contre leur Prelat, comme
 le remarque Cassiodore au liure deuxième
 de ses Diuerses.

Et Gregoire de Tours remarque au liure
 deuxième, chapitre premier, que Brictius
 Euesque de Tours, ayant esté accusé d'a-
 dultere par les habitans de la ville, & priué
 par eux de son Euesché, interjeta appel
 pardeuant le Pape, qui cassa leur Arrest,
 comme ayant esté donné par des Iuges in-
 competents, & le restablit dans son Siege:
 n'estant pas raisonnable que ceux qui doi-
 uent iuger les Anges, soient iugez par d'au-
 tres que par des Ecclesiastiques. Aussi nous
 voyons qu'en ces occurrences le saint Pere
 a de coutume de commettre les Metropo-

litàins, & les autres Euesques, pour informer & parfaire le procez, & quelques-fois mesme de le iuger definitiuelement. Mais auparauant que l'Euesque accusé se pouruoye deuant le saint Siege, il faut qu'il obtienne la permission du Roy: ce qui se monstre par cét exemple memorable que rapporte Gregoire de Tours au liure cinquième, chap. 21. de son Histoire, où il dit, que les Euesques Salonius & Sagittaire, ayans esté priuez de leurs Eueschez, par les Peres que le Roy Gontran auoit assemblez à Lyon; & desirans appeller de leur sentence deuant le Pape: *Ad Regem accedunt*, dit-il; *implorantes se injuste remotos: sibi que tribui licentiam ut ad Papam vrbis Romana accedere debeant, Rex verò annuens petitionibus eorum; datis Epistolis eos abire permisit.*

Et bien que le crime de leze Majesté, & d'entreprise contre l'Estat, doïue estre excepté de ceste proposition: & que son atrocité face cesser tous ces priuileges: Neantmoins nos anciens Roys ont tousiours porté tant d'honneur à ceste dignité, qu'ils n'ont iamais voulu les faire iuger que par d'autres Euesques assemblez en forme de Synode; dequoy le mesme Gregoire de Tours, lib. 10. cap. 18. nous donne l'exemple d'Ægydius, Euesque de Reims, que l'on

accusoit d'auoir conspiré contre le Roy Childebert : car il dit que ce Roy l'ayant fait arrester prisonnier , il conuoqua plusieurs autres Euesques ; pour estre Iuges de ce different : & qu'apres que le Duc Ennodius eut plaidé la cause du Roy en ceste assemblée, l'accusé qui estoit present, se voyant conuaincu, confessa publiquement son crime; & s'exposa à tel supplice qu'il plairoit à sa Majesté luy faire souffrir : Mais que les autres Euesques touchez de compassion de sa misere, la supplierent de luy donner la vie, & qu'apres l'auoir degradé, & priué de son Euesché, il fut banny hors du Royaume : Je ne puis encore obmettre ce que le mesme Auteur remarque, lors qu'il parle de Pretextatus, Archeuesque de Rouen, qui fut accusé & condamné pour vn semblable crime, que l'on auoit de coustume en ce temps-là, lors que les Euesques estoient condamnez, de chanter sur leurs testes le Psalme 108. qui contient les maledictions contre Iudas Iscariot.

En suite de ce Discours ie suis obligé de dire quelque chose de la Iurisdiction Ecclesiastique, pour monstrier que comme elle a esté establee par l'autorité des Princes souuerains : que de mesme elle a tousiours esté subiecte à leur puissance, quand elle a

voulu outrepasser ses bornes legitimes. L'on doit donc remarquer, que bien que durant vn certain temps, les Euesques ayent cogneu de toutes sortes de causes, & entre toutes sortes de personnes; Toutesfois du commencement ce n'estoit pas en qualite de Iuges, mais seulement de simples arbitres, & d'amiables compositeurs; comme il se void dans les Constitutions des Empereurs Honorius, Arcadius, & Marcianus, *in l. si quis ex consensu, & in l. decernimus. C. de Episc. audient.* Excepté quand il estoit question de matieres Ecclesiastiques: car alors ils en cognoissoient comme Iuges. Ainsi que Iustinian l'ordonna en la loy *Sancimus*, au mesme tiltre: *Has autem actiones, si ad negotia Ecclesiastica pertinent, necesse fore iubemus, ut a solis Episcopis cognoscantur; si vero civilium rerum controversia sit, volentes questionem apud Antistites instituere, patiemur; inuitos tamen non cogemus.*

La pluspart des meilleurs Autheurs tiennent que Charlemagne a esté le premier qui a institué ceste Iurisdiction, comme *Yuo Carnotensis* le confirme en ses Epistres, & avec luy Aufegifus, & dequoy l'on void aussi de certains tesmoignages au liure premier, *leg. franc. cap. 10. & 28.* & au Can. *Omnes.* & au Can. *Quicumque.* & au Can. *Volumus. 11. quest. 2.*

Mais, comme avec le temps les Ecclesiastiques, sous pretexte de ceste Jurisdiction commettoient plusieurs abus, & faisoient de grandes entreprises sur la Jurisdiction des Iuges seculiers: L'on restreignit en France son pouuoir dans ses iustes limites, specialement depuis que sous le regne de Louys Hutin l'on fit voir les grandes vsurpations que faisoient les Ecclesiastiques sur la Iustice Royale; De façon que depuis ce temps-là, les Iuges d'Eglise n'ont exercé aucune Jurisdiction sur les personnes laïques, si ce n'est pour les Mariages, & le petitoire des dixmes, au lieu qu'auparauant ils entreprenoient de cognoître des testamens & de tous les contractz, où les parties s'estoient obligées par serment, de les entretenir, & où l'on pretendoit qu'il y auoit de l'vsure: Et quant aux affaires profanes ou ciuiles, d'entre les Gens d'Eglise, ceste Jurisdiction Ecclesiastique n'a plus cogneu que des actions pures personnelles & pecuniaires, & non des actions reelles; encore l'on doit suiure en ces iugemens, non le droit Canon, mais les Coustumes & les Ordonnances de nos Roys; d'autant qu'on ne garde point en France le Chap. *Quod clerici. De foro compet.* Le Iuge d'Eglise ne peut aussi condamner personne en des

en des dommages & interests : qui est vne des raisons pourquoy il ne cognoist point du possesseur des benefices , pource que d'ordinaire ces differents se resoluent en de peines semblables.

Et quant aux crimes, ceste Iurisdiction a de mesme esté fort restreinte & moderee en France ; pource que comme l'Eglise n'a pas *ius gladij* , aussi ne cognoist-elle que des cas communs : En suite dequoy elle ne peut adjuger contre les coupables aucune peine temporelle, non pas mesme vne amende pecuniaire ; mais seulement l'excommunication & la penitence, comme il est dit *in cap. Non ab homine. extr. de Judic.* Jusques là que j'ay veu declarer par Arrest la sentence d'un Official, abusive, qui auoit priué pour tousiours un certain Chanoine des fruiets de sa prebende.

l'estime neantmoins que l'Eglise peut passer plus auant , & priuer les Prestres criminels de leurs charges & dignitez, comme Balsamon le remarque , *ad cap. 2. Concil. Carthag.* *Vidi etiam*, dit-il, *multos sacros propter furtum fuisse Synodaliter depositos.* Et au Concile de Nicée il est dit : *Si quis Episcopus deprehensus fuerit in peccato fornicationis, aut in alio simili, deponendus est, nec amplius in eundem gradum restituentus* : comme le semblable fut arresté au

98 DE LA SOUVERAINETE' DV ROY,
Concile d'Agde, & en plusieurs autres : &
cela se fait en consequence de l'excommu-
nication qu'ils encourent.

Que si les crimes dont les Ecclesiastiques
sont accusez, se trouuent si atroces, qu'ils
meritent des peines plus seueres, que la Ju-
risdiction Ecclesiastique ne peut ordonner :
c'est alors que les Officiers du Roy en peu-
uent prendre la cognoissance : ce qui est
conforme à l'Epistre que les mille Euesques
qui assisterent au Concile de Calcedoine
contre *Ælurus*, Euesque d'Alexandrie, qui
estoit accusé de plusieurs grands crimes,
écriuient à l'Empereur, qui finissoit par ces
mots : *Ælurus vestram iustitiam solummodo debet
experiri, quoniam ad magnitudinem commissorum eius
potestas Ecclesiastica non sufficit.* C'est proprement
ce que nous appellons en France, Cas pri-
uilegiez : c'est à dire, des crimes qui sont
agrauez par des circonstances extraordinai-
res, *Vt furtum vi factum, libido contra naturam,
adulterium, homicidium* : & tels autres forfaits,
que personne ne commet, *nisi sponte* & qui
pour leur enormité, doiuent plustoit atten-
dre la rigueur des Loix Politiques, que la
douceur des Canons de l'Eglise.


Et bien que nous n'ayons point de Consti-
tution ny d'Ordonnance, qui ayt clairement
distingué ces crimes; Il semble neantmoins.

que nous pouuons en tirer quelque lumie-
 re de sainct Augustin, *Tract. 40. in Ioan.* où il
 distingue les fautes humaines : *quæ peccatis,*
d'auec celles, quæ criminibus adscribi possunt. Et
 l'on peut dire, que lors que la seureté pu-
 blique est offencée par tels crimes, qu'il est
 raisonnable que les Officiers du Roy en
 prennent la cognoissance, contre qui que
 ce soit : D'où vient que Ciceron disoit, *in*
Bruto: Ipsi Magistratus qui sacrosancti habebantur,
nonne interdum in huiusmodi crimen incidisse visi sunt,
ut statim non post annum accusarentur, cessat enim
pruilegium, ubi delictum priuilegio maius est.

Ceste Iurisdiction Ecclesiastique a esté
 restreinte aussi 'par le Concordat, au ti-
 tre *De causis* : Car autres-fois les François
 estoient tenus en cas d'appel d'aller à Rome,
 mesmes en toutes les causes que le Pape
 vouloit euoquer; Mais il fut ordonné par
 ce Concordat, que d'oresnauant on leur
 donneroît des Commissaires en ce Royau-
 me, comme il s'obserue à present : Et les
 Cours souueraines tiennent main forte, à
 ce qu'il n'y soit contreuenue, non plus qu'à
 tous les autres droits de l'Eglise Galli-
 cane.

Que les terres de l'Eglise sont subjectes à la Souverainete du Roy.

CHAPITRE XIII.

 E seroit trop diminuer les droits de la Souveraineté Royale, de mettre en auant, que nos Roys ont exempté de leur subjection les terres & les possessions dont ils ont fait present aux Eglises, ou qu'ils ont permis leur estre données par leurs subjects. Car il est veritable, qu'ils ont en leur Royaume vn souuerain Empire sur tout ce qu'il contient, & que toutes les terres, soit des Ecclesiastiques, soit des laïques, releuent mediatement ou immediatement de leur Couronne.

D'où vient que nous lisons dans les Capitulaires de Charlemagne, que cét Empereur, & quelques vns de ses successeurs estoient si exacts de conseruer leur autorité sur toutes les Seigneuries de leur Royaume, que mesmes ils leuoient vne certaine censue qu'ils appelloient *casatam*, pour le fonds de terre, où les Eglises estoient edifiées: Aussi le Pape Zacharie écrivant à Boniface Euesque, luy disoit: *Solidum pro casata*

Regi soluite; qui fut depuis reuouée au Synode de Cologne, *tit. de censibus*, où il est dit, que le Prince seroit remercié de ce que *censum illum remisera*. C'est pourquoy il ne faut point trouuer estrange si nos Roys ont estably ceste loy, que l'Eglise ne peut acquerir ny posseder aucuns immeubles, qu'auec leur permission, & sans leur payer l'indemnité, qui est le tiers de la valeur en fief, & le quint en la roture, ce que l'on appelle droit d'amortissement.

En quoy ils se sont monstrez beaucoup plus religieux enuers l'Eglise, que les Empereurs Phocas, Valentinian, Valens, & Gratian, qui defendirent de luy laisser aucun legs par testament, comme il se lit dans la loy 22. & dans les suiuanes, C. *Theodo. de Episcop. & Eccles.* Dequoy saint Hierome fait de grandes plaintes en la lettre qu'il écrit à Nepotian: *Pudet dicere, Sacerdotes Idolorum, Mimi, & Auriga, & Scorta hereditates capiunt; solis Clericis & Monachis hoc lege prohibetur, & prohibetur non à persecutoribus, sed à Principibus Christianis. nec de lege conqueror sed doleo*

*les plaçons dans plus
entre les clercs &
p. 16.
moins qu'entre les
Empereurs*

Car bien que nos Annales rapportent, que le Roy Chilperic declara les testamens nuls, quand on leguoit à l'Eglise quelque chose d'immeuble: toutesfois cela fut reuouqué presque en mesme temps par le Roy

*our memoriamus hanc
legem. Conseruam
bonum est hoc quo
vultus ut inderiam
censuris. proinde penam
legis ad id causam
et tamen nos de
restitutione annuam*

*par fides commissis legibus et Ordinis et quasi maiora sine
imperatorum laici quam christi leges hinc inde, Evangelici amonitione
longe quoniam laudat, et propriis studiis dicitur. p. 16.*

102 DE LA SOUVERAINETE' DV ROY,
Gontran, comme le remarque Gregoire de
Tours au liure 7. Chap. 7. de son Histoire.
Et l'on ne void point que ceste loy de Chil-
peric aye iamais esté pratiquée en France:
au contraire il a tousiours esté permis à l'E-
glise de posseder des immeubles, mesmes
du temps que les Gaules estoient sous la do-
mination des Empereurs Romains, comme
nous l'apprenons de Prosper, au liure deuxi-
me de la vie contemplatiue, chap. 9. lors
qu'il louë l'œconomie de saint Hilaire,
Euesque de Poictiers, & sa sage conduite
à gouverner les heritages & les reuenus de
son Eglise: Ce que saint Gregoire confir-
me au liure cinquième de ses Epistres, où il
prie la Reyne Brunehilde, de mettre sous
sa protection celuy qui auoit le soin de mé-
nager & de faire valoir les terres & les posses-
sions de l'Eglise: & les Capitulaires de Char-
lemagne ne parlent d'autres choses, que des
grands biens que possedoit l'Eglise, non
seulement par le bien-fait de nos Roys, mais
encore par la liberalité de plusieurs Seigneurs
de France.

C'est pourquoy ceux-là se sont grande-
ment trompez, qui ont mis en auant, que
comme les Leuites, de mesmes les Ecclesiasti-
ques, estans incapables de tenir aucunes
terres ny seigneuries, que l'on auoit esta-

bly le droit d'amortissement sur eux, pour recompense de ce qu'on leur donnoit la permission d'en posseder, & de faire des acquisitions: car ce droit n'a esté introduit que pource que les terres venans en la possession de l'Eglise, de qui le Roy ne peut receuoir aucun secours pour les affaires & la conduite de la guerre, l'on a trouué qu'il estoit raisonnable qu'elle l'indemnifast du dommage qu'il receuoit, ou qu'elle luy donnast vn homme viuant & mourant pour luy payer ses droicts, & luy rendre les deuoirs & les seruices qui luy sont deubs. Et l'on ne void point que nos Roys ayent iamais empesché l'Eglise d'acquérir des immeubles, soit par contracts, ou par testamens, lors qu'elle a voulu satisfaire à ceste condition: qui est vn signalé tesmoignage, tant de leur pieté, & de l'affection qu'ils luy portent, que de leur prudence à conseruer les droits de leur Couronne.

En quoy il semble qu'ils ont imité l'exemple de Constantin, lors que par vne deuotion sans exemple, il donna à l'Eglise la ville de Rome, & que par vne prudente discretion il s'en reserua le droit de Souueraineté & de Iurisdiction: Ce que l'on conjecture premierement de la demande que le Pape Boniface I V. fit à l'Empereur Phocas du

104 DE LA SOUVERAINETE' DV ROY,
Pantheon, qui estoit acquis au fisque de
l'Empire, comme tous les autres Temples
des Payens: ce qui estoit inutile s'il eust esté
seigneur absolu de la ville de Rome. Se-
condement, de ce que Ammian Marcellin
raconte, que sous l'Empereur Constance, qui
estoit fils de Constantin, la Jurisdiction de
Rome appartenoit toute à l'Empereur: ius-
ques là mesme qu'il en chassa le Pape Li-
berius, pour n'auoir pas voulu condamner
sainct Athanase, Patriarche d'Alexandrie:
Cela mesme se prouue encore par la con-
firmation des priuileges de la ville de Ro-
me, que les Empereurs Honorius & Arca-
dius donnerent aux habitans, comme il se
void dans le Code Theodosien: ce qui n'eust
pas esté necessaire, si Constantin ne s'en
fust reserué la Jurisdiction & la puissance
souueraine.

Il est vray que depuis Louys le Debon-
naire, confirmant les immenses liberalitez
que Pepin & Charlemagne son pere & son
ayeul auoient faiçtes à l'Eglise Romaine,
luy donna (le Pape Paschal stipulant pour
elle) non seulement la ville de Rome, mais
aussi la Souueraineté & la Jurisdiction, cōme
nos Annales, & Gratian le tesmoignent
au Can. 3. dist. 63. & Volateran, lib. 3. de sa
Geographie, dit auoir extraict du Vatican
ceste

ceste donation, couchée en mesmes termes qu'il l'a inferée dans son Liure.

Quelques-vns disent que ce Prince eust fait prudemment, si à l'exemple de Constantin, il se fust reserué quelque marque de Souueraineté, dans ceste ville capitale du monde. Et les autres au contraire soustienent, que puis que son Pere l'auoit conquise, & que par le droit de la guerre il en pouuoit disposer avec toute liberté: qu'il estoit bien seant à la deuotion de ce Prince d'en faire present au saint Pere, pour recognoissance de tant de victoires, que Dieu luy auoit données sur ses ennemis: Toutes-fois i'estime, que bien qu'il soit du deuoir des Roys, de prendre la protection de l'Eglise de Dieu, & de la secourir en toutes ses necessitez; il faut neantmoins qu'ils mesurent tellement leurs liberalitez, qu'elles ne puissent apporter de dommage au public, & diminuer les forces de l'Estat; veu mesme que l'Eglise tire sa conseruation de la Republique. C'est pourquoy les Roys qui succederent depuis à Louys le Debonnaire, ayans remarqué la faute qu'il auoit faicte, & voulans aller au deuant de tous les inconueniens & les desordres qui pouuoient arriuer de ces donations, retindrent toutes sortes de puissances sur les Seigneu-

*vide Sigoniu.
de Legib. Nat.
in Ludouico. hanc
confirmacionem.
in qua dominium
superior. h. ex
hac actibus reserua-
tione. an non
francie. Regum
dominium. factis
posteriorum Regum
proletus. detur
proletus. vide quo
vide anaph. Bribat.
in non. lerya*

ries, qu'ils auoient données & consacrées particulièrement à l'Eglise, comme d'y faire executer leur ban, d'y faire tenir les assises par leurs Officiers, & d'y iuger toutes les causes dont ils peuuent cognoistre en cas de ressort; d'y establir des Baillifs Royaux, des Presidiaux, & d'autres sortes d'Officiers, pour y exercer la Justice Royale, & la Police, d'y leuer des Tailles, des Aydes, & des Subsidés, mesmes des Tailles Seigneuriales, pour le Mariage des Filles de France.

Et bien qu'aux autres Royaumes les appellations des Iurisdicctions temporelles des Euesques aillent aux Archeuesques, & non pas aux Officiers Royaux, suiuant le chap. *Romana. §. licet autem. de appellat. in 6.* & le chap. *Licet. de foro compet.* Neantmoins cela ne s'est iamais pratiqué en France; mais ces appellations ont tousiours esté releuées par deuant les Officiers du Roy: & ce chap. *Romana*, ne s'y est iamais obserué, bien qu'il fust adressé à l'Archeuesque de Reims: Et ç'a esté vne des difficultez que l'on a faicte pour la reception du Concile de Trente, pource qu'en la Session 22. Can. 7. il ordonne que ce chap. soit gardé. Et de faict, afin qu'on retinst cét ancien vsage parmy nous, les Ordonnances de nos Roys ont

voulu que les Iustices temporelles des Ecclesiastiques fussent exercées par des personnes laïques iusticiables en tous cas des Iuges Royaux : Ce qui ne peut estre que tres-iuste, puis que, comme dit saint Augustin, *Ecclesia iure humano ista possident in c. quo iure distinct. 8.*

Mais la principale marque de la Souveraineté que nos Roys se sont reseruée sur les terres de l'Eglise; c'est qu'ils s'en approprient la iouissance si tost que les Euesques sont decedez, & pendant que leurs Sieges sont vacans : Et ce droit s'appelle Regale temporelle; qui n'est autre chose qu'une pure saisie & main-mise feodale : d'autant que les Euesques sont leurs vassaux, à cause de leur temporel : d'où vient qu'à raison de ceste subjection anciennement, & avant que par les Conciles l'usage des armes fust interdit aux Ecclesiastiques, ils estoient tenus d'aller au ban & arriere-ban, comme les autres vassaux du Roy.

L'on doit remarquer que par l'Ordonnance de Philippe de Valois, qui a esté verifiée en la Cour de Parlement, & en la Chambre des Comptes, il y a plus de trois cens ans, il est dit : que le Roy veut que ceste iouissance dure, & ne soit close, iusques à ce que le successeur Euesque luy ayt

108 DE LA SOUVERAINETE' DV ROY,
fait, & presté le serment de fidelité, & que
les lettres de main-leuée en ayent esté pre-
sentées, verifiées & registrées en la mesme
Chambre, & que mandement d'icelles ayt
esté enuoyé aux Officiers des lieux, pour
executer la main-leuée, si ce n'est que le
Roy eust donné des lettres de souffrance:
auquel cas l'Euesque peut entrer en la
iouyssance de son temporel: Ce qui monstre
que nos Roys ne se priuent iamais de la
puissance souueraine qu'ils ont sur tout le
temporel de leur Royaume, en quelque
main qu'il passe, mesme en celle de l'E-
glise.

*Des Decimes que l'on paye au Roy sur les re-
uenus des Benefices.*

CHAPITRE XIV.



A preuue la plus certaine que nous
ayons, que l'institution des Roys,
& l'obeissance qu'on leur doit,
vient de l'ordonnance de Dieu;
est celle que l'on tire de ce passage de l'Escri-
ture Saincte, où il est dit, que Iesus-Christ
paya le tribut à Cesar, tant pour luy que
pour ses Apostres, leur donnant ceste belle

instruction : *Reddite Casari, qua sunt Casaris* : dont plusieurs graues Autheurs ont inferé, que les Ecclesiastiques estoient contribua-
bles aux charges de l'Estat, aussi bien que les laïques & les seculiers : Toutesfois ils ont fait ceste distinction, que pour les charges extraordinaires, l'Eglise en deuoit estre exemptée, suiuant ceste parole de l'Empereur Theodose, en la loy *Placet. C. de Sacros. Eccles. Nihil extraordinarium, superindictum-ve, ab Ecclesia flagitetur*. Mais quant à celles qui estoient ordinaires, qu'elle estoit obligée de les payer comme tous les autres subjects du Royaume : *Adeo vt non liceret abuti nomine Ecclesie, cuitandorum canonum causa*, comme il est dit en la Nouel. 37. d'où vient que saint Ambroise parlant du deuoir que l'Eglise deuoit rendre à l'Empereur, disoit : *Si tributum petit, non negamus* : aussi la pluspart de nos Docteurs sur le chap. 1. *De immunit. Eccles.* ont tenu qu'il n'y auoit que les Dixmes, & l'ancien dot des Eglises, qui estoient exemptes de toutes charges, & non pas les autres immeubles : dont mesme ils ont tiré ceste reigle, *In bonis Ecclesiasticis, vt clericos, in patrimonialibus verò vt laicos indicandos esse*.

Et bien qu'anciennement cela mesme s'obseruaft en France, comme l'on peut

conjecturer de la plainte qu'en fit sur ce
 sujet Gregoire VII. en l'Epistre qu'il écri-
 uit aux Roys Theodo. & Theodebert;
 Toutesfois il est veritable, qu'à mesure que
 la Religion Chrestienne s'est accruë & affer-
 mie dans ce Royaume, nos Roys n'ont le-
 ué aucune Taille sur les personnes d'Eglise;
 n'ayans pas voulu estre en cela moins reli-
 gieux enuers les Ecclesiastiques, que furent
 autre-fois les Égyptiens, les Iuifs, les Perses,
 & les anciens Gaulois, qui exemptoient leurs
 Prestres de toutes sortes de subides, comme
 nous l'apprenons de la Genese, chap. 47. de
 Diodore, liure deuxiême, chap. 1. d'Esdr.
 chap. 7. & de Cesar, au liure sixiême de ses
 Commentaires. Mais depuis le tiers, ou
 peu s'en faut, de tous les biens de la Fran-
 ce, ayans esté donnez à ceux de cét ordre,
 iusques aux Duchez, Comtez, & Baron-
 nies: dequoy mesme se plaignit autre-fois
 vn de nos Roys, dans Gregoire de Tours,
 lib. 6. cap. 46. *Ecce pauper remanet fiscus noster,*
 + *Ecce diuitia nostra ad Ecclesias sunt translata,*
nulli penitus nisi soli Episcopi regnant: perijt honor
noster, & translatus est ad Episcopos ciuitatum.
 Nos derniers Roys ont estimé, que sans
 blesser ny leur honneur, ny leur conscien-
 ce, ils pouuoient tirer du secours de l'E-
 glise, quand il estoit necessaire pour les

affaires de leur Estat. Aussi nous voyons dans Aymonius, au liure quatrième, Des gestes des François : que les Roys, de son temps prenoient le tiers du reueu des Abbayes, pour l'entretienement de leurs armées, lors qu'ils se voyoient pressez par la necessité; & que Charles Martel le pratiqua de la sorte, quand ceste grande armée de Sarrazins vint fondre sur la France.

Rigordus tesmoigne que Philippe Auguste prit des decimes sur le Clergé, lors qu'il entreprit la guerre contre les Infidèles, & dont aussi fait mention Pierre de Blois, en l'Epistre 20. *Sané, dit-il, sicut audimus, exijt edictum à Philippo Rege, vt describeretur Gallicus orbis; & oneretur Ecclesia decimationibus recidiuis, sic paulatim transibit decimatio in consuetudinem.* Philippes le Bel fit la mesme chose en l'année 1292. lors qu'il declara la guerre aux Anglois; & Philippes le Long suiuit puis apres son exemple. Mais ç'a esté le Roy François premier, & ses successeurs, qui les ont rendus ordinaires, tant à cause des guerres continuelles qu'ils ont eues contre ceux de la nouuelle opinion, que pour soulager le pauvre peuple taillable.

Et bien qu'on puisse soustenir, que nos Roys estans protecteurs & fondateurs des Eglises, peuuent de plein droit leuer des

112 DE LA SOUVERAINETE' DV ROY,
impositions sur les Ecclesiastiques : Neant-
moins ils ont esté si religieux qu'ils ne l'ont
iamais fait qu'avec le consentement du Pa-
pe, & de tout le Clergé; & pour des causes
si iustes & legitimes, qu'on ne les pouuoit
honnestement refuser; & en cas de refus ils
eussent eu raison de leur faire le mesme re-
proche que l'Empereur Diocletian fit à vn
certain Philosophe, qui demandoit vne
exemption d'une chose que chacun payoit
volontairement : *Profectio & desiderium tuum*
inter se discrepant; nam cum Philosophum te esse pro-
ponas, vinceris auaritia: comme il est rapporté,
l. professio. C. de munerib. patrimo. lib. io. Car ce
seroit vne ingratitude trop apparente, &
indigne des Prestres Chrestiens, de dénier
l'assistance, & le secours qu'ils doiuent à
leur Roy, & à leur Patrie; principalement
lors qu'il s'agit de la defense de la Reli-
gion. Aussi voyons-nous par les Loix Impe-
riales, qu'ils estoient tenus de contribuer à
tout ce qui importoit aux necessitez publi-
ques, comme il est dit *in l. ad instructionem.*
C. de sacrosanct. Eccles.

Ce que l'on peut reprendre & blasmer
en la leuée de ces decimes; c'est l'inégalité
de leur departement: car bien qu'il se doive
faire à proportion du reuenu des benefi-
ces; neantmoins cet ordre a esté changé,
partic

partie par les brigues des plus puissans, qui reiettent tousiours la charge sur les plus foibles; & specialement sur les pauvres Cures: partie pource que l'on a negligé d'observer l'Edict que François premier fit publier à Villiers-Costerets, qui desirant remedier à cét abus, ordonna que l'on renoueleroit ce departement de temps en temps, à cause que le reuenu des benefices tantost augmente, & tantost diminué, selon la qualité des terres & des saisons.

En suite de cela l'on doit observer, que les decimes se doiuent payer par toutes sortes d'Ecclesiastiques Beneficiers, & par toutes les Communautéz erigées en tiltre de Benefices, quand elles ont vn reuenu ordinaire, & perpetuel: & qu'ils peuuent estre contraincts au payement de leur taxe, par toutes sortes de voyes, mesme par saisie & vente des fruiets du Benefice, pour estre specialement affectez au payement de ce droit. Il a mesme esté iugé que ceux qui tiennent des pensions à tiltre de Benefice, doiuent aussi payer les decimes, suiuant le §. *de piscibus, de Decimis*: dont neantmoins sont exceptez les Religions des pauvres femmes, tous les Hospitaux, les Maladeries, & les autres Maisons de Dieu, qui sont instituées pour loger les Pelerins, receuoir les ma-

114 DE LA SOUVERAINETE' DV ROY,
lades , & nourrir les impotens.

D'auantage l'on doit remarquer, que par l'Edict de l'an 1599. verifié en la Cour, le huietième Mars, il est notamment porté, que les Receueurs des decimes , ne peuuent contraindre les Beneficiers de payer les taxes qui sont écheuës du temps de leurs predecesseurs, s'ils ne monstrent auoir fait quelque diligence à l'encontre d'eux. Et en cas mesme de diligence, ils ne peuuent demander au successeur, *ex obitu*, que deux années: & au successeur, *ex resignatione*, que trois années d'arrerages. Il semble que quelques grands personages ont eu raison, de trouuer estrange, que nos Roys ayent si facilement laissé aux Deputez du Clergé, qui sont departis en sept villes, Paris, Tholose, Roüen, Lyon, Tours, Bordeaux, & Aix, la Iurisdiction mesme en dernier ressort, de tous les procez & les differens qui arriuent entre les Beneficiers, leurs Receueurs, & Commis, tant pour raison des deniers qui se leuent sur eux, que de leur administration, comme le porte l'Edict de Henry III. de l'an 1580. d'autant que la cognoissance de tous sesdroicts, & des comptes qui s'en rendent deuroit appartenir aux Officiers du Roy, pour le grand interest qu'il a desçauoir combien & de quelles sortes de deniers se

leuent en son Royaume, ce qu'ils deuient, & comment ils font mesnagez.

Qu'on ne peut edifier de nouueaux Monasteres, ny instituer aucune nouuelle Congregation, sans la permission du Roy.

CHAPITRE XV.

VIS que le Roy est à la Republique ce que l'ame est au corps, est-il pas iuste qu'il ne se face rien de public dans son Estat, sans sa permission? C'est pourquoy l'on a tousiours tenu pour maxime, qu'on ne pouuoit establiſſir aucune Congregation, ny College, soit pour la Religion, soit pour la Police, sans le conſeil du Prince; d'où vient que le Iurisconsulte dit en la l. 1. ff. de Colleg. illicit. *Mandatis Principalibus precipitur Praesidibus prouinciarum, ne patiantur esse Collegia, & Sodalitia, ne tandem sub eo prae-textu, illicita Collegia coeant, quod non tantum in vrbe, sed & in Italia, & in prouincijs locum habere, Diuus quoque Seuerus rescripsit*: Ce qu'il auoit appris de la loy Licinia, dont parle Cicéron en l'Oraison qu'il a faicte pour Plancius, qui fit reuiure l'ancienne Ordonnance, par laquelle il estoit defendu d'instituer

116 DE LA SOUVERAINETE' DV ROY,
aucun College, sans la permission de ceux
qui auoient en main l'autorité publique.

De faict, nous apprenons, tant de cét
Auteur, que de Denys d'Halicarnasse, de
Tite Liue, & de Valere, que tous les Colle-
ges des Prestres, qu'ils appelloient : *Pontifi-
ces, Augures, Aruspices, Curiones, Vestales, Fla-
mines, Epulones, Sibilinos, Faciales, Salios, Lu-
percos, fratres aruales, Sacerdotes Gallos, & cele-
rum praefectos*, furent establis de la seule au-
thorité des Roys, ou du peuple, apres que
les Roys furent chassez : Ce que l'Empereur
Iustinian renouuella puis apres par sa Consti-
tution 67. où mesme il a compris les Mo-
nasteres; & fait defenses d'en edifier, sans
grande cognoissance de cause : *Multi enim;*
dit-il, *simulantes fabricare quasi orationis domos,*
suis medentur langoribus; non orthodoxarum Ecclesia-
rum fabricatores facti, sed speluncarum illicitarum.

Mais on dit contre ceste proposition,
que c'est violer la liberté de l'Eglise; bleſſer
la pieté, & en fin refroidir la deuotion pu-
blique, que de luy donner ce frein & ceste
contrainte; veu mesme que la loy Romaine
contenoit ces mots : *Sed Religionis causa coire,*
non prohibentur; voulant par là excepter tou-
tes les Congregations qui se faisoient pour
honorer Dieu, & le seruir avec plus de de-
uotion & de respect. A quoy l'on respond,

que ce n'est point diminuer la liberté de l'Eglise; ny affoiblir la pieté des hommes; que de faire approuver par le Prince, leurs vœux, & leurs bonnes intentions: d'autant que c'est luy qui doit puis apres prester main-forte à leur execution, & qui en doit estre le gardien & le protecteur.

Et quant à ce qui a esté objecté de ceste loy Romaine, la suite du texte nous en donne la solution: *Dum tamen per hoc non fiat contra Senatusconsultum*: c'est à dire, pourueu que cela se face, avec la permission du Prince, ou du Senat, suiuant cét ancien Arrest dont parle Tite Liue; lib. 9. *Ex auctoritate Senatus*, dit-il, *latum est ad populum, ne quis Templum, aram, & Collegium injussu Senatus dedicaret*: n'estant pas meismes permis de bastir aucun Temple, ny de faire aucune consecration, sans le consentement de tous les Ordres, suiuant l'ordonnance de la loy Papia.

Et certes, c'est avec raison que l'on doit tenir ceste maxime, non seulement pour l'intérêt qu'a le Roy & le public, d'empescher qu'on n'oste point du commerce les heritages où l'on veut edifier & doter de nouueaux Monasteres: Mais encore pource que l'Estat est priué de l'assistance, & du seruice que luy doiuent ceux qui s'y

118 DE LA SOUVERAINETÉ DU ROY,
retirent. C'est pourquoy l'Empereur Iusti-
nian limita le nombre des Clercs, & des
Prestres des Eglises, comme l'on void en
sa Nouel. 3. *Vt determinatus sit numerus clericorum*
maioris Ecclesie sanctissima, & ceterarum Ecclesia-
rum. Et les Empereurs Maurice, & Charle-
magne, passerent bien plus outre, lors qu'ils
defendirent estroittement, que personne ne
se rendist Moine, sans leur licence, & leur
congé, comme il se lit au liure premier,
chap. 120. des Capitulaires, dans Marcul-
phus, liure premier, chap. 19. & mesme dans
le Concile d'Orleans. 1. chap. 6. ce qui
dura iusques au temps de Hugues Capet.

qui donne la permission
de la permission

Mais ce qui doit obliger d'auantage les
Fondateurs des nouveaux Colleges, & Con-
gregations, à rendre ce deuoir à leurs Prin-
ces, c'est qu'elles se rendroient incapables de
receuoir aucuns immeubles, soit par con-
tract, ou par testament, si elles s'estoient
establies sans leur permission, comme il est
dit in l. *Senatus. ff. de rebus dubiis. & in l. omnibus.*
ff. ad Trebell.

Mon intention neantmoins, en écrivant
ces choses, n'est pas de restreindre ny de
blasmer la deuotion des hommes: car ce
seroit impieté; mais de faire cognoistre à
tout le monde que le Roy a esté porté par
de tres-iustes considerations à publier son

dernier Edict, par lequel il a reprimé l'immodéré zele, ou plustost l'ambition de plusieurs qui affectoient de se rendre Fondateurs de nouvelles Religions, sans prendre garde que leur nombre est monté à tel excez, que non seulement elles se ruinent d'elles-mesmes, à cause de la necessité qu'elles endurent, mais encore qu'elles destruisent & dépeuplent les anciens Monasteres, que l'on void maintenant abandonnez, & tous deserts; bien qu'autre-fois ils ayent seruy de retraite à vn nombre infiny de deuots personages, & aux plus sçauans hommes de toute la terre, ainsi que le remarque saint Basile, au liure de la vie solitaire: & d'où l'on tiroit, comme d'un précieux seminaire, les Euesques, les Archeuesques, & les autres Chefs de l'Eglise, comme saint Augustin nous l'enseigne en l'Epistre qu'il écrit à Aurelian.

Ioinct qu'il est à craindre que toutes ces diuerfes Congregations venans vn iour à se relascher de leur premiere ferueur, ne produisent des effects tous contraires à ceux que l'on attend maintenant de leurs nouvelles reformes. *Nihil enim in speciem fallacius est praua Religione*, dit ce Consul Romain, lors que par l'ordonnance du Senat il fit abolir la Compagnie des Bacchanales, à

120 DE LA SOUVERAÎNETÉ DU ROY,
cause des grandes impietez qu'ils commet-
toient dans leurs assemblées. Et comme il
arriua de ces Colleges & Congregations des
Pythagoriens, qui du commencement s'ac-
quirent vne grande reputation dans la Gre-
ce, & dans l'Italie : Mais puis apres ve-
nans à se corrompre, ils infecterent les
esprits de leurs disciples d'une si mauuaise
doctrine, que les Estats de ces deux Pro-
uinces coururent fortune de se perdre. Per-
sonne n'ignore l'Histoire des Templiers,
dont les commencemens furent admira-
bles en pieté, & en genereuses actions,
pour la defense de la Religion ; & la fin
tres-funeste ; s'estans puis apres portez à
toutes sortes de vices, & d'horribles abo-
minations, dont ils furent accusez & con-
uaincus au Concile de Vienne. Et tous
ces riches Monasteres, qui ont ancienne-
ment esté le domicile de la sainteté & de
la deuotion ; & que nous voyons main-
tenant tous desolez, par la vie libertine
& dissoluë des Religieux qui les habitent,
ne nous monstrent-ils pas, qu'il n'est rien
au monde plus inconstant & plus volage
que les resolutions des hommes, *Non sunt
stabiles qui seruiunt illi, & prauitatem inuenit in
Angelis suis.*

C'est pourquoy il est tres-important à
l'Estat,

l'Estat, que l'on ne puisse instituer aucune Religion nouvelle, ny bastir aucun Monastere, sans grande cognoissance de cause, & sans vne expresse permission du Roy, & qui soit encore verifiée au Parlement.

Du pouuoir qu'ont les Roys sur les benefices Ecclesiastiques, & de la Regale spirituelle dont ils iouïssent.

CHAPITRE XVI.



E n'est pas sans sujet, que plusieurs graues Autheurs ont mis nos Roys en parallele, avec les anciens Roys de Iuda: car comme ceux-cy n'estoient pas si tost consacrez, qu'ils receuoient de Dieu tant de dons & de graces particulieres, qu'ils sembloient estre changez en vne nature beaucoup plus releuée que la nature humaine. D'où vient que l'Ecriture remarque, qu'en mesme temps que Samuel eust épandu l'huile sacrée dessus le chef de Saül, que ce Prince fut remply de l'esprit de Prophetie, & que Dieu luy donna vn autre cœur: *Itaque cum auertisset humerum suum vt abiret à Samuele, immutauit ei Deus cor aliud.*

Q

De mesme nos Roys estans oincts en leur Sacre, de ceste miraculeuse liqueur que le Ciel leur a donnée, pour leur seruir en ceste action solennelle; ils sont enrichis par sa vertu de tant de faueurs extraordinaires, qu'ils semblent estre éleuez en vne condition toute diuine: Ils guerissent les maladies les plus fascheuses par leur seul attouchement; Ils sont tellement fortifiez de cœur & de courage, que par tout où ils paroissent, ils apportent la terreur à leurs ennemis. C'est pourquoy la Pucelle d'Orleans pressoit si viuement Charles VII. de se faire sacrer, luy ayant predit qu'il seroit beaucoup plus redouté de ses ennemis, après ceste ceremonie: ce qui parut estre veritable, par les grandes victoires qu'il emporta puis apres des Anglois.

X Et comme les Roys de Iuda auoient le pouuoir de regler les fonctions des Leuites, d'establir les Officiers du Temple, de iuger mesmes de la presceance entre les enfans d'Aaron: ainsi que nous lisons dans le premier liure du Paralipom. chap. 16. & 24.

De mesme nos Roys, en vertu de leur onction sacrée, qui les fait participans des prerogatiues des Ecclesiastiques; ils ont l'autorité d'ordonner de la Police de l'Eglise, comme nous auons dit cy-dessus,

d'empescher que personne n'entre dans les charges & les dignitez, par des voyes contraires aux saincts Decrets des Papes, & des Conciles : & mēme de pourvoir aux Benefices. Ce qu'ils font en trois façons : La première, quand vn Euesché est vaquant par la mort de l'Euesque : car les Roys ont droit de pourvoir aux Prebendes, iusques à temps que le siege soit remply, & c'est ce que nous appellons Regale spirituelle. La seconde, par la nomination qu'ils font au sainct Pere, des grandes dignitez de l'Eglise : Et la dernière, lors qu'ils y pourvoyent comme Patrons & Fondateurs : ce qui merite d'estre particulierement expliqué. Je parleray donc premierement de la Regale spirituelle, qui est vn droit qui appartient à nos Roys, à cause de la qualité d'Ecclesiastique, qui est vnée à leur dignité Royale.

C'est pourquoy il n'y a qu'eux dans leur Royaume qui iouissent de ce droit, & qui soient capables de l'exercer : car bien que les Regens ayent en toutes choses vne puissance souveraine : neantmoins pource qu'ils ne sont point sacrez, ils ne peuuent conferer les Benefices vaquans en Regale, comme il fut ordonné par la Cour de Parlement, quand elle verifia la Regence de Louyse de

126 DE LA SOUVERAINETE' DV ROY,
Benefices, fuiuant l'Ordonnance de Phi-
lippines de Valois, qui est conceüe en ces
termes: *Sufferentia non tollit Regalia quoad colla-
tionem beneficiorum.*

La cinquième, que ce droit de Regale
ne peut estre remis ny cédé à personne,
comme estant vn droit Royal, & si estroit-
tement attaché à la Couronne, qu'il ne
peut iamais en estre separé; D'où vient aussi
qu'il est appelé Regale, *regium*, pour mar-
quer son eminence sur tous les autres droits
de la Couronne.

La sixième, que la Regale ne reçoit point
la possession ciuile: c'est à dire, qui se prend
par procuration, pource que ce droit est
si noble, qu'il ne peut admettre aucune
fiction: & veut que la possession soit prise
reellement & de faict; bien qu'en toutes
les autres affaires on se puisse seruir du mi-
nistere de Procureur.

La septième est, que la Regale a lieu
tant que le Benefice vacque de droit, & de
faict, ou bien de l'un ou de l'autre seule-
ment.

La huitième, que le litige fait ouuer-
ture à la Regale: c'est à dire, que tant qu'il
y a procez à raison du Benefice, le Roy,
comme supérieur, y peut pouruoir; à l'exem-
ple de ce que nous lisons au droit Canon,

que pendant le procez sur le droit de Patronage, le superieur peut pourvoir, comme il est dit *in cap. quoniam. extra de iure patro.* Ce que l'on doit entendre, pourveu que le litige soit iuste: & *aduersus iniquum possessorem*, suivant ce que le Iurifconsulte a dit de l'appel frustratoire; qui ne peut profiter à celui qui l'a formé, *in l. fin. ff. de re iudicata*, & qui est repetée sous le tiltre, *De appellationibus.*

La neuvième, qu'il y a ouverture à la Regale, du iour qu'un Euesque a commis rebellion contre le Roy, au preiudice du serment de fidelité, qu'il luy a fait; pourveu que la rebellion soit notoire & publique, comme il a esté iugé par plusieurs Arrests de la Cour.

La dixième, que de deux pourueus en Regale le premier pourueu doit estre preferé, encores que le second eust pris possession, & non le premier; bien que l'on die vulgairement, que *Regalia in arca retenta nihil operatur*: car cela se doit entendre d'un long temps, & non de peu, comme il fut iugé sur mes Conclusions, par Arrest du mois de Iuin 1606. De sorte que c'est vne maxime, tant en matiere spirituelle, qu'en fait de breuets, & de donations emanées du Prince, que le premier en datte l'emporte.

128 DE LA SOUVRAINETE' DV ROY,
sans s'arrester à la possession : qui est une
exception perpetuelle de la loy *quoties. C. de
rei vindicat.* qui se doit restreindre, *in rebus
prophanis, & priuatis.*

L'onzième est, qu'en vertu de ce droit,
le Roy iouyt de tout ce dont iouïssoit le
dernier Euesque, excepté de la collation des
Benefices qui ont charge d'ames, comme
le definit *Ioannes Monachi*, bien qu'il eust
esté tres-grand ennemy des Regales : ad-
ioustant mesme, que le Roy, à cause de
son Onction sacrée, qui fait que ; *non est
merè laicus*, peut recueillir les dixmes dont
l'Euesque estoit en iouïssance.

La douzième est, que le Roy peut pour-
uoir en Regale, *spreto patrono Ecclesiastico*, à l'i-
mitation du Pape, pource que le Roy en
ceste matiere, *Papa vicem gerit.*

La trezième, qu'il n'y a que le Parle-
ment de Paris qui cognoisse des Regales, à
l'exclusion de tous les autres Iuges.

Et la dernière, que la Regale ne finit
qu'après que le successeur Euesque a fait
& presté au Roy le serment de fidelité : que
les lettres de main-leuée ont esté verifiées
en la Chambre des Comptes, & que son
mandement a esté enuoyé aux Officiers des
lieux, pour bailler main-leuée, comme nous
l'auons dit cy-deuant, lors que nous auons
parlé

parlé de la Regale temporelle: Je me contenteray d'auoir remarqué sommairement tous ces poinçts qui sont les plus importants de ceste matiere: car ce seroit chose superflüé d'en dire d'auantage, pource que plusieurs graues Autheurs en ont amplement discouru en des Traictez qu'ils ont expressement composez sur ce sujet.

De la Nomination que le Roy fait au Pape des premieres dignitez de l'Eglise.

CHAPITRE XVII.



E sçay que plusieurs mettent en auant, que le droit de Nomination, que nos Roys ont sur les Eueschez, les Abbayes, & les autres Benefices, qu'on appelle Consistoriaux, leur appartient de toute antiquité. Et que, pour preuue de leur dire, ils rapportent des exemples de plusieurs Euesques qui ont esté instituez & destituez par leur commandement: comme l'écrivent Gregoire de Tours, & Flodoart en ses Chroniques: & que les autres disent, que ce priuilege leur a esté concédé seulement du temps de Pepin, à qui le Pape Zacharie

R

130 DE LA SOUVERAINETE' DV ROY,
donna la puissance de pouruoir aux plus
hautes dignitez de l'Eglise: Mais ie ne puis
estre de leur aduis: car il est certain que nos
Roys n'ont eu ce pouuoir, que depuis le
Concordat que fit François I. avec le Pape
Leon X. en l'année 1516. Et ie ne me puis
persuader, que le Pape Zacharie aye iamais
accordé ce droit à nos Roys purement &
simplement, pour en vser absolument, &
tousiours, mais bien en de certaines occa-
sions, & en cas de necessité.

Et de faiët l'Abbé de Ferrieres en l'E-
pistre 81. qu'il écrit à Amulus, Archeuesque
de Lyon, parlant de ceste concession, vse
de ces termes: *Nam Pipinus à quo per Maxi-
mum Carolum, duxit Rex noster originem, exposita
necessitate eius Regni, Zacharia accepit consensum,
& acerbisati temporis mederetur*: D'autant qu'il
arriue souuent des rencontres d'affaires qu'il
est necessaire que les Roys y pouruoyent,
pour obuier aux dissensions, & aux trou-
bles, qui s'éleuent pour ce sujet dans l'E-
glise, comme il arriua à Constantinople,
apres la mort du Patriarche Sisinnius, où il
s'émeust vne telle sedition parmy ceux du
Clergé, sur l'élection d'un nouveau Patriar-
che, que l'Empereur fut contraint d'y pour-
uoir luy-mesme, pour appaiser toutes ces
querelles, comme le remarque Socrate, lib. 7.

cap. 29. La raison sur quoy ie me fonde est, que l'institution des Euesques & des Archeuesques, *iuris est merè diuini*, & que partant elle ne peut appartenir qu'à l'Eglise seule. D'où vient que l'Empereur Theodose estant supplié d'instituer de certains Euesques fit ceste modeste response: *Maior est hæc Prouincia, quam quæ viribus nostris sustineri possit*, comme dit Theodoret au liure quatrième de son Histoire Ecclesiastique, chap. 6. Et à ce propos, Cedrenus pag. 546. remarque, que plusieurs grands Prelats murmurèrent contre le Patriarche Alexius, iusques à le vouloir déposer, pour auoir esté créé & institué du seul mouuement de l'Empereur, sans les suffrages de l'Eglise.

Et pource que nous auons dit cy-dessus, que le Roy peut pouruoir aux Prebendes, à cause de son Onction sacrée; cela ne peut pas estre tiré en conséquence, pour les premières dignitez de l'Eglise, veu la grande difference qu'il y a des vnes aux autres, & que l'Euesque estant *Minister verbi, scientiæ custos, mediator Dei, magister pietatis & religionis, hic Princeps, hic post Deum terrenus Deus, & dignitate Dei cõonestatus*, comme il est dit au liure deuxième des Constitutions des Apostres, chap. 26. il merite d'estre institué par l'Eglise seule.

Ioinct que les anciens Chrestiens iugerent qu'il seroit dangereux de donner aux Princes vne puissance si absoluë sur les Benefices, qui pourroient en abuser, au grand preiudice de l'Eglise, comme fit autres-fois l'Empereur Iustin, qui vendit à vil prix, & à personnes indignes, les principales Prelatures; à ce que tesmoigne Nicephore Callixte, *lib. 17. cap. 33.* Car entre les Princes, aussi bien que parmy le reste des hommes, il s'en rencontre tousiours de bons & de mauuais.

L'estime donc que ce droit de Nomination, qui appartient à nos Roys, vient proprement de ce qu'auparauant le Concordat, ils auoient accoustumé de confirmer les élections des Prelats & des Euesques: car c'estoit l'ancienne Coustume de l'Eglise, que le peuple & le Clergé estans assemblez, ils éliisoient leurs Pasteurs, selon l'exemple que leur auoient donné les Apostres, & comme Iustinian l'ordonna par sa Nouel. 123. Ce qui se pratiquoit particulièrement en ce Royaume. D'où vient que le Pape Celestin écriuant aux Euesques de France, leur disoit: *Cleri electio, plebis & ordinis consensus, & Principis desiderium requiratur in ordinationibus Episcoporum & Sacerdotum*; C'est ce que nous enseigne amplement la Pragmatique

Sanction, qui fut publiée en suite du Concile de Basse.

Mais comme toutes choses degenerent de leur premiere perfection ; & qu'il n'est rien au monde de si saint, ny de si sacré, que l'ambition des hommes ne corrompe avec le temps : Aussi depuis que l'on eut recogneu que l'on ne procedoit plus à ces élections que par brigues, par faueur, & le plus souuent par violence : comme le remarque Amnian Marcellin en son liure vingt-septième, quand il rapporte, qu'en l'élection de Damasus il y eut cent trente-sept hommes tuez dans l'Eglise : Et Ruffin au liure onzième, chap. ii. recite qu'en l'élection d'un Euesque de Milan, il survint parmy le peuple vne telle sedition, que la ville fut presque toute ruinée : *Dissentio*, dit-il, *gravis & periculosa, vrbi propria maturum parabar exitium* ; l'on abolit peu à peu l'usage de ces élections en France, pour ce qui estoit des Eglises Metropolitaines, Cathedrales, & Conuentuelles, reserué de quelques-vnes, qui furent exceptées par les Ordonnances. Le succez de ces élections, s'estant par experience trouué le plus souuent incertain, n'estant fondé que sur l'aveugle iugement des hommes, qui se trompent d'autant plus lourdement en leur chois.

134 DE LA SOUVERAINETÉ DV ROY,
que Dieu mesme se repentit de l'élection
qu'il auoit faicte de Saul : comme le rap-
porte sainct Hierome en l'Epistre 48. où il
excuse l'Euesque qui auoit conferé le Dia-
conat à Sabīnīan : *Nec mirum quamuis sanctum*
hominem , tamen in homine deligendo potuisse falli ,
cum & Deum pœniteat , quod Saul in Regem vnxe-
rit. De façon que pour ces raisons conside-
rables, les élections estans ostées, nos Roys
au lieu du droit qu'ils auoient de les con-
firmer, ils ont maintenant en suite des
Concordats, le pouuoir de nommer aux
Eueschez ceux qu'ils veulent.


Et bien que cela appartienne au Pape,
iure proprio, comme il est dit in C. *Imperator*,
dist. 96. non à legibus publicis , non à potestatibus
saeculi , sed à Pontificibus , Deus voluit Christianae
Religionis Sacerdotes & Clericos ordinari & discuti.
Neantmoins ils ont agreable que nos Roys
vsent de ce droit, à l'exemple de sainct
Pierre, de qui sainct Iean Chrysostome, au
Discours qu'il fait de l'élection de sainct
Matthias, & de sainct Barnabé, disoit : *Quida*
an non licebat ipsi Petro eligere ? Licebat , & quidem
maximè , sed id non fecit , ne cui videretur gratificari.
Et pour le regard des Prelatures, & des
Abbayes, qui ont esté exceptées par les
Concordats, & qui sont demeurées electi-
ues comme deuant, le Roy s'est encore

retenu le doit qu'il auoit de les confirmer, & d'en donner son Breuet, sur lequel le Pape donne ses Bulles de prouision, & non autrement: Mais parlons maintenant de la troisiéme espece des Collations Royales.

De la Collation des Benefices qui appartiennent au Roy, comme Patron & Fondateur.

CHAPITRE XVIII.



 E troisiéme droit de qui nous allons parler en ce Chapitre, est d'autant plus recommandable que les deux autres, dont nous auons traité cy-dessus: que ceux-là n'appartiennent à nos Roys, qu'à cause de l'autorité que leur donne leur Couronne sur les Benefices: mais quant à ce dernier, ils se le sont acquis eux-mesmes par leur pieté & leur magnificence enuers l'Eglise: car estans touchés du mesme sentiment que Theodoric, Roy d'Italie, qui disoit ordinairement, dans Cassiodore, que plus les Roys estoient éleuez au dessus de leurs subjects; & plus ils estoient obligés de se monstrier deuotieux enuers la Majesté diuine: *Tanto diuinitati plurima debemus, quanto ceteris mortalibus maiora suscepimus.*

R. iij

Nam quid simile rependat Deo, qui potitur imperio?
 pour n'estre pas ingrats envers Dieu, de tant
 de faueurs extraordinaires qu'ils reçoient
 tous les iours de sa main liberale : Ils ont
 fondé plusieurs Maisons religieuses ; afin
 qu'on y chantast incessamment les loüan-
 ges de la diuine bonté, & qu'on la priast
 de continuer d'espandre ses graces & ses
 benedictions sur ce Royaume. Dequoy l'E-
 glise s'est sentie tellement obligée, que pour
 recognoistre tant de tesmoignages de pieté
 & de deuotion, elle leur a permis de con-
 ferer les Benefices qu'ils auoient si liberale-
 ment fondez & bastis. C'est de là que tire
 son origine ce droit de Collation & de Pa-
 tronage qui appartient à nos Roys, dont
 ils iouyssent avec beaucoup plus de prerogati-
 ues & d'auantages que les autres par-
 ticuliers fondateurs. D'autant que ceux-cy
 ne peuuent que presenter au Collateur or-
 dinaire, mais le Roy confere absolument
 & de plain droit, à cause du concours de
 ces deux qualitez, d'Ecclesiastique & de Pa-
 tron, qui se retrouuent en sa personne : ce
 que l'on doit seulement entendre des Be-
 nefices simples, comme il est dit au chap.
Dilectus de prab. & non pas des Eueschez, &
 des Prelatures : pource que les Roys n'en
 ont que la simple Nomination au Pape, dit
 le chap.

le chap. *Nobis*, de iure patron. & le chap. *Sacro-sancta*, & le chap. *Cum terra*, de electio.

Et bien qu'anciennement l'on tint pour vne maxime certaine, que le droit de Patronage appartenant au Roy, ne se pouuoit aucunement ceder ny transporter à vn autre : neantmoins comme la necessité ne laisse rien qu'elle n'attaque dans les Estats, & ne luy face ressentir les effects de sa rigueur: Aussi voyons-nous qu'on s'en est aucunement départy, pour ce qui est des Benefices simples, d'autant que maintenant en toutes les alienations des terres domaniales, on y comprend le droit de Patronage: Toutesfois ie n'estime pas que les acquereurs puissent conferer de plein droit, comme le Roy: mais seulement presenter à l'Ordinaire. Et pour ce qui est des Eueschez & des Abbayes, soit de fondation Royale, ou non, qui sont encloses dans les terres & les seigneuries, qui ont esté données en appennage: Il n'y a que le Roy qui aye le droit d'y pouruoir: car leur Nomination est tellement attachée à la Couronne, qu'elle n'en peut estre aucunement separée. Ce que nous voyons auoir esté perpetuellement obserué, specialement depuis qu'on a reconnu la faute que firent les Roys de la premiere & seconde lignée, de partager le

138 DE LA SOUVERAINETÉ DU ROY,
Royaume, avec vne attribution à chaque
lot, de tous les droits de Souueraineté.

D'auantage, on doit remarquer que ce
droit de Fondateur & de Patron est si pri-
uilegié en la personne du Roy, qu'on pre-
sume tousiours que toutes les Eglises sont
de fondation Royale, s'il n'apparoist du
contraire, ce que l'on doit verifier par écrit,
comme le desire le Concile de Trente, Sess.
25. chap. 9. Et bien que par la disposition du
droict Canon, le fondateur doieue par l'acte
de sa fondation se reseruer expressément le
droit de Patronage: & qu'autrement il ne
peut plus le pretendre, comme il est dit *in*
cap. Nobis. de iure patronatus. Neantmoins pour
ce qui est du Roy, il suffit de monstrier que
c'est luy qui a fondé, basti & doté l'Eglise,
pour se l'attribuer, comme le dit l'Abbé
Panorme, sur le ch. f. *de iure patro*.

Le Roy a aussi ce priuilege, que ny le
Pape, ny aucun autre Collateur, ne peut
pouruoir aux Benefices, qui sont en son
Patronage, ny créer dessus aucunes pen-
sions, sans son exprez consentement, comme
dit le mesme Panorme, *in cap. suggestum. de iure*
patro. si ce n'est qu'au veu & sceu du Roy,
& de ses Officiers, la pension aye esté payée
par vn long temps: car alors l'on presume
que le Roy l'a eu pour agreable: par l'argu-

ment que l'on tire d'ordinaire de la loy *ſi filius. C. de petit. hered.* comme la Cour de Parlement l'a iugé ſur mes Concluſions, en l'un & en l'autre cas.

En fin il ſera obſervé, pour vne marque de l'ancienne pieté de nos Roys, qu'aux Eglifes ſuperieures, dont ils ſont Fondateurs & Patrons, ils veulent eſtre enrollez au nombre des Chanoines; & anciennement ils ſe veſtoient d'un ſurplis, & prenoient place dans le chœur avec eux, pour y faire le ſervice diuin: iuſques là meſmes, qu'ils receuoient les diſtributions manuelles, & les fruits de leur prebende, comme nous l'enſeignent les Regiſtres Capitulaires de l'Egliſe de ſainct Martin de Tours, d'Angers, du Mans, & de quelques autres.

Mais outre ces droits, il y en a encores vn autre, que le Roy pretend auoir ſur les Prebendes des Eglifes Cathedrales, qui eſt de pourvoir à la premiere qui vient à vaquer, apres ſon ioyeux aduenement à la Couronne: On le fonde, non ſur vn droit de Patronage particulier, mais ſur ce que le Roy eſt Protecteur & Deſenſeur vniuerſel de toutes les Eglifes. Les Anciens appelloient ce droit, *Primarias preces*: comme le remarque Speculat. in tit. de *Præbendis. §. reſtat*, pource que du commencement ils ne con-

140 DE LA SOUV. DV ROY, LIV. I. CH. XVIII.
feroient point : mais ils prioient seulement les Euesques de conferer à ceux qu'ils leur nommoient. Cét Autheur remarque encore, que ce mesme droit fut accordé par le Pape à l'Empereur; & ie croy qu'il n'a esté introduit en France, que sur cet exemple, comme Boërius le remarque en sa Decision 22. Et de faict, ce n'est que depuis peu de temps, que le Parlement de Paris a receu ceste espece de collation : n'estimant pas qu'il fust raisonnable d'entreprendre sur l'Eglise par ceste nouveauté : mais depuis ce droit s'estant affermy par le temps, & par le consentement des Eglises, & ayant esté autorisé par des Lettres Patentes, qui l'ont restraint aux Eglises Cathedrales, il est maintenant en vsage: estant vne reigle approuuée de tous les Canonistes, que *Reges ex longissima possessione*, peuuent conferer les Benefices Ecclesiastiques, dit le Specul. rit. de leg. §. nunc tractemus.





DE LA
SOVVERAINETE'
DV ROY.

LIVRE DE V X I E S M E.

*Qu'il n'y a que le Roy seul qui puisse instituer des
Officiers, & donner des commissions
extraordinaires.*

CHAPITRE PREMIER.



NRE les marques de la
Souueraineté parfaite &
absoluë, la plus noble & la
plus importante à l'Estat,
est celle de pouuoir instituer
les Officiers. C'est pourquoy
les Princes souuerains ont de tout temps
aussi soigneusement chery le droit de con-

142 DE LA SOUVERAINETE' DV ROY;
ferer les charges & les dignitez de leur
Empire, que leurs subjects ont esté ambi-
tieux d'auoir le bon-heur dè les posseder.

De faict, lors que le peuple Romain
auoit la puissance souueraine; il se monstra
si ialoux de ceste prerogatiue, que personne
ne pouuoit estre pourueu d'aucun office,
que par son ordre: D'où vient qu'Asconius
appelle les Magistratures & les principales
dignitez de l'Estat, *Mera populi beneficia*: Et
depuis que le commandement souuerain
fut transmis aux Empereurs: la premiere
chose qu'ils affectionnerent avec plus de
passion, ce fut de s'attribuer la puissance de
pouruoir aux plus eminentes charges de
l'Empire: Ce que nous tesmoigne le Ju-
risconsulte Modestin, in *l. vnica. ff. ad legem
Iuliam de ambitu*, lors qu'il dit: *hac lex hodie in
vrbe cessat, quia ad curam Principis Magistratum
creatio pertinet, non ad populi fauorem*: En quoy
ils se rendirent si absolus, & si souuerains,
qu'ils punissoient comme sacrileges ceux
qui disoient la moindre chose contre la
creation & l'institution qu'ils auoient faicte
de quelqu'un; bien qu'il fust indigne de la
charge où ils l'auoient eleué, comme il est
dit en la loy *disputare. C. de crim. sacrilegij*: &
plus particulièrement en la loy *5. C. de diuersis
rescri. sacrilegij instar esse dubitare an is dignus sit,*

quem elegeris Imperator: Ce qui donne d'autant plus de sujet d'estonnement, qu'ils succedoient à vne Republique, qui fut si scrupuleuse en l'élection de ses Magistrats, qu'elle ne crea iamais aucun Officier d'importance, que sa vie, ses mœurs, & sa capacité n'eussent esté deuant approuuées par le iugement des Consuls, & de l'Assemblée generale du peuple: Et que mesmes on n'eust consulté les Augures, pour sçauoir si son administration seroit vtile & profitable au public: Mais les Empereurs se porterent à ceste rigueur, par la ialousie qu'ils auoient de conseruer ce droit, ne pouuant souffrir que personne prist la hardiesse de controler en cela leur puissance, & leurs volontez.

Et quant à ce Royaume, nos Roys n'ont pas esté moins affectionnez à la conseruation de ceste prerogatiue que les Empereurs Romains: car ils l'ont tousiours chérie comme vn des plus nobles fleurons de leur autorité souueraine: Nos Annales nous apprennent, que du commencement ils distribuoiēt les charges en forme de commissions annuelles, afin de les pouuoir plus facilement changer ou supprimer si elles se trouuoient dommageables au public: *Et ne quis diuturna potestate insolesceret*, comme parle

144 DE LA SOUVERAINETE' DV ROY,
Tâcite. Depuis ils les donnerent, sans limitation de temps, reuocables toutesfois à leur volonté. En apres ils les confererent en tiltre d'Office : neantmoins avec ceste mesme condition, pour tant qu'il leur plairoit : Mais pource qu'on leur fit entendre que ceste condition estoit contraire à la prouision qu'ils donnoient en tiltre, qui de sa nature auoit traict perpetuel, ils trouuerent bon que personne ne peust estre depossédé de sa charge, qu'en trois cas : Sçauoir est, de mort, de resignation & de forfaiture ; & ce fut le Roy Louys XI. qui fit le premier ce Reglement, par son Edict de l'an 1464.

Les mesmes Annales nous enseignent encore, que durant quelques siecles l'on a pratiqué l'ysage des élections en ce Royaume, & que nos Roys ne donnoient aucune prouision, si ce n'estoit à ceux qui auoient esté élus à la pluralité des voix, & que d'ordinaire ceste election se faisoit de deux ou de trois ; qui puis apres estoient presentz au Roy, pour faire le choix de celuy qui luy plairoit ; Je me souuiens d'auoir veu dans les anciens Registres de la Cour, que quelques-fois le billet de ceste presentation contenoit le nombre des voix que chacun auoit eu : Et que lors que les voix estoient égales

égales en nombre, de peur que de l'ordre de l'écriture le Roy ne tirast quelque presumption de preference, pour celuy qui seroit le premier nommé, ils écriuoient leurs noms en vn rond, & comme dans vn cercle, afin qu'il ne fust point preuenue, & que son choix fust plus libre.

Ce qu'ils auoient appris de Iustinian en l'Auth. *de defensorib. ciuic.* au §. *Interim*, où il veut que la mesme chose s'observe en l'élection des Escheuins des villes : Et le Docteur Felinus fait mention de ceste Coustume sur le chap. *Cum dilecta. de rescriptis*, où il raconte, que le Pape Urbain ayant commandé aux Cordeliers, de luy donner les noms des plus celebres de leur Ordre, pour en faire vn Cardinal, ils luy en presenterent trois, dont les noms estoient écrits, *In forma sphaera, ne in ordine cognosceret, quem illi digniorem iudicaret*, mais que le Pape s'estant piqué de ceste procedure, leur dit : *Ordinem perueristis, & ego ordinem peruertam* : Et qu'il en choisit vn autre que celuy qu'ils luy auoient présenté : à quoy se peuuent rapporter ces vers du Poëte Aufone :

*Recta olim ineptum, Delphicus lusit Deus
Quarentem quisnam primus sapientum foret,
Vt in orbe tereti, nomen incertum incideret,
Ne primus esset, ne vel imus quispiam.*

T

Mais depuis, nos Roys s'estans persuadez que l'on ne procedoit plus à ces élections avec la sincerité que l'on auoit accoustumé d'observer en telles actions, & que tout s'y faisoit par brigue & par faueur; ou bien s'estans apperceus que cela diminueoit leur puissance souueraine, & leur ostoit le moyen de gratifier ceux que bon leur sembloit: & pour retrancher aussi les entreprises de plusieurs Magistrats qui s'estoient attribuez le pouuoir de créer & d'instituer les Officiers qui leur estoient subalternes, ils les defendirent, & les reuoquerent; & voulurent que la creation & l'institution de toutes sortes d'offices dependissent absolument de leur autorité. De façon qu'il n'y a plus maintenant que le Gouverneur du Dauphiné, qui ayt la puissance de pourvoir à tous les anciens Offices de la Prouince, excepté à ceux du Parlement, de la Chambre des Comptes, des Generaux & Tresoriers de France: aussi n'est-il point de Gouverneur dans le Royaume, qui aye tant d'autorité dans son Gouvernement, veu mesme que les Arrests sont intitulez de son nom, & qu'il a la preface au Parlement: mais bien qu'il iouisse de toutes ces prerogatives par vne ancienne concession des Roys, il seroit neantmoins à desirer, que sa puissance

fust reſtreinte, ſelon l'ordre qui ſ'obſerve en toutes les autres Prouinces, afin que l'autorité ſouueraine du Roy fuſt par tout également conſiderée.

Et comme ces élections ſeruoient d'une pieuue aſſeurée de la capacité, de la vie, & des mœurs de ceux qui eſtoient élus, ils eſtoient auſſi receus au ſermēt ſans autre information ny examen : Mais à preſent que cet ordre eſt changé, ceux qui ſont pourueus de quelque charge ne ſont point receus en leur exercice, ſ'ils n'ont auparauant eſté interrogés, & preſté le ſerment par deuant ceux qui les doiuent recevoir. Et ie diray en paſſant, que bien que depuis quelque temps, les premiers Preſidens des Parlemens facent le ſerment entre les mains du Roy, lors qu'ils reçoient de ſa Maieſté leurs prouiſions : Néantmoins il a ſemblé à pluſieurs, qu'il euſt eſté meilleur de demeurer dans l'ancienne forme, & de ſe contenter qu'ils le preſtaſſent ſeulement au Parlement, apres que l'information de leur vie & mœurs a eſté veüe par la Cour : d'autant que ceſte repetition de ſerment ſemble arguer de défaut & de manquement celuy qu'ils ont preſté entre les mains du Roy : car de dire qu'ils le font à condition de le réitérer encore une fois, c'eſt mal en-

148 DE LA SOUVERAINETE' DV ROY,
tendre l'energie des actes legitimes, qui ne
reçoivent ny iour ny condition : mais qui
acquierent leur perfection en vn instant,
specialement lors qu'ils se passent en la pre-
sence du Prince, dont l'autorité supplée à
toutes les formes qui sont requises pour
les rendre authentiques. Je sçay que quel-
ques Officiers de la Couronne, & les Gou-
verneurs des Prouinces font double ser-
ment, l'vn au Roy ; & l'autre au Parlement,
mais ils ne font ce dernier, qu'à cause de
la Iustice qu'ils exercent, dont les appella-
tions se releuent à la Cour, & pour les obli-
ger à ne rien entreprendre sur la Iustice or-
dinaire : ce qu'on ne peut dire des premiers
Presidens, qui n'ont point de Iurisdiction
separée de celle du Parlement : Toutesfois
cela depend de la volonté du Prince, qui
ordonne de toutes choses, comme il luy
semble estre le plus à propos.

Or d'autant qu'il y a principalement de
trois sortes d'Officiers, dont le Roy se sert
en l'administration de son Royaume, sça-
uoir est de Iudicature, de la Guerre, & des
Finances, ie traiteray separément en quoy
consistent leurs fonctions, pour monstrier
qu'elles dependent absolument de son au-
thorité souueraine. Mais auant que de pas-
ser outre, il me semble qu'en suite de ce

Discours ie suis obligé de parler aussi des commissions extraordinaires ; pource que c'est vn droit de la Souueraineté, qui prend sa source de celuy qui donne le pouuoir aux Roys d'instituer tels Officiers que bon leur semble.

Ie sçay que par l'Edict de Blois, Article XC VIII. l'on peut inferer que le Roy s'est lié les mains, pour ne plus donner de telles commissions, voulant que chaque matiere soit renuoyée aux Officiers qui en doiuent naturellement cognoistre. Mais il n'a entendu les defendre que pour les affaires priuées, & qui ne vont qu'à l'intérêt des particuliers ; pource qu'en ces occasions il n'est pas raisonnable de rien changer dans l'ordre qui a esté estably par l'usage & par les Ordonnances : & non pas quand il s'agit des affaires publiques, & qui touchent l'État : car c'est, sans doute, que puis qu'il s'en est reserué la cognoissance, suiuant l'Edict de Charles VIII. qu'il peut commettre telles personnes que bon luy semble pour en cognoistre : ce qui a esté introduit sur l'exemple du droit Romain, qui mettoit difference entre les affaires qui tomboient dans la Iurisdiction ordinaire, & celles qui regardoient le public : pource que la cognoissance de celles-là appartenoit

150 DE LA SOUVERAINETE' DV ROY,
aux Officiers, *iure Magistratus* : & la cognoif-
fance de celles-cy, à *lege tantum*, vel à *Principe*
dabatur : c'est à dire, par commission, & l'a-
dresse s'en faisoit indifferemment, *sive Ma-*
gistratui, *sive priuato*. Dequoy l'on peut voir
quelques vestiges dans la loy 3. §. 1. & dans
la loy 4. ff. de *Officio Praefecti Vigil*. Ce qui est
amplement expliqué par le Docteur Cujas
sur la loy *Nemo*. ff. de *Regulis iuris*. Et nos an-
ciens Roys en vïoient ordinairement de la
sorte, comme ie le monstrey au Chapitre
suiuant, quand ie parleray de *Missis Domi-*
nici : & au Chapitre des Offices Militaires.


Or en ces commissions l'on doit obser-
uer deux choses : La premiere, qu'il est ne-
cessaire qu'elles contiennent nommément
tout le pouuoir que le Roy donne aux
Commissaires ; & personne de quelque qua-
lité qu'il soit, ne peut empescher leur execu-
tion, ny les reuoker, ny les restreindre
sans bleïser l'autorité Royale. Il suffit seu-
lement qu'elles soient publiées & notifiées.

La seconde, qu'il y a de deux sortes de
commissions : l'une qui est perpetuelle, &
qui attribüe aux Commissaires rang & digni-
té pour tousiours, comme on le void aux
Gouuerneurs des Prouinces, aux Conseillers
& Secretaires d'Estat, qui mesmes ont droit
de se qualifier Cheualiers. L'autre, qui n'est

que pour vn temps, & pour l'expedition de certaines affaires : Et celle-là, bien qu'elle donne aux Commissaires vn rang plus releué que n'auoient les Officiers dont ils exercent les charges durant leur interdiction, pource qu'ils representent plus particulièrement la personne du Prince, au nom duquel ils agissent, & que c'est vne maxime du droict Canon, que, *Omnis delegatus maior est ordinario in re delegata*, dit le chap. 11. *Sanè. de Offic. delegari.* Et le chap. *Pastoralis. §. fin. de Offic. Ordinarij.* Toutesfois si tost qu'ils ont accompli leur commission, ils deuiennent personnes priuées, comme ils estoient auparavant.

Des Offices de Judicature.

CHAPITRE II.

 O MME la plus importante fonction des Roys est de rendre la Iustice à leurs peuples, & que pour ce sujet ils sont appelez Iuges dans les Liures sacrez, & dans Homere, Δικαστοί. Aussi ne doiuent-ils rien rechercher avec plus de passion, que de se rendre recondmādables par ce saint exercice, & de s'acquies le glorieux

152 DE LA SOUVERAINETE' DV ROY,
titre de Iuste: car ils ne peuuent s'enrichir
d'une qualité, qui releue d'auantage l'éclat
de leur Majesté Royale, qui leur concilie
plus promptement la bien-vueillance de
leurs subjects, qui leur donne plus d'autho-
rité, & qui affermisse plus puissamment
leurs Couronnes sur leurs testes, que l'a-
mour de la Iustice: d'autant que, comme
dit le Sage: *Rex qui sedet in solio iudicij dissipat
omne malum intuitu suo.* C'est pourquoy l'Em-
pereur Auguste, qui a esté le plus aisé Prin-
ce de la terre, voulant gagner les cœurs &
les affections du peuple Romain, & asseurer
l'Empire à sa posterité, se rendit tellement
assidu aux Audiences des plaidoyries, qu'il
passoit les iours & les nuits à escouter les
plaintes de ses citoyens. L'on raconte la
mesme chose de Philippe Roy de Macedoi-
ne, & de l'Empereur Claudius, qui mesme
aux iours de Festes donnoient audience à
tous ceux qui leur demandoient iustice.
Celuy qui a écrit la vie de Charlemagne,
entre les belles actions qu'il rapporte de ce
grand Prince, releue d'un particulier coloris
la patience qu'il auoit d'entendre les cau-
ses des moindres de son peuple. Et nostre
Histoire élue iusques au Ciel le zele qu'a-
uoit saint Louys à la defense de la Iusti-
ce: & recommande particulièrement Char-
les

les VIII. à cause du facile accez qu'il donnoit à tous ceux qui auoient des plaintes à luy faire de l'injustice des Officiers. Et l'on peut dire avec verité qu'il n'y a iamais eu de Monarchie au monde, où les Roys se soient plus affectionnez à rendre la iustice à leurs peuples, ou qui ayent eu plus de soin de la faire sainctement exercer que les nostres. Car nous voyons que de toute antiquité ils ont esté curieux d'y commettre les plus signalez personnages de leur Royaume, tant en autorité, qu'en probité de mœurs. Et que c'estoient les Ducs qui auoient premierement ceste charge, comme nous l'apprenons des formules du Moine Marculphus, lors qu'au liure premier, chapitre huietième, il dit: *Non facile cuilibet iudiciariam conuenit committere dignitatem, nisi prius fides, seu strenuitas videantur esse probata: Ergo dum & fidem & virtutem tuam videmur habere comper- tam, tibi actionem ducatus & patriciatus in pago illo, quem antecessor tuus ille, vsque nunc visus est egisse, tibi ad agendum regendumque commisimus.*

Et sous les Ducs il y auoit des Comtes, qui estoient les Iuges ordinaires dans leurs destroits, comme nous en auons vn tesmoignage dans Gregoire de Tours, lors qu'il parle de sainct Nicaise: *Nam vidi ego quodam tempore Basilium presbyterum missum ab eo,*

154 DE LA SOUVERAINETE' DV ROY,
*ad Amentarium Comitem, qui Lugdunensem urbem
 his diebus potestate iudiciaria gubernabat: Et ailleurs
 encore, où il fait mention de Sainct Gre-
 goire, Euesque: In Comitatu positus (inquit)
 regionem illam per quadraginta annos iustitia comi-
 tante correxit: Et la difference qu'il y auoit
 entre les Ducs & les Comites, est remarquée
 par Vvalafridus Strabo, lequel au liure qu'il
 a laissé, touchant les choses Ecclesiastiques,
 chap. 31. compare les Comtes aux Euesques,
 & les Ducs aux Metropolitains; Ces Com-
 tes auoient des Vicaires, qui iugeoient les
 causes du commun peuple, de qui le Con-
 cile de Chalons, qui fut tenu du temps de
 Charlemagne, fait mention: Comitibus, &
 Iudicibus hoc summopere obseruandum est, vt iuste iu-
 dicent. Et peu apres: Sed & Ministros, quos
 Vicarios & Centenarios vocant, iustos habere debent:
 Ils ne cognoissoient que des matieres pures
 personnelles, & non pas des crimes où il
 écheoit peine de mort, ou de la perte de la
 liberté, comme nous l'apprenons des Ca-
 pitulaires de Charlemagne, lib. 4. cap. 26. où
 il est dit: Omnis controuersia coram Vicario aut
 centenario definiri potest, excepta redditione terra, &
 mancipiorum, quod non nisi coram Comite fieri po-
 test. Et encore au liure troisiéme, chap. 79.
 Vt nullus homo in placito Centenarij, neque causa ad
 mortem, neque ad libertatem suam amittendam indi-*

centur, sed ista in praesentia Comitum, vel missorum nostrorum indicentur.

Ce qui fait voir qu'outre les Ducs, les Comtes, & les Centeniers: les Roys auoient accoustumé d'enuoyer des Commissaires extraordinaires, qu'ils appelloient *Missos Dominicos*, pour corriger les fautes & les abus que l'on commettoit en l'exercice de la Iustice dans les Prouinces, & dans les villes. D'auantage, ces Comtes auoient pour Assesseurs les Escheuins des villes, qu'ils apelloient *Scabinos*. Toutes ces charges n'estoient alors que de simples commissions, qui estoient reuoquables à la volonté du Prince: car elles n'ont esté hereditaires, comme ils sont à present, que depuis ceste derniere lignée de nos Roys; aussi sont-ils demeurez sans aucune fonction publique, si ce n'est qu'ils ayent la dignité de Pairs de France: car en ceste qualité ils assistent le Roy, lors qu'il tient son liét de Iustice, pour iuger des autres Pairs, ou deliberer d'autres plus grandes affaires du Royaume.

Ce seroit vn labeur inutile, de descrire par le menu, comme nos Roys ont changé la face de toute ceste ancienne Police: veu que plusieurs autres en ont amplement traité: Il me suffira de dire que l'on a fait ce changement en vn ordre beaucoup meilleur,

156 DE LA SOUVERAINETE' DV ROY,
& plus splendide. Car est-il rien de plus auguste, & de plus venerable, que le Parlement de Paris, & tous les autres qui ont esté establis sur son exemple? Est-il rien qui represente avec plus de lustre & de splendeur la majesté de la Iustice? Y eust-il iamais au monde vne plus celebre Compagnie de Iuges, & qui ayt esté en plus grande reputation de sincerité, de doctrine, & d'experience? Aussi voyons-nous par nos Histoires, & par les anciens Registres de la Cour, que plusieurs Princes estrangers ont autre-fois choisy ce Parlement de Paris, pour estre les Iuges & les Arbitres de leurs plus importantes affaires, comme fit l'Empereur Federic II. au differend qu'il eut avec le Pape Innocent IV. le Comte de Namur, avec Charles de Valois; Philippes de Trente, avec le Duc de Bourgogne: le Duc de Lorraine, avec Guy de Chastillon: le Duc de Sauoye, avec le Dauphin: le Roy de Castille, avec le Roy de l'ortugal; & plusieurs autres: qui est vn tres-grand honneur à la France, & dont l'éclat rejaillit mesme sur la personne de nos Roys.

Ces Parlemens ont sous eux les Baillifs & les Seneschaux, pour les tenir en deuoir, & les reprendre, s'ils viennent à manquer

en leurs Jugemens , & en tout le reste de leurs charges : comme aussi les Parlemens ont sur eux le Roy, assisté de son Chancelier, & de son Conseil d'Estat, pour en recevoir la correction, si en quelque chose ils outrepassent la puissance qui leur a esté donnée, ou s'ils viennent à faire chose qui soit contraire au bien du service de sa Majesté, & à l'utilité du Royaume. Peut-on voir vn plus bel ordre, & vne police mieux réglée en aucun lieu de cét vniuers, spécialement en l'establissement de ce Conseil d'Estat, qui est diuisé comme en deux Chambres, dont la premiere est celle que l'on appelle Conseil Priué, & qui est establie pour recevoir les plaintes des oppressions & des tyrannies, que l'on exerce sur le peuple dans les Prouinces; à quoy ny les Iuges ordinaires, ny les Parlemens ne peuuent, ou negligent de donner ordre; pour iuger des differends qui arriuent entre les Cours souveraines, pour conseruer les droits & l'autorité de la Couronne, pour cognoistre des euocations en d'autres Parlemens, pour ordonner sur les Reglemens de Iuges, pour cognoistre de la direction des Finances, pour auoir l'œil sur les Baux à fermes des reuenus du Royaume; & pour d'autres semblables matieres dont ellè a la cognois-

158 DE LA SOUVERAINETE' DV ROY,
fance. La seconde, est celle que l'on appelle
proprement le Conseil Estroit, qui ne se
tient que dans le Cabinet, & en la presence
du Roy, où n'entrent que les principaux
Ministres de l'Estat, que l'on peut nommer
avec Tertullien, *Imperij Antistites, Ministros,*
& Tutores Legum. Et qui sont semblables à
ceux que l'Escripture sainte appelle, *Assisten-*
tes Regis, qui estoient tousiours aupres des
Roys de Iudée, pour leur donner conseil
en leurs plus importantes affaires, & sur
qui presidoit celuy que la mesme Escripture
appelle, *Amicum Regis*, id est, *primum ad manum*
Regis: estant la coustume des grands Prin-
ces d'auoir tousiours vn confident, dans le
sein duquel ils puissent mettre comme en
depost leurs plus secrettes pensées. Et c'est
dans ce Conseil que l'on traite des plus
grandes affaires du Royaume, comme de la
Paix & de la Guerre: C'est là où le Roy
donne Audience aux Ambassadeurs, où l'on
delibere sur les Responces qu'on leur doit
faire; où l'on arreste l'estat-general de tou-
tes les Finances du Royaume; où l'on de-
libere sur les Declarations que l'on fait con-
tre ceux qui brassent des menées secrettes
contre sa Personne, & contre l'Estat; où
l'on reçoit les auis de tout ce qui se passe,
soit dans les pays estrangers, soit dans les

Prouinces du Royaume ; où l'on lit les dépesches des Ambassadeurs , & où on leur donne l'adresse comme ils se doiuent conduire en leurs Ambassades ; où l'on donne conseil aux Roys d'establir de bonnes & sainctes Ordonnances , & de reuoquer les mauuaises. Ce qui monstre assez , qu'il n'y a point de Compagnie dans l'Estat , qui soit plus vtile ; & de qui la Iustice se puisse promettre vn plus puissant secours contre l'oppression des Grands : Mais il seroit necessaire que nos Roys fussent soigneux de la remplir tousiours de personnes de probité , & de suffisance : & qu'ils se missent deuant les yeux l'exemple de l'Empereur Adrian, *Qui cum iudicaret in consilio, habuit non amicos suos & Comites solum ; sed Iurisconsultos , & præcipue Iulium Celsum , Saluium Iulianum , Neratium*, dit Spartian en la vie de ce Prince.


L'on peut conjecturer aussi de ce Discours , combien est releuée la dignité de Conseiller d'Estat , & combien ceux-là se sont monstrez ridicules , qui ont osé mettre en auant qu'elle n'estoit qu'une simple commission , qu'elle ne donnoit aucun rang ny qualité hors le Conseil : & qu'elle n'auoit aucune presceance dans les Compagnies souueraines , bien que le Roy mesmes luy.

160 DE LA SOUVERAINETE' DV ROY,
eust donné vne commission particuliere
pour y presider: car il est certain, que les
Conseillers d'Estat ont toutes les marques
des plus grands Officiers du Royaume:
leurs prouisions sont signées en comman-
demens, & seellées du grand Sceau: Ils
font le serment accoustumé aux autres Offi-
ciers: le choix particulier que le Roy fait
de leur personne vaut vn examen, & de
leurs mœurs, & de leur suffisance. Et en
fin leur fonction n'est bornée ny limitée
par aucun temps, La seule difference que
l'on peut remarquer, entre eux & les autres
Officiers, est, que ceux-cy peuuent vendre
& resigner leurs charges, & non pas les
Conseillers d'Estat: Mais tant s'en faut,
que ceste distinction diminuë la splendeur
de leur dignité, au contraire, elle l'augmen-
te, & la releue d'autant plus, que *Viliora
quaque sunt, qua pretium habent.* Dequoy l'on
peut inferer, que les Conseillers d'Estat,
lors qu'ils executent les Commissions que
le Roy leur donne, tant pour les affaires
d'Estat, que de la Iustice; Ils portent avec
eux les prerogatiues du rang & de la seance
que l'on doit à leur qualité: & que c'est
vn des principaux droits de l'autorité sou-
ueraine des Roys, que de donner des com-
missions à qui bon leur semble: & l'on peut
fasseurer

s'asseûrer que tandis que l'on gardera cét ordre & ceste police dans l'exercice de la Justice; que la France se conservera en sa splendeur, & que la Majesté Royale sera toujours aymée, chérie, & respectée de son peuple. Mais ie desirerois que le Roy se tenant satisfait de tous ses Officiers, fust curieux de les conserver en l'honneur & en l'autorité que l'on doit à leur rang & à leurs charges: car comment pourroient-ils faire observer les Loix & les Ordonnances, si leurs personnes, & leur fonction, ne sont en l'estime du Prince? C'est pourquoy il deuroit toujours auoir deuant les yeux l'exemple de l'Empereur Trajan, à qui Pline parle en ceste sorte dans son Panegyrique: *Hac est natura fideribus, ut parua & exilia, validiorum exortus obscuret; Similiter Imperatoris aduentu, Legatorum dignitas inumbrabatur, tu tamen maior omnibus quidem eras, sed sine diminutione maior eandem auctoritatem presente te quisque; quam absente retinebat, quin etiam plerisque ex eo, reuerentia accesserat, quod tu quoque illos reuererebatur.* D'autant que c'est vne maxime assuree, que plus le Prince honore ses Magistrats, & ses principaux Officiers; & plus est-il honoré, & redouté de ses subjects.

Qu'il n'appartient qu'au Roy de faire la guerre, & des Offices Militaires.

CHAPITRE III.

 O M M E la vertu Militaire est vne des parties des plus requises & des plus necessaires aux Roys, pour defendre leurs peuples, pour recouurer ce qui a esté vsurpé sur leurs Estats, pour proteger leurs amis, leurs alliez, & leurs confederez: & en fin pour vuidier les differends qu'ils ont avec leurs voyfins, qui ne se peuuent terminer que par le trenchant de l'espée. Aussi l'on doit tenir pour maxime, qu'il n'y a qu'eux dans leur Royaume, qui ayent la puissance de declarer la guerre, de conduire les armées, & de faire la paix.

L'on confirme le premier poinct par ceste loy expresse des Empereurs Valentinian & Valens, qui est couchée en ces termes: *Nulli prorsus nobis inscijs atque inconsultis quorumlibet armorum mouendorum copia tribuatur. l. vnica. vt armor. vsus inscio Principe interdictus sit, lib. 11. C.* Cela mesme est authorisé par sainct Augustin, lors qu'il dit: *Ordo naturalis mortalium paci accommodatus, hoc poscit, vt suscipiendi belli auctoritas, atque consilium penes Principes sit: la*

loÿ *Cornelia*, que Sylla fit publier, dès le temps que la puissance souueraine estoit entre les mains du peuple Romain ordonnoit la mesme chose. Et de faict, nous apprenons de leurs Histoires, que l'on ne declaroit iamais la guerre à personne qu'elle ne fust arrestée, *in comitiis centuriatis*, c'est à dire, en la plus grande & solemnelle assemblée de la ville. C'est pourquoy Caton fut d'avis en plein Senat, que l'on deuoit liurer Iules César aux Allemands, pour auoir conduit ses troupes dans leurs pays, sans auoir eu le consentement du peuple, & que par la loy 3. *ad legem Jul. Maiest.* ceux-là estoient declarez criminels de leze-Majesté qui entreprenoient de faire la guerre, sans l'expres commandement de l'Empereur. Tite Liue *lib. 48.* raconte que Gn. Manlius fut iustement accusé, d'auoir mené son armée contre les Gallo-grecs, sans la licence & le congé du peuple, & du Senat. Ce que l'on doit toutesfois entendre d'une guerre publique & solemnelle, & non pas des occurrences particulieres, & fortuites; où il est necessaire de prendre les armes, pour y remedier promptement, comme quand il arriue des émotions & des seditions populaires, ou que l'on est auerty de quelque insigne surprise & trahison; d'autant qu'il n'y a point

164 DE LA SOUVERAINETE' DV ROY,
de doute, qu'en ces occasions le Magistrat
peut prendre legitiment les armes, &
combattre l'ennemy: ainsi que le pratiqua
Lucius Pinarius, sur l'aduis qu'il receut, que
ceux de la Sicile auoient delibéré de se ren-
dre aux Carthaginois: car pour chastier ceste
perfidie, il prit les armes, défit les troupes
des conjurez, & en fit mourir la plus grande
partie, comme tesmoigne Tite Liue, au
liure 34.

Le second poinct de ceste proposition est
fondé sur le mesme iugement: car puis que
Bellum indicere, ius imperij est, il n'y a point de
doute, que personne de quelque qualité
qu'il soit, ne peut s'attribuer aucune autho-
rité dans les armées, s'il n'en a la commis-
sion expresse du Prince souuerain: ce que
les Romains, du temps de leur Republi-
que, obseruoient si religieusement; que per-
sonne n'osoit s'entremettre des affaires de
la guerre, *nisi lege Curiata creatus fuisset: & nisi
adhibitis auspiciis*. Ce que Ciceron tesmoigne
clairement en sa seconde Philipp. lors qu'il
dit: *Consuli si legem Curiatam non habeat, attingere
rem militarem non licet*: c'est en ce mesme lieu
où il reprend Marc Antoine, de ce que de
son autorité priuée, & *sine lege, sine Sena-
tusconsulto, sine sorte*, il estoit allé exercer la
charge de Questeur, dans l'armée de Iules.

Cesar, lors qu'il faisoit la guerre contre les Gaulois.

Nos Roys n'ont pas esté moins curieux que ces anciens peuples, de conseruer en cela leur autorité souueraine: car nous apprenons de nos Annales, que iamais personne n'a pris aucun pouuoir dans les armées, que par leur ordre: C'estoient ces Ducs dont nous auons parlé au Chap. precedent, qui d'ordinaire conduisoient les troupes, *Ita vt à ducendo exercitu, duces dicebantur*: comme il se voit en ce passage de Gregoire de Tours, *lib. 6. c. 12.* lors qu'il dit: *Chilpericus Rex cernens has discordias inter fratrem & nepotem, Desiderium Ducem ex more euocat, at ille commoto exercitu, Ranoaldo Duce fugato, Petraboricum peruadit.* Et afin de rendre ces Ducs plus puissans & mieux suiuis à la guerre, ils auoient accoustumé de les faire accompagner de douze Comtes, qui estoient tenus d'obeïr à tous leurs commandemens: Ce que nous apprenons des Annales de Pepin, qui ont esté adioustées à la suite d'Aimoinus, *lib. 4. cap. 4. Pipinus domum reuersus Gufonem more Ducum duodecim Comitibus donauit.* Et l'on doit remarquer, que bien que le pouuoir de ces Ducs fust grandement absolu: Neantmoins les Roys pouuoient, quand il leur plaisoit, les reuoker, & donner leurs char-

166 DE LA SOUVERAINETE' DV ROY,
ges à d'autres , s'il s'en trouuoit de plus ca-
pables. D'autant que (comme nous auons
dit) toutes ses fonctions militaires dependen-
tent entierement de la puissance Royale.

Et bien que nous ayons à present en Fran-
ce plusieurs charges militaires , erigées en
titre d'office perpetuel, comme de Conne-
stable, & de Mareschaux de France: neant-
moins il est certain que le Roy, selon les oc-
currences qui se presentent, peut commet-
tre à qui bon luy semble le commandement
de ses armées; Dequoy nous auons vn e-
xemple tout recent en la personne de Mon-
sieur le Cardinal de Richelieu, que le Roy
apres s'estre seruy de ses sages conseils au
secours de l'Isle de Ré, au siege de la Ro-
chelle, & à la reduction du Languedoc, a
particulierement choisi pour conduire ses
armées dans l'Italie: où il a si heureusement
reüssi, qu'apres s'estre rendu maistre de Pi-
gnerol & des vallées circonuoisines, les ar-
mes de sa Maiesté ont tellement esté redou-
tées par ses ennemis, que de là s'en est en-
suiuy ce glorieux reestablissement de Mon-
sieur de Montouë dans ses Estats, malgré
tous les artifices & les efforts de l'Empire &
de l'Espagne. le diray neantmoins que telles
commissions ne se doiuent donner qu'à
ceux qui sont enrichis de semblables vertus,
pour éuiter la jalousie & le mescontentement

des autres Officiers de la Couronne.


Et quant au dernier poinct, les mesmes raisons nous obligent de tenir pour maxime d'Estat, & comme dit Aristote *πλῆτουμεα regni*, qu'il n'appartient qu'au Roy seul de conclure & d'arrester la Paix : car bien que les chefs d'armée ayent tousiours le pouuoir, *Vt consilium pro more, & tempore capiant*, comme dit Tacite: Toutesfois l'on a tousiours reserué au Prince souuerain de conclure les Traictez de Paix.

Cela s'obseruoit de la sorte à Rome, lors que la Republique estoit en sa fleur: & mesmes du temps des Empereurs: d'oà vient que Posthumius disoit dans Tite Liue, *Sponsione, quæ injussu populi Romani facta est, non teneri populum Romanum*; Et Tacite, parlant du Traicté de Paix que fit Corbulon avec le Roy des Parthes, dit que l'on tint toutes choses en surseance: *Donec referentur litteræ Neronis, an paci annueret*. Ce qu'ils faisoient, de peur que les Generaux de leurs armées, se voyans reduits en quelque extremité, comme les euenemens de la guerre font tousiours exposez à l'inconstance de la fortune, ils ne fussent contraints de faire des traittez honteux & infames à la Republique; Que s'ils en faisoient quelques-vns, c'estoit tousiours sous ceste condition: *Ita*

168 DE LA SOUVERAINETÉ DV ROY,
id ratur fore, si populus censuisset. Puis donc que
toutes les affaires de la guerre dependent
de la seule autorité du Prince; il est obli-
gé de prendre garde à ne les point entre-
prendre que iustement, à les conduire avec
prudence, & les faire réussir au bien de son
Estat, & à la gloire de ses armes.

Des Officiers de Finances.

CHAPITRE IV.

 OVT ainsi qu'il n'y a que les
Roys dans les Monarchies, &
les peuples dans les Democra-
ties, qui ayent la puissance de
disposer des deniers publics: &
que personne n'oseroit toucher à ce deposit
sacré, sans leur exprez commandement,
comme le Tribun du peuple Metellus le fit
entendre à Iules Cesar, quand il voulut
prendre de l'argent dans le thresor public.
De mesme il n'appartient qu'à eux d'insti-
tuer les Officiers de Finances dans leurs
Royaumes. Et c'est en quoy consiste vn des
principaux droits de la Souueraineté.

Aussi les premiers Roys de Rome pour
marque de leur autorité souueraine, cré-
rent

rent les Questeurs deuant tous les autres Magistrats de leur Estat, dit Vlpian en la loy vnique, *ff. de Officio Quaestoris*: & Tite Liue remarque au liure 4. de la premiere Decade: Que le peuple Romain eut ce mesme sentiment, lors qu'apres auoir repris la souueraineté, il éleut malgré le Senat des Questeurs de familles plebeiennes: bien qu'auparauant ce fussent des charges particulierement affectées aux Patriciens: d'où vient qu'ils estoient ainsi nommez, *Quasi à genere querendi*, pource qu'on les choisissoit des meilleures & des plus illustres Maisons de la ville.

Nos Roys n'ont pas esté moins jaloux & curieux de monstrier en cela leur puissance souueraine: car personne en ce Royaume n'oseroit prendre la hardiesse de s'entremettre du maniment des Finances, sans charge expresse de leur part, sans auoir baillé des cautions suffisantes, ou si l'on n'est pourueu d'offices qui donnent ce pouuoir, qui sont de deux sortes parmy nous. L'une est de ceux qui reçoient seulement les deniers pour les apporter aux Receptes generales, & de là à l'Espargne, que l'on nomme Receueurs Particuliers & Generaux. L'autre, est de ceux, qui font la dépense, que l'on appelle Tresoriers: Et d'autant que les Finan-

170 DE LA SOUVERAINETE' DU ROY,
ces du Royaume sont employées, ou pour
subuenir aux frais de la guerre, ou pour four-
nir durant la paix aux despenfes ordinaires
de l'Estat; & que pour ce subiect elles sont
appelées les nerfs de la guerre, & l'orne-
ment de la paix, l'on a estably de deux sor-
tes de Tresoriers. Les vns ont la charge de
payer les gens de guerre, qui sont les Tre-
soriers Ordinaires & Extraordinaires des
guerres, le Tresorier de la Cavalerie legere,
des Regimens entretenus, de l'Artillerie & de
la Marine, que les Romains appelloient d'un
nom general, *Quaestores Castrenses*, qui tiroient
au sort leurs Prouinces comme les Consuls
& les Preteurs, & aupres de qui ils resi-
doient pour receuoir les reuenus de la Re-
publique, & qui estoient autant respectez
& chers du peuple Romain, que seuerement
punis lors qu'ils ne s'acquittoient pas
fidellement de leurs charges. Quant aux au-
tres Tresoriers, ils fournissent les deniers
pour l'entretienement de la maison du Roy,
comme sont les Maistres de la Chambre
aux deniers, les Tresoriers de la maison, de
l'Escurie, de l'Argenterie, des Menus, des
Gardes du Corps, des cent Gentils-hom-
mes, des Offrandes, de la Venerie, des Ba-
stimens, & plusieurs autres semblables que
l'on peut comparer à ces Questeurs que les

Romains appelloient *Urbanos*, & tous ces Officiers ont vne correspondance avec les Tresoriers de l'Espargne, qui ont la garde & la distribution du gros des Finances de sa Majesté.

Mais pource qu'il n'y a point d'Officiers dans l'Estat, qui ayent plus d'occasions de faire leur profit aux dépens du public; & que peu de personnes se peuuent long-temps maintenir à l'épreuue des tentations, que donne le doux maniement des Finances: *Cum nihil sit tam munitum, quod non expugnari pecunia possit*, & que πάντα ἀνά τὴν πλῆτῃ, dict Aristote en ses Rhetoriques. Aussi l'on a estably la Chambre des Comptes, pour auoir l'œil sur leurs actions, pour les tenir en leur deuoir, pour examiner leurs comptes, tant de la recepte que de la despense, & pour punir les abus qu'ils commettent en l'exercice de leurs charges, & mesmes leur negligence.

Et quand il arriue que le mal & le desordre est monté iusques à tel excez, que ceste Compagnie souueraine n'est pas assez puissante pour y apporter du remede, le Roy a de coustume d'eriger vne Chambre de Iustice, pour faire vne particuliere recherche de leurs maluersations & de leurs fautes, & les chastier selon la rigueur des peines que l'on a introduictes contre le crime de Peculat. Ou-

tre ceste Chambre des Comptes, il y a encore les Tresoriers de France qui veillent pour asséurer les deniers qui s'imposent en chacune Prouince. La Cour des Aydes, qui fait iustice d'entre le Roy & ses sujets, touchant les Aydes, les Tailles, les Gabelles, & les autres subsides qu'on leue sur le peuple. Le Conseil des Finances, où l'on donne les principales fermes du Royaume, & où l'on resout toutes les contentions & les procez touchant les droicts du Roy que l'on reuoque en doute. Ce qui se fait en la presence du Surintendant qui tient la premiere place apres le Chancelier ou le Garde des Sceaux, & où assistent aussi les Intendans, que le Roy François I. crea par son Edict de l'année 1523. qui declare par le menu toutes leurs fonctions. Mais d'autant que la charge de Surintendant est maintenant vne des plus importantes du Royaume, que c'est elle qui a de la conduite l'œconomie publique, & qui dependent de ceux qui se messent des Finances: ie me sens obligé de représenter icy d'où elle a pris son origine, en quoy consiste son exercice, & quelles sont les parties qui sont necessaires pour s'en acquiter dignement.

L'on doit remarquer que nos Roys ont quelquesfois imité les Romains en l'ordre de

la Police qu'ils ont establie dans leur Royaume : de sorte qu'ayans veu que les Empereurs Romains auoient vn Officier exprez, qui auoit le soin de la direction des Finances de l'Empire, qu'ils appelloient *Præfectum arario*, dont il est fait mention en la loy *Arrianus*, ff. de *Iure fisci*, ils instituerent à leur exemple vn grand Tresorier, qui auoit le maniment de tous les reuenus de la Couronne. Mais depuis s'estans apperceus que ceux qui exerçoient cét Office abusoient de leur trop grande authorité, & qu'ils commettoient plusieurs larcins, comme il se verifia sous le Regne de Philippes le Bel, de Louys Hutin son fils, & de Charles VI. l'on supprima cette charge, & l'on establit en son lieu celle de Surintendant des Finances, à qui l'on attribua le mesme pouuoir ; excepté le maniemēt des deniers, que l'on a depuis tousiours portez à l'Espargne. Et pour la releuer dauantage, l'on choisit des Princes & des plus grands Seigneurs du Royaume pour l'exercer. Nos Rois s'estans persuadez qu'ils se comporteroient avec d'autant plus de soin & d'integrité dans la direction de leurs Finances, qu'ils seroient plus genereux & plus jaloux de leur reputation, que d'autres de moindre qualité. De façon que ceste dignité estant exercée par des personnes si eminentes, est peu à peu montée.

174 DE LA SOUVERAINETE' DV ROY,
à vn tel degré de splendeur, qu'elle est main-
tenant l'vne des plus releuées de l'Estat, &
qui desire le plus de parties en celuy qui a
l'honneur d'en estre pourueu, qu'aucune au-
tre qui soit dans le Royaume: car outre la
bonté de la memoire, la viuacité de l'esprit,
& la fermeté du iugement, il est necessaire
encore qu'il aye vne fidelité & vne affection
particuliere au seruice de son Prince, afin qu'il
puisse dignement satisfaire aux deux princi-
paux poincts de sa charge. Le premier est
d'entretenir soigneusement le credit du Roy,
d'accomplir les promesses, & de garder la
foy qu'il a donnée à ceux qui l'ont secouru de
leurs moyens & de leur bourse durant la ne-
cessité de ses affaires, & qui se sont obligez
pour son seruice. Et l'autre est de subuenir à
poinct nommé aux occasions pressantes de
l'Estat, de prendre garde d'auoir de l'argent
prest pour le payement des armées qui sont
sur pied, & d'auoir l'œil qu'il ne soit point dé-
tourné en autre vsage: pource que l'on a veu
souuent, que faute d'auoir fidellement em-
ployé les deniers que sa Maiesté auoit ordon-
nez pour les frais de la guerre, la France a re-
çeu plusieurs desastres signalez: de quoy la dé-
route de la Bicoque, la perte du Duché de Mi-
lan, les frequentes reuoltes des Suisses, & la
ruïne du plat pais nous seruent de funestes té-
moignages.


Il euitera facilement tous ces mal-heurs & ces precipices, s'il est soigneux de reuestir son ame d'une parfaicte probité : car ceste vertu luy seruira d'un souuerain preseruatif contre les charmes & les attraitz qui accompagnent ordinairement vn si grand maniement de deniers, & qui produisent des effectz d'autant plus puissans sur ceux qui sont esleuez en cette dignité, qu'elle leur fournit mille specieux pretextes pour couvrir leurs desseins, & leur donne l'autorité pour les executer : *Authoritates enim seu dignitates, quarum maior liberiorque potestas, eo impellere consueuerunt, ut aduersus leges agantur plurima*; dit sainct Iean Chrysostome en l'Homelie. 41. sur sainct Matthieu.

Dauantage il doit estre enrichy d'une grande prudence, pource qu'ayant ceste vertu, il ne peut plus tomber dans la necessité, comme l'asseure le Sage lors qu'il dit : *Si appetuntur diuitiæ, quid prudentia locupletius, quæ operatur omnia*? Car elle luy fera trouuer des moyens iustes & tolerables, pour satisfaire aux dépenses publiques & necessaires: Elle luy'ouuira l'esprit pour decouurir les ruses, & se déueloper des subtiles inuentions de ceux qui sont employez dans le maniement des Finances, que le Poëte Comique appelle *Homines genere Gerionaceo; quos si Argus seruet, qui o-*

176 DELA SOUVERAÎNETÉ' DV ROY,
culeus totus fuit, is numquam seruet. Et que l'Em-
pereur Tibere comparoit à ces sangsues af-
famées que l'on applique sur le corps hu-
main : Elle luy donnera l'industrie de pour-
voir également sur toutes les affaires du
Royaume , & non pas seulement sur quel-
ques-vnes, qui est la chose que doit le plus
soigneusement observer, celuy qui est appel-
lé au gouvernement de l'Estat : *Qui Reip. pra-*
sunt , dict Ciceron , *hoc Platonis praeceptum te-*
neant, vt totum corpus Reip. curent, ne dum aliquas
partes tuerentur, reliquas deserant. En fin elle luy
donnera l'adresse de disposer vtilement des
deniers du Roy, d'en empêcher le diuertif-
sement & le pillage , & de retrancher tous
les abus qui se commettent en leur admini-
stration : En quoy celuy qui possède main-
tenant cette charge sert dignement le Roy.

De la venalitez des Offices.

CHAPITRE V.

 PRES auoir traité des charges &
des dignitez de l'Estat , & de la
puissance qu'a le Roy de les insti-
tuer & les supprimer , selon qu'il
iuge estre à propos pour le bien de son royaume : il m'a semblé qu'il ne seroit point hors
de sujet, de parler de la venalité des Offices,
que

que nos Roys ont permise depuis quelque temps ; d'autant qu'elle combat entièrement leur autorité souveraine , s'estans aucunement priuez par ce moyen , de conferer les charges à qui bon leur semble. Ceux qui excusent & qui defendent ceste venalité, disent : que puis que les Offices font part des fruiets & des reuenus du Domaine du Roy , il s'ensuit qu'il en peut disposer à sa discretion : c'est à dire, les donner, les vendre, les multiplier, & d'y commettre telles personnes qu'il estime estre les plus capables de luy rendre seruice.

Que ceste venalité n'est point nouuellement introduitte ; veu mesme qu'anciennement à Rome , ceux qui entroient dans l'exercice des Magistratures , estoient obligez , ou de faire des ouurages pour la commodité de la ville, ou de donner des ieux & des spectacles au peuple, ou de promettre d'ayder le public de quelques sommes notables, pour recompense de ce qu'on les auoit faits participans des honneurs & des dignitez de la Republique , comme l'on void par la loy *Publius. ff. de condit. & demonst.* & par tout le tiltre, *de pollicitat.* Que si cela estoit trouué iuste dans ceste Republique si bien policée ; pourquoy trouuerons-nous estrange que le mesme soit obserué parmy

178 DE LA SOUVERAINETE' DV ROY,
nous; puis que le Roy tourne au profit de
son Estat les deniers qu'il reçoit de ses Offi-
ciers?

D'avantage, ils disent: que l'Empereur
Valentinian fit autre-fois ceste Ordonnan-
ce, que les Consuls Romains payeroient dès
l'entrée de leur charge cent marcs d'or. &
les Senateurs vne autre certaine quantité,
qu'ils appelloient *Aurum oblatitium*, comme
il est dit en la loy 2. C. de Consul. lib. 12. Et
que les Empereurs ne prenoient pas seule-
ment pour eux le droit qu'ils nommoient
Dominicum suffragium, dont il est parlé dans la
Nouvel. 161. mais encore ils permettoient à
leurs fauoris, de prendre de l'argent, *sub
nomine suffragij*, de ceux qui briguoi-
ent les Offices, & mesmes d'vser de contrainte
contre ceux qui refusoient de le payer: de-
quoy l'on void des tesmoignages en la loy
vnique, C. *Theod. de suffrag.* Et dans Suctone
en la vie de Vespasien. Que si cela estoit
permis à des particuliers importuns, pour-
quoy le sera-il defendu au Prince?

Outre plus ils mettent en auant, que par
le moyen de la venalité des Offices, les plus
riches posséderont les charges de l'Estat, ce
qu'Aristote au cinquième de ses Politiques,
chap. 6. desire estre obserué en toute Re-
publique bien policée, pource qu'il est à

presumer, qu'ils les exerceront avec d'autant plus d'integrité & de splendeur qu'ils seront moins sujets à l'avarice, & à se laisser corrompre par des presens. D'où vient que les Romains voulans pourvoir aux principales dignitez de leur Republique, choisissent tousiours ceux qui estoient les plus opulens en reuenüs, comme Seneque le remarque en l'une de ses Declamations, lors qu'il dit: *Senatores Equitèſque census ascendere faciebat, ne splendor Ordinum angustia rei familiaris vileſceret.* Estimans que la vertu sans les biens, estoit comme vn astre caché: & que les richesses estoient son plus bel ornement pour la faire paroistre. C'est pourquoy Ciceron décrivant en l'Epistre qu'il adresse à Quintus son frere, les qualitez requises en vn Magistrat, met celle-cy des premieres, *Nec ei deſit quod ad rem familiarem pertinet.*

Ils adjoustent encore, que la venalité des Offices est vn moyen d'asseurer la fidelité des subjects enuers le Roy, pource que tenant en sa puissance le meilleur de leur bien, ils seront plus estroittement obligéz de suiure sa fortune: Mais ils passent encore plus outre, lors qu'ils disent que toutes ces raisons ont autre-fois esté trouuées si considerables en ce Royaume: que nos Annales nous enseignent, que du temps

180 DE LA SOUVERAINETE' DV ROY,
mesmes de nos meilleurs Roys, les Offices
de Iudicature se donnoient à ferme, comme
les autres reuenus du Royaume: que s'ils
se pouuoient afermer à certain temps, pour
quoy non les vendre? mesmes entre les par-
ticuliers.

Mais l'on peut respondre, que toutes ces
raisons meritent d'estre appellees ἀλογοὶ λόγοι,
comme Origene nomme celles dont se ser-
uoit vn certain Sophiste, pour soustenir vne
mauuaise cause: car bien que l'institution des
Offices depende de la volonté du Prince;
toutesfois ce n'est pas à dire qu'il les doive
vendre? Car les Offices n'ayans esté créez
que pour secourir la Republique, aux cho-
ses qui sont necessaires pour sa conserua-
tion: comme nous l'auons dit cy-deuant,
sa conscience, & l'amour qu'il doit porter
au bien de son Estat, l'obligent de les rem-
plir de personnes de merite, & qui soient
capables de rendre du seruice au public:
ce que la venalité ne luy peut permettre,
qui prefere tousiours la richesse à la vertu,
& la bourse aux merites des hommes, *Quod
olim fuit inter signa pereuntis Reipublica*, dit en
quelque lieu Petronius Arbitr.

Certes, c'est chose non moins perilleuse,
que honteuse, de donner à l'argent ce que
l'on doit à la suffisance; Je sçay bien que

quelques Princes ont autre-fois leué quelque droit sur les Officiers, qu'ils appelloient, *ius suffragij*. Mais ils abusoient en cela de leur puissance. Et ne sçait-on pas, qu'il est des Princes comme des années, dont les vnes sont fertiles, & les autres steriles? *Quomodo sterilitatem aut nimios imbres, dit Tacite, & cetera natura mala, ita luxum & auaritiam dominantium tolerate; sed neque hæc continua, & meliorum interuentu pensantur*; Aussi voyons-nous que l'Empereur Constantin abolit les Ordonnances que ses predecesseurs auoient faiçtes sur ce sujet, comme il se lit *in l. i. de honor. Codicil. C. Theod.* & en la loy vnique, *De perfectiss. dignit.* au C. de Iusti. Et bien que depuis l'Empereur Iulian restablit cét ancien droit des suffrages que l'on prenoit sur les Officiers: l'Empereur Honorius ayant consideré l'injustice de ceste imposition, defendit derechef de la plus exiger par la loy premiere *ad l. Iul. de ambitu. C. Theod.* Et en fin elle fut du tout abolie, pour les Officiers de Iudicature, par la Nouell 8. *Vt iudices sine quoquo suffragio fiant, id est sine priuato, sine dominico*; Le semblable fut aussi ordonné pour les Gouverneurs, & les Iuges des Prouinces, comme il est dit en la loy derriere, *C. ad l. Iul. de reper. ind. Ad huiusmodi honoris insignia non ambitione, vel pretio, sed pro-*

182 DE LA SOUVERAINETE' DV ROY,
bata vitæ testimonio accedendum est.

Et quant à la despense que les Officiers estoient obligez de faire à l'entrée de l'exercice de leurs charges, bien que cela fust agreable au commun peuple; Neantmoins les plus sages d'entre eux ne l'approuuoient pas, preuoyans, comme il arriua depuis, que ces magnificences & ces largeesses, dont on se seruoit pour acquerir la bien-vueillance de la populace, seroit vn iour la ruine de la Republique, *Quod enim*, dit Tacite, *virtutis premium antea fuerat, id postea veluti venditum est.* Et pour ce qui est du choix & de l'élection des Senateurs qu'ils faisoient sur le pied de leur reuenu, donnant la preference aux plus riches; qui ne veid que ce fut vn establissement tres-infame, & qui bannissoit du milieu d'eux le merite & la capacité? *Postquam enim Senator*, dit Seneque, *censu legi coëptus, pessum iere vitæ pretia:* car bien que la pauureté semble estre subiecte à tout plein d'incommoditez; elle est toutesfois plus propre pour cultiuer la vertu, que l'abondance & la richesse, comme disoit Vlyse, parlant de son Ithaque, *τηνχῆ, ἀλλ' ἀγαθὴ νοῦποσιπύφες.* Et me souuient que le Chancelier de l'Hospital dit sur ce sujet en vne action qu'il fit en public: Que la pauureté du President de la Vacquerie estoit beaucoup plus

recommandable, que les richesses d'un Chancelier du Duc de Bourgogne, à qui son maistre dit: *Rolin, c'est trop.*

L'on a mis en avant qu'on ne pouvoit mieux conseruer la fidelité des subjects envers le Prince, que par le moyen de la venalité des Offices. A quoy l'on peut respondre, que cela seroit bon à dire en vn Estat seigneurial, où tout se gouuerne par contrainte: Mais non pas en vn Estat Royal, où les Roys commandent à leurs peuples, comme fait vn pere à ses enfans; & les subjects obeïssent à leurs Roys, comme les enfans à leurs peres: Et ceste bien vueillance est la plus seure caution de leur fidelité.

Mais voyens maintenant par quels moyens ceste venalité des Offices s'est introduite en ce Royaume: Nos Annales nous apprennent que les Preuostez, les Vigueries, & les Vicomtez, se donnoient à ferme, comme les autres biens du Domaine, à cause que les Greffes, & les autres emolumens de la Justice y estoient annexez: Et mesme que la Preuosté de Paris n'en estoit pas exceptée, ainsi que nous tesmoignent les anciens Praticiens, Masuer, & Benediëti. Cela se pratiquoit de la sorte du temps de saint Louys, mais avec vn si grand blasme des nations

184 DE LA SOUVERAINETÉ DV ROY,
voysines , que la Chronique de Flandres
rapporte , que comme Philippe le Bel vint à
poursuivre la Canonisation de ce bon Roy,
le Pape Boniface fit tout plein de difficul-
tez , se fondant sur ce qu'il auoit permis,
que les Offices de son Royaume fussent
publiquement affermez , ce qui auoit causé
la ruine de plusieurs familles. C'est pour-
quoy le Roy Charles VII. touché de ces
considerations , retrancha puis apres cet
abus comme vne chose honteuse & perni-
cieuse à son peuple : Bien qu'il n'y eut alors
que les Iustices inferieures qui fussent sub-
iettes à ce desordre. Car les Baillifs , les
Seneschaux , & les Officiers des Iustices su-
perieures ne payoient rien de leurs charges:
Il restoit encore quelque pudeur dans les
esprits des hommes : Mais depuis s'estant
évanouïe de leurs cœurs , & l'avarice s'e-
stant renduë maistresse de leurs passions ,
ceux qui vinrent puis apres n'affermerent
pas seulement les offices de leur Royau-
me , mais encore ils les exposerent en vente
à tous ceux qui se presentoient pour les a-
chepter.

Ce fut le Roy Louys XII. qui com-
mença de mettre en vsage ces moyens
pour auoir de l'argent ; mais il ne vendit
alors que les Offices de Finances , & non
pas

pas ceux de Iudicature, comme il est aysé de voir par son Ordonnance de l'année 1508. où il tesmoigne vn extreme regret d'auoir commis ceste faute, & s'excuse sur la necessité des affaires publiques, & les grandes debtes que luy auoit laissées Charles VIII. son predecesseur : Et en mesme temps il reuoqua du tout ceste venalité. Apres la mort de ce grand Prince, le Roy François I. son successeur la reestablit pour tous les Offices indifferemment, tant de Finances, que de Iudicature ; tant il est mal-aysé de se departir d'un si grand reueu, & que l'on ne prend que sur des volontaires ; Neantmoins nous lisons dans les Registres de la Cour, des lettres qu'il escriuit au Parlement, quand la Reyne sa Mere fut atteinte d'une dangereuse maladie, où il tesmoigne vn tres-vif ressentiment d'auoir remis ce desordre dans son Royaume, iusques là mesme, qu'il confesse que Dieu l'en punissoit par ceste affliction ; & prioit la Cour de luy donner aduis des moyens qu'il auoit à tenir, pour bannir cét abus du milieu de la France.

Aussi, certes, auoit-il sujet de parler de la sorte : car la pluspart des malheurs qui affligent maintenant tout le corps de l'Estat n'ont pris leur origine que de ceste vena-


186 DE LA SOUVERAINETE' DV ROY,
 lité des Offices. C'est d'elle qu'est venue
 la cherté de la Iustice, la longueur des
 procez, la multitude des Officiers, ou
 plustost des faincants, le luxe des vns, l'a-
 uarice des autres, la ruine de plusieurs fa-
 milles, & le desespoir des peres: qui au lieu
 de receuoir à benediction le nombre d'en-
 fans que Dieu leur donne, sont desormais
 contraints de dire avec Tertullian, *lib. 1. ad*
uxorem liberorum voluptatem iam nunc amarissimam
esse. Si bien que comme Homere, *Iliad. 5.*
 nomme le vaisseau dans lequel Helene fut
 enleuée, *αρχηγοῦ*, pource que de là toutes
 sortes de maux arriuerent à la Grece: &
 qu'à son imitation Gregoire Nazianzenc
 en l'Oraison qu'il a faicte de l'amour de la
 pauvreté, appelle le ventre *αρχηγοῦ*, d'au-
 tant qu'il est la sentine d'où prennent leur
 source toutes les maladies qui tourmentent
 les hommes: Nous pouuons aussi donner
 ce mesme nom à ceste venalité: car c'est
 elle qui a donné la naissance à tant de
 calamitez qui ruinent peu à peu les fonde-
 mens de ceste Monarchie.

Mais ce qui a comblé la mesure de tous
 nos desastres, c'est l'inuention de ce droit
 annuel, qui a produit tout à la fois vne in-
 finité de permicieux & de dommageables
 effects: C'est elle qui a osté au Roy le choix

& l'élection des Magistrats, qui doit entièrement dépendre de son autorité: C'est elle qui a rendu les Officiers fermiers de leurs charges, les obligeant d'en payer vn certain prix tous les ans, & des deniers d'entrée au renouvellement des termes: C'est elle qui a banny la vertu des Offices, ayant tellement augmenté leur valeur, qu'il n'y a plus que les riches qui y puissent prétendre. Les autres maux que ceste funeste Paulette produit tous les iours sont en si grand nombre, que j'aurois peine de les rapporter en vn si petit discours: Mais j'espère que Dieu, apres auoir donné vne Paix vniuerselle à la France, touchera le Cœur du Roy, pour la deliurer d'vn si grand malheur; ou du moins, pour apporter quelque temperament au prix excessif des Offices; ordonnant de rigoureuses peines, tant contre les vendeurs, que les acheteurs, qui auront esté si osez que d'y contreuenir.

Des Commandemens, & des Rescripts du Prince Souuerain, & de l'obeïssance qui leur est deuë.

CHAPITRE VI.

 V I s que la principale marque de la Souueraineté, est de pouoir commander absolument; & que d'estre tenu d'obeïr, à tous les commandemens du Prince, est celle de la subjection: l'ay pensé qu'apres auoir parlé des Officiers, il seroit à propos de traiter en suite quand, & comment ils doiuent obeïr aux commandemens des Roys & des Princes souuerains. Pour expliquer plus clairement ceste matiere, & proceder avec ordre, ie diray en premier lieu: que les plus fameux Theologiens & Politiques enseignent, qu'on ne doit aucune obeïssance aux Roys, lors qu'ils commandent quelque chose qui est contraire aux Commandemens de Dieu, suiuant ceste parole precise de saint Pierre, *Obedire oportet Deo, magis quàm hominibus.*

Ce que saint Thomas exagere, 2. 2. quæst. 104. où il dit: *Si aliud Imperator, aliud Deus iubeat, contempto illo, obtemperandum est Deo:*

ce qui est confirmé par plusieurs exemples de l'Eſcriture ſaincte : & entre autres par celui de ces ſages femmes d'Egypte, qui ne voulurent point obeïr à Pharaon, lors qu'il leur commanda de tuer les enfans malles des Hebreux, en accouchant les meres : *Et timuerunt obſetrices Deum, & non fecerunt iuxta præceptum Regis*, dit le texte ſacré : l'on rapporte encore celui des ſeruiteurs de Saul, qui refuſerent de tuer Abimelech, & les autres Preſtres du Seigneur, bien qu'il leur commandaſt abſolument : *Noluerunt autem ſerui Regis extendere manus ſuas in Sacerdotes Domini*. De façon qu'il fut contraint de donner ceſte commiſſion à Doeg l'Idumean, qui mit au fil de l'eſpée quatre vingts quinze Preſtres tous reueſtus de leurs habits Sacerdotaux, comme il eſt dit au premier des Roys, chap. 22.

L'on doit pratiquer le meſme quand le Prince commande de faire des pourſuites & des executions injuſtes contre les innocens; bien que par vne legere apparence, elles ſemblent eſtre fondées ſur la juſtice, comme ſont celles de qui parle Ammian Marcellin, liure quatorzième de ſon Hiſtoire : *Tanquam licentia crudelitati indulta, per ſuſpicionum nebulas æſtimati quidam, noxijs damnabantur*. Et plus particulièrement lors qu'il décrit la

misere d'un Eusebius, *Qui implorans Cælo iustitiam, nec confessus, nec confutatus, pœnali morte est multatus*: Et qui raconte les cruautéz que commit Constantius durant son Règne: *Nec discernente à societate noxiorum infontes, veluti exturbatum è iudiciis fas omne discussit, & censatum legitima defensione silente, carnifex rapinarum sequester, & abductio capicum, & bonorum ubique multatio versabatur*: estant certain que les commandemens & les executions de telles fureurs & violences doiuent estre tenuës d'autant plus abominables, qu'elles sont couuertes du voile de la Iustice.

Ie ne suis pas de l'aduis de ceux qui reiettent toute la faute sur celuy qui commande; & qui excusent ceux qui obeïssent, se fondans sur ceste regle de nostre Iurisprudence, *Qui mandato iudicis facit, dolo facere non videtur, cum habeat necesse parère*. Et sur ce que le Pape Innocent III. *in cap. Pastoralis. de off. deleg.* dit que l'ordinaire doit executer la sentence de son superieur; bien qu'il sçache qu'elle est injuste, pource qu'il n'a que la simple execution, sans aucune cognoissance de cause: *Seruus autem, dit Senèque, herilis imperij non censor, sed minister est.*

Mais ceste regle se doit entendre seulement des choses indifferentes; & qui sont de peu d'importance, comme le traicte am-

plement Aufreitus, *ad stilum Partam. cap. 12.* se servant de ceste autre regle, pour prouver son opinion : *Ad ea, qua non habent atrocitatem facinoris, vel sceleris, ignoscat seruis, si vel dominis, vel ijs qui vice dominorum sunt, obtemperauerunt, l. 157. ff. de reg. iuris.* Car quand il s'agit de choses graues & atroces, celuy qui se rend ministre de telles cruauitez, est aussi punissable que celuy qui les commande, comme l'Escripture l'enseigne par l'exemple qu'elle nous donne, de ceux qui executerent le commandement de Nabuchodonosor : & qui letterent les trois enfans dans la fournaise : Dieu ayant permis que pour punition de leur injuste obeissance, ils fussent suffoquez par les flammes : Autrement si ceste excuse estoit receuable indifferemment en toutes occasions, il faudroit dire que tous les Bourreaux qui ont autre-fois executé les commandemens des Tyrans, contre les Martyrs, sont innocens, qui seroit vne impieté de le penser seulement, selon l'aduis de S. Gregoire de Nazianze, en l'Oraison 12. où il s'oustient absolument, qu'en ces rencontres il ne faut nullement obeir, quand mesme le commandement porteroit, à peine de la vie, exhortant vn chacun de la perdre courageusement, plustost que de contribuer à de si noires

192 DE LA SOUVERAINETE' DV ROY,
 meschancetez. Mais d'autant que ces choses si extraordinaires n'arriuent que rarement, & seulement sous les Regnes des Tyrans; ie n'en parleray point dauantage: Je passeray donc à vn autre cas: Sçauoir, s'il faut obeïr aux commandemens, qui bien qu'ils semblent injustes, ont toutes-fois pour object le bien de l'Estat: comme si le Prince souuerain commandoit de tuer quelqu'un qui fust notoirement rebelle, factieux & seditieux: mon opinion est, qu'en telles occasions l'on doit obeïr, & sans scrupule: car comme disoit Alexandre, dans Quinte Curse, *Vbi reuerentia excessit animis, & summa imis confundimus, vi opus est, ut vim expellamus, præsertim apud seditiosos & perduelles*. Ce que confirme l'Empereur Iust. in l. i. C. *quand. liceat sine iud. se vindic. Melius est occurrere in tempore, quam post exitum vindicare*: ce que voulut dire Vitellius: *Seditionis intuitu bene olere occisum hostem, ciuem melius*. D'où vient que les plus sages Autheurs ont excusé la forme que Tibere, & quelques autres Empereurs, pratiquerent pour se défaire de Sejan, de Cecinna, de Parmenion, & de plusieurs autres de ceste qualité.

Il estime qu'on doit dire le mesme des commandemens que fait le Prince d'enuahir les Estats de l'ennemy public, pour
 preuenir

preuenir les desseins qu'il a sur les nostres: car toutes ces commissions se doiuent iuger iustes ou iniustes, selon l'vtilité ou le dommage que l'Estat peut receuoir de leur execution: tesmoin ce lieu excellent de l'Orateur Romain en ses Philippiques: *Hoc ius Iupiter ipse sanxit, vt omnia quæ Reip. salutaria sunt, legitima & iusta habeantur*; ce qu'il auoit appris de l'Augur Fabius, lors qu'il dit: *Optimis auspiciis ea geri, quæ pro Reip. salute petuntur; quæ contra Rempub. fieri contra auspicia.*

L'on peut faire encore ceste demande: sçauoir, si celuy qui ne trouue pas en sa conscience, que le commandement que le Roy luy a fait soit iuste, est tenu de luy obeïr? A quoy ie dis, que s'il y a des raisons de part & d'autre, qu'il doit suiure la volonté du Roy, & non pas la sienne: Toutesfois ie désirerois, que pour asseurer sa conscience, il considérast exactement le sujet de sa commission, afin d'accommoder son sentiment à celuy de son Prince; & de l'exécuter sans scrupule: car il seroit à craindre, que demeurant incertain dans sa resolution, il ne se portast avec negligence ou lascheté en l'exécution de ses commandemens, comme il arriua à Ioab, qui ayant eu la charge de nombrer tout le

194. DE LA SOUVERAINETE' DV ROY,
peuple d'Israël, negligea de faire le denombrement & la reueue des tribus de Benjamin & de Leui: *Ex eo quod inuitus exequeretur Regis imperium*, ainsi qu'il est dit au liure premier, chap. 21. du Paralipomenon. Et de ceste doctrine saint Augustin en l'Epist. 22. contre Faustus inferé que les subjects doiuent prendre les armes, & aller à la guerre avec leur Roy, sans s'informer si son entreprise est fondée sur la iustice, ou non: Et que la bonne reputation du Prince leur doit suffire, sans s'enquerir d'auantage de ses desseins: car c'est la gloire d'un grand Roy, d'estre secret en ses conseils: *Gloria Dei celare verbum*, dit le Sage. Et l'on ne peut luy faire vne iniure plus sensible, que de vouloir penetrer dans ses intentions: *Abditos Principis sensus, & si quid occultius parat exquirere illicitum, anceps, nec ideo adsequare*, dit Tacite. Et dequoy il nous donne l'exemple de Tybere, qui fit ressentir au Sénateur Asinius Gallus, combien sa curiosité l'auoit offensé, lors que faisant semblant de refuser l'Empire; & que pour mieux amuser le Senat il luy arriua de protester qu'il prendroit volontiers le gouuernement de la partie qu'on luy donneroit: ce Sénateur pour sonder le fond de sa pensée luy fit ceste response: qu'il choisit donc

la part qui luy feroit la plus agreable : de-
quoy il se sentit tellement piqué, qu'il le
fit puis apres mourir.

On peut encore demander, quelle obeïſ-
ſance les Cours ſouueraines doiuent rendre
aux Ediëts que le Roy leur enuoye, pour
les regiftrer & publier ? Je n'entends pas
parler de ceux qui ſont iuſtes ; d'autant que
chacun doit aller au deuant , & les rece-
uoir comme des Oracles : mais de ceux
qu'on appelle burſaux : comme s'il vouloit
augmenter ſes tributs , en eſtablir de nou-
ueaux , & créer des Officiers inutiles & ſu-
perflus , pour en tirer de l'argent. Il me
ſemble qu'il faut diſtinguer les temps : car
ſi c'eſt pour ſubuenir à vne neceſſité preſ-
ſante pour le bien public : l'oſe dire que la
reſiſtance qu'on feroit à les verifier, ſeroit
vne pure deſobeïſſance : *Neceſſitas magnum hu-*
mana imbecillitatis patrocinium, omnem legem frangit.
Mais hors le cas de neceſſité, j'eſtime qu'il
y va de la reputation des Cours ſouue-
raines , de faire au Prince de ſerieuſes re-
monſtrances , & de taſcher par toutes ſor-
tes de moyens de le deſtourner de tels
conſeils. Car comme l'on doit touſiours
preſumer que les volontez & les in-
tentions du Prince ſont fondées ſur l'e-
quité, comme dit Salomon, *Voluntas Regis*

196 DE LA SOUVERAINETE' DV ROY,
labia iusta: Et que lors qu'il fait des Ordon-
nances, il s'est persuadé qu'elles estoient
vtils au public: L'on doit esperer aussi,
qu'il aura pour agreable d'entendre les re-
monstrances de ses Officiers, qui le veulent
détromper, & luy faire voir les inconueniens
qui peuuent arriuer, soit à sa personne, soit
à son peuple, de la verification de tels
Edicts, Et qu'il imitera en cela la douceur
& la bonté de Dieu mesme, qui ne se
fâche point quand on repliche à ses com-
mandemens: Et qu'on luy demande la re-
solution de ses doutes, comme il se void
en plusieurs lieux de l'Ecriture sainte: Et
mon opinion est que les Compagnies sou-
ueraines doiuent perseuerer, iusques à ce
qu'ils ayent obtenu quelque chose: ou
qu'ils en ayent du tout perdu l'esperance:
Car alors il se faut resoudre à l'obeïssance,
suiuant la Constitution de l'Empereur Iusti-
nian, *in auth. de mandatis princip. §. deinde, &*
auth. vt nulli iudicium. §. & hoc. Et de l'Edict
que le Roy Charles IX. fit publier, tou-
chant les remonstrances des Magistrats au
Prince: autrement la Majesté & l'authori-
té Royale seroit par ce moyen sujette aux
volontez de ses Officiers, ce qui seroit
trop preiudiciable à l'Estat.

Il me semble aussi que l'on fera pru-

demment, de ne point aller vers le Roy, si l'on cognoist qu'il ne soit pas en humeur d'escouter aucune remonstrance, ny de souffrir qu'on differe l'execution de ses commandemens, ou du moins, si l'on trouue qu'il soit à propos de deputer vers luy, pour luy faire entendre ses raisons, l'on doit se comporter en ceste action avec toute sorte d'humilité & de respect; sans se roidir & s'obstiner contre le torrent: pource que comme le Laboureur ne doit semer ny prendre la peine de cultiuer sa terre, s'il n'a l'esperance d'une bonne recolte: & de recueillir les fruiçts de ses labeurs. L'on ne doit aussi iamais s'opposer aux volontez du Roy, si l'on n'est assuré de gagner quelque chose sur son esprit par telles resistances: Car ce seroit exciter inutilement contre soy-mesme son indignation & sa colere, qui pourroit le porter à des extremités dangereuses pour l'Estat, & pour ceux qui se seroient opposez à ses volontez: comme il arriua à Ionathas, qui ayant pris mal son temps pour excuser Dauid, mit son pere en telle colere; que s'il n'eust pris la fuite, il l'eust percé d'une lance, & tué sur la placé. L'on ne peut prendre vn meilleur conseil en telles rencontres, que de se resoudre à la patience,

198 DE LA SOUVERAINETE' DV ROY,
& de considerer que le Cœur des Roys
est en la main de Dieu, qui dispose leurs
volontez & leurs mouuemens tantost à la
douceur, & tantost à la seuerité, selon que
le meritent nos vertus, ou nos vices.

En suite de ceste doctrine, quelques-
vns de nos Docteurs ont demandé, si les
mandemens & les rescrits que les Roys
donnent sur les affaires particulieres, doi-
uent auoir force de loy: & s'ils obligent
les Officiers d'y obeir, mesmes pour de-
cider toutes les autres causes semblables.
L'estime qu'il faut distinguer, & mettre
difference entre ceux qui se donnent sur
de simples requestes: & en ce cas il seroit
dangereux de les suiure en ses iugemens,
pource que le plus souuent on les obtient
par faueur ou par haine. C'est pourquoy
l'Empereur Macrinus vouloit reuoquer
tous les rescrits de ses predecesseurs, com-
me le remarque Capitolin: *Omnia rescripta
veterum principum*, dit-il, *Macrinus tollere sta-
tuerat. vt iure non rescriptis ageretur; nefas esse di-
cens, leges videri Commodi, & Caracallæ, & ho-
minum imperitorum voluntates, cum Trajanus li-
bellis numquam respondisset, ne ad alias causas facta
perferrentur, quæ ad gratiam composita viderentur.*

Mais pour les autres qui ont esté faites
avec conseil & deliberation, ou en suite

de iugemens contradictoires, il seroit raisonnable d'y obeir, & de les estendre en d'autres semblables causes: dequoy l'on void plusieurs exemples dans nos liures: & principalement en la ley *Diui fratres. ff. de iure patron.* que ie rapporteray toute entiere, pource qu'elle est fort remarquable: *Comperimus à peritioribus dubitatum aliquando, an nepos contra tabulas auiti liberti bonorum possess. petere possit, si eum libertum pater patris, cum annorum xxv. esset, capitis accusasset: Et Proculum sane non leuem iuris auctorem, in hac opinione fuisse, ut nepoti in huiusmodi causa, non putaret dandam bonorum possessionem. Cuius sententiam nos quoque secuti sumus, cum rescriberemus ad libellum Causidiae Longinae, sed & Volusius Matianus amicus noster, ut est iuris civilis, prater veterem & bene fundatam peritiam maxime diligens, religionè rescripti nostri ductus est, ut coram nobis affirmauerit non arbitratum se aliter respondere debere, sed cum & ipso Matiano, & aliis amicis nostris iurisperiis adhibitis plenius tractaremus magis visum est, nepotem neque verbis, neque sententia legis, aut edicti pratoris, ex persona vel nota patris sui excludi à bonis auiti liberti.*

Ce qui se confirme par deux autres exemples de l'Ecriture sainte, l'un du 27. des Nombres, où apres que Dieu eust acheué de terminer par le ministere de

200 DE LA SOUVERAINETE' DV ROY,
Moyse la cause des filles de Salphad , il
ordonna que sa decision seroit tenuë pour
loy generale en tous les autres cas sem-
blables. L'autre est du premier des Roys,
où il est dit , que le iugement que rendit
Dauid, sur la contention des soldats, qui
refusoient de faire part des despoüilles des
Amalechites à ceux qui estoient demeu-
rez pour la defense du bagage , auroit for-
ce de loy perpetuelle en de pareilles ren-
contres : *Et factum est ex die illa , & deinceps
constitutum & prafinitum , & quasi lex in Israël,
vsque ad diem hanc.* Cela se peut rapporter
aux Arrests que le Roy donne en son
Conseil, pour l'éclaircissement des droicts
de sa Couronne; & aux Declarations qu'il
fait sur ce sujet , ou sur les doutes qui se
peuvent rencontrer en ses Edicts , & en
ses Ordonnances , à qui tous les Officiers
doient deferer & obeïr. Mais pour auoir
cette creance elles doient estre leuës &
enregistrées aux Cours souueraines, comme
les autres loix.

Neantmoins i'oseray dire que les Offi-
ciers ne doient auoir aucun égard aux
Lettres que le Roy leur pourroit enuoyer
pour decider les questions qui seroient
pendantes par deuant eux : car ils doient
presumer que c'est par surprise qu'elles ont
esté

esté obtenus, suiuant ceste ancienne maxime : *Pendente lite non fieri sacras formas, neque sacras iussiones.* Mais principalement l'usage de ces Rescrits, de ces Mandemens, ou de ces Lettres, est précisément interdit à ceux qui s'en voudroient preualoir, pour paruenir à des Noces inégales, & contre le gré des parens, & des tuteurs, comme il est dit au tiltre, *Si nuptia ex rescripto petuntur.* C'est pourquoy les Roys Childebert & Clotaire, enjoignirent à tous les Iuges de traiter avec rigueur, ceux qui se seruoient de leurs Rescrits, pour espouser des filles, contre leur consentement, & contre celui de leurs parens : dont l'Ordonnance est transcritte dans le Concile de Tours. L'on doit tenir le semblable de toutes les autres Lettres signées en commandemens, qui sont contraires aux Loix generales du Royaume, s'il n'y a expresse derogation : & des Lettres de cachet que les Ordonnances reprouuent, & defendent à tous les Iuges d'y auoir aucun égard, à cause de la facilité qu'il y a de les obtenir : Et n'y a que les Lettres parentes signées en commandemens, & scellées du grand Seau, que la loy *sacri Affatus, C. de diuers rescript.* appelle *sacrum encaustum*, qui puissent seruir de legitime tesmoignage de la volonté du Prince.

Qu'il n'y a que le Roy qui puisse faire
des Nobles.

CHAPITRE VII.



E ne puis estre de l'aduis de ceux qui ont mis en auant, que la Nature auoit créé les hommes, pour estre tous égaux: bien qu'ils appuyent leur opinion de l'autorité de Senèque, quand il dit au liure troisiéme des bien faits; *Eadem omnibus principia, eademque origo, nemo altero nobilior, vnus omnium parens mundus est.* Et en vn autre endroit: *Istum etiam quem seruum tuum vocas, ex iisdem seminibus ortum vides, eodem frui Cælo, aque spirare, aque viuere, aque mori:* Car ceste égalité dont il parle se doit entendre seulement de la iouïssance des clemens, qui est commune à tout le monde, & de la substance interieure des corps & des esprits, qui est semblable en tous les hommes: mais non pas des qualitez & des graces exterieures que Dieu leur donne, qui sont toutes differentes.

Ce que Platon au liure troisiésme de sa Republique a mieux expliqué qu'aucun

autre, lors qu'il feint que Dieu donnant l'estre aux hommes, il mella de l'or dans les esprits des vns, de l'argent, du cuiure, & du fer, dans les esprits des autres: c'est à dire, qu'il les enrichit de differentes qualitez, dont les vnes estoient plus excellentes & releuées; & les autres de moindre consideration. Aussi nous voyons que l'Apôstre des Gentils, compare ceste Majesté diuine, au potier: qui d'une mesme terre fait des vases differents de prix & d'estime: Et qu'ailleurs il le décrit comme dispensateur de ses biens spirituels, honorant les vns d'une grace plus accomplie, & donnant aux autres, une vertu moins parfaite; afin qu'estans reuestus de diuerses perfections, ils peussent remedier aux defauts les vns des autres: & se prester vn reciproque secours dans leur foiblesse. Ce que plusieurs ont dit estre necessaire, pour maintenir ceste societé ciuile, & obliger les hommes à se porter une mutuelle bienveillance, & s'entr'aymer plus constamment: *Præclare enim agitur cum pusillo, si magnis societur, maior quoque à minoribus sustinetur & erigitur*, dit vn Ancien. C'est pourquoy nous voyons qu'en toutes les Republiques bien policées on a tousiours estably diuers ordres entre les citoyens: Car les vns ont

204 DE LA SOUVERAINETE' DV ROY,
 esté destinez pour trauailler aux arts meca-
 niques, au labourage, & au commerce:
 les autres pour l'exercice des armes, &
 pour rendre la Iustice: & les autres pour
 le culte & le seruice de Dieu. Et quand il
 arriuoit parmy les Anciens, que quelqu'un
 de la populace se rendoit recommandable
 par sa valeur & son industrie, ils auoient
 accoustumé de l'esleuer iusques au premier
 grade; afin de l'exciter à se rendre de plus
 en plus parfait en la vertu, & par ces ho-
 norables recompenses échauffer les autres
 à l'imiter & suiure son exemple. Ce que
 les Empereurs Romains sceurent vtilement
 mettre en pratique, quand pour releuer
 le merite de ceux du plus bas ordre de
 la Republique, ils donnoient aux vns le
 droit de porter l'anneau d'or, comme Ci-
 ceron le remarque en l'action 5. contre
 Verres: *Sæpe etiam Imperatores nostri superatis*
hostibus, & Repub. optimè gesta, strenuos annulis
aureis in concione donarunt. Et aux autres, *Nat-*
alium restitutionem, qui les remettoit dans le
 mesme degré de liberté, dont iouïsssoient
 les premiers Romains, & qu'ils appelloient
Quiritibus adscribere, comme nous l'appre-
 nons du tiltre de *natal. restit.* qui estoient les
 deux moyens dont ils se seruoient, pour
 les esleuer au dessus de l'ordre Plebeian,

& les faire approcher de celuy des Sénateurs & des Cheualiers, ainsi que Plinè l'explique au liure premier, chap. 35. de son Histoire naturelle.

Or comme il n'y a rien qui releue avec plus de splendeur la puissance souueraine, que d'auoir l'autorité de changer l'estat & la condition naturelle des hommes: Aussi n'y auoit-il à Rome, que l'Empereur qui peust donner le droit d'ingenuité & de Bourgeoisie, comme l'Empereur Diocletian le declare expressement en la loy premiere, *C. de iure aueror. annul. natales antiquos, & ius ingenuitatis, non ab ordine Decurionum prestari, sed à nobis peti potuit*: ce que nos Iuriscultes auoient auparauant enseigné en la loy 1. *& in l. quaris. ff. de nata. rest.*

Sur cét exemple l'on a tousiours tenu en France, qu'il n'y a que le Roy qui puisse donner des Lettres de Noblesse: ce que nos anciens Praticiens appelloient, *Facere de villano militem*. Et de faict, par Arrest de la Cour, rapporté par *Joannes Galli*, en datte de l'année 1260. l'on fit tres-expres- ses defenses au Comte de Flandres, de plus entreprendre de donner des annoblissemens. Et par autre Arrest de l'année 1269. qui se lit dans le Registre, *Olim, fol. 46. & 58.* vn Comte de Neuers fut condamné à l'a-

206 DE LA SOUVERAINETE' DV ROY,
mende enuers le Roy, pour auoir anobly
deux de ses subjects, qui furent aussi con-
damnez chacun en mille liures d'amen-
de, pour s'estre mespris si lourdement
en vne chose qui dependoit de la seule au-
thorité du Roy.

Ce qu'estant presuppposé, l'on doit re-
marquer, que nos Roys conferent la No-
blesse par deux moyens, l'un tacite, &
l'autre expres: celuy-là se fait par les Offi-
ces: & cestuy-cy par des Lettres patentes.
Quant aux Offices qui donnent le tiltre
de Noblesse, les vns sont enrichis d'un si
grand éclat de dignité, qu'ils acquierent
vne pleine & entiere Noblesse, en mesme
temps, qu'on a l'honneur d'en estre pour-
ueu: comme sont les Offices de Chance-
lier de France, de Garde des Sceaux, des
Conseillers d'Estat seruans actuellement,
des Secretaires d'Estat: toutes les premie-
res dignitez militaires: de la Iustice: &
de la Maison du Roy, qui estoient ancien-
nement affectées à la plus haute Noblesse.

Et les autres, bien qu'ils soient fort
honorables; neantmoins ils n'attribuent
pas si promptement vne pleine Noblesse, à
ceux qui les possèdent: mais ils seruent
seulement de degré pour y paruenir: car
suiuant la Coustume que nous obseruons,

il faut que la possession de ces Offices, ayt esté continuée de pere en fils, dans vne mesme famille, pour faire que le troisiéme se puisse dire pleinement Noble. Encores est-il nécessaire, que le pere & l'ayeul en ayent ioüy iusques à leur deceds. De ceste espece sont les Offices de Conseillers des Cours souueraines, de Tresoriers Generaux de France, de Secretaires du Roy Maison, & Couronne, de Capitaines & Lieutenans de Compagnies de gens de guerre, & de plusieurs autres, qui pour l'honneur de leur dignité, ioüyssent d'une pleine immunité des Tailles, & de toutes sortes de subides: ce que l'on peut dire estre déjà vne demie Noblesse.

Et bien qu'on ayt iugé dans les Cours de Parlement, que les successions des Conseillers se doiuent partager noblement, sans attendre ceste continuation d'Offices de pere en fils: neantmoins on le iuge autrement en la Cour des Aydes, quand il est question du payement des Tailles, & que leurs enfans pretendent en estre exempts. En quoy ils suiuent la regle du droit Romain, qui dit en la loy 1. C. de dignit. lib. 12. *si vt proponis & auam Consulem, & patrem pratorum virum habuistis, claritatem generis retinetis.* Ce qui semble auoir esté tiré d'une an-

208 DE LA SOUVERAINETE' DV ROY,
cienne Constitution qui fut faiëte du temps
de C. Sulpitius Galba, par laquelle il fut or-
donné : *Ne cui ius esset vti annulis aureis , nisi
cui ingenuo ipsi , patri auctque paterno , H-5. qua-
draginta census fuisset , & lege Iulia Theatrali in
xiiij. ordinibus sedenti ,* dit Pline au liure 35.
chap. 2. de son Histoire naturelle. L'on
doit dire le semblable de ceux qui seruent
à la guerre , avec les qualitez , & durant
le temps qui est porté par l'Edict de l'an
1600.

Quant à l'autre sorte d'annoblissement
qui se fait par Lettres expressees , comme
ce moyen est plus absolu, que celuy dont
nous venons de parler, aussi a-t'il ses effects
plus presens : car ceux-là sont annoblis , &
leurs enfans nais & à naistre, si tost qu'ils
ont obtenu leurs Lettres de Noblesse :
Je dis nais & à naistre , suiuant l'opinion
d'Ulpian, qui dit en la loy *Senatoris filium.
ff. de Senator. nil interest iam in Senatoria dignitate
constitutus, eum susceperit, an ante dignitatem.* Ce
qui a decidé toutes ces grandes questions,
qui furent autre-fois agitées pour la suc-
cession des Royaumes : sçauoir qui seroit
preferé, ou celuy qui estoit nay auant que
le pere fust Roy, ou celuy qui estoit ve-
nu depuis ? Budée neantmoins dit en son
Commentaire qu'il a fait sur la loy *fin. ff.
de Sena-*

de *Senatoribus*. qu'en plusieurs endroits on n'estime pour vraiment Nobles que l'arrière-fils de celuy qui a esté annobly, comme le pratiquoient les Romains, qui mettoient difference entre les hommes nouveaux, & les anciens Nobles, ainsi que le remarque Cicéron en l'Oraison qu'il a faicte pour Cluentius : mais cela ne se void gueres parmy nous.

Et bien que quelques-vns de nos Docteurs écriuans sur l'Auth. *Vt Indices siue quoque suffrag. §. Itaque.* & sur le *ca. gratia. 1. quest. 1.* tiennent que le Prince de son seul mouuement, & sans autre raison, peut annoblir qui bon luy semble : Et que l'on doit en cela plustost considerer la puissance de celuy qui donne, que les merites de celuy qui reçoit : se seruans de ce passage de l'Ésriture sainte : *Honorabitur, quem voluerit Rex honorari*, & du dire de Pline en son Panegyrique : *Cesar nobiles efficit, & conseruat*. Neantmoins ie ne puis estre de cét aduis, au contraire, j'estime que le Prince, ne peut iamais abuser plus indignement de sa puissance, qu'en donnant le tiltre de Noblesse à celuy qui ne l'a point meritée par quelque genereuse action. Car c'est en ce faisant, la deshoner, & la rendre vile & mesprisable, comme le Senat & les No-

210 DE LA SOUVERAINETÉ DV ROY,
bles de Rome le tesmoignerent lors qu'ils
virent vn Flavius du tout indigne, auoir
esté promu à l'Office d'Ædile, avec le
droit de porter l'anneau d'or, *Tanta in-*
dignatione Senatum exarsisse, vt plerique nobilium,
aureos annulos, & phaleras deponerent, dit Tite
Liue.

Que s'il s'est veu durant le Regne de
nos derniers Roys, que la Noblesse ait esté
vendue à prix d'argent; comme ce fut vn
monstre engendré d'une hideuse necessité,
aussi fut-il supprimé par Edict expres de
l'an 1598. Et de faict, nous voyons que
toutes les Lettres d'annoblissement que
nos Roys octroyent sont fondées sur les
merites & les seruices de ceux qu'ils anno-
blissent, & dont la preuue s'en doit faire
en la Chambre des Comptes, & en la Cour
des Aydes, lors qu'ils les y presentent pour
estre registrées.

Et bien que la condition de ceux qui
suiuent les armes, & puis apres celle des
Officiers, meritent sur toutes les autres ce
titre de Noblesse : l'estime toutesfois,
qu'on ne doit point mespriser les rares ver-
tus de plusieurs, qui ayans recueilly de
grands biens de leurs ancestres, & mespri-
ans les honneurs du monde, viuent ho-
norablement en leurs maisons, & donnent

à leurs citoyens l'exemplē d'une bonne conduite en leurs familles. Car véritablement, ils ne doiuent pas estre moins estimez que les autres. D'où vient mesme, qu'anciennement ils estoient tenus & reputez pour nobles: tescmoin ce que dit Aristote, lors qu'au liure premier, chapitre quatrième de ses Politiques, il establit deux sortes de Noblesse, vne publique, qui est celle des Officiers, & de ceux qui sont employez aux affaires de la Republique: Et l'autre priuée, qui est de ceux qui vivent honnestement dans leurs maisons; celle-cy estoit en vsage parmy les Romains: comme Ciceron nous l'enseigne en plusieurs endroits de ses œuvres, & particulièrement en la 7. Act. contre Verres: *Alter parens, ex altera parte Erbidensis Ebulita, homo, domi sue clarus & nobilis*: Et puis apres, *Dicit etiam causam Heraclius segesta, homo domi sue summo loco natus*. Et en l'Act. 5. *Sozetenus est Eutellius homo cum primis ciuitatis prudens, & domi nobilis*. Et en l'Oraison pour Flaccus: *Vbi erant illi Pithodorus & Lepison, cateris homines noti, inter suos nobiles*. Ayant estimé que la vertu, & en suite la Noblesse, ne se trouuent pas seulement dans le public: c'est à dire, dans les Magistratures, & dans les fonctions publiques; mais encores dans les bonnes

212 DE LA SOUVERAINETÉ DV ROY,
& honorables familles, que Platon dit
estre les Patrons racourcis des grandes Re-
publiques.

Mais quoy que ceste espece de No-
bleſſe merite vne parfaicte louange: *Nobi-
litas enim nihil aliud est, quam cognita virtus*, dit
Ciceron en l'Epistre qu'il écrit à Hirtius.
Neantmoins pource qu'elle est aujourd' huy
plus en consideration parmy les Philoso-
phes, que parmy les Politiques, elle ne
iouyſt pour toute recompense de son me-
rite, que du seul contentement, que la
vertu donne à ceux qui la possèdent. D'où
vient que si le Roy vouloit les annoblir,
ils passeroient par la meſme rigueur que
tous les autres, & feroient contraints de
payer la finance accouſtumée pour l'in-
demnité, que la Chambre des Comptes a
de couſtume d'arbitrer, selon la quantité
des biens & des facultez que l'on possède,
si ce n'est que le Roy leur en eust fait la
remise par des Lettres expresseſ.

Voyons maintenant quels sont les pri-
uileges & les prerogatiues dont iouyt la
Nobleſſe: ils sont si grands & si notables,
qu'ils ont bien merité d'estre authorisez
de la puissance du Prince. Le premier est,
que ceux de cét ordre, sont ordinairement
preferez, à ceux qui sont de familles Ple-


beiennes, quand il est question de pourvoir
 tant aux charges civiles & militaires, qu'aux
 grandes Prelatures de l'Eglise. Ce qui se
 pratiquoit mesme du temps de nos anciens
 Roys, comme nous l'apprenons du Moine
 Marculphus, qui viuoit du temps de Da-
 gobert, de Sidonius, & de Gregoire de
 Tours. Et nous voyons encore à present
 plusieurs Eglises Cathedrales, & Abbaves,
 dont les Prebendes, & les places des Re-
 ligieux, sont particulièrement affectées par
 des Gentils-hommes. Le second est, qu'il
 n'y a que les Gentils-hommes, qui puissent
 posseder les fiefs du Royaume: ce qu'on
 leur a accordé, pour recompense des tra-
 uaux qu'ils endurent dans les factions de
 la guerre: & de ce qu'ils exposent leurs
 vies à toutes sortes de dangers, pour la de-
 fense du pays. Cela mesme se pratiquoit
 parmy les Romains, qui donnoient à leurs
 soldats les terres qu'ils auoient conquises
 sur les ennemis, comme le tesmoigne Lam-
 pridius en la vie d'Alexandre Seuer: *Sola*
que de hostibus capta sunt, limitaneis Ducibus &
Militibus donauit, ita vt eorum essent, si heredes
eorum militarent, nec vnquam ad priuatos pertine-
rent, dicens attentius eos militaturos, si etiam sua
rura defenderent. Ce qui a seruy de patron
 pour l'establissement de nos fiefs. Et bien

214 DE LA SOUVERAINETE' DV ROY,
que d'autres que les Gentils-hommes les
possèdent maintenant, ce n'est que par
dispense du Prince, & à la charge de luy
payer certaine indemnité, qu'on appelle,
Francs fiefs & nouveaux acquets.

En fin, la Noblesse iouyt de l'immunité
& de l'exemption de toutes Tailles, & des
autres subsidez qu'on leue sur le menu peu-
ple: elle est seulement tenuë de se mettre en
campagne, quand elle est appelée par ban
& arriere-ban, & en toutes les occasions
où le Roy se trouue en personne. Mais
d'autant que plusieurs autres ont traité
de ce mesme sujet, & que i'en ay parlé
amplement ailleurs: Je me contenteray
d'en auoir remarqué icy les principaux
poincts; l'adjousteray seulement pour con-
clusion de ce Discours, que personne ne
peut s'attribuer aucun de ses priuileges,
que par la concession du Prince, à peine
de crime de faux, comme il est dit *in l. 27.*
eos qui. §. fin. ff. ad leg. Corn. de fals. d'autant
que c'est vne maxime de nostre Iurispru-
dence, que *Nemo potest sibi mutare causam pos-*
sessionis sue, nec statum suum immutare.

*Qu'il n'appartient qu'au Roy de naturaliser les
estrangeurs, & des droits qu'il a sur eux.*

CHAPITRE VIII.

ESTOIT avec raison que le grand
Hercule disoit, que son pays estant
par tout, on le nommoit à tort,
tantost Thebain, & tantost Ar-
gien: Et qu'Ariston, Socrate, Democrite,
Diogene, & plusieurs autres Philosophes,
se faisoient appeller Cosmopolites, ou Ci-
toyens du monde: Car la nature auoit
destiné toute la terre, pour seruir d'une
cité commune à tous les hommes, afin
que comme ils n'auoient qu'une mesme
langue, ils vescuissent aussi sous de mesmes
Loix, & iouüssent également de sembla-
bles priuileges: Mais depuis que par la
confusion de leur langage, ils furent con-
traints de se separer les vns des autres, ils
rompirent ceste alliance, dont la nature
les auoit vnus, & ils se cantonnerent dans les
pays qu'ils auoient choisis pour habiter;
Et comme si d'hommes ils eussent esté
changez en bestes farouches, non seule-
ment ils se firent la guerre les vns aux au-

D d iij.

216 DE LA SOUVERAINETE' DV ROY,
tres, mais encore par des Loix particulie-
res, ils se priuerent de toute habitude, &
de toute communion de droit, tant hu-
main que diuin.

De là vint la publication des Loix
Mutia & Licinia, parmy les Romains, qui de-
fendoient à tous les éstrangers, & mesmes
aux Italiens, qui estoient leurs proches
voyfins, de s'habituer dans la ville de Ro-
me, à peine de la vie; dequoy ils furent
tant indignez, que pour se venger d'un si
sanglant affront, ils entreprirent contre eux
la guerre, que leurs Historiens appellent
Italique? Où les Romains se virent telle-
ment presséz, que pour faire la paix avec
eux, ils furent contraints de leur accorder,
non seulement la permission de demeurer
dans leur ville, mais encore le droit de
Bourgeoisie: à la charge neantmoins qu'ils
seroient nommez *Noui ciues*: c'est à dire,
qu'ils ne seroient capables des honneurs
publics, qu'après la troisiéme generation,
comme l'explique *Paterculus*.

Caius Papius, Tribun du peuple, renou-
uella depuis ceste mesme rigueur enuers
les éstrangers, lors qu'il les chassa de Ro-
me, prenant ce pretexte, que leur ville ne
seroit plus la demeure des citoyens Ro-
mains, *Sed colluuium nationum in qua extranei qui-*
que

que *morarentur*, dit Tite Live. Ceux d'Athenes ne furent pas plus humains envers les mesmes estrangers : tescmoin le severe iugement qu'ils donnerent contre Thrasibule : car bien qu'ils luy fussent obligez de leur liberté, pour avoir chassé les Tyrans, & restably dans leurs biens tous les bannis ; neantmoins, pource que, contre les Loix, & de son autorité priuée, il auoit fait citoyen d'Athenes Lylias Syracusien, ils le condamnerent en dix talens d'amende, & chasserent Lylias de la ville.

Plutarque en la vie d'Agis, dit que ceux de Sparte en vsèrent de la sorte envers tous ceux qui vouloient establir leur demeure dans leur ville. Ce qui fut depuis pratiqué par tous les autres peuples, craignans que s'ils permettoient aux estrangers de demeurer parmy eux, ils ne seruissent d'espions à leurs ennemis, pour decouvrir tous les secrets de leur Estat, ou ne corrompissent les mœurs de leurs citoyens. Neantmoins iugeans depuis que c'estoit vne grande imprudence de chasser du tout les estrangers de leurs villes, ils exempterent de ceste rigueur ceux qu'ils voyoient enrichis de plusieurs qualitez eminentes, & de qui ils pouuoient esperer du secours & du conseil, pour le gouver-

Ec

218 DE LA SOUVERAINETE' DV ROY,
nement de leur Estat, comme Cicéron le
discourt en ses Oraisons qu'il a faictes pour
Balbus, & pour le Poëte Archias : *Et enim*
cùm cateris præmiis digni sunt, qui suo labore &
periculo rempublicam defendunt; tum certè dignissimi,
qui ea ciuitate donentur, pro qua, pericula ac tela
subierunt. Aussi Caius Marius se seruit de
ceste consideration, pour s'excuser enuers
le peuple, de ce qu'il auoit donné le droit
de Bourgeoisie Romaine à mille Camerins:
d'autant, disoit-il, qu'ils auoient combat-
tu vaillamment pour la Republique con-
tre les Cymbres.

Mais cela se deuoit faire avec les for-
mes accoustumées: Comme en Athenes, il
falloit, que celuy qui demandoit le droit
de Bourgeoisie, se presentast en personne
avec toute sa famille, deuant le Senat, &
qu'il renonçast à son propre pais: & que
puis apres cela fust rapporté deuant le peu-
ple, qui ne pouuoit rien ordonner, s'il n'y
auoit cinq mille citoyens qui en fissent
d'avis: comme Plutarque le recite en la vie
de Solon: & Demosthene en l'Oraison
contre Neæra, dit d'auantage, qu'apres
toutes ces solemnitez, si le peuple venoit
à cognoistre auoir esté surpris; qu'il pou-
uoit reuoquer son decret, & punir ceux
qui les auoient trompez: comme il arriua

à Pytholas Theſſalien , & à Apolinide Olynthien : Et Vlpian remarque ſur l'Oraison, que Demosthene a faicte contre Timocrates, qu'ils exerçoient tant de rigueur contre ceux qui ſous vn faux tiltre, auoient obtenu cét honneur, que *Causam dicebant è vinculis.*

La forme qu'on pratiquoit à Rome estoit presque semblable ; pource que l'on examinoit deuant le peuple , les vertus & les merites de ceux qui demandoient le droit de Cité Romaine : Mais ils estoient plus ſeueres que les Atheniens , contre ceux qui auoient vſé de tromperie pour l'obtenir ; car ils les puniſſoient du dernier ſupplice : ce que nous teſmoigne Suetone en la vie de Claudius , où il dit que ce Prince fit trancher la teſte à vn certain, qui auoit obtenu le droit de Bourgeoisie, *Ex falsa causa* : ce qu'ils appelloient, *Crimen peregrinitatis, ſive Exias.*

C'eſt ſur ces exemples qu'on a introduit, non ſeulement en ce Royaume, mais auſſi par toutes les autres contrées de l'Europe, ce droit Royal, que nous appellons en noſtre langue, *Aubeine* ; pource qu'il ſ'exerce ſur ceux qui ſont naiz ailleurs : c'eſt à dire, ſur les eſtrangers : Bien que quelques-uns diſent , que ce mot *Albinus* , prend

220 DE LA SOUVERAINETE' DV ROY,
son origine d'Albion, pource qu'il fut premierement introduit en France, en haine des Anglois, dont l'Isle estoit appellée Albion par les Anciens; pour reuence de ce que sous Edoüard III. ils firent defenes aux François d'habiter en leur pays, à peine de la vie, comme le remarque Polydore Virgile.

Voyons maintenant quels sont les effects que ce droit produit. Le premier est, qu'il rend tous les estrangers incapables de tenir des Estats, des Offices, & des Benefices, en ce Royaume: comme il est ordonné par l'Edict de l'an 1431. Et par l'Edict que fit Louys XII. le 13. iuin 1499. touchant les Benefices, & qui mesme reuoque toutes les dispenses, que le Roy Charles VIII. auoit auparauant données de ce droit, aux estrangers.

Nos Roys ont esté portez à publier ces Ordonnances, pource qu'ils ont estimé que les affaires, tant diuines que ciuiles de leur Royaume, seroient mieux conduites, & auroient vne issuë plus heureuse, *Si patrijs regerentur auspicijs.* Que ce seroit faire vne injure insupportable, à leurs subiects, d'employer des estrangers, au lieu de se seruir de leur industrie, s'en trouuans mesmes vn grand nombre en France, enrichis

de toutes sortes de vertus & de facultez. Et que c'estoit vne maxime obseruée dans tous les Estats, qu'il n'y auoit que les naturels citoyens, qui estoient reputez capables d'exercer les Offices, & les autres fonctions publiques. D'où vient que ceux de Sodome, dans l'Escripture sainte, disoient à Loth: *Ingressus es, vt aduena, numquid vt indices?*

L'on n'observe pas neantmoins les Edicts en toutes sortes de rencontres: & principalement quand il est question de reconnoître la vertu, & les seruices de quelque grand personnage. Car alors on les exempté de la rigueur de ces Loix; & l'on les declare capables de tenir les plus grandes charges du Royaume: comme le pratiquerent autre-fois Charles VIII. enuers Stuard, de nation Escossoise: François I. enuers Iean Iacques Triulce, qu'il fit Marechal de France: Henry II. enuers Charles de Gonzague: Henry IV. enuers le Marechal d'Ornano, qui estoit Corse de nation.

Le second effect que produit ce droit d'Aubeine, est, que le Roy succede à l'estranger, à l'exclusion de ses plus proches parens; d'où vient que *Benedicti*, sur le Chapitre *Raynuius*, dit que de son temps,

122 DE LA SOUVERAINETE' DV ROY,
les enfans mesmes de l'estranger; ne luy
succedoient point : mais nous voyons par
les Registres de la Cour, que ceste rigueur
a esté moderée, & qu'elle ne s'obserue
plus, que contre les enfans qui sont naiz
hors de France, & non pas contre les au-
tres, comme du Luc le remarque au tiltre
de statu hominum.

D'auantage, ce mesme droit oste encore
à l'estranger la faculté de pouuoir disposer
de ses biens par testament, & le rend in-
capable de succeder à ses propres parens
qui resident en France, comme dit Cona-
nus, au tiltre, *Qui testament. facere possunt.*
Cela se doit entendre aussi du François,
qui s'est fait estrangér, & qui a renoncé
au droit de sa patrie; d'autant que dès lors
il est tenu pour deserteur, & priué de tous
les priuileges de citoyen François, ainsi
que ie l'ay deduit plus amplement dans
mes Decisions.

Plusieurs font exceptez de la rigueur de
ce droit, comme ceux qui ont obtenu des
lettres de naturalité du Roy, qui est le seul
qui les peut donner en son Royaume, sui-
uant la disposition de la loy 1. ff. de iur. au-
reor. annulor. & de la loy 1. ff. de natal. restitu.
Et comme on le fit sçauoir à François II.
Duc de Bretagne, qui vsurpoit ce droit

dans les pays de son obeïssance: car puis que par ce moyen l'estranger est fait égal aux naturels citoyens: & qu'il ne faut plus mettre de difference, *inter ciues, qui quod, & eos qui rōmā sunt*: c'est à dire, *inter natos, & factos*, dit Isocrate en son Panegyrique, il est certain que si tost que le Roy les a naturalisez ils iouïssent des mesmes priuileges que les autres citoyens François, En quoy nous differons des Romains, qui n'accordoient pas tout à coup ceste grace, mais seulement par degrez. Car les estrangers qui auoient esté naturalisez prenoient premierement, *Vsum togæ Romanæ*; & puis quelque temps apres, ils estoient receus *inter ciues*, comme Marcianus l'explique in l. 31. & 32. ff. de iure fisci. Le mesme estoit pratiqué en Athenes, où durant vn certain temps on le plaçoit *inter metoikos*, & puis apres on le mettoit au rang des vrayz citoyens, & le rendoit-on capable d'exercer les Offices de la Republique.

Et l'on doit remarquer que l'estranger qui a esté naturalisé, venant à mourir sans enfans, & sans auoir disposé de ses biens, que le Roy est son heritier, à l'exclusion des hauts-Justiciers, qui ayans voulu pretendre leur succession, comme par droit de des herence: la Cour les en a deboutez.

224 DE LA SOUVERAINETÉ' DV ROY,
par plusieurs Arrests, n'ayant pas trouué
raisonnable, que la faueur & la grace, que
le Roy auoit faicte à l'estranger, luy deust
nuire, & retrancher en quelque sorte de
son droit, pour profiter au seigneur par-
ticulier, contre la regle de nostre Iurispru-
dence, *l. si Iudex circumuento. ff. de minoribus.*

Secondement, ceux-la sont exceptez de
ce droit, qui sont naiz dans les pays où les
Roys de France ont anciennement com-
mandé: car bien que pour ceder à la ne-
cessité, qui tient en sa puissance les succez
des affaires humaines, nous en ayons per-
du la possession; neantmoins le droit en
est tousiours demeuré à la Couronne, qui
ne perd iamais ses droits, sur les choses
qui ont esté de son vray Domaine, comme
sont les pays de Flandres, d'Arthois, de
Tournesis, de Cambresis, & les autres qui
sont mentionnez dans les Traictez de Ma-
dril, & de Cambray; qui ont esté de toute
antiquité des fiefs dependans de la Cou-
ronne, tant en hommage, que iressort:
comme Paul Emile le tesmoigne en la vie
de Charles le Chauue, & de saint Louys.
Toutesfois ceste exemption n'a la force
qu'apres qu'on a obtenu des Lettres de De-
claration du Roy, & que tandis que les
Seigneurs qui detiennent les terres yfur-
pées

pées sur la Couronne, sont en bonne intelligence avec la France. Je ne rapporteray point icy tous les autres Estats, dont les habitans iouïssent de ceste faueur; pource que quelques-vns en ont déjà fait la liste: & ie tasche de ne rien prendre de leur labeur.

D'avantage, ceux-là sont exceptez de ce droit, qui sont naiz dans les Prouins qui ont autre-fois esté conquises à la Couronne, & qui depuis ont esté renduës à leurs anciens Seigneurs: Car si quelques-vns de ces pays ont tousiours demeuré en France depuis la conquête, il n'y a point de doute, qu'ils doiuent estre tenus pour François; comme il a esté iugé plusieurs fois en faueur des Sauoyards, qui estoient venus s'habituer en France, lors que le Roy François I. l'eut conquise, & qui y demurerent apres que l'on eut rendu leur pays au Duc Philbert Emmanuel, en faueur de son Mariage avec la sœur de Henry II. en l'année 1559.

La rigueur de ce droit ne s'exerce point encore contre les peuples qui sont alliez & confederez de la Couronne, comme sont les Suisses qui demeurent en France, qui sont aux gages du Roy, & qui n'ont point intention de retourner en leur pays,

Ff

226 DE LA SOUVERAINETE' DV ROY,
ainsi que le contiennent les Traictez de
Louys XI. de l'an 1477. & de l'an 1481.
Les Escossois ont autre-fois ioüy de ce
mesme priuilege; iusques là qu'en faueur
du Mariage de François II. avec Marie
Reyne d'Escoffe, ils furent tous faits na-
turels François, avec pouuoir de tenir des
Offices & Benefices : mais depuis la disso-
lution de ce Mariage, ce priuilege a esté
excepté à l'égard de ceux qui seruent dans
les Gardes Escossoises. Ce qui auoit esté
accordé à ceste nation, à l'imitation des
Romains qui donnerent le droit de Bour-
geoisie Romaine à tous ceux de Sicile,
& d'Etolie, en faueur de l'alliance qu'ils
auoient contractée avec eux, comme Ci-
ceron l'écrit en ses Epistres *ad Atticum*, &
Suetone en la vie d'Auguste.

Les Marchands qui trafiquent en Fran-
ce, qui frequentent les Foires publiques,
comme sont ceux des villes Imperiales d'A-
lemagne, ne sont point aussi sujets à la
rigueur de ce droit; ce qui leur a esté accor-
dé en suite de la Hanse Teutonique, & du
Traicté que le Roy Louys XI. a fait avec
eux, & qui contient entre autres choses,
que tandis qu'ils trafiqueront en France,
ils pourront librement disposer des biens
qu'ils y possederont, soit par contractz en-

tre vifs, ou par testament. Ils ont merit  ceste faueur de nos Roys,   cause du grand profit que le Royaume re oit du commerce qu'ils exercent en France : & que nous pouuons dire avec Pline, que par leur moyen, *Nunc factum est, ut gens altera, alterius suppleret inopiam; ut eo modo, quod  nitum esset vspiam, apud omnes natum esse videretur.* Car c'est le propre de la marchandise, de suppl er aux defauts de la nature, de fournir les choses qui sont necessaires   vn pays, d'emporter ce qu'un autre poss de avec trop d'abondance; & en fin de rendre les Estats florissans, & les combler de toutes sortes de biens & de richesses. C'est pourquoy Aristote, dans sa Republique, ne laisse pas le soin du trafic aux particuliers seulement : mais il veut encore que le public, qui est le plus interess , en prenne le soin & la principale intendance. Aussi pour ceste consideration, Cassiodore, au liure fixi me de ses Diuersitez, d criuant la charge du Prefect des viures, luy tient ce discours : *Tui studium est, ut sacratissima vrbis prepararetur annona, & vbique redunder.*

Nous pouuons aussi comprendre dans ceste exception : premierement, les Ambassadeurs, & ceux de leur suite, suiuant la disposition du droit Romain, *in l. qui  *

228 DE LA SOUVERAINETE' DV ROY,
larronibus. §. 1. ff. de testam. à cause de leur qua-
lité, & de la grande franchise que leur
donne le droit des Gens. Secondement,
les domestiques des Princes du Sang, qui
vont en pays estrange; comme il fut jugé
pour des Italiens, qui estoient à la suite de
Madame de Ferrare, lors qu'elle reuint d'I-
talie en France: il en faut dire de mesme
des François, qui sont allez en Espagne,
en Angleterre, & en Sauoye, à la suite des
Filles de France, qui y sont mariées: ce
qui leur a esté accordé sur l'exemple du
mesme droit Romain, qui se lit, *in l. tem-
poralibus. C. de vxor. mil.*

Les Escoliers qui viennent de pays
estrange estudier en l'Vniuersité de Paris,
ioüyssent aussi de ceste exemption, comme
il est expressément porté par l'Edict de
l'année 1315. qui est conforme à l'Ordon-
nance de Frederic, en l'Auth. *habita. C. Ne-
fil. pro patre.* Ce qui leur a esté donné en
faueur des Muses, dont l'Empire spirituel
s'estend par tout l'vniuers; & n'est borné
d'aucunes limites, que de l'ignorance &
de la Barbarie. Tous les autres estrangers
sont sujets au droit d'Aubeine: Mais nos
Rois en vsent avec tant d'humanité, qu'il
leur est presque comme inutile, pource
qu'ils ne refusent à personne les Lettres de

Naturalité, pour peu que l'on ayt de re-commandation. Il est toutesfois necessaire, que ceux qui les ont obtenues, & leurs heritiers, facent leur demeure en France: Car. c'est le domicile qui sert de principal fondement à la iouïssance de ceste faueur du Prince: comme il se pratiquoit parmy les Romains, qui ne reputoient point celuy là capable *Sacrorum, libertatis, dignitatis, vrbis, fori, ludorum, festorumque dierum*, s'il n'auoit son actuel domicile à Rome, comme le tesmoigne Ciceron en l'Oraison qu'il a faicte pour Balbus.

Qu'il n'appartient qu'au Roy de legitimer les Bastards, & des droits qu'il a sur eux.

CHAPITRE IX.

LEs Anciens ayans recogneu par experience, qu'ils ne pouuoient se seruir d'un plus puissant moyen, pour establir les bonnes mœurs parmy leurs peuples, & les retirer du concubinage dans lequel ils les voyoient plonger, que de punir les peres en la personne des enfans, qui naistroient de leurs impu-

Ff. ij.

230 DE LA SOUVERAINETÉ DV ROY,
dicitez , publierent des Loix rigoureuses
contre les Bastards, leur donnans des noms
pleins d'opprobres , les appellans , *Nothos*,
Manzeres , *spurios* , vulgè *quasitos* , *obliquos* : les
bannissans des Assemblées publiques ; les
rendans incapables de succeder à leurs pe-
res , & les priuans des honneurs & des pre-
rogatiues des familles dont ils estoient
descendus ; ce qu'ils obseruoient avec tant
de rigueur, qu'il n'y auoit que le Prince
qui peust par sa puissance absolüe les lauer
de toutes ces taches d'infamie , & les ren-
dre capables de paruenir aux charges de
l'Estat, à l'égal des autres citoyens. Ce qui
fut exactement pratiqué parmy les Ro-
mains : car il n'y auoit que les Empereurs
qui peussent legitimer les enfans naturels,
comme il est dit *in l. l. C. de natural. lib.* Et
bien qu'ils eussent vn autre moyen de le-
gitimer les Bastards ; qui estoit , *per Curia*
oblationem , comme il est expliqué *in l. com-*
munitum , *C. eod.* Neantmoins cela fut depuis
reuoqué , sur ce qu'on iugea qu'il estoit
impertinent , de laisser la dispensation de
ce droit souuerain à des Decurions de ville,
qui n'estoient que des Magistrats popula-
ires , bien qu'instituez sur l'exemple du Se-
nat Romain. Cela mesme a esté de tout
temps obserué en France , qu'il n'y a que

le Roy seul qui puisse donner des Lettres de legitimacion, & rendre les Bastards capables d'exercer toutes sortes d'Offices: ayant esté iugé qu'il estoit iuste & raisonnable, que puis que le Roy faisoit les Edicts & les Ordonnances, qu'il pouvoit aussi les adoucir, & dispenser de leurs rigueurs ceux qui bon luy sembloit: veu mesme que par le droit naturel il n'y auoit point de difference entre les legitimes & les Bastards; la nature leur donnant aux vns & aux autres vn mesme estie, & vne semblable origine: Et que s'il y auoit du vice en celle des enfans naturels, on ne deuoit point leur imputer, mais aux passions de-reglées de leurs peres: Et que c'estoit vne action digne de la bonté du Prince, d'employer sa puissance & son autorité pour suppléer à ce defaut de leur naissance, leur oster ces taches d'infamie, & les rendre legitimes: *Mouente misericordiâ, quâ indigni non sunt, qui alieno laborant vitio*, comme dit l'Empereur Iustinian, in l. legem. C. eod. tit. Aussi qu'il importoit à l'Estat, & pour la conseruation de l'autorité Royale, d'empescher qu'on ne changeast point la condition des personnes de ses subjects, sans la permission du Prince, comme il s'obseruoit parmy les Romains, qui ne permet-

232 DE LA SOUVERAINETE' DV ROY,
 toient point que l'on fist aucune adoption,
 ou arrogation, qu'elle n'eust esté confir-
 mée par vn Edict exprez du peuple, du
 temps de la Republique: ou bien par le
 Rescrit du Prince, du temps des Empe-
 reurs, specialement de ceux qui estoient
sui iuris, comme il se lit in l. 2. C. de adop-
 D'où vient qu'Aulugelle dit au liure 5.
 que l'arrogation estoit ainsi dite: *Quòd non,*
nisi rogatione ad populum factâ, fieri poterat. Ce
 que Ciceron confirme en l'Oraison *pro do-*
mo sua, lors qu'il dit, *Jure à majoribus prodito,*
nemo ciuis Romanus in alterius potestatem transire
potest, nisi populus auctor fiat. C'est là dessus
 donc qu'on a estably ceste maxime: Qu'il
 n'appartient qu'au Roy de legitimer les
 Bastards; soit qu'ils descendent, *Ex soluto*
& soluta; siue sint spurij, siue adulterini, vel nati
ex Presbytero, Diacono, vel Subdiacono, siue ex
cõitu incestuoso: Ce qui a esté confirmé par le
 Pape, mesme au Chapitre, *Per venerabilem*
extra. Qui filij sunt legit.

Mais ie crains que l'on estende trop ceste
 puissance, specialement pour les Bastards,
 qui sont naiz d'inceste & d'adultere. Car,
 pour en parler selon la verité, n'est-ce pas
 en ce faisant tolerer aucunement ces abo-
 minables impudicitez? S'il y auoit vne loy
 parmy nous, qui donnast ceste autorité
 aux

aux particuliers, seroit-elle pas exposée au blasme de tout le monde? Le Prince qui a la puissance de corriger les Loix, doit-il pas estre plus rigoureux, & plus severe, contre les adulteres, que les Loix mesmes? Si vn pere de famille fait son deuoir, quand il abdique les enfans qui sont venus d'un mariage contracté sans son congé; que ne doit faire vn Prince, qui est le Pere commun de tous les hommes, contre des enfans venus d'une si brutale origine? Aussi voyons-nous que les Romains furent en cela beaucoup plus zelez pour la conseruation de l'honnesteté, que nous ne sommes: d'autant qu'en l'auth. *quib. mod. nat. effc. legit.* au §. fin. ils ont déclaré absolument, que ceux qui estoient naiz d'une alliance si honteuse estoient indignes d'estre recogneus, mesme par la nature, & par les Loix ciuiles, comme il est repeté en l'auth. *incestas. C. de incest. nupt.* En quoy ils imitoient leurs ancestres, qui condamnerent à mort Rea Siluia, apres auoir esté conuaincuë d'inceste, & furent iettez dans le Tybre les enfans qui en estoient descendus.

De dire, que le Roy par ses Lettres de legitimacion les rend capables seulement de tenir des Offices & des Benefices, sans

234 DE LA SOUVERAINETE' DV ROY,
leur donner le droit de succeder aux biens
de leurs peres , n'est pas vne excuse legi-
time. Car, n'est-ce pas, en cẽ faisant, met-
tre l'impudicitẽ sur les Autels, & luy don-
ner place sur le theatre de l'honneur, qui
est deu seulement aux personnes de me-
rite? n'est-ce pas faire triompher les peres
de leurs crimes? au lieu que la loy veut;
que leur brutalitẽ soit punie en la per-
sonne de tels enfans. Et quant à ce que
l'on objecte, qu'il seroit injuste de faire
porter la peine aux enfans d'une faute dont
ils ne sont pas coupables: Je responds que
cela seroit, peut estre, considerable, en
toutes autres rencontres; mais non pas en
cette occasion: où les enfans estans des
effect̃s si proches d'un crime si atroce, il
est impossible de les supporter dans les
Offices, & dans les dignitez, sans scandale.
Aussi la loy de Moysẽ leur defendoit de se
trouver aux Sacrifices, avec les autres du
peuple; comme il est dit au Deuteronomie;
chapitre 23. Et dont il semble que les
Grecs ayent empruntẽ leurs Loix, qu'ils
ont faictes sur de semblables sujets; & de
qui fait mention Demosthene, en l'Oraison
contre Aristocrat. Ioinct que ce n'est pas
chose nouvelle, de punir quelques-fois
ceux qui sont sans faute, pour destourner

les autres de mal faire , par leur exemple : comme il est dit *in l. 30. si quis aliquid. ff. de penis, & in c. mulier. 15. quest. 1.* & dans la Genese, chap. 9. & au Leuit. chap. 30.

L'on dit encore contre ceste maxime, qu'il se void souuent des hommes de ceste condition , qui deuiennent excellens en valeur , en vertu , & en suffisance , dequoy l'Antiquité nous donne les exemples d'Hercules , de Thesée , de Teucer , d'Ænée , de Romulus , de Remus , d'Artaxerxes , d'Alexandre le Grand , d'Alexandre Seuer , de Constantin le Grand , de Clouis premier , de Charles Martel , du Comte de Dunois : de Denys , Roy de Portugal : de Henry , Roy de Castille ; qui furent les lumieres de leurs siecles : & dont le public eust esté priué , si le public les eust méprisez. A quoy ie responds , que ce sera tousiours vne action louable , de recognoistre la vertu des hommes , de quelque origine qu'ils soient descendus , lors qu'ils la feront cognoistre par leurs faicts heroïques : mais legitimer des enfans , pour les rendre capables des Offices & des Benefices , ne faisant que sortir du ventre impudique de leur mere , & sans aucun merite , ny recommandation : l'estime qu'il n'y a point d'apparence.

Et pour le regard de ceux qui sont nãiz *ex soluto & soluta*, Je serois aussi d'avis, qu'on se rendist plus difficile à leur donner des Lettres de legitimatiõ: d'autant que par la facilité qu'il y a de les obtenir, & de s'acquérir par ce moyen des heritiers, plusieurs negligent de se marier, dont il aduient plusieurs grands scandales dans la France.

L'vsage neantmoins, comme j'ay dit, a passé par dessus toutes ces consideratiõs: & l'on obserue maintenant, que la legitimatiõ que le Prince a donnée à ceux qui sont incestueux & adulterins, ne leur confere autte chose, que la capacité de tenir des Offices & des Benefices: mais non pas le droit de succeder aux biens de leurs peres, quand mesmes les Lettres le porteroient expressement, (ce qu'on imputeroit à surprise) & qu'elles seroient suiuiues & confirmées par vn testament solennel du Pere, comme il se iuge d'ordinaire au Parlement: A la reserue neantmoins de leurs alimens, *ex humanitate canonica*, bien que la Loy Romaine les en priue du tout; si ce n'estoit qu'il y eust de fortes & de puissantes raisons, pour excuser l'inceste; comme en l'exemple de la loy, *Qui in prouincia. §. Diuus. ff. de ritu nuptiar.* où le lu-

risconsulte fait ainsi parler les Empereurs Marcus & Lucius, écrivant à vne mere qui leur demandoit vne legitimacion pour les enfans : *Mouemur & temporis diuturnitate, quo ignara iuris in matrimonio auunculi tui fuisti; & quod ab auia tua collocata es, & numero liberorum vestrorum. Idcirco, cum hac omnia in vnum concurrant, confirmamus statum liberorum vestrorum, perinde ac si legitime concepti fuissent.*

Quelques-vns ont adjousté ceste autre exception: Quand le Pape a permis à quelques-vns, qui sont dans les degrez prohibez, de se marier ensemble; avec declaration expresse que les enfans, qu'ils auoient eu auparauant, & qu'ils auront puis apres, seront legitimes: car le Pape peut dispenser du droit positif, & de toutes les choses qui ne sont point contraires aux articles de la Foy, & à l'Estat vniuersel de l'Eglise, comme il est dit au Ca. *sunt quidam* 25. *quest. 1.* Neantmoins ie voudrois tousiours en excepter les enfans venus de l'inceste commis entre personnes qui sont alliées dans les degrez expressément defendus par la loy de Dieu; nonobstant toutes dispenses, qui en ces occasions doiuent plustost estre appellées dissipations des Loix, de la pudeur & de l'honnesteté, que dispensations.

Mais quant à ceux qui sont naiz *ex soluto & soluta*, que l'on appelle *naturales filios* ; il n'y a point de doute, que par la legitimati-
 on du Prince, ils sont rendus égaux aux
 legitimes. En quoy nous suiurons l'aduis de
 l'Empereur Iustinian, in §. eos. *Instit. de here-
 dit. que ab intest. deferuntur* : & en sa Nouvelle
 8. où il veut que la legitimati-
 on qu'il don-
 ne, aye le mesme effect *erga reliquos agna-
 tos cognatósque, quàm erga patrem*. Mais en
 France nous y apportons ce temperament,
 pourueu que les Lettres de legitimati-
 on aient esté impetrées par le pere, ou qu'il
 aye poursuiuy leur verifi-
 cation en la Cham-
 bre des Comptes, suiuant vn Arrest pru-
 demment donné au Conseil du Roy en
 l'an 1579. fondé sur ce, qu'autrement il y
 auroit crainte, que les Bastards ne vinssent
 impudemment à s'introduire d'eux-mesmes
 dans les grandes & les notables familles:
 comme il s'est fait autre-fois, tesmoin ce
 qu'en dit Valere Maxime, *De his qui infimo
 loco nati, riendacio se clarissimis familijs inserere co-
 nati sunt*. Il suffit que les Lettres de legiti-
 mation aient esté obtenûes du seul con-
 sentement du pere: car celuy des autres
 parens n'est point necessaire, suiuant l'opi-
 nion de tous les Docteurs, sur la loy *Gali-
 us. §. & quid si tantum. ff. de liber. & posthum.*

par l'argument qu'ils tirent de l'exemple de l'adoption, qui ne laisse pas d'avoir son entier effect : bien que les autres heritiers n'y ayent point consenty, comme il est dit *in l. cum adoptio. ff. de adoptio. §. 1. instit. de hered. qua ab intest. defr.*

On a aussi pratiqué en France cét autre temperament : C'est que les enfans, qui sont legitimez par le Roy, ne peuvent pretendre aucun droit d'aisnesse en la succession de leur pere : pource que ceste prerogative doit demeurer à celuy qui est naturel & legitime; encores qu'il fust nay depuis le legitimé par le Prince. Il ne peut avoir aussi en la succession du pere vne plus grande portion, que le moindre des autres enfans, comme du Moulin le traite sur la Coustume de Paris, art. 8. & Tiraqueau, en son Traicté *De iure primogenio*. Ce que j'ay veu iuger & pratiquer au Parlement.

Et quant aux successions qui échent en collaterale, on observe encore en France, que les Bastards legitimez par le Prince, ne peuvent succeder aux parens de leurs peres & meres, s'ils n'ont consenty à leur legitimacion : comme il se pratiquoit à l'égard des adoptez, qui ne succédoient point aux parens du pere adoptant.

240 DE LA SOUVERAINETE' DV ROY,
s'ils n'auoient approuué leur adoption,
comme il se lit in §. *filium*, de l'auth. *quib.*
mod. natural. effic. leg. & pource que, *inuito*
suus heres non agnoscitur l. cum nepos. ff. de
adoptio.

D'auantage, l'on doit remarquer, que le
Roy succede aux adulterins & incestueux,
quoy que legitimez, s'ils meurent sans en-
fans. Neantmoins on a iugé en la cause
des Vions, que les freres, tous enfans d'un
Prestre, se pouuoient succeder les vns aux
autres, à l'exclusion du Roy; d'autant que
par ses Lettres de legitimation, & à cause
de la finance qu'il auoit receuë, il les auoit
subrogé en son lieu & place. Mais quant
aux autres, qu'on appelle naturels, naiz *ex*
soluta & soluta, & qui ont esté legitimez par
le Prince : bien qu'ils ne puissent succeder
à leurs parens du costé de leur pere & de
leur mere; neantmoins leurs parens peu-
uent heriter d'eux, lors qu'ils meurent sans
enfans; bien mesme qu'ils n'ayent point
consenty à leur legitimation, & excluent
le Roy, de l'heredité. Ce qui semble dé-
raisonnable en apparence, selon la regle
de reciprocis, que l'on void dans la loy pe-
nult. §. *filium.* & §. *ideo. C. de adoptio.* Mais
on en use de la sorte, à cause que le vice,
qui rend le Bastard incapable de succeder,
est

est attaché à sa seule personne, & non pas à ses parens : Aussi qu'il est certain que le pere ou la mere des Bastards legitimez par le Prince, ont acquis à leurs parens ce droit, *etiam ignorantibus*, comme il est dit *in l. soluendo. ff. de negot. gest.* N'estant pas chose nouvelle que quelqu'un puisse recueillir la succession d'un autre, qui soit incapable de luy succeder, comme nous en voyons un exemple dans la Coustume de Paris, où les femmes en collaterale ne peuvent succeder aux masles, pour ce qui est des fiefs, mais bien les masles aux femmes.

Voyons maintenant quels sont les droits que le Roy pretend auoir sur les Bastards non legitimez : Car, quant aux questions qui touchent les droits des particuliers, j'en laisse la decision à ceux qui ont fait des volumes entiers sur ce sujet. Premièrement, il est certain, que le Roy a droit de succeder aux Bastards non legitimez : d'autant que, comme ils n'ont *nec genus, nec gentem*; aussi ne peuvent-ils heriter de personne, & personne ne peut heriter d'eux; que le Roy, suivant la loy Romaine, *in l. 1. C. de natural. liber.* Ce qui a lieu à l'endroit des Bastards, de quelque extraction qu'ils soient descendus, quand mesmes ils seroient sortis de la Maison de France, sui-

242 DE LA SOUVERAINETÉ DU ROY,
uant l'Ordonnance de Huë Capet, par
laquelle il a voulu que les Bastards des
Roys ne puissent plus auoir aucune part au
Royaume, comme ils auoient du temps
des deux premieres Races. Neantmoins
ceste proposition reçoit deux exceptions:
sçauoir est, quand le Bastard a des enfans,
ou qu'il a disposé de ses biens par testa-
ment: car en ces occasions le Roy ne peut
rien pretendre à leur succession.

Et bien que veritablement ce droit de
succeder aux Bastards, soit du tout Royal;
veu que c'est le Roy seul qui les peut legi-
timer, comme dit *Ioannes Faber*, sur la loy
Imperialis. C. de nupt. Toutesfois les hauts-
Iusticiers pretendent auoir part à leur suc-
cession: comme de faict ils ont obtenu
plusieurs Arrests, qui leur donnent la facul-
té de leur succeder, si trois choses concu-
rent: sçauoir est, si les Bastards, ou Bastar-
des, sont naiz en leurs terres; s'ils y sont
demeurans; & s'ils y sont morts: encore
ne peuuent-ils pretendre que les biens, soit
meubles ou immeubles, qui sont situez
dans leur Iustice. Ce qui s'est introduit
par la grande negligence des Officiers, qui
se sont peu souciez de defendre les droits
du Roy.

D'auantage, l'on doit remarquer, Que

les Bastards des Gentils-hommes sont tenus, comme roturiers, de payer la Taille au Roy; bien mesme qu'il les ayt legitimez: si ce n'est que particulièrement ils ayent obtenu des Lettres d'annoblissement, en consideration de leur vertu & de leur merite; ou de celuy de leur pere: comme autre-fois il a esté iugé en la Cour des Aydes, sur mes Conclusions, en suite de l'Édict de l'année 1600. art. 25. Qui, de verité, est contraire à l'ancienne Coustume que l'on obseruoit en France: Mais est-il pas iuste, de faire moins d'estat de ceux qui viennent d'un concubinage, que d'un mariage? Neantmoins ie ne voudrois pas comprendre en ceste regle les Bastards des grandes & illustres Maisons, dont la Noblesse est cogneüe de tout le monde. De façon que l'on peut tenir pour maxime generale, que les Bastards des Roys sont Princes, que ceux des Princes sont Seigneurs, que ceux des Seigneurs sont Gentils-hommes, & que ceux des Gentils-hommes sont roturiers, s'ils ne sont legitimez & annoblis par le Roy.

Finalemēt, l'on doit obseruer, que le Roy, ou le haut-Iusticier, venant à succeder aux fiefs, & aux autres biens des Bastards, doiuent payer leurs debtes; sui-

244 DE LA SOUVERAINETE' DV ROY,
 uant la loy 18. §. *si fundus. ff. de pignor. act.*
 qui dit, *pignus cum sua causa transire*: Mais
 c'est à proportion du bien dont ils ont he-
 rité; pource que *non sunt successores iuris, sed*
bonorum: comme il se pratiquoit autre-fois
 à l'égard du maistre, qui succedoit au
 pecule de son esclau: du pere de famille
 à son fils: & de l'Abbé à son Religieux,
 suiuant la responce du Iurisconsulte Vlpian,
in l. quasitum. §. si cum ex parte. ff. de pecul. l. 2.
ff. de Castr. pecul. & d'Innocentius, ad cap.
cum olim. de priuilegiis.

Qu'il n'appartient qu'au Roy de faire battre de la
 Monnoye: Et quand & comment il
 peut la changer.

CHAPITRE X.



UIS que la Monnoye ne reçoit
 son prix que de la loy, estant dite
 pour ce sujet à νόμος, comme re-
 marque Aristote, au premier de
 ses Polit. Et qu'elle deuient par ce moyen
 non seulement l'ame du commerce: mais
 aussi la regle & la mesure du reuenu des
 Roys, des gages de leurs Officiers, de la

solde de leurs gens de guerre, du salaire des mercenaires; & de tous les biens de leurs peuples. Est-il pas iuste, que sa fabrique, sa valeur, & son cours, ne depende que de la volonté du Prince, qui est la Loy viuante de son Estat, & qui donne l'estre & l'autorité à toutes les autres Loix?

C'est pourquoy nous voyons que de tout temps, & en tous lieux, le droit de faire battre de la Monnoye, a esté tenu comme vne des plus eminentes marques de la Souueraineté, comme le tesmoigne clairement Procope, qui voulant monstrier que les François estoient Souuerains dans les Gaules, dit, qu'ils faisoient battre de la Monnoye d'or. Vopiscus se sert aussi de ceste mesme raison, pour prouuer que Firmus auoit esté legitime Empereur: *Cum ille diceret Firmum latrunculum fuisse, non Principem; contra ego illum, & purpurâ vsum, & percussâ Monetâ Augustum esse vocitatum; quinque etiam nummos Seuerus Archontius protulit.* Aussi, certes, la premiere chose qu'on faisoit après auoir proclamé quelqu'un Empereur, c'estoit d'ordonner, que l'on imprimeroit son nom & son image sur la Monnoye: D'où vient que Lampride, parlant de l'aduenement d'Antoninus Diadumenus à l'Empire, fait ceste remarque: *Et Antonino Dia-*

246 DE LA SOUVERAINETE' DV ROY,
dumeno ad Imperium euecto, statim apud Antio-
chiam Moneta, Antonini nomine, percussa est. Et
 nous voyons que les Roys & les Monar-
 ques ont esté si ialoux de ce droit, qu'ils
 ont creu, que d'oser battre de la Monnoye,
 sans leur permission; c'estoit attenter con-
 tre leur autorité souueraine, & vouloir
 vsurper la Royauté: comme l'Empereur
 Commode fit ressentir à Perennius, son
 Fauory, qu'il condamna à souffrir vn sup-
 plice infame, pour auoir fait battre de la
 Monnoye, sous ses armes & sous son nom,
 de son autorité priuée. Herodote dit la
 mesme chose d'un Roy de Perse, qui fit
 trancher la teste à vn Ariander, Preuost
 d'Egypte, pour auoir commis vn sembla-
 ble attentat: Et Otho Frigin, discourant
 de la Hongrie, remarque, que c'est vn cri-
 me capital, mesmes aux grands Seigneurs
 du Royaume, de fabriquer de la Monnoye:
Nulli, dit-il, in tam spatiofo ambitu, Rege ex-
cepto, Monetam, vel telonium, habere licet.

Ce qu'ils auoient, peut-estre, emprunté
 de la loy Romaine, qui defendoit expresse-
 ment aux particuliers, à peine de crime de
 leze-Majesté, de se mesler de la fonte de
 la Monnoye, dit la loy 2. C. de fals. mon. &
 le Iurifconsulte Paulus, au liure cinquième,
 sent. tit. 25. Et ie trouue fort estrange que

l'Empereur, & ses predecesseurs, ayent endure iusques à present, que les Ducs, les Comtes, & les grandes Citez d'Alemagne & d'Italie, qui dependent de l'Empire, facent, sans sa permission, grauer leurs noms & leurs images sur la Monnoye qu'ils fabriquent en leurs pays. Je sçay qu'autre-fois ce mesme abus regnoit en France, tesmoin ce que nous disons encores, Deniers Tournois; qui estoit vne Monnoye que l'on faisoit à Tours, de l'autorité de l'Archeuesque: Et l'on void encores vne Monnoye qui porte ceste Deuise, *Canomanensis Moneta*, pource que l'Euesque du Mans la faisoit battre dans sa ville & dans son Diocese. Et d'autant qu'elle estoit plus forte de la moitié, que celle de Normandie; elle donna sujet au Prouerbe qui dit, *Qu'un Manceau vaut Normand & demy*. L'Euesque de Paris eut la mesme autorité: D'où vient que nous disons encores, Deniers Parisis, qui estoit vne Monnoye plus forte que toutes les autres, en consideration de ce que Paris estoit la ville capitale du Royaume. En fin la pluspart des Euesques, & des grands Seigneurs de France, iouÿssient de ce droit; excepté pour la Monnoye d'or, dont la fabrique a tousiours esté reseruee

248 DE LA SOUVERAINÈTE' DV ROY,
aux Roys, & aux Princes Souuerains.

Mais le Roy Louys Hutin, ayant reconnu cēt abus & ceste entreprise sur son autorité, fit defenes aux Euesques, & aux grands Seigneurs de son Royaume, de ne plus faire battre de la Monnoye, se reseruant à luy seul ce droit de Souueraineté. De façon que depuis ce temps-là l'on n'a plus permis à personne, ny mesmes aux Princes dont les Estats releuent en fief de la Couronne, d'exposer de la Monnoye sous leur nom, & marquée de leurs armes, principalement de la Monnoye d'or, comme Louys XI. le fit sçauoir au Duc de Bretagne, qui, outre ce qui luy auoit esté accordé par le Traicté d'Angers, auoit encore osé prendre la hardiesse de faire battre de la Monnoye d'or : Car le Roy luy fit dire, qu'il ne pouuoit souffrir cet attentat contre son autorité, n'estant licite à personne de faire battre de la Monnoye d'or, sans vne concession particuliere ; comme Iean, Duc de Berry, l'obtint du Roy son frere en l'année 1271. & qui fit battre en suite de ce priuilege ceste Monnoye, qu'on appelle à present, Moutons d'or. L'Empereur Charles IV. donna ceste mesme prerogatiue au Roy de Boheme, par sa Bulle d'or ; Et le Roy de Pologne

Pologne à l'Archeuesque de Gnesne, en l'an 1224. En quoy ils suiuirent l'exemple de Constantin le Grand, qui accorda ce mesme priuilege à sa Mere, dit Eusebe, au liure troisieme de la vie de cét Empereur.

Mais l'on demandera, si le Prince Souuerain peut à sa volonté changer la Monnoye, augmenter son prix, ou l'empirer par foiblage de poids, ou par écharseté d'alloy, comme parlent les Monnoyeurs. A quoy l'on peut respondre, que si nous en croyons Aristote aux lieux que nous auons alleguez cy-dessus, il sera tousiours en la puissance du Prince, d'en vser ainsi qu'il trouuera estre plus vtile pour le bien de son Estat: Car s'il peut la décrier, dit-il, & la rendre inutile; pourquoy ne peut-il pas la hausser & la baisser de prix, quand ses affaires le desirent? quelle difference mettroit-on entre la Monnoye & le metal dont elle est composée, si le Prince n'auoit ceste liberté? Ne doit-on pas plustost considerer en la Monnoye la valeur que le Roy luy donne par sa Loy, que sa substance, & sa matiere.

Toutesfois, bien qu'il ne nous appartienne pas, de borner en aucune chose, la puissance des Roys; i'oseray dire, qu'en

250 DE LA SOUVERAINETE' DV ROY,
conscience, ils ne doiuent faire ces diminutions ny ces changemens, qu'en cas d'une grande & vrgente necessité : Car alors il semble que toutes choses soient permises. Et, certes, nous voyons par l'Histoire, qu'en ces rencontres les peuples les plus seueres, & les mieux policez, n'ont point fait de difficulté de se seruir de ce remede, pour subuenir à leur indigence : Ainsi nous lisons que les Romains ordonnerent, *Ob publicam inopiam bello Punico primo, cum impensis Respublica non satisfaceret, ut asses sextantario pondere ferirentur*, dit Pline, au liure trente-troisième de son Histoire naturelle. Ainsi en vsa Timothée, lors qu'il fit la guerre contre les Olinthiens : car n'ayant plus d'or, ny d'argent, il fut contraint de faire battre de la Monnoye de cuiure, & la faire courir au mesme prix que celle d'argent.

Ainsi l'Empereur Federic, en l'an 1240. tenant la ville de Faenze, assiegée : il se trouua reduit en vne telle necessité d'argent, qu'il fut forcé de faire de la Monnoye de cuir, de la valeur d'un Augustan d'or, qui eut cours durant la guerre. Ainsi Dominique Michaelis, Venitien, ayant épuisé toutes ses finances en la guerre qu'il auoit entreprise contre Saladin, fit faire de la Monnoye de cuir : Ainsi les

François, qui furent assiegez dedans Nouarre, firent courir vne Monnoye de cuiure, qui valoit autant que celle d'argent: Ainsi Philippe le Bel empira l'alloy des Monnoyes, se voyant contraint d'entretenir vne grande armée, pour s'opposer aux incursions des Anglois, & pour dompter la rebellion des Flamens: Ainsi Charles le Bel, pour subuenir aux frais de la guerre; qu'il fut contraint de faire en Guyenne, se seruit de ceste mesme inuention. Et en fin l'on en vsa de la sorte du temps des guerres du Roy Iean, & lors qu'en l'Assemblée generale des Estats, qui furent tenus à Paris, l'an 1358. l'on arresta de forger vne certaine Monnoye d'or, de moindre valeur que les anciennes.

En toutes ces occasions, i'estime que les Princes peuuent, sans blesser leur conscience, affoiblir leurs Monnoyes: la necessité ayant ce priuilege, de rendre iustes & legitimes les actions, qui d'ailleurs seroient injustes. C'est l'aduis de *Joannes Faber*, sur le tiltre, *quib. mod. toll. oblig. in instir.* de Boërius en sa Decision 327. & des Canonistes, sur le Chap. *Quanto. Extra de iureiur.* qui pour soustenir ceste doctrine se seruent des argumens qu'on tire d'ordinaire de la loy *Cura. §. 1. ff. de muner. et honor. &*

252 DE LA SOUVERAINETE' DV ROY,
de la loy *ab his honorib. §. autis. ff. de excusat.
minor.*

Mais quand l'on est reduit à ces extre-
mitez, l'on doit obseruer deux choses:
L'une, que celuy qui a le commande-
ment, & qui donne cours à telles Mon-
noyes, s'oblige de reparer la perte que le
peuple en peut receuoir, quand la neces-
sité sera passée, comme fit Monsieur de
Toiras, au dernier Siege de Casal, qui
s'obligea au nom du Roy, de reprendre
toute la Monnoye de cuiure qu'il auoit
fait fondre pour souldoyer les soldats, &
d'en donner d'autre d'argent, apres la de-
liurance de la ville. L'autre, que l'on ne
doit rien innouer en la fabrique de la
Monnoye; que de l'aduis, & par vne com-
mune deliberation de tous les Ordres: ce
que l'on a tousiours pratiqué en ce Royau-
me, comme nous enseignent les anciennes
Ordonnances: celles de François premier,
de Henry II. & III. & les dernieres.

Hors ces mauuaises rencontres, ie n'esti-
me pas que les Roys puissent introduire
rien de plus dommageable à leurs peu-
ples, que le changement de la Monnoye,
à cause des grands inconueniens & des
desordres qui en arriuent au public: Car
premierement, puis que c'est elle qui don-

ne le prix aux choses; seroit-ce pas, en la changeant, mettre dans l'incertain la valeur de tous les biens de leurs subjects, & les reduire à faire les mesmes plaintes que Ciceron faisoit de son temps, sur vn semblable sujet, *Jaetabatur illis temporibus nummus sic, vt nemo posset scire quid haberet.*

Mais quel dommage plus sensible peut-il arriuer à celuy qui void dans les Registres de ses ancestres, qu'on leur payoit cent écus d'or fin, pour le fermage de leur terre, lors que l'écu ne valoit que vingt sols la piece : & que maintenant qu'il est haussé iusques à quatre liures, on ne luy en paye que vingt-cinq : Et quel regret est-ce au Gentil-homme, qui voyant que ses predecesseurs ont autre-fois donné l'arpent de terre à vn sol de censue, il n'en reçoit pas aujourd'huy la septième partie, pource que le sol, de leur temps, valoit mieux que sept de maintenant. Le mercenaire peut faire la mesme plainte; qui du temps de nos Majeurs auoit pour vn sol plus de viures, que pour sept à present. L'on peut dire le mesme de toutes les choses qui tombent en commerce : car le Marchand mesure tousiours son trafic sur le pied du fin de la Monnoye qu'on luy donne pour le prix de sa marchandise : ce

254 DE LA SOUVERAINETE' DV ROY,
qui cause la cherté de toutes sortes d'estof-
tes & de denrées.

D'avantage , ce changement de Mon-
noye , ouvre le chemin aux Faux-mon-
noyeurs , pour la facilité qu'ils trouuent
d'exposer vn metal meslé. C'est pourquoy
Vopiscus loüe grandement l'Edict que fit
l'Empereur Tacite: *Cauit vt si quis argento pu-
blice priuatimque as miscuisset, si quis auro argen-
tum, si quis ari plumbum, capitale esset, cum pu-
blicatione bonorum.* Aussi ie n'ay iamais esté de
l'aduis de ceux qui ont estimé , que nous
deuions faire nostre Monnoye égale à celle
des Princes voyfins : c'est à dire , l'affoi-
blir comme eux , disant , pour pretexte,
que par ce moyen on les empeschera d'en-
leuer nostre bonne Monnoye , & la con-
uertir en la leur , qui est beaucoup plus
foible que la nostre : Car outre (comme
ie viens de dire) que c'est faciliter le che-
min aux Faux-monnoyeurs : c'est encores
diminuer la gloire de nos Roys ; qui ont
toufiours remporté cét honneur , d'auoir
la Monnoye d'or & d'argent , la plus pure
de l'Europe.

Cét aduis seroit , peut-estre , receuable
en de petits Estats , où il n'y a point de
mines d'or & d'argent , ny chose aucu-
ne que l'on puisse donner en contre-

échange : mais non pas en ce Royaume, où nos bleds, nos vins, nos toiles, nos sels, & les autres marchandises, qui croissent parmy nous en abondance, & dont tous nos voyfins ne se peuuent passer, valent mieux que toutes les mines des Indes. Si bien que c'est à nous à leur donner la loy, & non pas à nous de la recevoir d'eux.

Il est bien vray, que le plus grand desordre qu'il y a dans les Monnoyes, & en suite dans le commerce, vient de ceste inégalité qui est entre le tiltre de nostre Monnoye & celle de nos voyfins. Ce qui n'estoit pas anciennement, car chacun se conformoit à vne mesme loy : & suiivoit-on presque par tout, non seulement ceste ancienne proportion d'entre l'or & l'argent, que Platon remarque en son Dialogue de Hipparchus, qu'un marc d'or fin payoit douze marcs d'argent fin : mais encore le prix du marc d'or, & celui d'argent, estoit par tout égal : Et l'on apprend de nos Annales, que saint Louys fit vne grande instance enuers tous ses voyfins, pour conseruer entr'eux cet ordre : mais il s'est depuis tellement peruersti, soit par les guerres, soit par la disette d'or & d'argent en quelques Prouinces, soit par l'a-

LA SOUVERAINETE' DV ROY,
uarice des hommes , qu'il semble que le
mal soit à present sans remede.

Je sçay bien que quelques estrangers
nous accusent d'auoir esté les premiers au-
theurs de ce desordre , par le sur-hausse-
ment que nous auons fait, tant du prix de
l'or & de l'argent , que de la Monnoye
qui en a este fabriquée, & qu'ils disent que
sur l'exemple de Philippes Auguste , qui
haussa le prix du marc d'or fin , à qua-
rante liures, & le marc d'argent le Roy, à
cinquante-trois sols quatre deniers, que tous
les autres ont pratiqué la mesme chose: si
bien qu'à present le marc d'or fin vaut deux
cens cinquante & tant de liures: & le marc
d'argent plus de vingt-deux liures. Et en
suinte de cela, la Monnoye d'or s'est telle-
ment accreuë, qu'il se void par nos Histo-
res, qu'en l'année 1354. l'écu couronne ne
valoit que douze sols six deniers, & main-
tenant, par tolerance, on le met à quatre
liures: Que cela a seruy de patron à tous
les autres Princes, de faire le semblable.
Et ie croy, toutesfois, qu'un chacun d'eux
a volontairement conspiré à ce desordre.
Mais le plus grand mal que la France re-
çoit à present de ce sur-haussement, c'est
principalement aux pistoles ; d'autant que
bien qu'en Espagne elles ne s'exposent qu'à
sept

sept liures quatre sols: neantmoins ils nous les donnent en payement, pour le prix de nos bleds, & de nos toiles, à huit liures quatre sols, selon le cours qu'elles ont païmy nous: Ce qui est nous rendre, sans y penser, tributaires du Roy d'Espagne, de seize ou vingt sols pour pistole.

Outre ces pertes & ces dommages qu'apportent les changemens en la Monnoye, ils donnent encore la naissance à vne infinité de procez, de contentions & de disputes, comme il arriua quand ceste question fut agitée; Si les rentes constituées par certain nombre d'écus, rachetables par le contract à mesme nombre & especes, & les arrerages aussi payables en écus, & non autrement, pouuoient, apres ce sur-haussement, se racheter par liures, selon que l'écu valoit lors du contract: car le creancier de la rente disoit, que les parties, en contractant, auoient considéré, non seulement les especes, mais mesme *nummi substantiam & veluti auri pondus*: Et que partant pour la racheter, il falloit luy rendre son argent, *in eadem bonitate & quantitate*: Le debteur au contraire, repliquoit qu'en la Monnoye on ne deuoit pas considerer *rerum naturam, sed famam & estimationem*: & que la bonté principale

258 DE LA SOUVERAINETE' DV ROY,
de la Monnoye ne consistoit pas en sa
matiere, mais en la valeur, que le Prince
luy donnoit; & mesme que ceste valeur
deuoit estre prise du temps du contract,
selon la loy *bonitatis. ff. de euict.* & la loy *si*
voluntate. C. de resc. vendit. Autrement qu'il
seroit injuste que le creancier profitast de
l'augmentation que le Roy auoit donnée
à la Monnoye. Et d'autant que ceste
question fut iugée diuersement en plusieurs
lieux, & que cela tenoit vn chacun dans
vne grande incertitude, le Roy, pour assou-
pir tous ces differents, voulut par ses der-
niers Edicts: & principalement par celui
de l'an 1577. que les rentes, & tous les
autres contracts, se pourroient acquitter,
en payant par le débiteur en liures ce que
l'écu valoit au temps du contract; non-
obstant toutes les clauses & les condi-
tions contraires, que l'on y auoit inserées:
Et que pour retrancher à l'aduenir toutes
ces contentions, on ne contracteroit plus
en écus, mais en liures seulement. Tous
ces embarrasemens n'arriueroyent point, si
la Monnoye n'estoit exposée à tant de
changemens; & si l'on gardoit exactement
cette maxime de nos Iuriconsultes, qui
dit que, *certa, publica, & perpetua nummorum*
estimatio esse debet, l. ideo. ff. quod certo. loc. &

l. 1. ff. de contrahend. emptio.

Finalement, l'on doit remarquer, que le fin de l'or & de l'argent en la Monnoye, s'affoiblit legitiment par le moyen de deux droits qu'on leue sur son ouurage; dont le premier s'appelle Seigneuria-ge, pource qu'il est deu au Roy, à cause de sa Souueraineté: Et quelques-fois les Princes craignans d'empirer la Monnoye, le remettent liberalement à leurs peuples: L'autre est pour le brassage: c'est à dire, pour les frais & les salaires des Monnoyeurs; bien que le Roy Henry II. pour la mesme consideration ayt ordonné, que ces frais ne se prendroient plus sur la Monnoye: mais bien sur le public, par forme de Taille, qui estoit aussi l'aduis de la Glose sur la loy 1. ff. de contrah. empt. Mais ceste Ordonnance a depuis esté reuouquée par le Roy Charles IX. Et ces deux droits se montent à quatre liures quinze sols pour marc d'or: & quatorze sols quatre deniers pour marc d'argent. C'est pourquoy l'on ne trauaille aux Monnoyes d'or, que sur le tiltre de 23. & d'argent le Roy sur le tiltre de 11. car. 12. grains: De sorte que le surplus du fin, qui est le vingt-quatre carat, & le demy denier, reuiennent au profit du Prince.

Kk ij

Par toutes ces raisons, & les autoritez que nous auons rapportées, il apparoist assez, qu'il n'appartient qu'au Roy, de faire battre de la Monnoye, & de changer son prix: mais que l'on ne doit faire ce changement qu'en des occasions pressantes & necessaires, & de l'aduis de tous les Ordres.

*Quelle puissance, & quels droits a le Roy
sur la Mer.*

CHAPITRE XI.



OMME la Terre & la Mer sont les deux Nourrices des hommes; Aussi du commencement elles leur estoient également communes: car les premiers hommes ne possédoient rien en propriété sur la terre, que leur seule habitation: *Vnde & à domo dictum dominium.* L'usage du reste de son estenduë estoit permis à tout le monde: Mais depuis qu'elle fut diuisée en Empires, en Royaumes, en Principautez, en Prouinces, en Seigneuries, & en territoires, sa puissance n'a plus esté libre comme elle

estoit auparavant, chacun s'en estant approprié quelque partie. De façon qu'il n'y a plus rien de commun en elle, que les grands chemins, & quelques autres lieux publics, encores n'est-ce que pour l'usage seulement : car la propriété en appartient au public, c'est à dire, aux peuples, dans les Estats Populaires : ou aux Roys, dans les Monarchies.

Mais, quant à la Mer, nostre Jurisprudence a tenu, iusques à l'Empereur Iustinian, qu'elle estoit commune à tous les hommes, ainsi que l'air & les autres elements, comme il est dit, *in §. quædam. De rer. diuis.* & dans ce Poëte au sixième de ses Metamorph.

Quid prohibetis aquas? vsus communis aquarum est

Nec Solem proprium natura, nec aëra fecit.

D'où vient que la loy Romaine donnoit l'action d'injures, contre celuy qui empeschoit qu'un autre n'y nauigeast, ou qu'il n'y peschast librement, comme dit Vlpian, *in l. iniuriarum. §. fin. ff. de iniurijs*; d'autant qu'aux choses qui sont communes, les hommes sont également Seigneurs, & ioüissent de mesmes auantages. Toutes-fois, comme l'auarice est tousiours aide d'approprier à son usage, ce que l'innocence naturelle a laissé à la commu-

262 DE LA SOUVERAINETE' DV ROY,
nauté des hommes, *Instar enim vnius ciuitatis est ista mortalium omnium consociatio*, dit Cicéron, 'au premier de ses Loix. Aussi nous voyons par nos Liures, & par les Histoires anciennes & modernes, que peu à peu la Mer est deuenüe propre aux particuliers, comme la terre. C'est pourquoy l'Empereur Leon, après auoir reformé ceste loy d'Ulpian, que nous auons rapportée, il ordonna par sa Nouvelle 56: que celuy qu'il estoit en possession de pescher seul deuant sa maison, & *ante suum prætorium*, pouuoit defendre la peschie à tous autres; pource, dit-il, que, *ius illud maris potest ad aliquem pertinere, puta per occupationem*: c'est à dire que ce droit public peut deuenir priué, lors qu'un particulier s'en est mis en possession, comme le firent autrefois Lucullus, & quelques autres, dont nous auons des exemples, tant en la loy *venditor. ff. communia prædior.* qu'en ceste mesme Nouvelle de l'Empereur Leon, où il permet aux particuliers, de diuiser entre eux le Bosphore de Thrace: Et pour marque du partage de chacun, de mettre des bornes, qu'il appelle *ἑταῖροι*.

En suite de ceste Ordonnance plusieurs peuples & Princes Souuerains, se sont acquis par occupation la pluspart des

destroits & des feins de la Mer: Mais ceux qui ont esté les plus hardis, ne se contentans pas seulement des riuages, se sont efforcez d'estendre leur Seigneurie dans la pleine Mer, du commencement iusques à cent mille, qui reuiennent à vingt-cinq lieuës, à les prendre du riuage de la terre voyfine, comme le traictent nos Docteurs, & principalement Balde, sur la loy premiere, *ff. de rer. diuis.* & sur la loy *cum proponas. C. de naut. fauor.* Puis apres voyans que c'estoit vn trop petit espace, ils élargirent leur Empire & leur domination aussi loing que leurs Royaumes & leurs Provinces contenoient de terre: se fondans sur ce que dit la loy, *in agris limitatis. ff. de acquir. rer. domi.* & prétendirent encore par le mesme argument, que les Isles, qui naissoient dans cét espace de Mer, leur appartenoient. Et en fin les plus puissans estendirent leur autorité sur tout le large de la Mer: D'où vient que celuy-là disoit dans Iuuenal:

*Quicquid conspicuum pulchrumque in aquore toto;
Res fisci est, ubicumque natat.*

S'estans persuadez que ceste vsurpation leur estoit permise; puis que la Mer, selon le premier droit de nature, n'estoit à personne: & que, *Benè quicquid acquiritur, quod*

à nullis adhuc dominis abrogatur, dit Theodoric, dans Cassiodore: Que c'estoit l'opinion de plusieurs Autheurs, qui auoient tenu pour regle d'Estat, que la disposition des choses communes appartenoit au plus puissant, *cap. super quibusdam. §. praterca, de verb. signif. l. 2. §. si quis à Principe. ff. ne quid in loco publico fiat. l. 1. §. idque à Principe. ff. de aqua quot. & est.* Et partant, que la seigneurie de la Mer se pouuoit acquerir, tout ainsi que les Empires de la terre: Et que pour ceste raison l'Empereur Antonin se nommoit en la loy 9. *ff. ad leg. Rhod. de iactu. Mundi dominum, & legem Maris.* Et que Denys d'Halicarnasse, décrivant la puissance de l'Empire Romain, disoit: *Romana vrbs imperat toti terræ, atque etiam Mari:* c'est à dire, pour la Iurisdiction, pour la pesche du poisson, des perles, & des autres pierres precieuses, pour le fret des Nauires, pour imposer des subsides; pour y tenir des armées Nauales; & pour y establir des Loix & des Coustumes, & telles autres subjections: Et de faict nous voyons que les Romains, se fondans sur ces raisons, pour marque de leur Souueraineté, sur la Mer, ils imposèrent des subsides sur la Mer Erythrée. Et depuis encores sur l'Hellepont: les Bissantins s'estans acquis par leur valeur, l'Empire

l'Empire de la Mer du Pont, en vserent de la sorte : car ils leuerent aussi-tost vn tribut, qu'ils appellerent *ἡ γαλαξίας*, sur tous les Nauires qui passoient par leur destroit.

Ainsi les Atheniens & les Perses establirent ces autres Loix, qu'aucun vaisseau armé, venant de Medie, ne passeroit les Cyanées : Ainsi les Carthaginois & les Romains firent entr'eux ce Traicté, que ny eux, ny leurs alliez, ne nauigeroient point, soit pour depredier, ou pour trafiquer, *ultra Promontorium pulchrum*, si ce n'estoit qu'ils y fussent portez par la tempeste : Et qu'en ceste rencontre ils seroient tenus de sortir du port où ils auroient abordé, cinq iours apres y estre arriuez; sans rien emporter, que leurs necessitez pour viure : Les mesmes Romains firent le semblable, quand ils accorderent la paix au Roy Antiochus : car ils luy imposèrent ceste loy, qu'il n'enuoyeroit point de vaisseaux armez, outre les promontoires de Sarpedon & de Celycadnie, sinon ceux qui porteroient les Ambassadeurs, & les ostages. Ainsi les Argiens, dit Thucydide, au liure septième, defendirent aux Lacedemoniens de nauiger sur leur Mer : d'où vient qu'ils furent prests de declarer la guerre aux Atheniens, pource qu'ils auoient

266 DE LA SOUVERAINETÉ DU ROY,
laissé passer librement par leur Mer l'armée
Nauale des Spartains leurs ennemis, contre
le Traicté qu'ils auoient fait ensemble.
Ainsi ceux de Neucrate establirent aussi
ceste loy sur tout le Nil, qui enjoignoit à
tous les Nautonniers de venir surgir à leur
port, sur peine d'une grosse amende: si ce
n'estoit qu'ils eussent esté empeschez d'y
aborder par la tempeste. Les Roys des
Tartares firent la mesme Ordonnance,
quand ils publierent par toute l'estendue
de leurs Costes, des defenses de pescher
des perles, sans leur permission.

Et depuis que ceste Majesté diuine, *Cuius
est mare, & ipse fecit illud*, a permis que les
Mers incogneuës, ayent esté ouuertes aux
hommes, ainsi qu'il semble que l'auoit
predit le Poëte Seneque, lors qu'il dit en
sa Medée,

— vient annis

*Sacula feris, quibus Oceanus
Vincula rerum laxet, & ingens
Pateat tellus, Tiphysque nouos
Detegat orbes, nec sit terris
Vltima Thule.*

Nous auons veu qu'elles ont aussi-tost
esté partagées entre les Roys qui en ont
fait la découuerte, par l'aduis mesme du
souverain Pontife, & sous ceste loy de

pouvoir piller tous ceux qui passeroient la ligne, qu'ils prescriurent entre eux.

Tous ces exemples suffissent, à mon auid, pour monstrier que l'on peut acquerir la Seigneurie sur la Mer, tout ainsi que sur la terre : Iusques là mesme que les Venitiens, pour vne marque d'une puissance absoluë sur leur golfe, marient tous les ans avec grandes ceremonies leur Seigneurie avec la Mer Adriatique. Et que les anciens Roys qui auoient des terres maritimes, se faisoient appeller Neptunes, pour marque de leur Empire sur la Mer, dit Laënce, au liure qu'il a fait de la fausse Religion.

Quant à la puissance dont nos Roys iouïssent sur les mers qui confinent à leur Royaume, l'on doit obseruer, que bien que nos Ancestres se soient autre-fois rendus admirables par leurs nauigations, comme nous le tesmoignent assez les grandes conquestes qu'ils firent en la Grece, apres le siege du Temple de Delphes, & leurs passages en la Thrace, en la Natolie, en la Gallogrece, & en d'autres Prouinces éloignées. Il est veritable neantmoins, que depuis l'establissement de ceste Monarchie, nos peres n'ont pas en cela tousiours imité le courage de leurs predecesseurs, s'estans

268 DE LA SOUVERAINETE' DV ROY,
fort peu fouciez de faire de grands pro-
grez sur la Mer, sinon depuis ces derniers
siecles. Que le Roy François premier,
excité par l'exemple des Roys d'Espagne,
qui, sous la conduite de Christophle Cou-
lon, auoient enuoyé decouurir les terres,
dont parlent Platon & Aristote, & cét
Edict des Carthaginois, qui defendoit aux
habitans de leur ville, d'y trafiquer: de
peur qu'estans allechez par les delices de
ses riches entrées, ils n'abandonnassent
leur propre pays; il dressa vne Flotte en
l'année 1534. dont il fit Admiral Iacques
Cartier, & luy commanda d'aller re-
cognoistre la Coste de Labrador iusques
à la Floride. Ce qui fut continué par le
Marquis de la Roche, & le Capitaine
George, iusques en l'année 1540. Et de-
puis encore par plusieurs autres, qui esta-
blirent quelques habitations en la nou-
uelle France, & qui donnerent iusques
au Bresil. Mais ces genereux desseins
s'estans refroidis dans les cœurs des Fran-
çois apres la mort de ce grand Roy, l'on
intermit peu à peu ces nauigations: & en
fin on les negligea tout à fait. De façon
que les trauaux que ces courageux Capi-
taines auoient endurez à la decouuerte
de ces nouuelles conquestes, demeurèrent

presque inutiles, & n'apportèrent d'autre fruit à cet Estat, que le commerce de certaines pellereries, de peu d'importance. Ce bon-heur estoit réservé à la France, de voir ceste negligence de nos peres, réparée par le Roy qui regne à present sur nous, ayant considéré que les Espagnols, à qui l'on peut appliquer ce passage du Deuteronome, *Inundationem Maris quasi lac fugent thesauros absconditos arenarum*, n'estoient montez à ce haut degré de puissance; où ils sont éleuez maintenant, que par leurs navigations & leurs Flottes des Indes: que les Anglois & les Hollandois ne s'estoient rendus considerables, que par le grand nombre de vaisseaux qu'ils entretenoient pour le commerce: & qu'autre-fois les Atheniens, les Carthaginois, & les Romains auoient heureusement pratiqué ce sage conseil, s'estans rendus les maistres de tous les pays maritimes qui les auoisoient, si tost qu'ils eurent acquis la Seigneurie de la Mer: Il s'est en fin resolu de reestabli en ce Royaume l'exercice de la Marine; & d'entretenir pour ce sujet cinquante à soixante Nauires bien armez, prestes à faire voile à toutes occasions. Et nous deuons esperer, que Dieu benira ce genereux dessein, puis qu'il n'a pour

270 DE LA SOUVERAINETE' DV ROY,
but que la protection de son Estat, de
celuy de ses amis, & de ses alliez, que le
bien de ses subjects, & que de rendre la
Mer assuree contre les Corsaires, & les
Pirates qui ruinent entierement le com-
merce, & qu'il meritera par ce moyen les
mesmes louanges qui se lisent dans l'Ec-
clesiaste 47. 17. *Ad insulas longe divulgatum est
nomen tuum, & dilectus es in pace tua, & mi-
rata sunt terra.*

Et cependant il continuera de iouyr
du pouuoir que ses predecesseurs se sont
acquis par leur valeur sur les Mers, qu'ils
ont occupées; & sur celles qui approchent
de leurs terres: specialement pour ce qui
est de la Jurisdiction, pour la pesche,
pour les subsides que l'on y leue à l'en-
tree & à la sortie de leurs ports; pour les
congez à long cours; pour le fret des Na-
uirs: & en fin pour tous les autres droits
dont ils sont de tout temps en possession,
suiuant les Ordonnances de Charles V.
de Charles VI. de Louys XI. de François
premier, de Henry II. de Charles IX.
de Henry III. de Henry IV. & de
celles que depuis peu il a fait publier luy-
mesme. Qui sont des prerogatiues si par-
ticulieres à la Souueraineté, que person-
ne n'ose s'en approprier la iouissance,

sans vne expresse permission du Roy. Et de faict l'on void dans le Tresor des Chartres, vne transaction qui fut passée en Parlement, dès l'an 1372. entre le Roy Charles V. & le Comte & la Comtesse d'Eu, par laquelle ceux-cy se desisterent de la possession & iouyssance, qu'ils disoient auoir de la Iustice, pour tous les faicts de la Marine, & du dixième des choses gagnées en Mer sur les ennemis: d'autant que ces deux droits dependent entiere-ment de l'autorité souueraine du Prince: Et partant ils ne peuuent estre communi-quables à personne. Aussi le Roy par sa derniere Ordonnance, reuoque tous les dons que ses prédécesseurs en auoient fait auparavant.

Il y a d'autres droits, qui bien que par la Loy Romaine ils appartiennent à l'In-uenteur, & par quelques Coustumes aux hauts-Iusticiers, comme sont les droits de Lagan, de poissons Royaux, & des autres choses croissantes en la Mer, & que le flot a iettées sur le riuage: toutesfois si quelqu'un monstre, qu'il soit en possession immemoriale de iouyr de ces espaues en certaines choses, il n'y a point de doute qu'il ne l'emporte: comme il fut iugé par Arrest de Bordeaux, pour vne espaue d'am-

272 DE LA SOUVERAINETE' DV ROY,
bre gris, au profit de Monsieur d'Esper-
non; apres auoir verifié, que luy, & les
predecesseurs, en auoient de tout temps
iouy, suiuant la maxime, qui veut que, *in*
his que ad maria & fluuios spectant, possessio iure
scripto sit potior, comme Bartole l'enseigne,
in l. ult. ff. de vsucapio.

Mais entre tous ces droits, il y a celuy
de bris & de naufrage, qui, pour estre sou-
uent debattu en Iustice, merite icy quel-
que éclaircissement: Car les vns l'accusent
d'inhumanité, plus cruelle que le naufra-
ge mesme: & entre autres Hildebertus,
Epist. 65. lors qu'il dit: *Quicquid euadebat ex*
naufragijs, totum sibi fiscus lege patrie vindicabat,
passosque naufragium miserabilius violentia Principis
spoliabat, quam procella: Que pour ce sujet,
au Concile de Nantes, qui fut célébré sous
le Pape Honoré II. l'on defendit d'en vser
d'auantage: Et l'on fit ce reproche aux
Chrestiens, qu'ils estoient en cela plus bar-
bares que n'estoient mesmes les infidel-
les, qui permettoient à ceux qui auoient
fait naufrage, de recouurer librement leurs
biens contre toutes sortes de personnes,
comme il est dit *in l. ult. ff. de incen. rui. &*
naufr. qui est tirée d'une constitution de
l'Empereur Antonin, & qui est conforme
à la loy premiere, C. de naufrag. quod enim

iur

*ius habet fiscus in aliena calamitate: ut de re tam
luctuosa compendium sectetur.*

D'où vient que plusieurs de nos Docteurs, & mesmes quelques Theologiens mettent en avant, que l'on ne doit prendre ce droit que sur les Pirates, sur les Infidelles, & sur les ennemis, comme il est dit en l'auth. *navigia. C. de furr.* Et que les autres adjoustent, qu'on ne le peut pretendre que sur les hardes & les marchandises que l'on a iettées en la Mer, pour alléger le Nauire durant l'orage; pource que l'on presume qu'elles ont esté abandonnées, sans esperance de les pouvoir iamaïs recouurer, se servant pour ce sujet de l'authorité de la loy *falsus. §. 1. ff. de furr.* Bien que ceste opinion semble impertinente: car les choses que l'on quitte par contrainte, & non volontairement, comme les marchandises qui sont iettées dans la Mer, pour éviter la perte du Nauire & le naufrage, ne doiuent pas estre tenuës pour delaissées, comme dit Aristote au troisième de ses Morales, & nos Iuriscultes, in *l. si quis merces. ff. pro dereli.*

Ceux, au contraire, qui defendent l'usage de ce droit, l'appuyent premierement sur les Ordonnances, que nous venons de remarquer, & sur les Coustumes des Pro-

274 DE LA SOUVERAINETÉ DV ROY,
uinces qui sont proches de la Mer, qui
l'appellent varech, ou varefche : Qui veu-
lent toutes, que si celuy qui a fait naufra-
ge, reclame son bien dedans l'an, qu'on
luy rende, en payant seulement les frais
du sauuement : mais qu'après l'an expiré,
il n'y est plus receuable, & qu'il appar-
tient partie au Roy, & partie à son Admi-
ral. Ils fondent la iustice de ce droit, sur
ce qu'il a esté estably, pour recompense
du soin que le Roy prend de rendre les
Costes assésurées, contre les brigandages
des Corsaires, dont il doit faire la recher-
che, & la punition, à ses frais & despens.

D'auantage, ils disent, que comme les
espaues de terre appartiennent aux hauts-
Iusticiers ; si après les solennelles procla-
mations que l'on a de coustume de faire
durant vn certain temps en ces rencon-
tres, l'on ne vient point les redeman-
der : que le mesme se doit obseruer pour
les espaues de Mer, comme parlent quel-
ques Coustumes, soit qu'on les trouue
flottantes, ou iettées sur les riuages : Car
l'on presume, que ceux qui ont differé, du-
rant vn si long-temps, à faire la demande
de leur bien, l'ont volontairement aban-
donné. Ces raisons iointes à l'vtilité, qui
donne tousiours le contre-poids aux ma-


rières fiscales, ont introduit cét vſage, que l'on obſerue maintenant en France.

Finale^{ment}, l'on doit obſeruer, que de tout temps l'exercice de ceſte puiſſance & Jurisdiction que le Roy a ſur la Mer, auoit eſté commiſe à l'Admiral de France: mais depuis, ceſte qualité a eſté ſupprimée & conuertie en celle de Grand-Maiſtre, Chef & Sur-intendant general du commerce & de la nauigation, dont le Roy a pourueu Monſieur le Cardinal de Richelieu; ſ'eſtant promis, que par ſon bon eſprit, ſon courage, & ſon ſoin, il reſtablira la grandeur de ceſte charge, qui a eſté negligée depuis vn ſi long-temps. Et d'autant que ceux qui poſſedoient cy-deuant en propriété les Duchez de Guyenne, & de Bretagne, & le Comté de Prouence, ſe diſoient Souuerains ſur leurs Coſtes, iuſques là meſme, qu'en Guyenne il y auoit vn Admiral particulier; Le pouuoir de l'Admiral de France eſtoit tellement limité, qu'il ne ſ'eſtendoit que ſur la Mer & les Coſtes de Normandie, & de Picardie: qui eſtoit vne entrepriſe manifeſte ſur l'autorité ſouueraine du Roy, qui a ſon eſtenduë ſur tout le Royaume. Mais depuis que toutes ces Seigneuries ont eſté reünies à la Couronne; il n'y a point de

276 DE LA SOUVERAINETE' DV ROY,
doute, que toute l'autorité publique,
que ces Ducs, & ces Comtes s'attribuoient
tant sur la Terre que sur la Mer, ne soit
aussi retournée à son premier principe : &
que tous les Offices & les charges de ces
Estats, & de ces Duchez, ne soient deuenues
Royales, ou reünies aux Royales, comme
il s'est fait en Guyenne par la suppression
de la dignité d'Admiral, & sa reünion à
celle de France ; & en Bretagne, en suite
des Lettres patentes de l'an mil cinq cens
cinquante-quatre. Il ne reste plus main-
tenant que la Prouence, où ceste charge
est contentieuse, entre le Gouverneur de
la Prouince, & l'Admiral de France : Il
n'y a point de doute qu'en la These gene-
rale, ceste contention ne se doüe regler
comme les autres : si ce n'est qu'au particu-
lier, le Roy, de qui dependent toutes les
charges de son Royaume, en ayt autre-
ment disposé.

*Des Fleuves navigables, & des droits que le Roy
a sur eux, à cause de sa Souveraineté.*

CHAPITRE XII.

E n'est pas sans raison, que les Fleuves & les Rivières navigables, ont mérité d'être mises en la particulière protection des Roys: Car c'est par leur moyen que les Provinces se communiquent les vnes aux autres les biens qu'ils recueillent avec abondance, dans leur estendue: Ce sont elles qui facilitent le commerce, qui comblent de toutes sortes de richesses les pays par où elles passent, qui animent la terre pour produire les foins, les bleds, & les fruits, qui seruent de nourriture & d'aliment aux hommes, & à tous les animaux. C'est pourquoy Philon Juif les appelloit les Nourriciers de la nature, & les comparoit aux veines du corps, par où coulent le sang & les esprits qui entretiennent la vie: Et les Anciens, pour reconnaissance de tant de bien-faits, adoroient leurs sources, & leur dressoient des autels, comme à de puissantes diuinités:

Magnum Fluminum capita veneramur, subita ex abdito vasti amnis eruptio aras habet, dit Senèque, & les representoient tenans vne Corne d'abondance en leur main, pour monstrier qu'ils apportoitent toutes sortes de biens aux contrées voy fines par où ils prenoient leurs cours. De là vient que les Capitaines Romains faisoient porter en leurs Triomphes, les figures des Fleuves du pays des ennemis; afin que par leur nombre, le peuple cogneust, quelles estoient les richesses & la fertilité des Prouinces qu'ils auoient conquises à l'Empire.

Mais ce qui les rend plus recommandables au public, c'est que la pluspart seruent de limites aux Royaumes, & de bornes aux Prouinces, tesmoin ce que dit Pline, du Rhin : *Illum extremam Romani Imperij marginem alluere.*

C'est pourquoy les Romains estoient grandement soigneux de fortifier les riuages de ces Fleuves, comme il se lit, in *Tit. de re milit. C. Theodosa. lib. 9.* Ce que Tacite a remarqué particulièrement en ses Annales, *Præcipuum robur*, dit-il, *Rhenum iuxta, commune in Germanos Gallisque subsidium, octo legiones fuisse.* Aussi quand ces Fleuves se rendoient gueables par la diminution de leurs eaux, ou qu'ils venoient à se geler,

en sorte, qu'on peust passer d'une rive à l'autre: ils prenoient cela pour un presage mal-heureux de la ruine future de leurs Estats & de leurs Prouinces, comme si déjà ces Fleuves eussent refusé de leur servir de frontiere & de defense: *Apud imperitos, dit Tacite, prodigij loco habebatur, ipsa aquarum penuria, tanquam nos amnes quoque, & vetera Imperij munimenta desererent.*

Toutes ces grandes commoditez que le public reçoit de ces Rivières publiques, ont souvent incité plusieurs Roys, & grands Capitaines, d'entreprendre des ouvrages dignes de leur generosité, pour les joindre les unes aux autres, afin de faciliter leur navigation. Ainsi Corbulo, du temps de Clodius, joignit la Meuse au Rhin, par un canal de vingt-trois mille de longueur, *quæ incerta Oceani vetarentur*, dit Tacite. Ainsi Vetus s'efforça de faire tomber la Moselle dans la Saone: *Vt copia, dit le mesme Tacite, per Mare, dein Rhodano & Arare subuecta, per eam fossam, mox Fluvio Mosella in Rhenum, exin Oceanum decurrerent: sublatisque itinerum difficultatibus navigabilia inter se Occidentis Septentrionisque littora fierent.* Ainsi Charlemagne renuiant sur ces genereux desseins, entreprit de joindre par une tranchée, les deux plus grands Fleuves

280 DE LA SOUVERAINETÉ' DV ROY,
de l'Europe, le Rhin, & le Danube; mais
il fut empesché d'accomplir son entre-
prise par les grandes guerres qui luy tom-
berent sur les bras. Et nous auons veu de
nostre temps, que le defunct Roy Henry
le Grand, suiuant les traces de ses prede-
cesseurs fit ouuir vn canal, pour passer de
la Riuiere de Loyre à la Riuiere de Seine:
mais la mort enuieuse d'un ouurage si utile
à la France, ne luy permit pas de luy
donner son entier accomplissement, ayant
esté miserablement assassiné, lors qu'il com-
mençoit d'esperer d'auoir vne bonne issue
de son entreprise. Toutes ces peines, ces
soings, & ces dépenses que nos Roys font
liberalement sur les Fleuues, pour les ren-
dre marchands & nauigables, leur ont
acquis en France la pleine Seigneurie de
leur canal. De façon que l'on a reietté l'o-
pinion de ceux, dont parle Masuer, au ti-
tre de *Iudicibus*, qui ont mis en auant que
celuy qui estoit propriétaire, & qui auoit
Iurisdiction sur le riuage des Fleuues, pou-
uoit estendre le mesme droit iusqu'au mi-
lieu de l'eau. Et de faict, comme, depuis
peu, le Roy eut communiqué à Monsieur
de l'Aubespine, Maistre des Requestes, de
rapporter au Conseil vn Placet, que quel-
ques Seigneurs luy auoient présenté, pour
auoir

auoir don d'une grande Isle, qui s'estoit formée depuis quelques années dans la Garonne, afin de luy en donner auidis: pour ce que les Gentils-hommes qui auoient des terres voyfines de ce Fleuve, prétendoient que ceste Isle leur appartenoit, en consequence de l'opinion susdite, qui est tirée de la loy premiere, §. *si. insula. ff. de fluminibus*, qui porte, *si insula. in publico flumine nata fuerit; eius erit, cuius ripam contingeret: aut si in medio alueo, nata est; eorum est, qui prope virasque ripas, possident*: Et qui d'auantage soustenoient, qu'estans voyfins de ce Fleuve impetueux, & par conséquent sujets aux incommoditez que causent ces grandes inondations: il estoit raisonnable, que les Isles & les atterrissemens qui sy faisoient, leur fussent adjugez, suiuant ceste maxime du Iurisconsulte, in l. 1. §. *fin. ff. de aqua & aqua flu. arcenda; ad quem aqua incommodum defluit, ad eum pinguedo terra decurrit*. Les Anciens mesmes ayans appellé les Isles *δῶρον ποταμῶν*, les dons que les Fleuves faisoient à leurs voyfins, pour les recompenser des dommages qu'ils receuoient de leurs débordemens, comme le remarque Lucain, parlant du Pau, --- *his rura Colonis Accedunt, donante Pado*. ---

Neantmoins le Conseil donna auidis au

Roy, que, fuiuant le droit qui auoit esté de tout temps pratiqué en France, ceste Ile luy appartenoit : pource qu'elle estoit née & formée dedans le Fleue, qui estoit de son Domaine. Que toutesfois il en pouuoit disposer au profit de qui bon luy sembleroit, à tilre de fief, ou de censue : pource qu'elle n'estoit qu'un domaine naissant, dont on n'auoit point encôre fait d'estat.

Et ainsi l'on rejeta les aduis d'Angelus, *in l. fluminum. ff. de dam. infect.* Et de Bartole, *in l. quominus. ff. de flumin.* qui disoient que les Fleues de l'Italie & de la Lombardie appartiennent aux villes par où ils passent, quoy qu'ils recognoissent l'Empereur. Car au contraire, nous tenons en ce Royaume, que le Roy conserue tousiours son droit, sur les Fleues publics: bien qu'ils prennent leurs cours par les terres des Seigneurs particuliers, & des villes, encore qu'ils ayent toute Iustice: car la Iustice n'a rien de commun avec la propriété du Fleue.

Il est bien vray qu'anciennement, & lors que les droits du Roy n'estoient pas bien cogneus, on accordoit plusieurs droits aux Seigneurs hauts-Iusticiers, qui estoient voyfins des grands Fleues, comme d'auoir le tiers des amendes, à quoy estoient

condamnez ceux, qui contreuenoient aux reglemens, que l'on auoit fait pour entretenir la netteté de leur canal, fuiuant l'Ordonnance de Charles VI. d'auoir le droit des pescheries, & les deffens, comme dit *Joannes Faber, in §. flumina, instit. de rerum diuis.* de s'approprier les Espaes d'eau, quand les Fleuues se débordent, & qu'ils entraînent les meubles, & le bestial des maisons qu'ils ont abattuës.

Mais tous ces droits leur ont depuis esté retranchez par les Ordonnances que l'on a faictes, touchant les Eaux & les Forests : & spécialement par celle, qui fut publiée en l'année mil cinq cens septante-deux, qui veut que toute la Iurisdiction, & la cognoissance, des mal-versations qui ont esté commises sur les eaux, les bords & les riuages des Fleuues, appartienne aux Iuges des Eaux & Forests, priuatiuement à tous autres. Si ce n'est qu'ils fussent fondez en tiltres & concessions particulieres des Roys : & sans qu'en consequence de leur Iustice, quoy que haute, ils puissent plus pretendre aucuns de ces droits. Non pas mesmes d'empescher la pesche, comme plusieurs le veulent faire, sous pretexte qu'ils disent en estre en possession : qui neantmoins n'est qu'une vsurpation : d'au-


284 DE LA SOUVERAINETÉ DV ROY,
tant plus odieuse, qu'elle retranche la li-
berté naturelle, qui permet la pesche à tout
le monde, comme le traictent le mesme
Joannes Faber, au lieu que nous auons rap-
porté cy-dessus, & *Guido Pape*, en sa De-
cision 154. se fondant sur la loy vnique, §.
publicano, ff. vt in flumine publico nauigare liceat.
Veu mesmes que le Roy, à qui sont les
Fleuves, & la Iustice tout ensemble, se
contente seulement de regler la pesche,
sans la defendre en general. Il en est au-
trement des petites riuieres, qui ne sont
pas nauigables : car elles appartiennent en
propriété, aux Seigneurs des terres qu'el-
les arrousent. Aussi sont-elles appellées par
plusieurs de nos Coustumes, Riuieres Ban-
nales, & Riuieres de Cens: Et l'on ne peut
pas y pescher que par leur permission.

Outre ces droits remarquables, le Roy
ioüyt encore d'un autre, non moins no-
ble: c'est qu'il n'y a que luy qui puisse le-
uer des peages sur les Fleuves: Aussi pour
ce sujet il est tenu de faire entretenir les
ponts, les ports, les passages, & de rendre
leur canal libre. Et quelques-vns ont ad-
iousté, de recompenser mesmes les pertes
& les dommages, que les Marchands re-
çoient, par le manquement des repa-
rations necessaires, pour la seureté de la na-

nigation ; comme le contient vn ancien Arrest, rapporté par du Tillet, en datte de l'an 1295. Et si le Roy accordoit à d'autres le droit de leuer peages sur ces Fleuves, comme il y en a plusieurs qui iouissent de ce priuilege ; c'est tousiours avec ces mesmes conditions, & ces mesmes charges : d'autant que les peages n'ont esté establis que pour ceste consideration.

*Des grands chemins, & des droits que
le Roy a sur eux.*

CHAPITRE XIII.

 E s Anciens considerans que la pluspart des affaires des hommes demeureroient imparfaictes : Que personne n'entreprendroit plus ny de voyages, ny d'Ambassades : Qu'il ne se feroit plus de trafic, & qu'il n'y auroit plus de communication entre les nations & les diuerses Prouinces de la terre, si les chemins n'estoient asseurez contre les brigandages des voleurs ; Ils les mirent non seulement en la protection de ces Dieux, qu'ils appelloient *viales*, & *presides viarum* :

Nn iij.

286 DE LA SOUVERAINETE' DV ROY,
dont veut parler ce Poëte en ce vers,

Geminósque pares qui compita feruánt,
De Diane & de Mercure, à qui ils donnerent pour ce sujet le nom d'*cródos*, mais encore ils les mirent en la garde des Roys & des Princes souuerains. C'est pourquoy dés l'antiquité mesme, les grands chemins estoient appelez, *via Regia, consulares, pretoria, militares, publica*, pour monstrier qu'il estoit du deuoir des Roys & des principaux Magistrats de l'Empire, d'auoir vn soin particulier de leur entretenement, & de leur seureté. Et de faict, l'on remarque que l'Empereur Auguste se porta avec tant d'affection à la reparation des grands chemins, qu'il en merita vne loüange, & vn remerciement public, comme le tesmoigne ceste ancienne Inscription: *Orbe mari terraque pacato, Templo Jani clauso, Republica optimis legibus, sanctisque institutis, reformata, viam superiorum Consulium tempore inchoatam, multis locis intermissam, pro dignitate Imperij latiorcm, longiorem, Gades vsque, promouit.* Et ce fut luy, dit Plutarque, qui fit dresser ceste colonne dorée, qu'on appelloit, *Miliarium aureum*, qu'il posa au milieu du Marché, où aboutissoient tous les chemins d'Italie.

Aussi les Romains, durant la Republique, ne furent pas moins soigneux en cela

que les Empereurs : car ils establirent des Officiers particuliers , qu'ils appelloient *Viocuros*, qui n'auoient point d'autre exercice, que de faire reparer les grands chemins. Outre plus, les Censeurs auoient la charge de les faire pauer & construire, tescmoin ce chemin admirable, que fit dresser le Censeur Appius, qui fut appelé de son nom, *via Appia*, à qui ce Poëte donna cét Eloge,

Appia longarum teritur regina viarum.

Et que Procope, liure premier de la guerre des Gots, a décrit comme vn ouurage miraculeux, pour auoir esté pauer de pierres dures comme fer, dont on ne trouue point de semblables dans tout le pays des enuirs. Ce qui a donné sujet de luy auoir comparé ceste merueilleuse Chaussée de la Roynie Brunchault, que le vulgaire croit auoir esté pauer, ou par art magique, ou de pierres tombées du Ciel, pour ce que l'on n'en void point de mesmes dans tout le voysinage.

L'embellissement aussi, & la commodité des grands chemins estoit commise aux mesmes Censeurs: Dequoy l'Histoire nous donne des tesmoignages, lors qu'elle loue Caius Gracchus, de ce qu'estant Censeur il fit bastir au long des grands che-

288 DE LA SOUVERAINETE' DV ROY,
mins des Magasins & des Greniers , pour
la commodité des passans : ils donnoient
encore les permissions d'y edifier les mo-
numens , & les sepultures, comme le re-
marque l'ancien Scholiaste de Iuuenal, sur
ce vers :

Quorum Flaminia tegitur cinis atque Latina.

Les *Ædiles* auoient aussi la charge de l'en-
tretien des ruës & des chemins de la
ville , dit la loy premiere, ff. de via publica,
Et si quid in ea fact. esse dicatur.

Les Atheniens obseruoient la mesme
police : car ils auoient deux sortes d'Offi-
ciers, qu'ils nommoient ἀγνόμοι, & ἀρχαγόμοι,
ceux-là auoient la charge de la reparation
des chemins des villes , & ceux-cy des
chemins de la campagne : ainsi qu'Aristote
l'explique au liure sixième de ses Polit. Et
nous voyons que le grand Papinian consi-
derant combien l'entretien des che-
mins estoit necessaire en vn Estat, mit en
lumiere vn liure qu'il intitula ἀγνομίων, *sive*,
de Officio Astynomi, dont il ne nous reste
qu'un fragment en la loy premiere, ff. *ne*
quid in via publ. si. Ils estoient aussi grande-
ment soigneux d'asseurer les passans con-
tre les surprises, les cruautéz , & les vio-
lences des voleurs , que nos Iuriconsul-
tes appellent *Viarum incessores* & *grassatores*
comme,

comme il se void en tout le tiltre *de listorum, & itinerum custodia*, lib. xij. C. Et pour ce sujet ils donnoient souuent des commissions extraordinaires pour les poursuire, comme Tibere le pratiqua; lors qu'il establit sur les chemins, *stationes militum grassaturis tollendis*, dit Suetone, & quand le peuple Romain enuoya Pompée contre les Pirates de la Mer de Cilicie.

Et l'on remarque qu'ils estoient si rigoureux, contre ceux qui violoient la securité des chemins; qu'ils punissoient ce crime du mesme supplice que le crime de leze-Majesté: dequoy leur Histoire nous donne l'exemple d'Equitius Cupes, & de Macellus; qui pour auoir desrobé quelques Marchands, qui apportoit des viures en la ville, furent bannis à perpetuité, tous leurs biens confisquez, & leurs maisons abattuës: & en leurs places furent edifiez deux Marchez publics, qu'ils appellerent de leurs noms, *Forum Macellum, & Forum Cupedinis*: où l'on vendoit les viures, & toutes les prouisions de la ville. Mais ils passerent bien plus auant, lors qu'ils rendirent les voisins responsables des meurtres, & des voleries, que l'on auoit faictes sur les chemins publics: bien mesmes qu'elles eussent esté commises, *ignorante domi-*

290 DE LA SOUVERAINETE' DV ROY,
no, & qu'il n'eust point participé au vol.
Nam res possessioque eius notabatur ignominia, ipse quoque infamia aspergebatur, dit Tertullien. Et Plutarque fait mention d'un semblable jugement que les Amphyctions rendirent contre les Scyriens, sur un mesme sujet: Ce qu'ils faisoient, afin de veiller exactement sur la seureté des chemins de leur voisinage: Dont plusieurs de nos Docteurs ont tiré ceste consequence, que les hauts-Iusticiers, & ceux qui leuent des peages sur les grands chemins, quand mesme ce feroit le Roy, sont tenus de représenter les voleurs, ou de restituer les biens qui ont esté dérobez; & entre autres Bartole, *in l. ne quid. ff. de incend. rui. & naufr.* Hostiensis, *in tit. de consuet. §. ex quib.* Balde, *in cap. 1. §. Marchio. Qui feud. dar. poss. & Archidiaconus, in c. si quis peregrinos. l. 4. quest. 3.*

Et de faict ceste proposition a esté suivie de plusieurs Arrests de la Cour, qui ont condamné les Seigneurs hauts-Iusticiers & Peagers, d'indemniser les Marchands que l'on auoit volez sur les grands chemins, si le larcin auoit esté fait entre deux Soleils, comme le contient vn ancien Arrest de l'an 1265. qui fut donné au profit du Comte d'Arthois, contre des Marchands, qui auoient esté volez, apres Soleil cou-

ché. Ce qui monstre que nos Roys n'ont pas esté moins soigneux de la seureté des grands chemins, que tous ces anciens. Dequoy nous donnent encore de certains tesmoignages, les Ordonnances de Louys le Debonnaire, de Philippes Dieu-donné, & de celles de leurs successeurs, qui créèrent expres les Preuosts des Mareschaux, pour poursuiure les vagabonds, & les voleurs, & proceder contre eux avec toute sorte de rigueur : Ce qu'ils recommanderent aussi particulierement aux Presidiaux, leur donnant par leur Edict de Creation le mesme pouuoir qu'aux autres.

Nos Roys ont aussi fait prendre soigneusement garde, qu'on n'empietast point sur leur largeur, & qu'on n'y fist aucun bastiment qui peust incommoder le public, comme nous l'enseigne l'Auteur de la Somme Rurale, lors qu'il dit : *Chemin Royal, est le grand chemin, qui va d'un pays en un autre, & d'une bonne ville à autre; si n'y doit estre foüy, ny planté, qu'il ne contienne tousiours quarante pieds de large, sur l'amende de soixante sols au Roy : Car au Roy, dit-il, appartient le gouvernement, & la cognoissance des chemins Royaux, & des cas qui y aduiennent : encores que le chemin passast au trauers, & parmy la terre du haut.*

292 DE LA SOUVERAINETE' DV ROY,
Iusticier. Et au mesme endroit il adjouste:
Et d'is sçauoir qu'en France, au Roy appartient les
trauers garder, & maintenir: si doit ce trauers
contenir de large iusques à vingt ou vingt-deux
pieds; & est appellé trauers, pource qu'il transe
d'un pays à un autre. Aussi voyons-nous,
que tous les Edicts, que l'on a faits puis
apres, ont ordonné la mesme chose: &
specialement celuy de François I. de l'an
1517. de Henry II. de l'an 1552. de Hen-
ry III. de l'an 1579. art. 356. qui ont
commandé, que les grands chemins fus-
sent bornez & plantez d'ormes, pour em-
pescher que personne n'entreprist sur leurs
largeurs. Ce sont les Tresoriers de Fran-
ce, & les Voyers, qui ont ceste charge:
Ceux-cy, pour voir & regarder ce qui
peut estre necessaire pour leurs repara-
tions, & d'en faire leur rapport: & ceux-
là, pour ordonner, faire construire les ou-
rages, les receuoir. & assigner le paye-
ment. Ce qui se rapporte à tous les Re-
glemens que les Romains establirent autre-
fois pour ceste police, dont l'on peut voir
des vestiges dans les douze Tables, & dans
tous les tiltres des Pandectes, qui traictent
de ceste matiere, comme le tiltre, *ne quid*
in loco pub. vel itinere fiat: celuy de *via pub.*
& *si quid in ea fact. esse dicat.* & celuy de

via pub. & itinere publico reficiendo.

De toutes ces Loix & ces Ordonnances, il refulte premierement, que les chemins publics appartiennent au Roy, par l'argument qu'on tire de la loy 2. §. *viarum. ff. ne quid in loc. publ.* & fuiuant la constitution de l'Empereur Frideric, *qua sint regalia*, dont nous auons vn exemple dans Aristote, au liu. 2. *æconomicum*, chap. 14. où il parle d'un Condolus, Agent du Roy Mausolus, qui fit vendre publiquement, au profit du Roy son Maistre, tous les fruiets des arbres qui estoient plantez, ou qui panchoient sur les chemins publics. Secondement, que la cognoissance de tous les cas qui y arriuent, appartient au Roy, & à ses Officiers; si ce n'est que par des tiltres bien expres, il en aye octroyé la Iurisdiction à d'autres, comme ils ont fait à plusieurs Seigneurs des terres, par où les grands chemins trauerfent, & qui par ce moyen, se font chargez de leur garde, & de leur protection: mais c'est tousiours à la referue de la preuention du Roy. Aussi les Gens du Roy du Parlement, ont tousiours soustenu que la cognoissance des meurtres & des homicides, que l'on commet sur les grands chemins, appartient aux Iuges Royaux,

294 DE LA SOUVERAINETÉ DU ROY,
priuatiuement à tous autres; fuiuant les
anciens Arreſts du Regiſtre intitulé *Olim*,
ce que j'ay veu iuger par pluſieurs fois, ſur
mes Concluſions.

Et en fin, qu'il n'y a que le Roy, qui
puiſſe créer & leuer des peages ſur les
grands chemins, ainſi que ſur les Fleuues
nauigables; ſans que perſonne oſe uſurper
ce droit, que par ſa permiſſion: ce qui a
eſté ordonné en ſuite de ceſte regle ge-
nerale, qui defend à toutes perſonnes, de
leuer aucuns deniers ſur le peuple, ſans
l'autorité du Prince, à peine de crime de
leze-Majeſté. Encore ceux à qui le Roy a
donné ce priuilege, ne peuuent rien exiger
d'auantage, que ce qui eſt porté par la
Pancarte, que les Peagers ſont tenus d'at-
tacher à vn poteau, aupres du lieu où
l'on doit payer le peage, apres qu'elle a
eſté approuuée & ſouſcrite par le Iuge
Royal, fuiuant l'Edict d'Orleans, qui a
eſté fait ſur l'exemple de l'Ordonnance des
Empereurs Marcus & Commodus, qui ſe
lit, *in l. ult. §. licet. ff. de public. veſtig. & comm.*
Et à condition auſſi d'entretenir & repa-
rer les chemins, qui ſont dans l'eſtendue de
leurs hautes Juſtices: Et qu'à faute de ce
faire, le Procureur du Roy peut faiſir le
peage.

En consideration dequoy, & de ce que les Seigneurs, qui ioüyissent de ce priuilege, sont responsables des marchandises qui ont esté perduës sur les chemins de leur Iurisdiction, les Ordonnances leur permettent de proceder par commise, contre ceux, qui par dol & par fraude n'ont payé le peage, suiuant la disposition de la loy, *in l. inuermus. C. de nauib. non excusa. lib. 11.* C. qui veut mesmes que la commise ayt lieu, non seulement pour les marchandises illicites, & qui ont esté recelées: mais encores pour les licites, & celles qui ont esté declarées, dit le Iurisconsulte Paulus, *in l. 11 ff. de publica. vect. & com.* & dont l'on a tiré l'Ordonnance de Charles VIII. qui se void dans le stile du Parlement, *parte 3. tit. de excess. officior. sub pana confiscationis pannorum illorum, & animalium illos deferentium, aliarumque mercium cum illis inuentarum.* D'où a pris son origine l'ancien Prouerbe, qui dit, *Que la robbe de l'ennemy, fait confisquer la robbe de l'amy.* Je sçay que plusieurs trouuent ceste Ordonnance trop rigoureuse: pource qu'en confisquant les marchandises licites, avec les illicites, c'est estendre la peine au delà de la faute; comme dit le Iurisconsulte, *in l. 6. ff. de his que vt indig. aufer.* neantmoins elle

296 DE LA SOUVERAINETE' DV ROY,
s'obserue exactement tous les iours, en
haine du dol & de la fraude.

Et l'on doit remarquer que nos Roys
ont voulu que les Ecclesiastiques, & les
Nobles, soient exempts de ces peages,
pour leurs prouisions, & les fruiëts qu'ils
recueillent de leurs terres & de leurs he-
ritages: si ce n'est qu'auant que de les faire
passer, ils les eussent vendus à des Mar-
chands, non priuilegiez, suiuant l'Ordon-
nance de Charles V. que l'on lit dans le
Registre intitulé, *Antiqua*. Les Escoliers de
l'Vniuersité sont aussi priuilegiez, non seu-
lement par la Constitution de Frideric, en
l'auth. *Habita*: mais aussi de l'Ordonnance
de nos Roys.

Les domestiques des Roys, des Reynes,
& des Princes du Sang, iouyssent de ceste
mesme exemption, comme dit l'Ordon-
nance de Philippes de Valois, qui est dans
le Registre 6. fol. 2. les viures & les muni-
tions, qui se meinent dans les armées Roya-
les, ne payent aucun peage sur l'exemple de
ce qu'ordonne la loy Romaine, in l. 9. §. *res
quæ. ff. de public*. On y a aussi adjousté les Am-
bassadeurs, suiuant la loy 23. ff. *de verb. signif.*
Ce que l'on doit entendre, non seulement
pour les peages, qui se leuent sur les che-
mins, mais aussi sur les Fleuues nauigables.

DU

Du droit de Marque, & de Represailles: & qu'il n'appartient qu'au Roy de les octroyer.

CHAPITRE XIV.



N ancien philosophe disoit avec raison, que bien-heureuses estoient les Republiques, où les injures, que l'on auoit faictes aux particuliers, estoient reputées comme faictes à tout le corps de l'Estat; & dont l'on poursuioit la vengeance, du commun consentement de tout le peuple: se persuadant que ceste amour & charité publique, enuers les personnes priuées, pouuoit seruir d'un puissant moyen pour establir entre les citoyens vne ferme concorde, les vnir d'une parfaicte bien-vueillance: & les rendre plus forts, pour resister aux violences de leurs ennemis.

Mais ceste proposition est principalement veritable, lors qu'il s'agit de la reparation des dommages que l'on a receus des estrangers. Car nous lisons, que les anciens Romains auoient accoustumé, en de semblables rencontres, d'enuoyer au nom de la Republique leurs Ambassadeurs,

Pp

298 DE LA SOUVERAINETE' DV ROY,
qu'ils nommoient *Faciales*, vers ceux qui
auoient fait l'injure, pour en demander la
reparation: & à faute de la faire, leur de-
noncer la guerre, ce qu'ils appelloient *Clari-
gationem*, comme Tite Liue nous l'apprend
au liure premier, septième & huitième. Et
bien que depuis ils changerent ceste for-
me, iugeans qu'il n'estoit pas raisonnable
de precipiter dans les perils d'une guerre
douteuse toute la Republique, pour des
injuries particulieres. Neantmoins ce qu'ils
y apportèrent de nouveau, tesmoigne tous-
iours, avec combien d'ardeur, ils faisoient
paroistre le ressentiment qu'ils auoient des
violences, que l'on auoit faictes à leurs
citoyens. Car ils permirent de se venger
soy-mesme, non seulement contre ceux
qui auoient fait l'iniure, mais encores con-
tre les autres de la mesme nation, soit par
arrest de leurs personnes, soit par saisie de
leurs biens, & de s'ayder de main-forte,
pour cét effect: comme il est dit *in l. qui
restituere. ff. de rei vindicat.* qui est vn exemple
de ceste iustice armée, dont Homere veut
parler en l'une de ses Hymnes, où Mars
est appelé *βίμυτος ἀραγός*, c'est à dire, l'ayde
& la force de la Justice: voulans en outre,
que si apres quelques sommations, on ne
leur faisoit point raison, il leur fust per-

mis, comme en vn dény de Iustice, vendre publiquement les biens de celuy qu'ils auoient arresté, & de s'indemniser sur le prix : ce qu'ils appellerent d'un terme general, *Pignorationem*, vel *ἐιςχρησισμὸν*, comme il est dit en l'auth. *Hubita, C. ne filius po. patr.* & in auth. *sed omnino. C. ne vxor. pro mar.*

Ce que vray-semblablement ils auoient emprunté de ceste ancienne loy de Draco, que les Atheniens nomment *ἀσφαλισία*, dont fait mention Demosthene en l'Oraison contre Aristocrate. Et bien qu'elle ne parle que de l'homicide commis par vn estrangier, & qu'elle permette en ce cas, aux parens de celuy qui auoit esté tué, d'en arrester trois pour vn, iusques à ce que le meurtrier leur eust esté rendu, ou bien que ceux du mesme pays en eussent fait la iustice : Toutesfois elle fut depuis estenduë, pour les pillages, les larcins, & les depredations des marchandises, comme il se void dans Thucydide, *lib. 5.* où il dit, que les Lacedemoniens permirent aux Atheniens d'arrester quelques-vns de leurs hommes, au lieu de ceux qui les auoient volez : Et l'on void que les nations voisines d'Athenes, auans embrassé ceste mesme loy, l'ont tousiours ainsi pratiquée, à ce que remarque Polybe, *lib. 4.* où il parle de

300 DE LA SOUVERAINETE' DV ROY,
Dorimachus, qui fut arresté par les Messé-
niens, pour des pirateries, que certains
Etholiens, dont il estoit issu, auoient
faictes sur leurs subjects : & dans Hero-
dote, au liure sixième, l'on lit aussi que
les Æginetes retindrent en leur port les
vaisseaux des Atheniens, pource que des
Corsaires de leur ville auoient pillé leurs
marchandises.

Et en fin, ceste loy a esté trouuée si
iuste, & si vtile, pour maintenir la so-
cieté generale des hommes, que depuis ce
temps-là, elle a esté receuë par toutes les
nations de la terre, & mise au nombre de
celles du droit des Gens. Car bien qu'elle
ayt esté defenduë par l'Empereur Iusti-
nian, en l'auth. *Vt non fiant pignorationes.* §. 1.
coll. 5. & par le Pape Gregoire X. in cap.
vnico. de iniur. & dam. dat. lib. 6. Ce n'est pas
toutesfois, qu'ils l'ayent improuuée, veu
que saint Augustin, & plusieurs autres
Theologiens, l'ont estimée iuste : mais
pource qu'ils se persuaderent, que puis
qu'ils commandoient à tout le monde,
l'Empereur à tous les peuples seculiers, &
le Pape à tous les Ecclesiastiques; que leurs
subjects, sans ce remede extraordinaire,
pouuoient se pouruoir par deuant leurs
Iuges, comme dependans d'vn mesme

seigneur, pour auoir reparation de leurs iniures, & pour recouurer leurs biens: Mais maintenant que ce grand Empire a esté diuisé en plusieurs Royaumes, qui ont leurs bornes & leurs limites distinctes & separées, l'on en vse autrement: Car nous voyons que nonobstant ceste defense on ne laisse pas de l'observer par toute l'Europe, & specialement en ce Royaume, où nos Roys se sont tousiours monstrez tres-soigneux de maintenir leurs peuples contre la violence des estrangers: Et ce droit est appelle Droit de Marque, à cause qu'il s'exerce le plus souuent sur les frontieres du Royaume, qu'on appelle communement, Marches & Limites.

Et nous apprenons de nos Annales, que quelques-fois aussi on l'a pratiqué, lors que les Princes estrangers ont fait refus de rendre les François, qui s'estoient réfugiés chez eux, apres auoir commis en France quelque grand crime: En quoy l'on suiuiot la loy de Dieu, qui rend coupables de l'homicide, tous ceux qui recellent le meurtrier: & c'estoit se conformer au dire de cét ancien Capitaine, *Hostis est, qui hostem non ostendit.*

Or comme toute ceste procedure est presque vne demie-guerre, aussi n'y a-t'il

302 DE LA SOUVERAINETE' DV ROY,
que le Roy qui la puisse permettre : bien
qu'il se voye dans les Registres de la Cour
& dans nos anciens Praticiens, que le
Parlement autre-fois auoit de coustume
d'octroyer les Lettres de Marque. Mais
c'estoit au temps que nos Roys visitoient
plus souuent leur Parlement, & qu'ils y
alloient prendre conseil sur les grandes
affaires du Royaume: car depuis l'Ordon-
nance de Charles VIII. & que les Roys,
qui l'ont suiuy, se sont reseruez la cognois-
sance des affaires de leur Estat, il n'y a
plus qu'eux qui les octroyent: Car il n'appartient qu'aux Roys de donner le pou-
voir de se venger soy-mesme de son en-
nemy: de s'armer pour ce sujet, & d'ar-
rester vn homme pour vn autre: & en
fin, de saisir & faire vendre les marchan-
dises de l'un, pour la debte d'un autre,
comme nos Docteurs le traiçtent sur la
loy 3. ff. ad leg. Iul. Majest. la loy, qui cæsus.
ff. ad leg. Iul. de vi. la loy premiere, C. quando
lic. se ips. vindic. & tot. tit. ne vnus ex vican. pro
ali. vic. deb. tene. Et de faict, nous lisons
dans les Arrests de la Toussaincts de l'an
1272. qu'on reuoka des Lettres de Mar-
que, qui auoient esté données par la Com-
tesse de Flandres, pour faire saisir les Mar-
chandises d'un Marchand Anglois, & luy


fit-on defenſes de ne plus entreprendre choſe ſemblable.

L'on doit encore remarquer, que comme ce droit eſt extraordinaire, & éloigné des regles communes de la Juſtice : Auſſi n'a-t'on pas trouué juſte d'y comprendre toutes ſortes de perſonnes : car on en a excepté les perſonnes miſerables, comme les femmes & les enfans, les Eccleſiaſtiques, les Ambaſſadeurs, les Eſcoliers, & les Marchands trafiquans ſous la foy publique des deux Royaumes, comme il eſt traité au Chap. *Et ſi pignerationes de iniur. & dam. lib. 6. in l. ſanctum ff. de rer. diuiſ. in l. fin. ff. de leg. l. fin. ff. de decr. ab ord. fac. in auth. habita. C. ne filius pro patre, & in auth. omnes peregrini in l. commu. de ſucceſſ. & l. vnica. C. de nund.* De meſme tous ceux qui ne ſont pas encores *allecti inter ciues*, lors que l'on a fait l'injure, ſont exemptez de ceſte loy, comme il eſt dit, *in l. fin. ff. de var. & extraordinar. cognit.* Et nous voyons qu'on n'octroye iamais ces Lettres qu'auec grande cognoiſſance de cauſe : c'eſt à dire, apres auoir veu les informations des torts & des injures que l'on a receuës : les ſommattons, qui ont eſté faiſtes aux Princes eſtrangers de rendre Juſtice : leurs refus, ou leurs délais fruſtratoires, re-

304 DE LA SOUVERAINETE' DV ROY,
sentans vn dény de Iustice : & apres, par
vne grande & meure deliberation, qui se
fait sur ce sujet, dans le Conseil du Roy.
Neantmoins pour euitier le peril de l'e-
uasion, les Iuges peuent bien permettre
de saisir, sans déplacer, attendant l'obten-
tion des Lettres. Ce qui s'obserue princi-
palement aux Parlemens qui sont éloignez
de la Cour.

*Qu'il n'appartient qu'au Roy d'instituer des Postes
& des Courriers publics, d'écrire des Lettres
aux Parlemens en Corps, & aux Armées :
Et de plusieurs autres droits, qui de-
pendent de la Souueraineté.*

CHAPITRE XV.

 ON dessein est de traicter en ce
Chapitre, de plusieurs droits, qui
sont tellement propres à la Sou-
ueraineté, que quelques-uns de
nos Iurisconsultes les appellent, *Jura Ma-
iestatis*. Je parleray premierement de l'Insti-
tution des Postes, qui est vn droit telle-
ment singulier aux Princes souuerains, que
personne ne peut s'attribuer ceste puissance
dans

dans leurs Estats, sans leur expresse permission; comme le fit entendre l'Empereur Leon à de certains Iuges qui vouloient vsurper ceste prerogatiue: *Iudicibus*, dit-il, *facienda euectionis copiam denegamus, cum id tantum nostro numini sit reservandum l. Iudicibus. C. de cur. publicis*. Et certes, c'est avec iuste raison que ce pouuoir est reserué seulement aux Roys: Car puis qu'ils n'ont principalement estably les Postes que pour leur commodité particuliere, afin qu'ils soient plus promptement aduertis de l'estat des affaires de leurs Prouinces les plus éloignées des pays estrangers, ce qui doit estre defendu à la curiosité de leurs subjets; il ne doit appartenir aussi qu'à eux, d'establir des Courriers dans leurs Royaumes.

Ce fut le grand Cyrus, Roy des Perse, qui trouua le premier ceste inuention, pour sçauoir avec plus de diligence ce qui se passoit dans la vaste estenduë de son Empire: Car Xenophon remarque au liure huictième de la Cyropédie, que ce Prince fit bastir de iournées en iournées de grandes maisons, où l'on nourrissoit des chevaux, pour seruir aux Courriers qui portoient ses dépesches, qu'ils appelloient, *Angarios & Astandas*. Les Grecs imiterent

306 DE LA SOUVERAINETE' DU ROY,
 son exemple, d'autant que nous voyons
 dans Herodote, qu'ils establirent de cer-
 tains hommes sur les grands chemins, qui
 se portöient les vns aux autres les com-
 mandemens de leurs Princes, avec vne
 incroyable vîtesse. L'Empereur Auguste
 institua la mesme chose à Rome, comme
 le remarque Suetone en la vie de ce Prin-
 ce : *Quò celerius cognosci posset, dit-il, quid in*
quaque Prouincia gereretur, iuuenes primò modicis
internallis per militares vias, dehinc vehicula dispo-
suit: commodius id visum est, vt qui à loco eîdem
perferrent litteras, interrogari quoque, si quid res
exigerent, possent.

Cela mesme a esté de tout temps pra-
 tiqué en France; & du commencement
 nos Ancestres se serüirent de charjots: &
 puis apres ils establirent les cheuaux de
 relais, qu'ils nommoient *Veredos* & *paraue-*
redos, comme il se void dans la vie de Chil-
 debert, où l'Histoire remarque que ce
 Roy voulant se saisir des biens de Ran-
 ching, il commanda à ceux à qui il auoit
 donné ceste commission, de prendre les
 cheuaux destinez pour l'vsage de la Poste,
 afin de faire vne plus grande diligence.
 Mais depuis ce temps-là le public ayant
 esté priué de ceste commodité par la ne-
 gligence de nos peres: Le Roy Louys XL

la reſtablit, au grand ſoulagement de ceux qui ont des affaires en diuerſes Prouinces; comme nous l'apprend l'Ordonnance qu'il fit publier ſur ce ſujet, qui non ſeulement confirme ce droit Royal: mais encore qui donne la charge au Controlleur des Poſtes, que nous pouuons comparer à cet Officier, que les Romains appelloient *Ma-giſter Officiorum*; d'auoir vn ſoin particulier, de faire obſeruer l'ordre, & tous les Reglemens qu'il auoit eſtablis, touchant le deuoir des Courriers, & des Maiſtres particuliers des Poſtes. Noſtre Police neantmoins eſt differente de celle des Romains en vne choſe; pource que parmy nous il eſt libre à tout le monde, de prendre la Poſte, quand on veut faire quelque voyage: ſi ce n'eſt qu'en certaines rencontres le Roy aye defendu aux Maiſtres des Poſtes, de donner des cheuaux, ſans billet de ſa part. Mais parmy les Romains, il eſtoit defendu, à qui que ce fuſt, de courre la Poſte, *ſine diplomate*, & ſans l'exprefſe permiſſion de l'Empereur: d'où vient que nous voyons que Plinie le ieune ſ'excuse enuers Trajan, de ce que ſans luy en auoir parlé, il auoit donné vn paſſe-port à ſa femme, ſous ſon nom, afin qu'elle peuſt ſe ſeruir des chariots publics, pour aſſiſter

308 DE LA SOUVERAINETE' DV ROY,
plus promptement à la mort de sa tante.
Et cet ordre estoit obserué avec tant de
rigueur, que Capitolin remarque, que
Pertinax ayant pris la Poste, sans la per-
mission de l'Empereur Aurelian, il fut
condamné par le President de Syrie, de
faire à pied son voyage, depuis Antio-
che iusques au lieu où la cohorte, qu'il
commandoit, estoit en garnison : ce qui
nous est confirmé par la loy *Nullis. C. de
curf. publicis*, & la loy 137. ff. *de verb. obli-
gat.* Mais depuis, la peine contre les con-
treuenans fut arrestée à vingt-cinq liures
d'or, comme il est dit en la loy 6. *C.
eod. tit.*

Le second droit, que j'ay estimé digne
de remarque, c'est qu'il n'appartient qu'au
Roy d'écrire aux Armées, & aux Parle-
mens en Corps : ce qui a esté permis aussi
aux Gouverneurs des Prouinces, qui en de
certaines rencontres peuuent écrire aux
Parlemens qui sont dans leur Gouverne-
ment. Et quand il arriue que les Princes
du Sang leur enuoyent des Lettres, leurs
Registres portent, qu'ils peuuent bien les
receuoir, à cause du respect que l'on est
obligé de rendre à leur eminente qualité :
mais qu'on les doit enuoyer au Roy toutes
cachetées.

En quoy nous imitons les Romains, qui en vsoient de la sorte, comme nous l'apprenons de Tacite, lors qu'il dit que c'estoit vne marque de prise de possession de l'Empire, que d'écrire aux Armées, & au Senat : *Litteras ad exercitus, & ad Senatum, tanquam accepto Imperio, misit* : & au liure cinquième, *Miserat Mutianus epistolas, qua materiam sermonibus præbuere ; si priuatus esset, cur publice loqueretur*, & le mesme encore dans le deuxième liure de ses Histoires, où il dit : *Recitata Fabij Valentij Epistola ad Consules scripta, haud immoderate ; gratior Cecina modestia fuit, quod non scripsisset.*

Et c'est pour ce sujet que nous tenons en France, qu'il n'appartient qu'au Roy, de faire des Declarations publiques. Ce qui a esté estably sur ce que parmy les Romains il n'y auoit que l'Empereur qui peust parler en public aux legions Pretorienne, & prendre son Siege dans le Tribunal, qu'ils appelloient *Cæsperitium*, qui d'ordinaire estoit élevé au milieu du Camp ; de sorte que, comme les legions d'Illyrie voulurent y élouer Blesus, il ne voulut iamais le permettre, s'écriant aux soldats : *Mea potius cede imbuite manus ; leuiore flagitio legatum interficietis, quam ab Imperatore desiscitis* : comme le remarque Tacite.

Qq iij

Ce qui fut iudicieusement ordonné par l'Empereur Auguste ; pource que c'est principalement dans les Armées, que l'autorité & la puissance du Prince souverain doit paroître avec plus d'éclat : Dequoy il se monstra si ialoux, que pour ceste même considération, il defendit à tous les Capitaines, de changer les soldats, de compagnies en autres, sans sa permission : Ce que ses successeurs observerent depuis exactement, comme nous le monstre la loy *Contra. C. de re militari, nisi hoc Augusta Majestas publica utilitatis causâ fieri iusserit.*

L'on ne peut aussi, sans l'expresse permission du Prince, faire apposer ses armes, que nous appellons Pannonceaux Royaux, sur les maisons & les heritages, qui ne sont point de son domaine : En quoy nous imitons encore la Constitution de Theodose, *Ne quis prædijs suis, vel alienis, vela Regia suspendat*: Car bien que la plupart estiment que cét Empereur fist ceste defense, pour empescher que sous le nom du fisque on n'empictast le bien d'autrui, & que l'on n'exposast aux mespris des hommes les possesseurs des heritages où l'on verroit telles marques éleuées, comme estans obligez au Roy, ou à d'autres ; neantmoins il est veritable, qu'il ne publia ceste

Ordonnance, que pour preuenir l'ambition de plusieurs particuliers, qui vouloient vsurper ce droit sur son autorité souueraine: *Regia enim Maiestatis est, vt nostræ tantum domus & patrimonia, titulorum inscriptione legantur*, dit l'Empereur, *in l. 1. C. vt nemo priuatus tit. prad. suis, vel al. Imp.* Et pour ceste mesme consideration l'on a tenu, qu'il n'estoit pas permis aux personnes priuées, d'auoir dans leurs maisons des prisons particulieres, que la loy appelle *Priuatos carceres*: car comme le Prince souuerain a sous sa protection la liberté de ses peuples; Aussi personne ne doit entreprendre de les emprisonner, sans son autorité, comme il est dit par tout le titre *De priu. carceribus*.

Nos Roys ont encore ceste notable prerogatiue, qu'il n'appartient qu'à eux de sceller leurs Lettres en cire iaune. C'est pourquoy René d'Anjou, Roy de Sicile, voulant se seruir en son Seau de la cire de ceste couleur, il fut contraint de demander ce priuilege au Roy Louys XI. qu'il luy accorda par ces Lettres patentes, qui furent verifiées au Parlement, en Iuillet, 1480. & qui portoient nommément, qu'on luy donnoit ceste permission par grace & priuilege special. En quoy ils ont imité

312 DE LA SOUVERAINETÉ DU ROY,
 les Empereurs Romains, qui se reserue-
 rent particulièrement ceste prerogative, de
 signer leurs Lettres & leurs Rescripts d'une
 encre pourprée, comme il est dit in l.
 6. C. de diuers Rescripts, où l'Empereur
 Leon parle de la sorte : *Hanc sacri incausti*
confectionem nulli sit licitum aut concessum habere,
aut à quocunque sperare, eo videlicet qui hoc aggressus
fuerit Tyrannico spiritu, post proscriptionem bo-
norum omnium, capitali pœna plectendus. C'est
 pourquoy il n'y auoit que les Empereurs
 qui peussent se vestir de robbes de soye
 teintes en pourpre, ou en écarlate, sui-
 uant la disposition de la loy C. de vestib.
holoueris, quod soli principi eiusque domui dicarentur :
 d'où vient que ceux qui saluoient
 l'Empereur, dicebantur *sacram purpuram ad-*
rare in l. 1. Cod. de Apparit. Præ. Pline remar-
 que au liure 19. que le voile de pourpre
 estoit la marque du vaisseau de l'Empe-
 reur. Aussi void-on que de tout temps le
 pourpre a esté mis entre les ornemens
 publics des Princes souuerains, ainsi que
 le Feu, le Sceptre, la Couronne, & le
 Throsne, comme l'écrit Herodian en la
 vie de l'Empereur Gordien : ce que per-
 sonne n'osoit vsurper qu'à peine de la vie :
 pource que ces ornemens estans les mar-
 ques de la Souueraineté, l'on ne pouuoit
 s'en

s'en reueſtir, qu'en vſurpant la Principauté, foulant aux pieds la Maieſté Royale. Et de faiſt Froiſſard raconte que les Flamands perſuaderent au Roy d'Angleterre, lors qu'ils le ſolliciterent de les receuoir en ſa protection, de prendre les ornemens des Roys de France, afin d'auoir vn pre-texte pour ſe retracter du ſerment qu'ils luy deuoiẽt comme à leur Prince ſouuerain.

C'eſt encore l'vn des plus nobles droits de la Souueraineté des Roys, qu'on ne doit attribuer qu'à leurs Maieſtez la gloire des victoires, qui ont eſté obtenues ſur leurs ennemis: Pource qu'autrement ce ſeroit vſurper l'honneur de leurs armes, & diminuer leur reputation. C'eſt ce que ſçeut tres-ſagement obſeruer Agrippa, qui referoit touſiours à la prudence & à la bonne conduite de l'Empereur Auguſte, les heureux ſuccez de ſes entrepriſes: *Nunquam in ſuam famam geſtis exultauit; & ad Imperatorem, vt miniſter, fortunam referebat.* En quoy il obſeruoit le prudent aduiſ que luy auoit donné Mecenas, dont veut parler ce Poète en ce diſtique:

*Maius erat potuiſſe ramen, nec velle triumphos,
Maior res magnis abſtinuiſſe fuit.*

Et l'on remarque que les Courtiſans qui

314 DE LA SOUVERAINETE' DV ROY,
ont negligé de fuiure ce sage conseil, &
qui ont voulu trop s'approprier la gloire
des victoires, ont en fin ressenty les effects
de la ialousie de leurs Maistres. Dequoy
Tacite nous donne l'exemple de Silius,
qui se veid reduit iusques à ceste extremi-
té, ou de se tuer soy-mesme, ou de souffrir
vn supplice infame, pour s'estre accueilly
la haine de Tibere par ses trop grandes
vanteries: *Credebant plerique auctam offensionem
ipsius intemperantiâ immodicè iactantis suum mi-
litem in obsequio durauisse, cum alij ad seditiones
prolaberentur: neque mansurum Tiberio Imperium,
si is quoque legionibus cupido nouandi fuisset.* Et
l'Histoire est pleine de semblables puni-
tions. C'est pourquoy parmy les Grecs
il estoit defendu aux Chefs des Armées,
d'inscrire leurs noms sur les Trophées qu'ils
éleuoient sur le champ, où ils auoient
gagné quelque bataille: Afin qu'il n'y eust
que le public qui participast à ceste gloi-
re.

C'est encore vn droit singulier du Prince
souuerain, qu'on le reputé auoir son do-
micile dans la ville capitale de son Royau-
me; pour obliger les vassaux qui releuent
de la Couronne, d'y venir faire leurs hom-
mages, & d'y rendre leurs deuoirs. Aussi
nos Histoires remarquent, que dès le

temps de Clouis, Paris fut destiné, pour estre le Siege de l'Empire François. Ce qu'ils establirent, sur ce qu'ordinairement les grands Roys ont toujours tenu pour maxime d'Estat, de faire leur demeure dans les villes capitales de leurs Royaumes : *Et vnde in omnia esset regimen*, dit Tacite. D'où vient que la ville de Rome est appelée par Capitolin : *Sedes Imperij*. Et Suctone remarque, que pour ce sujet l'Empereur Auguste n'abandonnoit Rome, que le moins qu'il pouvoit : *Non diu urbem reliquit, & biennio continuo post adeptum Imperium, pedem portui non retulit*. Les Empereurs Antonin, Iustinian, Amurat, & entre nos Roys, Charles le Sage, vivoient de la sorte. C'est pourquoy ils auoient accoustumé de se vanter, d'auoir plus fait de belles choses, sans sortir de leur cabinet, que tous leurs predecesseurs par leurs voyages, & leurs grands exploits.

D'auantage, c'est vn droit qui est vny à la Majesté Royale, que quand bien le Prince deuiendroit ennemy de la Patrie; neantmoins on ne doit iamais attenter à sa personne, non pas mesme par la voye de Iustice. C'est pourquoy Domitian sacquit vne grande louange d'auoir puny l'affranchy de Neron, qui luy auoit aydé

316 DE LA SOUVERAINETE' DV ROY,
à se faire mourir. Daudid est estimé d'a-
voir exercé vne semblable action de Iusti-
ce contre celuy qui auoit tué Saül. L'on
remarque que Bajazet fut loué de tous
les Princes de son temps, de ce qu'il fit
executer à mort vn Bernard Baudin, qui
s'estoit réfugié en Asie, apres auoir tué
Iulien de Medicis, bien qu'il fust tenu
pour Tyran de Florence : & tant que les
siecles dureront l'on blasmera la memoire
d'Isabel Reyne d'Angleterre, d'auoir fait
mourir ignominieusement Marie Reyne
d'Escoce, & vefue d'un Roy de France.

C'est aussi vn des plus grands droits du
Prince souuerain, de pouuoir éloigner de
sa Cour ceux, qui par leurs secrets depor-
temens, luy donnent occasion de se défier
de leur fidélité, suiuant ceste regle d'Estat:
Ratio Imperiorum est, ne noceri possit : C'est ce
que les Romains pratiquerent sagement :
Car lors qu'ils entroient en défiance de
quelques-uns de leurs citoyens, ils auoient
accoustumé de luy donner quelque Am-
bassade, afin de l'éloigner pour quelque
temps des affaires; sous ce pretexte d'hon-
neur : Comme Agrippa le fit volontaire-
ment, pour couter les soupçons que l'on
donnoit de luy à l'Empereur Auguste :
Ainsi que le remarque Velleius Patercu-

lus, au liure deuxiême : *Marcus, inquit, Agrippa, sub specie ministeriorum principalium profectus in Asiam, ob tacitas cum Marcello offensiones, presenti se subduxit tempori.* Et Tite Liue nous donne l'exemple de Scipion l'Afriquain, dont l'eminente vertu fut tellement suspecte à tous ses citoyens, qu'il fut contraint de sortir de la ville, & d'aller demeurer en sa maison des champs, pour mettre leur esprit en repos : *Nam periculosum erat, dit-il, in Repub. praesertim libera, vnum hominem esse caput & culmen Imperij, sub umbra Scipionis urbem terrarum orbis dominam latere, nutus eius pro decretis patrum esse.* En quoy ils imitoient le Maistre de Musique, qui fait retirer du Chœur celuy qui pour auoir la voix trop haute, trouble l'harmonie du Concert : ce que ie dis, non pour louer absolument ces formes d'Ostracismes; mais pour dire qu'on les doit tolerer, quand le Prince en vse bien à propos : d'où vient que Ciceron appelloit ces remedes : *Leges temporis, non hominis.*

Ie ne parle point icy des autres droits qui appartiennent au Roy, comme Duc ou Comte de quelque Prouince particuliere reünie à sa Couronne, comme de la tutelle & garde-noble des mineurs, qui luy appartient en Normandie, à cause de la

318 DE LA SOUVERAINETE' DV ROY,
qualité de Duc, & qui luy donne le pou-
voir de faire les fruiets siens de tous les
heritages des mineurs : car il a de coustu-
me de disposer de ce droit, & de le don-
ner par ses Lettres Patentes, à qui bon
luy semble. Cela mesme s'observe en An-
gleterre, mais le Roy en iouyt, *jure Regio*,
comme le remarque Polydore : Ce qui
peut auoir esté introduit, sur ce que l'Em-
pereur Auguste, *Solitus erat rectorem apponere*
etate paruis, aut mente captis, donec adolefcerent,
aut resipiscerent, dit Suetone en la vie de ce
Prince. Aristote en ses OEconomiques,
nous rapporte vne semblable Constitu-
tion que firent deux Roys de ce siecle;
par laquelle ils declarerent que les tutel-
les des mineurs appartenoiẽt aux Roys:
ὅως ἕκαστος εἰς ἡλικίαν ἔλθοι. Et en fin l'on doit
remarquer, que par les maximes que l'on a
tenus de tout temps en France, le Roy a ce
droit, & ce priuilege; de ne pouuoir-estre
excommunié, ny mesmes ses Officiers, &
les Prelats de son Royaume : Et de pou-
voir defendre qu'aucune Monition, Sus-
pension, ou Interdiction, soit publiée pour
ce sujet, ny executée: comme il est am-
plement déduit par les Arrests qui se li-
sent dans les Registres de la Cour, de l'an
1388. 1399. & 1509. ce qui fut proposé

dans vne Assemblée celebre du Conseil, que l'on tint à sainct Germain, en la presence du Roy, en l'année 1583. apres qu'on eut veu & examiné les priuileges que les saincts Peres ont oëtroiyé à nos Roys; en consideration de ce qu'ils sont les Fils aînez de l'Eglise, & qu'ils leur ont rendu toutes sortes de bons offices, dans la necessité de leurs affaires, ou qu'ils ont esté mal traictez par leurs ennemis.



DE LA



DE LA
SOVVERAINETE'
D V R O Y.
LIVRE TROISIESME.

Du Domaine de la Couronne.

CHAPITRE PREMIER.

N T R E tous les biens & les reucus, dont le Roy iouÿt, à cause de sa Couronne, le plus ancien & le plus noble est celuy qu'il recueille de ses terres & seigneuries. Car comme, *Fundus sic dictus est, quòd rerum omnium sit fundamentum*, dit Varron: De mèsme l'on peut dire, qu'en-tre les sortes de richesses que possèdent les

sr

322 DE LA SOUVERAINETE' DV ROY,
Roys, les plus asseurées, & qui conuien-
nent mieux à leur grandeur, sont celles
qui viennent de leurs terres. Aussi voyons-
nous que Salomon ne se glorifie pas tant,
d'auoir amassé de grands tresors; que de
ce qu'il auoit fait planter plusieurs vigno-
bles, & des forests entieres d'arbres d'ex-
cellens fruiets, lors qu'il dit dans l'Eccle-
siaste 2. 5. *Plantaui mihi vineas, & syluas ligno-
rum germinantium, &c.* A quoy se rapporte
le dire de cét ancien Poëte:

*Vos sapere, & solos aio bene viuere, quorum
Conspicitur nitidis fundata pecunia villis.*

C'est pourquoy les terres & les seigneu-
ries de nos Roys ont merité sur tous les
autres biens, qu'ils possèdent, d'estre nom-
mées par excellence, Le Domaine de la
Couronne: Ce que l'on a fait, peut estre,
à l'imitation des Romains, qui appelloient
les terres du Prince, *Dominicas*, en la loy
premiere, *C. de locat. prædior. ciuil. vel fiscal.* &
en plusieurs autres endroits.

Ce furent nos premiers Roys, qui iet-
tans les fondemens de ceste Monarchie,
donnerent l'origine à ce Domaine: Car
apres auoir remporté des victoires signa-
lées sur leurs ennemis, dompté les Gaules,
& estably la Paix dans les Prouinces qu'ils
auoient conquises: afin de recognoistre les

merites & la vertu de ceux qui les auoient feruis en toutes leurs guerres; ils partagerent les terres du Royaume, & les donnerent à leurs principaux Capitaines, pour en iouïr par vsufruit durant leur vie: pource que leurs enfans ne leur succedoient point, si le tiltre de leur concession ne le portoit expressement, comme il se lit *in c. vnico, In quibus causis feudum amitt.* Ce que depuis ils permirent iusques au quatrième degré: & apres iusqu'au septième. Et en fin iusques à l'infiny; à la charge de les tenir du Roy, en foy & hommage, & de luy en payer les droits & les deuoirs qu'ils auoient prescrits par leurs inuestitures. Se reseruans par cemoien la seigneurie directe, sur toutes les possessions, qu'ils leur auoient données. Et de là est venu ce plus noble droit du Domaine, que toutes les Seigneuries du Royaume releuent du Roy: ce qui luy apporte non seulement vn tres-grand reuenue; mais encores qui luy donne des hommes, qui sont obligez de le seruir, en toutes ses entreprises.

Mais afin que ce droit fust mieux estably, ils retindrent en leur main toutes les principales terres de chaque contrée; & ordonnerent que toutes les autres Seigneuries dependroient d'elles, comme de leur

324 DE LA SOUVERAINETE' DV ROY,
chef, & y rendroient leur foy & homma-
ge. De ce reuenu nos Roys ont vescu du-
rant vn long-temps, & ont entretenu la
splendeur de leur Maison, sans rien prendre
sur leurs peuples: Ayans prudemment iugé,
que ioüyffans d'un grand Domaine, ils
auroient assez de Finances pour fournir à
leurs despenfes, sans estre contraincts d'af-
fliger leurs fubjects d'aucunes exactions.

C'est pourquoy l'on a tenu iufques à
prefent ce Domaine, fi fainct & fi facre, que
les Roys mefmes s'obligent par le ferment,
qu'ils font à leur facre, de le maintenir &
le conferuer de toute leur puiffance: & que
c'est vne maxime inuiolable, que l'on ne le
peut aucunement alier, fi ce n'eft en cer-
tains cas qui font fpecifiez par l'Ordonnan-
ce de l'an 1562. Le premier eft, quand il
fagit de fonder vne Eglife en l'honneur
de Dieu, pour le remercier d'une victoire
obtenüe fur les ennemis, ou pour auoir
receu quelque faueur fignalee de fa diuine
bonté: Car en cefte occafion ce n'eft pas
proprement l'aliener, mais pluftoft c'eft
le remettre entre les mains du Roy des
Roys; de qui dependent tous les Sceptres,
& toutes les Couronnes de la terre. Le
fecond eft, lors qu'il faut appanager les
Enfans de France: d'autant que c'eft chofe

iuste, que puis qu'ils sortent de la Maison Royale, qu'on leur donne du reuenu suffisant, pour paroistre dans le monde selon le rang qu'ils tiennent; & pour entretenir leurs Maisons avec splendeur.

Mais quand on leur donne ces appanages, c'est sans aucun droit de Souueraineté: car elle doit demeurer toute entiere en la Personne du Roy: Et à la charge encores de reuersion à la Couronne, les masles venans à faillir, & l'appanage estant finy.

Outre ces deux cas, l'usage a depuis donné la liberté de l'aliener en d'autres occasions: sçauoir est, quand il faut racheter le Roy, & payer sa rançon, lors qu'il est pris par ses ennemis; & pour secourir en temps de guerre & de nécessité l'Estat & le Royaume affligé: veu qu'en telles rencontres, rien ne nous doit estre plus cher, ny plus précieux, que le salut public, pour lequel on ne pardonne pas mesme aux choses les plus saintes. Et en fin, pour recompenser les seruices des Seigneurs estrangers, qui ont quitté leur pays, & abandonné leurs biens pour se donner entierement au seruice de nos Roys; qui est vn deuoir qu'on ne peut obmettre, sans reproche d'une extreme ingratitude: comme il fut dit autre-fois en plein Par-

326 DE LA SOUVERAINETÉ DV ROY,
lement, lors qu'on voulut retirer la terre
de Concreffault, qui auoit esté donnée au
Seigneur de Stuard, Escossois, pour re-
compense de ses seruices.

L'on a encore adjousté vn sixième cas:
pour recognoistre quelque seruice notable
& extraordinaire, que quelqu'un des sub-
jects du Roy a fait à la Couronne, comme
il fut arresté au mesme Parlement, lors
qu'en consequence de l'Edict du Roy
François I. de l'an 1589. on voulut re-
tirer les terres que Philippes le Bel auoit
données à ce courageux Nogaret, pour
auoir esté iusques à Rome faire reparer
les injures, que le Pape Boniface VIII.
auoit faictes à son Maistre, & à toute la
France: Toutesfois ie ne voudrois pas faire
force sur cét exemple, pour s'en seruir
comme d'une loy: car la consequence en
seroit trop dommageable, ioint que les
Roys ne manquent point d'autres moyens,
pour recognoistre la vertu & les seruices
des hommes illustres.

Mais en toutes ces occasions, l'on
ne peut proceder à l'alienation des terres
du Domaine, qu'en vertu de Lettres Pa-
tentes, bien & deuëment verifiées en la
Cour de Parlement, & en la Chambre des
Comptes, à qui les Roys ont principale-

ment commis la garde & la protection de leur Domaine. Que si c'est à cause de la necessité que l'on est contraint de faire ceste alienation, l'on ne peut la permettre qu'à la charge de rachapt perpetuel, comme n'estant pas vne pure alienation: mais plustost vne antichrese, ou engagement: Et en outre elle ne se doit faire qu'à deniers comptans, *Et non habita fide de precio*, suiuant la disposition de la loy, *si procurator. §. fin. ff. de iure fisci*, comme il s'observe en l'alienation des biens de l'Eglise, & des mineurs; & sans qu'on puisse faire entrer en payement aucunes debtes du Roy, suiuant les Reglemens, que l'on a faits au Conseil d'Estat sur ce sujet.

Et bien qu'anciennement le Domaine ne se peust aliener que sur le pied du dernier dix, afin de faciliter le moyen de le pouuoir retirer: Neantmoins cela ne se pratique plus, & l'on le vend au plus offrant; pource que l'on en a tant aliéné, qu'il est maintenant comme impossible de le pouuoir retirer, si ce n'est celuy qui a esté vendu à meilleur marché que du dernier dix, dont le Roy pourroit tirer vn notable secours; s'il y estoit bien seruy.

Quant aux moyens que l'on a pratiquez pour l'accroistre, nos predecesseurs n'ont

328 DE LA SOUVERAINETE' DV ROY,
pas esté moins industrieux à faire ce ménage, qu'ils ont esté diligens à le conseruer: Car en premier lieu, ils ont estably ceste regle, que tout ce que le Roy possède de son propre, ou d'acquest, lors qu'il vient à la Couronne: tout ce qu'il acquiert depuis, & ce qui luy échet par don, par succession, ou autrement, est réputé acquis & vny à la masse du Domaine: De sorte qu'il ne faut point perdre le temps à distinguer ce qui estoit du Domaine de l'Empereur, & du Domaine de l'Empire, comme ont fait quelques-vns: parce qu'en France le bien du Roy, & celuy de la Couronne, ne font plus qu'un seul corps, & vne seule masse, nonobstant ce que fit le Roy Louys XII. lors qu'il establit la Chambre des Comptes de Blois, pour son Domaine particulier, pource que pas vn de ses successeurs n'a suiuy son exemple. Huë Capet a esté l'auteur de ceste maxime, ses successeurs l'ont suiue, & le defunct Roy, de tres-loüable memoire, l'a confirmée, lors qu'il reünit solennellement à la Couronne, toutes les terres & Seigneuries qu'il possedoit à son aduenement, comme ie l'ay deduit plus amplement en mes Decisions.

Et bien que les Gens du Roy du Parlement

ment tiennent que ceste vnion se face *ipso iure*, si tost que la Couronne est escheue au Roy, comme ie l'ay estimé avec eux pour le regard de ce qu'il possedoit lors de son aduenement à la Couronne. Toutesfois pour ce qu'il acquiert, & ce qui luy est escheu depuis, il semble qu'on en vse autrement: car l'on tient que l'vnion de ces biens là se doit faire, ou en vertu de Lettres patentes, ou par vne iouïssance de dix ans, par les mains des Receueurs ordinaires du Domaine, suiuant l'Ordonnance de l'an 1566. que l'on a publiée sur l'exemple de ce que l'on obseruoit parmy les Romains, lors qu'on vouloit incorporer au Domaine public les biens qui estoient nouuellement écheus à l'Empereur: Car ceux qu'ils appelloient *Catholicos & Comites rer. priu.* qui gardoient l'estat de tous les biens de l'Empire, en faisoient vn enregistrement solemnel, & y apposoient les armes du Prince, comme il se void en la loy 2. C. de *bo. vaca. & incorporatione*, en la loy 2. C. de *aqueduct.* & en la loy fin. *ff. de requir. reis*: & en beaucoup d'autres lieux: Et ils tenoient, comme nous, que iusques à ce que l'on eust fait ceste incorporation publique, le Prince en pouuoit librement disposer: Ce qu'ils obseruoient de la sorte,

330 DE LA SOUVERAINETE' DV ROY,
afin de luy donner moyen d'exercer fa liberalité, qui est la plus noble vertu des Princes.

Mais on a depuis inuenté vn autre expedient tres-propre pour augmenter le Domaine, c'est que les proprietaires des terres, qui ont esté erigées en titre de Duché, de Marquisat & de Comté, depuis l'Ordonnance de l'an 1566, & celle des Estats de Blois, de l'an 1579. qui la confirme, venans à deceder sans hoirs masles procréés de leurs corps en legitime mariage, sont vnies au Domaine de la Couronne, sans en pouuoir puis apres estre separées, ny par des Lettres contraires, ny par d'autres dispositions des Roys. Et bien que cela ayt esté cy-deuant negligé: toutesfois Monsieur le Garde des Seaux fit obseruer ce Reglement, quand il fut question d'eriger en Duché le Marquisat de Villars, dont il ne voulut sceller les Lettres, que ceste condition n'y fust inferée.

Ce qui ne peut estre que tres-vtile à l'Estat, soit que l'on considere l'euement de ceste condition, soit que l'on regarde son effect, qui par l'apprehension de perdre leurs terres peut destourner les plus ambitieux de rechercher tel-

nouvelles creations de Duchez , qui ne seruent qu'à releuer l'audace de plusieurs Seigneurs , qui ne sont desormais que trop insupportables : Aussi qu'on peut nommer ces qualitez avec Tacite, 2. *Annal. inania fama.* Et ailleurs : *honoris vmbras & simulachra.* Dont neantmoins le public reçoit vn notable dommage , & d'autant plus important , que ceux qui portent ces tiltres illustres , dédaignent d'aller à la guerre , ne voulant pas se soumettre à des Generaux d'armées , qui n'ont point ceste qualité : & par ce moyen , en faisant des Ducs , l'on perd des Capitaines.

Mais l'erection de tant de nouuelles Pairies , qui estoient autre-fois appellées , *Amplissima Regum beneficia* , est encore beaucoup plus preiudiciable à l'Estat : car outre qu'elle cause les mesmes inconueniens que nous auons touchez cy-dessus , elle diminue tellement l'autorité du Roy dans les Prouinces , que son nom est presque incogneu dans la Iustice. C'est pourquoy le Parlement , pour arrester le cours de ce grand desordre , quand elle verifie les Lettres de telles erections : ordonne que ce sera à la charge , de ne rien innouer pour le ressort , & que les terres erigées en Pairies demeureront pour ce regard au mesme

332 DE LA SOUVERAINETE' DV ROY,
estat, qu'elles estoient auparauant. Ceste
celebre compagnie n'ayant pas mesme
espargné feu Monsieur de Montpensier,
lors qu'il fit eriger en Duché & Pairie
sainct Fargeul, situé dans le ressort de
Montargis; ny Monsieur le Prince de
Condé, quand il fit eriger Chasteau-roux
en Duché & Pairie.

Or il faut obseruër, que comme l'ac-
quereur des terres du Domaine, quand
elles sont alienées pour de l'argent, &
en cas de necessité, ne iouyt pas de la
Seigneurie directe: mais seulement de l'v-
tile: Et qu'il ne les possède point *pro suo*,
sed pro pignore; ou comme parloient nos
anciens Iuriconsultes, *non mancipio, sed usu*
tantum: aussi ce n'est point à luy, que la
foy & l'hommage des terres & Seigneu-
ries qui en releuent, se doit faire, mais au
Roy seulement.

Comme aussi les honneurs, les prero-
gatiues, & les préeminences de Seigneur,
ne luy appartiennent point: iusques là que
pluseurs ont tenu, qu'il ne pouuoit re-
tirer par puissance de fief, les terres mou-
uantes de ce qu'il a acquis, en cas de mu-
tation: pource que ce droit n'ayant point
d'autre but, que la reünion du fief ser-
uant, au fief dominant: cela ne se peut

faire que par celuy, à qui appartient la Seigneurie directe: si ce n'est que par le contract d'engagement, le Roy luy en eust fait cession expresse; Estant veritable que bien que ce droit *Non transeat cum vniuersitate*; neantmoins le Roy le peut expressement ceder à vn autre: comme il se pratique aujourd'huy, nonobstant ce que dit Guido Pape en sa Decision 411. & Boërius sur la Coustume de Bourges, tiltre de la retenue des choses vendues en fief: & Chassanée sur la Coustume de Bourgogne, *in tit. des Censcs, §. 1. in verbo, Retenues.*

Et par ceste mesme raison l'on obserue que les acquereurs des terres du Domaine ne peuuent faire exercer la Iustice en leurs noms, ny pretendre aucun droit de pouruoir aux Offices, ny mesmes aux Benefices qui sont sujets au droit de patronage, comme le contient l'article 333. de l'Edict de Blois: Et par vn article precedent, qui est le 331. il est nommément dit, qu'ils ne iouïront des Offices extraordinaires de ces terres, ny pareillement des autres droits Royaux, qui dependent de la Couronne, encores que les Lettres d'acquisition & d'engagement, ou autre tiltre, le portast expressement, avec defences,

334 DE LA SOUVERAINETE' DV ROY,
tant au Parlement, qu'à la Chambre des
Comptes, d'y auoir aucun égard : Et cela
est notable, que le Parlement de Rouën,
procedant à la verifcation de cét Edict,
declara qu'entre les droicts incesfibles, l'on
comprendroit les droits de garde-noble,
& de patronage, appartenans au Roy, à
caufe de fa Souueraineté en la Prouince de
Normandie.

Il fera auffi remarqué, que ceux-là se
font trompez, qui ont compris dans le
Domaine & en fa reuente, les communes
& les pastis; dont de tout temps les ha-
bitans des villes, bourgs & villages, appar-
tenans au Roy, ont iouy: à la charge d'en
payer par chacun an, quelques redeuan-
ces à la recepte de son Domaine. Car les
Rois ont laiffé toutes ces terres au com-
mun peuple, pour la nourriture de leurs
bestiaux: fans quoy, il leur seroit impossi-
ble, ny de viure, ny de faire valoir leur
labourage: De sorte qu'il n'y a propre-
ment que la redeuance, qui est du Domai-
ne, & non le fond, quoy que le Roy en
retienne tousiours la directe.

Ce qui estoit ainsi pratiqué par les Ro-
mains, comme nous le tesmoigne Pline,
liure 18. chapitre 18. *In tabulis censoriis pascu-
scribuntur omnia, ex quibus Princeps reditus habet,*

quia diu hoc solum vectigal fuit. En quoy l'on peut les comparer, *agris illis vectigalibus*, dont les particuliers ne pouuoient estre deposez, tandis qu'ils payoient au fisque la redevance, comme le remarque Hyginus Urbicus, *lib. de limit. agror.* & le Jurisconsulte, *in l. 2. §. 1. ff. de public. & in l. 71. §. fin. ff. de legat. 1.* Aussi l'on a depuis apporté quelque temperament sur ces reuentes, par la distinction qu'on a faicte des communes, qui dès le commencement ont esté données à simple censiue, d'auec celles où il se trouue par les titres de bail, que les preneurs ont donné des deniers d'entrée; Pour celle-là, l'on a maintenu les propriétaires dans leur ioüissance comme auparauant; Mais pour celles-cy, l'on a presumé qu'elles auoient esté alienées en Domaine: Et pour ceste raison on a fait payer de nouvelles finances aux acquireurs, bien'que leur censiue, fust aussi forte, que celle des autres: Ainsi se font paroistre les bons esprits de ce temps, pour tirer de l'argent de toutes choses.

Mais outre ce Domaine solide des terres & des Seigneuries, on en a depuis quelque temps inuenté vne autre sorte, sur les Offices de Greffiers, & des autres qu'on appelle aujourd'huy Domaniaux: car au

336 DE LA SOUVERAINETE' DV ROY,
lieu qu'anciennement ils n'estoient que de
simples Offices, dont ceux qui en estoient
pourueus, ne pouuoient estre depossédez
que par mort ou forfaiture, & qu'il n'y
auoit que le droit d'y pouruoir qui fust
domanial: Neantmoins on les a faits main-
tenant sujets aux ventes & reuentes,
comme toutes les sortes de Domaine,
dequoy l'on a tiré vne somme incroyable
de deniers. L'on auoit autre-fois tousiours
excepté les Greffiers des Cours souuerai-
nes: mais depuis on les a compris avec
tous les autres, tant ont de puissance en
ce siecle les Partisans: Et en fin l'on re-
marquera, que tous les acquereurs du Do-
maine, ne peuuent par les regles du Con-
seil, estre depossédez de leurs acquisitions,
qu'en deux cas: sçauoir est par Edict ge-
neral, ou par Tiercemens, qui se peuuent
faire sur le prix de leurs acquisitions. De-
quoy l'on excepte les grandes terres, que
le Roy peut retirer des acquereurs, quand
bon luy semble, en les remboursant.

Que

*Que le Domaine du Roy n'est point
sujet à prescription.*

CHAPITRE II.

B IEN que les raisons que j'ay rapportées au precedent Chapitre, pour prouver que le Domaine du Roy est inalienable, semblent estre assez suffisantes, pour monstrier qu'il ne se peut aussi prescrire, suivant la regle commune, qui veut, que les choses qui ne tombent point dans le commerce, ne soient point sujettes à la prescription. Toutesfois ceste matiere est si importante, que j'ay creu ne pouvoir estre trop long, pour expliquer amplement toutes les difficultez qui s'y rencontrent.

Je dis donc que le Domaine, a le mesme privilege, que les choses saintes & sacrées. Et que comme elles ne se peuvent prescrire; d'autant qu'il n'y a que Dieu; qui s'en puisse dire le seigneur, Et que ce seroit vne chose absurde, de penser que la prescription peust courir contre luy: De mesme le Domaine, qui apres les choses diuines

V u

338 DE LA SOUVERAINETE' DV ROY,
nous doit estre en plus grande recom-
mandation , que toutes les autres sortes de
biens du Royaume , n'est point sujet à la
prescription. Pource qu'il n'y a personne
qui s'en puisse dire le maistre , & le pro-
prietaire, que la Couronne, à qui il appar-
tient. Car le Roy mesme n'en ioiïyt que
par forme d'vsufruiet : Et bien qu'il l'ait
possédé par quelque temps que ce soit;
Neantmoins il n'en peut iamais acquerir
la propriété.

Ce qu'à plus forte raison l'on doit dire
de ceux, qui le possèdent en tiltre d'appa-
nage, d'vsufruiet & d'engagement , & de
tous les autres, *Qui eo viuunt, vt alieno; Qui*
est vn obstacle legitime contre toute sorte
de prescription: d'autant que, comme dit
Joannes Faber, ad leg. cum notissimi. C. de pra-
script. 30. vel 40. annor. leur tiltre contient
en soy, perpetuam & indefinitem interruptionem,
adeò vt nullis sæculis possit præscribere, qui alieno
nomine possidet. L'on a introduit ce droit
particulier en faueur de la Couronne , qui
sera tousiours d'autant plus puissante &
redoutable, qu'elle sera riche & opulente
en reuenus. Car l'on craint tousiours de
s'attaquer à ceux, qui ont leurs Finances
bien fournies. D'où vient que l'Escripture
saincte voulant descrire la puissance de

Iosaphat, disoit : *Data sunt ei diuitiæ multa, itaque factus est pauor Domini, super omnia regna terrarum, nec audebant bellare contra eum.*

Les Romains, de qui nous empruntons à tous momens de serieux exemples, gardoient ceste mesme maxime, pour le Domaine de l'Empire, comme nous l'apprenons du tiltre; *Ne rei Dominica, vel templorum, vindicatio, temporis præscriptione summoueat*, au Code de Iustinian, dont la loy premiere veut nommément, que le Prince puisse rentrer dans son bien, *Omni temporis definitione submota* ce qui est encore repeté en la loy 2. du mesme tiltre, disant: *Si quæ vnquam loca ad sacrum dominium pertinentia, cuiuslibet temeritas occupauerit: in sua iura retrahantur, nullà longi temporis præscriptione obstante.* Ce qui est confirmé par la loy derniere, *C. de fund. & saltib. dominic.*

Mais ie ne sçay de quel mouuement ils furent portez depuis à changer ces Ordonnances si vtilles à leur estat: & qu'ils receurent contre ceste premiere police, la prescription de quarante ans. I'estime que l'Empereur Anastase, qui fut celuy qui institua ceste sorte de prescription, en deuint si ialoux, que mesme il voulut y comprendre les choses publiques, lors qu'il dit: *Nullum ius priuatum vel publicum, in quacunque causa, vel in quacunque persona, quod præ-*

340 DE LA SOUVERAINETE' DV ROY,
*dictorum annorum curriculo extinctum est, iugi
silentio moueatur, in l. omnes. C. de prescript. 30.
vel 40. annor. & dont il n'excepta que les
redevances ordinaires & extraordinaires,
qu'il appella *Functiones, seu ciuilem canonem, vel
aliam quampiam publicam collationem*, à cause que
ces droits estoient deubs, pour marque de
subjection, & pour recognoistre la souue-
raineté du Prince, comme il est dit *in l.
comperit, eod. tit.**

Mais comme cét Empereur fit ce chan-
gement sans raison; aussi nous ne voyons
point maintenant d'Estats ny de Republi-
ques, qui ayent donné force à ceste pre-
scription de quarante ans; pour ce qui est
du Domaine de leurs Couronnes. Ils ne re-
çoient seulement que celle de cent ans;
& se fondent sur ce que l'Empereur Justi-
nian, n'ayant compris que les Eglises, dans
la reuocation qu'il a faicte par les No-
uelles 111. *cap. 1.* & 131. *cap. 6.* de la pre-
scription de cent ans, & non pas les gran-
des Citez, *que iura fisci habebant*. à qui il l'a-
uoit accordé auparauant, aussi bien qu'aux
Eglises, par la loy fin. *C. de sacros. Eccles.* Il
a voulu faire entendre, que son intention
estoit qu'elle demeurast en son entier,
pour leur regard. Dont ils inferent que
l'on doit donner vn mesme iugement des

biens & du patrimoine des Couronnes, Et qu'ils ne se peuvent acquerir que par la prescription de cent ans. C'est l'opinion de la Glose, sur l'auth. *De non alien. & permut. §. ut autem lex*: De Balde & d'Angelus, in l. 3. C. *communis de usucap.* d'Alexandre en son Conf. 14. lib. 5. & de la plupart des autres, sur l'auth. *Quas actiones. de sacros. Eccles.* Ce qui a tousiours esté tenu pour constant dans le Palais, en suite de ceste maxime que l'on y a establie de toute antiquité: Que toutes les loix qui defendent l'alienation du Domaine de la Couronne, ou de l'Eglise, n'ont point rejezté la prescription de cent ans. Iusques là que l'un des plus sçauans Praticiens de ce temps, parlant de l'Ordonnance du Roy François premier, de l'an 1539. qui exclud nommément la prescription de cent ans, en matiere de Domaine, dit n'auoir iamais esté obseruée, *nec in consulendo, nec in iudicando.*

J'ay veu toutesfois iuger au contraire dans le Conseil du Roy, suiuant ceste Ordonnance: qui bien qu'elle semble en apparence estre trop rude, voire inhumaine; puis que comme ce long temps termine la plus longue vie des hommes: *Vnde seculum sic dictum, quod sit tempus longissimum senescendorum hominum*, dit Varon. Il est aussi

342 DE LA SOUVERAINETE' DV ROY,
raisonnable qu'il puisse mettre fin à leurs
peinës & à leurs inquietudes: specialement
apres auoir continué leur possession, au
veu & sceu du Roy, & sans aucune in-
terruption: Neantmoins puis que la loy
est escrite, & que sa rigueur se recompense
par l'vtilité que le public en reçoit, il sem-
ble que nous sommes tenus de l'obser-
uer.

Et ie feray tousiours de cét aduis, pour
le regard des terres & des seigneuries de
la Couronne, qui ont esté vsurpées par
force ou par surprise sur la France: Car il
est certain, qu'attendu le vice de ceste
possession, l'vsurpateur ne peut acquerir
aucune prescription pour les retenir: prin-
cipalement, quand le debat est entre deux
Princes souuerains, qui ne releuent point
d'autre que de Dieu & de l'espée: pource
que ceste violente possession ne peut estre
naturellement interrompuë, que par vne
plus grande force: & moins encore ciui-
lement, d'autant que si l'vsurpateur est
resolu de retenir ce qu'il a occupé, il se
mocquera de toutes les sommations, les
protestations, & les procedures que l'on
fera contre luy.

Et cependant seroit-il raisonnable que
ceste prescription peust nuire à celuy, qui

pressé par d'autres occasions plus vrgentes, auroit esté contraint d'abandonner la possession de son bien. Aussi voyons-nous que l'Empereur Honorius declara par vne constitution expresse, qu'il n'entendoit point que le temps, durant lequel les Vandales auoient occupé les Espagnes, peust nuire aux Espagnols, comme il est dit en la Nouvelle *de præscript. 30. annor.* Valentinian III. son successeur fit la mesme Ordonnance contre les mesmes Barbares, en faueur des anciens Seigneurs, & des habitans du pays: Et quelque temps apres l'Empereur Iustinian fit vne semblable Declaration, pour la famille de Titions, dont plusieurs auoient esté contraints de se retirer en Allemagne, & passer les Alpes, pour la crainte des armées des Ostrogots, que Bellissime défit en Italie: la constitution de cét Empereur nous a esté restituée par le Docteur Cujas, *lib. 10. obseruat. cap. 21.*

Ce fut aussi sur ces considerations, que les Loix Romaines donnerent à leurs subjects l'autorité perpetuelle, de recouurer ce qu'on leur auoit osté de mauuaise foy, dit le §. *furtiua. instit. de vsucap.* & la loy *virtia. ff. de acquir. possess.* & qu'ils inuenterent *ius illud postliminii*, pour recouurer non seu-

344 DE LA SOUVERAINETÉ DV ROY,
lement la liberté : mais encores les biens
que les ennemis auoient pris par force sur
eux, comme il est dit *in l. captiuus, & in l.
postliminium. ff. de capt. & postlim. reuers.* Et sui-
uant la disposition de la loy *Attilianus. ff.
de seruit. pradiorum rusticorum.* Aussi Solon,
s'appuyant sur ces mesmes raisons, iugea
que la ville d'Athenes deuoit reprendre
son ancienne liberté, apres l'expulsion de
Pisistrat : bien que Diocles & Hippias,
ses enfans, en eussent ioüy durant vn fort
long-temps. Le semblable fut pratiqué
par les Siciliens, apres qu'ils eurent chassé
de Syracuse Hieron & Thrasibule, qui
auoient vsuré le commandement durant
vne longue suite d'années, contre le con-
sentement du peuple.

Le me suis autre-fois seruy de ces raisons,
pour iustifier les droits que le Roy a sur les
villes de Mets, Toul & Verdun, qui sont
de l'ancien Domaine de la Couronne, apres
auoir esté reconquises sur ceux qui les
auoient vsurpées sur la France. Ce que l'on
peut aussi dire de toutes les pretentions
que nos Roys ont sur les Royaumes de
Nauarre, de Naples, de Portugal, sur la
Flandre, sur le Milanois, & sur vne partie
de la Sauoye & du Piedmont, qui ayans
autre-fois esté acquis à la Couronne de
France,

France, n'ont peu estre alienez, ny prescits, par aucun temps: Et nous deuons esperer, que Dieu, quelque iour, ouurira le moyen à nostre genereux Prince, de recouurer sur ses ennemis, toutes les terres, qu'ils ont vsurpées avec tant d'injustice: Ce qu'il fera avec d'autant plus de courage, que *semper generoso Imperatori decorum studium Imperij pristini recuperandi*, disoit l'Ambassadeur de Iustinian à Theodat, dans Procope au liure premier de la guerre Gothique.

Mais l'on doit obseruer, que ceste maxime est receüe non seulement pour les terres & les seigneuries du Domaine; mais encore pour tous les droits, qui appartiennent au Prince, à cause de sa Souueraineté, comme de donner Graces, d'auoir vn dernier ressort, de naturaliser des estrangers, de legitimer des Bastards, de leuer des deniers sur le peuple, de battre Monnoye, le droit de patronage, & tels autres semblables; qui, comme ils sont des plus precieux fleuons de la Couronne, ils ne peuuent aussi se prescrire, par qui que ce soit, ny par aucune possession.

De ceste regle l'on a excepté premiere-ment les biens, qui en consequence des confiscations, ou des autres droits, que nous auons cy-deuant deduits, *Fisco quidem*

346 DE LA SOUVERAINETÉ DV ROY,
delata sunt, sed nondum agnita: car l'on tient
communément, que, comme ils se peu-
uent aliener, ils sont aussi sujets aux pre-
scriptions ordinaires, & qui sont receuës en-
tre les particuliers, excepté la prescription
de quatre ans, qui n'a iamais eu de force
en France, comme Faber l'a écrit, *ad l. 2.*
C. comm. de vsucap. I'estimerois neantmoins
qu'en toutes ces rencontres, & les autres,
qui concernent le fisque, il faudroit vne
prescription de quarante ans, suiuant ceste
loy, *omnes. C. de præscript. 30. vel 40. annor.* &
la loy derniere, *C. de fund. patrimonial. lib. xj.*
C. C'est l'aduis de quelques Docteurs,
in §. res fisci. inst. de vsucap. qui d'auantage
soustiennent, que depuis que ses biens sont
incorporez à la masse du Domaine, selon
les formes prescrites par le droit Romain,
ou par les Ordoñances, il deuiant aussitost
de mesme nature & condition que
le Domaine ancien: c'est à dire, exempt
de toutes sortes de prescriptions.

Secondement, l'on excepte de ceste
regle les actions que le Roy peut auoir,
pour raison de choses mobilières, comme
de rachapts, de lots & ventes: & spéciale-
ment celles dont il se peut seruir contre
les Officiers comptables, leurs vesues &
leurs heritiers, pour des choses qui de-

pendent de leurs comptes : car comme elles ne concernent point le Domaine, & qu'elles sont seulement mobilières, & pour de l'argent ; Aussi par la disposition de droit, elles se peuvent prescrire par vingt ans, *Si suis temporibus propositæ non fuerint, viginti annorum spatium excludi*, dit le texte, *in l. in omnibus. ff. de perpet. & tempo. prescript. in l. quemcumque. ff. de requir. reis, & in l. iustas. C. de iure fisci* : qui veut mesme, *etiam iustas fisci actiones concremari* : si elles n'ont esté intentées dans les vingt ans ; & dont nous auons vne preuve authentique dans Plin le Jeune, où l'Empereur Trajan luy mande, d'arrester le cours de telles actions apres vingt ans, pource qu'en faisant autrement, dit-il, *futurum esset, ut multorum securitates conuellerentur*. En quoy l'on peut voir de combien nous sommes plus rigoureux, que ces anciens ; qui allons rechercher les veufues, & les enfans, apres quarante, cinquante, & soixante ans, pour de legeres souffrances qui auront esté trouuées dans les comptes de leurs maris ou de leurs peres.

*Des Forests, & des Bois de haute fustaye : Et
des droits que le Roy a sur eux, à cause
de sa Souueraineté.*

CHAPITRE III.



N TRE les ornemens, dont
la nature a embelly cét vni-
uers, & les choses qui com-
posent le Domaine du Roy,
il y en a peu qui soient
plus plaisantes, plus vtils,
& plus nécessaires aux hommes que les
Bois. & les Forests. C'est pourquoy les
Anciens les auoient en vn tel respect,
qu'ils croyoient mesmes, que quand les
Dieux descendoient du Ciel, pour con-
uerfer parmy les hommes, ils se retiroient
toufiours dans les plus ombrageuses Fo-
rests, comme estans les lieux les plus agrea-
bles, & les plus delicieux de la terre. Ce
que nous reimoigne Ciceron, lors qu'en
ses Oraisons, qu'il a faiètes contre Verres,
il adresse sa parole aux diuinitez de la
Sicile : *Vos denique etiam atque etiam imploro,
atque appello, sanctissima Dea, qua illos Ænenses
lucos incolitis.* De là vient aussi qu'ils auoient

aëcoustumé de bastir les Temples de leurs Dieux, dans les plus espés bocages de leur pays: comme nous l'enseigne le Poëte des Latins en la description de ce superbe Temple, que Didon auoit fait construire en l'honneur de Iunon dans sa nouuelle ville de Carthage:

*Lucus in vrbe fuit, mediâ letissimus umbrâ:
Hic Templum Junoni ingens Sidonia Dido
Condebat. ----*

Ayans ceste opinion que la hauteur des arbres, leur ombrage, & le profond silence des Bois, auoient vne certaine vertu de faire r'entrer les hommes dans eux-mesmes, & de leur donner des sentimens extraordinaires de deuotion. C'est ce que nous exprime elegamment Seneque en son Epist. 41. quand il dit: *Si tibi occurrit vetustis arboribus, & solitam altitudinem egressis frequens lucus, & conspectum cæli densitate ramorum, aliorum alios protegentium submouens: illa proceritas sylua, & secretum loci, & admiratio umbræ in aperto tam densa atque continua, fidem tibi numinis faciet.* Ce que, peut-estre, ils auoient appris des Liures sacrez des Hebreux: D'autant que nous lisons, que ce peuple se remettant en la pensée, que Dieu auoit créé le premier homme dans le sacré bocage du Paradis terrestre, il auoit les

350 DE LA SOUVERAINETE' DV ROY,
Bois & les Forests en vne telle estime &
veneration, qu'il choissoit le plus sou-
uent ces lieux solitaires, pour y dresser
ses Autels, & y faire ses Sacrifices à la Ma-
iesté diuine. Aussi l'Escripture remarque
particulièrement qu'Abraham planta vn
Bois en Bersabée, *In quo inuocaret nomen
Dei aterni*: Que Iacob consacra à Dieu
vn chesne: Que Gedeon sacrifia sous vn
chesne, *Tulit omnia sub quercu, & obtulit ei*:
Que l'on erigeoit les sepulchres des grands
Princes dans les Forests, comme il est dit
au liure premier des Roys: *Habitatores Ia-
bes Galaad sepelierunt ossa Saül & filiorum eius
in nemore Jabes*. Et en fin que c'estoit au-
pres des chesnes, qu'ils establissoient leurs
Roys, comme remarque la mesme Escri-
ture: *Constituerunt Regem Abimelech iuxta quer-
cum, que erat in Sichem*.

Les anciens Druïdes n'estoient pas moins
religieux enuers les Forests: car non seu-
lement ils demeuroient tousiours dans les
Bois, mais encore ils faisoient leurs sacri-
fices aux pieds des chesnes, & mesmes ils
les adoroient, & leur offroient des victi-
mes comme à leurs Dieux. D'où vient
que Gregoire de Tours, *lib. 2. cap. 10.* re-
prochoit aux anciens François, que *Perni-
mum numinis aliquando tribuerint arboribus &*

Syluis. Et nous lisons dans le tiltre du Code de *Cupressis ex luco Daphnensi, vel Perseis, per Ægyptum non excidendis vel vendendis*: qu'ils punissoient, comme sacrilèges ceux qui auoient esté si temeraires, que d'y abattre des arbres.

Toutes ces considerations iointes à la grande necessité qu'a le public des bois de haute fustaye, pour la construction des Temples, des Villes, des Palais, & des maisons des particuliers: & pour faire des Vaisseaux & des Nauires, sans quoy les Mers & les Fleuues feroient du tout inutiles aux hommes, ont porté les Roys à prendre vn soin particulier de la conseruation des Forests, & de les mettre sous leur protection. Aussi voyons-nous que dans les Estats bien policez, l'on a fait de toute antiquité plusieurs Loix & Reglemens, afin d'empescher les abus que l'on peut commettre à leur debit & à leur coupe. Et l'on a créé des Officiers expres, pour prendre garde, que l'on n'y fist point de degast. Mais principalement nos Roys ont esté curieux par-dessus tous les autres Princes de la terre, de faire obseruer exactement ceste police, comme ie monstrey dans la suite de ce Discours.

Mais afin de parler de ce sujet avec or-

352 DE LA SOUVERAINETE' DV ROY,
dire, l'on doit remarquer, qu'il y a de trois
sortes de Forests en ce Royaume. Les
vnes sont particulièrement du Domaine
du Roy: Les autres appartiennent aux
particuliers, & sur qui le Roy a droit de
Grurie, & de Graine: Et les dernières
sont celles qui ne laissent pas d'estre sub-
iectes aux Ordonnances, & aux Officiers
du Roy, en plusieurs choses: bien qu'elles
soient exemptes de la Grurie. Quant à
celles qui sont du Domaine, il y en a de
trois sortes: Les vnes sont voisines & de-
pendantes des Terres & des Maisons de
plaisir des Roys, & pource qu'elles leur ser-
uent d'embellissement elles sont tenuës si
sainctes & si sacrées, qu'on n'y peut rien
couper: comme il est dit aux articles 336.
& 337. de l'Ordonnance de Blois: La se-
conde espece est de celles qui sont plus
éloignées, & de qui le Roy peut dispo-
ser de la superficie, soit par don, pour-
ueu qu'il soit verifié au Parlement, & en
la Chambre des Comptes, & qu'il soit
effectué dans l'an: autrement il deuien-
droit nul, suivant l'Ordonnance du Roy
François I. de l'an 1515. art. 69. soit par
vente ordinaire ou extraordinaire, pour la
necessité de ses affaires. Ce qu'on ne peut
executer, que les commissions n'ayent au-
parauant

parauant esté verifiées en la Cour, suiuant l'Ordonnance de Henry III. du mois de May 1579. & l'Arrest de la verification d'icelle.

Et les dernieres sont celles, que les particuliers possèdent à tiltre d'vsufruiët, ou par engagement, où ils ne peuuent rien couper, ny rien prendre. Car en toutes les alienations du Domaine, l'on a de coustume d'excepter les bois de haute fustaye: pource que par les maximes communes de droit, elles ne sont point tenuës au nombre des fruiëts, mais de faire vne partie du fond, comme il est dit *in l. agri, & in l. arbores. ff. de vsufructu*. Et bien que ces Loix là, selon l'aduis du Iurisconsulte Labeo, en exceptent les bois chablis, & qui ont esté abattus par l'impetuosité des vents, & qu'en suite de ceste opinion plusieurs autres ayent soustenu, que les amendes & les restitutions appartiennent à l'vsufruiëtier, ainsi qu'il se pratiquoit autre-fois au Palais. Neantmoins l'Ordonnance du mois de Iuin 1611. a tranché tous ces doutes, & a voulu nommément, que les chablis, les amendes, les foisaictures, les confiscations de bois, & tous les autres émolumens & profits qui peuuent estre adjugez pour les delicts & les maluersations, qui sont com-

354 DE LA SOUVERAINETE' DV ROY,
mises dans les bois de haute fustaye, soient
censez & reputez domaniaux, & de la
mesme nature du fond; & sans qu'ils puis-
sent appartenir à d'autres, qu'au Roy, &
à ses successeurs Roys: & pour cét effect
elle les a reünis inseparablement au Do-
maine: bien que les contractz des vsu-
fructiers & engagistes portassent le con-
traire; & sans qu'à l'aduenir ils y puissent
rien pretendre: Et elle leur a laissé seule-
ment les paissions, les glandées, les amen-
des, les restitutions, & les confiscations,
qui viennent des maluersations que l'on a
commises dans les taillis.

Et l'on doit remarquer, que nonobstant
l'alienation des bois de haute fustaye, à
titre d'usufruit ou d'engagement, le Roy
ne laisse pas toutesfois de les pouoir ven-
dre, pour subuenir à ses vrgentes affaires:
Mais j'ay veu au Conseil du Roy, qu'on a
de coustume en ce cas, de desdommager
les usufruitiers, & les engagistes, pour la
perte qu'ils font de la glandée.

Quant à l'autre espece de Forests, sur
qui le Roy a droit de Grurie & de Grairie,
l'on doit remarquer, que par la Grurie, l'on
entend la Iurisdiction dont le fruit con-
siste aux amendes, aux confiscations, &
en la perception de la moitié, ou d'une

autre partie des fruiets, & du reuenu des Bois & des Forests des Seigneurs particuliers: Et la Grairie consiste en la propriété & au Domaine d'une partie des bois & des Forests. Plusieurs se sont trauaillez à trouuer l'origine d'une si pesante seruitude sur le bien d'autrui, & d'où vient encore ce nom de Grurie. Car les vns disent qu'il tire son etymologie du mot de Grue, qui est le symbole de la vigilance, & que le Roy prend cedroit, pource qu'il tient en sa protection les Forests, & qu'il veille sur leur conseruation: Et les autres soustiennent qu'il vient du mot de Druerie, en changeant le G en D: qui vient de ce mot Grec *δρυος*, qui signifie Bois: Mais laissons là toutes ces niaises subtilitez, pour parler de la chose. Quant à moy j'ay tousiours estimé, que ces droits auoient esté introduits, sur ce qu'anciennement il n'y auoit que les Roys, qui eussent le droit d'auoir des Bois de haute fustaye: & personne ne pouuoit en laisser croistre, sans leur permission, comme nous l'apprenons du liure quatriéme, *leg. Franc. cap. 19.* intitulé, *De Forestibus nouiter institutis*, qui est conçu en ces termes: *Vt quicumque illas habet, dimittat; nisi iudicio veraci ostendere possit, quod per iussionem sue permissionem Domini Caroli genitoris nostri eas*

356 DE LA SOUVERAINETE' DV ROY,
instituisset : ce qui est repeté au titre De Fo-
restibus Dominicis, du mēme liure, où il est
dit : De Forestibus nostris, ut ubicumque fuerint,
diligentissimè inquirant, quomodo salua sint, & de-
fensa, & ut Comitibus denuntient ne vllam Fo-
restam nouiter instituunt, & vbi nouiter institu-
tas, sine nostra iussione inuenerint, dimittere præci-
piant.

De sorte qu'il est à presumer, que quand
les Roys permettoient à quelques vns,
d'edifier des Bois de haute fustaye, & de
les retenir, qui estoit vn droit Royal; que
c'estoit à la charge qu'ils auroient la lu-
risdiction, les profits qui en viendroient,
& quelque part encore en la coupe d'i-
ceux, comme du tiers en quelques lieux,
& de plus, ou de moins en d'autres. La
Chartre de Louys Hutin, pour la Nor-
mandie, appelle ces droits, le Tiers, &
Danger: Tiers, pource que le Roy prend
le tiers du prix de la vente, comme de
trente liures, dix liures: & le Danger, qui
est la dixième partie du total.

Ce qui appuye ma conjecture, c'est
qu'on ne leue ces droits que sur les an-
ciennes Forests, dont l'origine est in-
cogneüe, & non pas sur celles qui ont esté
edifiées de nouveau: pource que nos Roys
ayans donné depuis vne permission gene-

rale à tous ses subjects d'auoir des Forests & des hauts bois: Ils se sont contentez de retenir ces droits de Grurie sur les anciennes Forests: Et ie puis dire, que puis qu'ils seruoient de marques de l'ancienne autorité de nos Roys, qu'on ne deuoit pas permettre si facilement leur alienation, comme l'on a fait depuis quelque temps.

D'auantage, l'on doit obseruer, que ceux qui detiennent les Bois qui sont sujets à ces droits de Gruerie, ne les peuvent couper ny vendre, sans le congé & la permission du Roy, pource qu'il en est le seigneur en partie, suiuant la disposition de la loy 2. *C. de comm. rerum alienat.* qui est conforme à l'Ordonnance de l'an 1515. Iusques là mesme, que bien que les Tre-fonciers puissent prendre du bois, pour bastir & se chauffer: *Et ad fundi necessitatem*: neantmoins il faut que cela se faile avec les Officiers du Roy, & par leur ordre, suiuant l'Edict de l'an 1376. art. 49.

Mais il est à remarquer, que ces droits, & les autres semblables, ne se prennent point sur le mort-bois: c'est à dire, sur les arbres, qui n'apportent aucun fruit, comme faulx, marfaulx, espine, puisne, seur, aulne, genest, genieure & ronces: & les autres de mesme espee, que Columelle

378 DE LA SOUVERAINETE' DV ROY,
& Offilius, lib 5. iuris partiti, appellent *Gremiales* aut *cremiales* : comme l'exprime clairement la Chartre de Louys Hutin : pource que les Bois de ceste qualité, estans de peu d'estime & de valeur : & d'ailleurs communément affectez aux pauvres vsagers, il eust esté rude, si ie ne dis injurieux, que le Roy eust pris des droits si grands & si notables.

Reste maintenant à parler de la dernière espèce de Bois de haute fustaye, qui sont exempts de la Grurie, & qui ont esté edifiez & possédez par des particuliers sans ceste charge. Il n'y a point de doute, que le Roy n'estende sa puissance sur telles Forests, pour empêcher qu'on n'en abuse : comme le porte l'Ordonnance du Roy Henry II. de l'an 1558. qui defend à tous Archeuesques, Euesques, Abbez, Prelats, & autres personnes Ecclesiastiques, de quelque qualité qu'ils soient, de vendre, faire vendre, couper, abatre, demolir, alierer & degrader aucun Bois, & arbres de haute fustaye, & à tous Marchands, de les acheter, vser, couper, & abatre, sans obtenir Lettres de permission du Roy, adressées au Parlement, & qu'elles n'y ayent esté verifiées, apres information, ou enqueste deuëment faicte, de son Ordonnance, sur

la necessité & cause vrgente: Ce qui a esté ordonné de la sorte non seulement, pour ce que le Bois de haute fustaye, est tenu pour immeuble, & que le Roy est protecteur du bien de l'Eglise: mais principalement pour l'interest qu'a le public, de conseruer des choses qui luy sont si vtils & si necessaires.

L'on confirme ce Reglement par vne autre Ordonnance de Charles IX. de l'an 1561. qui enjoint aux Ecclesiastiques, & mesmes aux Communautéz des villes, bourgs & villages, de delaisser à couper la tierce partie de leur Bois taillis, pour croistre & se conuertir en nature de Bois de haute fustaye, avec defences tres-expresses à tous Officiers: de permettre ne souffrir, qu'il soit fait plus grande coupe, qu'à raison des deux tierces parties, qui est vn grand tesmoignage de l'authorité, que les Roys se sont reseruez, sur les Bois de tous leurs subjects.

Ce qui n'a pas lieu seulement pour les Bois des Ecclesiastiques, & des Communautéz: mais aussi pour ceux que possèdent les particuliers: comme il se void par les Ordonnances de l'an 1576. art. 21. de l'an 1515. art. 37. & de l'an 1518. art. 3. par lesquelles il est ordonné, qu'aux Bois

360 DE LA SOUVERAINETE' DV ROY,
& Forests du Domaine, Et en ceux de
tous les autres subjects, il sera laissé, &
expressément retenu certain nombre de
bailliueaux, outre ceux qui auront esté
reseruez dans les ventes precedentes, &
sans qu'ils puissent estre coupez qu'ils
n'ayent atteint la croissence de quarante
ans, pour le moins; si ce n'estoit pour le
necessaire vsage du propriétaire, & sans
qu'il les puisse vendre, sous les peines y
contenuës, tant contre les Officiers, que
contre les Propriétaires. Ce qui se con-
firme encore par l'Ordonnance du Roy
François I. de l'an 1539. & les autres sui-
uantes, par lesquelles il est defendu à tous
les subjects du Roy, qui ont Bois de chesne,
de permettre, qu'il en soit fait échalas
de quartier: mais de les reseruer pour
bastir.

Que si quelqu'un met en auant, que
c'est entreprendre sur la liberté, que la
nature donne aux hommes, de disposer
de leurs biens comme bon leur semble,
Etiam abutendo, comme dit le Iuriconsulte,
*in l. sed & si lege §. consuluit. ff. de petit. hære-
dit. & in l. in re mandata. C. mandati.* Je di-
ray, que c'est en cela que consiste vn des
droits de la Souueraineté du Prince, de
pouuoir restreindre en telles choses, la
liberté

liberté de leurs subjects, pourveu que cela se face par vne loy generale, qui les comprenne tous, & non pas vn particulier seulement, suivant la loy 1. & 2. ff. de leg. & le C. *erit autem lex* 4. *distinēt.* spécialement pour le regard des Bois de haute fustaye, qui sont si necessaires à tous les hommes.

Finalement, l'on doit obseruer que l'exécution de ces Ordonnances, & de tous les autres Reglemens, que l'on fait pour le mesnage des Bois & des Forests, & la cognoissance de tous les differents, qui peuuent suruenir de leur contrauention, est attribuée aux Maistres particuliers, Gruyers & Verdiers, & par appel aux grands Maistres, Enquesteurs & Generaux Reformateurs, en leurs sieges des Tables de marbre: A qui l'on a aussi attribué la cognoissance des procez, qui concernent le fond & propriété des Bois, des Forests, & droits de Grurie & de Grairie, pour estre instruits, iugez & terminez en premiere instance, & par appel en la grand Chambre des Parlemens où il doit ressortir: mais depuis quelque temps la cognoissance du fond a esté reseruée à la Table de Marbre de Paris seulement, & non encore directement, mais incidemment.


Et quant aux autres differents qui regardent le Reglement des vsages, des delicts, & des mal-versations qui ont esté commises en la coupe des Bois & des Forests : Et les procez des Princes, des Prelats, des Gentils-hommes, & des autres sujets du Roy, qui sont intentez pour le fond & la propriété de leurs Bois & Forests, pour le Reglement des vsagers, les delicts & les mal-versations que l'on y a commises, ils peuuent estre instruits aussi par les grands Maistres en leurs Sieges, nonobstant oppositions ou appellations quelconques : pour puis apres estre iugez en dernier ressort, & sans appel, par l'un des Presidens de la grand' Chambre, appelez avec luy le nombre de dix Conseillers, tant de la Cour, que des Lieutenans & Conseillers des Sieges, comme il est plus amplement contenu en l'Edict du Roy Henry II. de l'an 1554. qu'il fit sur l'exemple de celuy qu'il auoit publié auparavant, pour l'establissement d'un grand Maistre au Duché de Bretagne. Tout ce que ie trouue à redire en ces Ordonnances : c'est que ces Officiers ne prennent point la cognoissance des Bois & des Forests des particuliers, s'ils n'en sont requis par eux, excepté pour les cas

que nous auons cy-deuant remarquez : Car il eust esté plus vtile pour la conseruation de l'autorité du Roy, & pour le bien public, que l'on eust generallyment estendu ceste Iurisdiction, tant sur les Bois des Communautéz des villes, des bourgs, & des villages, que sur les Forests de tous les autres subjects : Comme il se pratiquoit parmy les Romains, ainsi que nous apprend Suetone en la vie de Iules Cesar, où il dit, que toutes les Forests de l'Empire, estoient subjectes à la Iurisdiction des Consuls : d'où le Poëte prit occasion de dire,

Si canimus syluas, syluæ sunt Consule dignæ.

*De la Chasse, & que c'est au Roy
d'en ordonner.*

CHAPITRE IV.

 E Traicté vient fort à propos à la suite du precedent : car c'est principalement dans les Bois & les Forests, que l'on prend l'exercice de la Chasse, & où les bestes fauuges font ordinairement leur retraite :

Zz ij

364 DE LA SOUVERAINETE' DV ROY,
D'où vient qu'Aristophane appelle Diane,
la Deesse des Chasseurs, *τὴν ἀγροίαν*, Boca-
gere, ou Forestiere.

Or bien que la Chasse soit vne inuen-
tion diuine, *ἐφευρεται τῷ θεῷ*, dit Xenophon:
qu'Aristote, au premier de ses Politiques,
la mette *inter antiquissima vita genera*, & que
du commencement elle fust permise à
tout le monde, par le droit de la nature:
Estant le premier Art qu'elle a enseigné
aux hommes, pour se nourrir, & sustenter
leur vie, comme dit l'Empereur Iustinian,
in §. fere instit. de rer. diuis. & *in l. 1. ff. de*
acquir. rer. dom. qui pour ceste raison donne
les bestes sauuages, les oyseaux, les pois-
sons, & les autres semblables animaux,
qui ne sont à personne, à celuy qui les a
pris le premier: & que par consequent il
semble que le Prince ne puisse l'empescher
ny la defendre à ses subjects. Toutesfois
il n'y a point de doute que sa Souuerain-
té ne luy donne la puïssance d'en restrein-
dre la liberté, s'il void qu'elle soit preiu-
diciable au public, comme dit *Joannes Fa-*
ber, sur le §. *fluvius. de rerum diuis.* D'où
vient que nous lisons dans Diodore, que
Solon, l'un des Sages de la Grece, voyant
que tout le peuple d'Athenes s'adonnoit à
la Chasse, & que l'on negligeoit les Arts

mechaniques, dont le public receuoit vn extreme dommage, ne fit point de difficulté de la defendre. Et cet Autheur remarque, que ceste Ordonnance ayant depuis esté negligée : cela fut cause de la prise, & de la ruine d'Athenes. C'est sur ceste mesme raison que l'Empereur Frederic fonda sa Constitution, qui se lit au tiltre *de pace tenenda*, chap. 7. par laquelle il defend absolument la Chasse au commun peuple de l'Empire. Ce qu'il fit sur l'exemple des anciennes Ordonnances des Empereurs Honorius & Arcadius, qui sont dans les Codes de Iustin. & Theodose, tit. *de venat. ferar.* qui ne leur ayant permis la Chasse, que contre les Lyons, les Ours, & les Loups, leur ont tacitement defenduë, contre toutes les autres bestes.

Maintenant il n'y a point d'Estats qui n'ayent des Loix & des Ordonnances semblables, du moins à l'endroit de ceux qui ne sont pas nobles : car pour le regard des Gentils-hommes, elles leur permettent plus facilement, afin de les rendre plus robustes & plus adroits à la guerre : d'où vient qu'Aristote, au lieu que nous auons rapporté, dit qu'il y a de deux sortes de guerre, l'une contre les hommes, & l'autre contre les bestes farouches : & que

366 DE LA SOUVERAINETE' DV ROY,
comme elles ont vne fin semblable, de
remporter la victoire sur leurs ennemis,
& les reduire sous leur puissance; qu'elles
se seruent aussi de mesmes regles, & de
mesmes preceptes, pour la conduite de
leurs entreprises. C'est ce que Ciceron
veut dire au Liure 2. De la Nature des
Dieux: *Jam verò immanes & feras belluas nan-*
ciscimur venando, & vt vescamur ijs, & exer-
ceamur ad similitudinem bellicæ disciplinæ. Aussi
Cesar au Liure sixième de la guerre des
Gaules, dit que les ieunes gens, pour
apprendre le mestier de la guerre, s'exer-
çoient premierement à la Chasse de cer-
tains animaux, qu'il appelle *Vros*, les plus
vistes, & les plus rusez qui fussent en la
Forest Hercinie, & qu'ils se donnoient au-
tant de gloire d'en auoir pris quelqu'un,
que s'ils auoient tué en guerre vn de leurs
ennemis. C'est pourquoy les anciens Poë-
tes feignent que Chiron enseigna l'exer-
cice de la guerre à Achilles en l'exerçant
à la Chasse: Et quand ils descriuent la va-
leur de leurs Heros, ils les louent aussi
bien de leur adresse à dompter les bestes
farouches, que de leur courage & leur ge-
nerosité à vaincre les tyrans & les voleurs
des grands chemins.

Et nous voyons mesmes que les hommes

d'Estat & de Lettres, se sont seruis de cét exercice, pour se rendre l'esprit plus propre à l'estude, & plus vif pour l'expedition des affaires, tesmoin ce que dit Pline le Jeune en l'une de ses Epistres: *Mirum est ut animus ab agitatione motusque corporis excitetur, iam vndique sylva & solitudo, ipsūque illud silentium, quod venationi datur, magna cogitationis incitamenta sunt: proinde, cum venabere, experieris Dianam non mentibus magis; quam Minervam, inhabitare, & inerrare.*

Mais c'est principalement aux Roys & aux Princes, que l'exercice de la Chasse est plus conuenable, tant pour les empêcher de tomber dans l'oyuicté, qui les plonge dans toutes sortes de vices & de débauches; que pour leur seruir d'un honneste diuertissement parmy les peines & les traiaux qu'ils endurent en l'administration de leur Royaume: Et principalement pour les rendre plus robustes & plus courageux en la conduite des guerres, qu'ils entreprennent pour la défense de leurs Estats. D'où vient mesmes que quelques Roys ont mis entre leurs plus hauts tiltres, celui de grand Chasseur: Ce que nous confirme cét Epitaphe que Darius fit mettre sur son Sepulchre: *Amicus amicis fui: Eques & agitator optimus, Venatores omnes su-*

perani; & quacumque volui facere, perfeci.

Mais comme l'excez est tousiours blasma-
ble, mesmes aux choses honnestes : Aussi
l'on a tousiours repris ceste trop grande
affection que plusieurs ont porté à cet exer-
cice ; le preferant non seulement au soin
& à la conduite de leurs affaires , mais
encore à leur propre vie : Car combien de
funestes accidens font-ils arriuez à plusieurs
grands Princes , pour s'estre laissez em-
porter à la violence de ceste passion : elle
a causé la mort à Theodose le Jeune , à ce
que tesmoigne Zonare : Elle a precipité
Clotaire , premier de ce nom , dans ce
mesme mal-heur , qui chassant en la Fo-
rest de Compiègne , s'échauffa tellement à
poursuiure la beste , qu'il tomba en vne
pleuresie , & mourut incontinent apres,
en la fleur de son aage : Elle a fait ressen-
tir ce mesme defastre à Theodebert , fils
de Theodoric , Roy de Mets , qui fut mi-
serablement mis en pièces par vn Taureau
sauuage , qu'il poursuiuoit trop asprement,
dit Agathias au Liure premier de la guerre
Gothique : Et Pausanias en ses Corinth.
fait mention d'un semblable accident , qui
arriua à Saro , cet ancien Roy des Gaules,
qui apres auoir remporté plusieurs victoi-
res sur ses ennemis , & dompté l'Egypte ,
il ne

il ne peut dompter l'ardeur qu'il auoit à la Chasse : car poursuiuant vn Cerf avec trop de violence, il se precipita dans ceste Mer ; qui fut appellée de son nom *Saronium* : comme si les eaux , dit vn ancien Autheur, eussent porté enuie à la terre, de l'honneur qu'elle auoit d'estre commandée par vn si grand Monarque.

Et certes , il semble que ce Prince ayt laissé , comme par succession à nos François, cét extreme desir qu'ils ont pour cét exercice : D'autant que nous lisons dans Aimonius en la vie de Clouis , au Liure 1. Des Gestes des François, chap. 21. que nos premiers Roys auoient accoustumé de s'exercer continuellement à la Chasse, *Vt moris est Francorum venatui insistere*, dit-il : Et ailleurs il les appelle *Venationis studiosos*. Eginard nous décrit l'Empereur Charlemagne presque tousiours dans les Forests, si tost qu'il auoit quelque relasche : *Venationi fuisse deditissimum, ex more & consuetudine Gallorum, cui nationi nulla alia in eo studio comparanda*.

Aussi Sydonius Apollinaris, écrivant les loüanges d'vn nommé Vectius , au liure quatrième de ses Epistres , il vse de ces termes : *Illa leniora, quod ipse quem loquimur in equis, canibus, accipitribus instituendis, spectan-*

10 DE LA SOUVERAINETE' DV ROY,
ais, circumferendis, nulli secundus: spécialement
pour la volerie, que nos Ancestres ont
tellement chérie, que mesmes leurs plus
solemnels sermens se faisoient, *super acci-*
pitre & spata, comme nous l'apprenons des
Capitulaires de Charlemagne: & qui a
esté d'autant plus estimée par nos Pe-
res, qu'elle est vne des plus anciennes
Chasses, que les hommes ayent inuentée,
comme il se peut conjecturer de ce passa-
ge du Prophete Baruch, chap. 3. où il parle
de ceux qui *in auibus Cæli ludunt*: Et de ce
lieu d'Aristote au Liure neuvième de son
Histoire des animaux, où il fait mention
de certains peuples de Thrace, qui estoient
en si bonne intelligence avec les épre-
uiers, & les autres oyseaux de proye,
qu'ils alloient de compagnie à la Volerie;
& se faisoient part de leur gibier, les vns
aux autres.

De toutes ces circonstances qui releuent
l'honneur de la Chasse l'on peut induire
que les Princes souuerains ont la puissan-
ce, non seulement de la regler; mais en-
core de la defendre, & de la permettre à
qui bon leur semble: Aussi voyons-nous
que le Roy François premier, par son Or-
donnance de l'an 1515. & qui a esté suiue
de plusieurs autres, fit defences à toutes

personnes, de quelque qualité qu'ils fussent, de chasser dans ses Forests, les Buissons, & ses Garennes, ny d'y prendre des bestes rousfes & noires, des lièvres, des connils, des phaisans, des perdrix, & d'autre gibier, avec les chiens, arbalestes, arcs, filets, cordes, toiles, collets, tonnelle, li-niere, ou autre engin; si ce n'est qu'ils en eussent permission expresse des Roys, & qu'ils en eussent ioüy depuis dix ans: Ce qui est appuyé du droit commun, qui defend de chasser sur la terre d'autrui: & à plus forte raison, sur les Terres & les Forests du Prince, qui doiuent estre plus priuilegiées que les autres.

Mais on demandera, si l'on doit comprendre dans ceste generale defense ceux qui ioüyssent à tiltre d'vsufruiët, ou par engagement des terres du Domaine: En quoy ie voudrois distinguer celles que l'on possède en appanage, d'avec celles que l'on tient par simple engagement: Car au premier cas, il n'y a point de doute, que les detenteurs, sous ce tiltre, ne puissent y exercer toutes sortes de Chasses: d'autant que *potius vicem domini gerunt, quàm fructuarij.* Et que le droit de Chasse est plustost vn droit de Seigneurie, que de Souueraineté.

Mais quant à ceux qui n'en iouïssent que par simple engagement, il s'y rencontre plus de difficulté, à cause que si nous en croyons le Iurisconsulte Iulianus, la Chasse n'est point mise entre les fruiëts: *Venationem, fructus fundi negauit esse Iulianus, nisi fructus fundi ex venatione constet, in l. 16. ff. de usur. & fruct. & cat.* comme sont les Garennes & les Estangs.

L'estime que pour decider ceste question, il faut prendre garde, quelle est la qualité de ceux qui les possèdent: Car s'ils sont Gentils-hommes, mon opinion est, qu'ils peuuent chasser aux menuës bestes, & gibier, & non pas aux bestes noires & rouffes, qu'on appelle grosses bestes, qui doiuent estre reseruées pour le plaisir du Roy: Mais s'ils sont roturiers: il n'y a point de doute, qu'ils sont compris dans la defense generale de l'Ordonnance que nous auons rapportée cy-dessus, art. 16. qui defend à tous ceux de ceste qualité, d'auoir chiens, collets, filets, liniere, & autres engins à chasser, ne prendre lieures, herons, perdrix, phaisans, ny autre gibier, sur peine de confiscation de leurs engins, & d'amende arbitraire; si ce n'est qu'ils ayent permission expresse du Roy: Ce qui est conforme à l'ancien vsage de France, que

rapporte Boutillier en sa Somme Rurale, qu'il composa en l'an 1410. Les mesmes defenses sont aussi faictes par ceste Ordonnance, à tous les Officiers des Forests, de chasser avec armes, ou autrement, sur les peines qui y sont contenuës, & qui pour ce regard est maintenant mal observée, ou du moins, *manu languida*, ce qui cause vn grand degast de gibier dans les Forests & les Buissions du Roy.

Mais j'ay veu souuent agiter ceste question : sçauoit, si l'on observe en France la loy Romaine, qui defend de chasser sur les terres d'autrui, & qui est couchée en ses termes : *D. Pius aucupibus rescripsit : Rationi consentaneum non esse, iniuris dominis, vos in alienis prædijs aucupari*, l. 16. ff. de seruitut. rusticor. præ-

dicte que nos Interpretes ont estendu à toutes sortes de Chasses. Sur quoy ie dis premierement, qu'il seroit impertinent de douter, si le Roy peut chasser ailleurs que sur ses terres : veu mesmes que les anciennes Ordonnances veulent, que lors qu'il va à la Chasse en personne en quelque part du Royaume que ce soit, que les Seigneurs, sur les terres de qui il chasse, l'accompagnent par tout : Car c'est vn des droits de sa Souueraineté. Mais quant aux autres Seigneurs, ie croy

374 DE LA SOUVERAINETÉ DV ROY,
 que par les mesmes Ordonnances de France, ils ne doiuent point entreprendre de chasser dans les Forests d'autrui, si ce n'est en poursuivant le gibier, qu'ils ont fait leuer sur leurs terres: d'autant qu'en ceste rencontre ils peuuent le poursuivre sur les terres de leurs voyfins; avec le mesme droit, que parmy les Romains le maistre auoit de poursuivre son esclau fugitif, iusques dans les Maisons de l'Empereur, des Senateurs; & de tous autres: & mesmes, *Scrutari cubilia ac vestigia occultantium*, comme dit Vlpian; in l. 2. ff. de ser. fugit. Ce qu'ils peuuent faire iusques à ce que la beste *aufugerit persecutionem venatoris*, comme parle le Iuriconsulte Pompo. in l. 44. ff. de acquir. rer. dom. c'est à dire iusques à ce qu'elle soit du tout éch.
 Hors ceste occasion, il n'est pas permis d'entrer dans la Forest d'autrui, pour y chasser. Autrement, si quelqu'un auoit fait ceste entreprise contre le consentement du propriétaire, il seroit tenu de luy rendre le gibier qu'il auroit pris, avec tous les dommages & interets, en haine de sa temerité, suivant la loy *quemadmodum*. §. 3. vers. *plane*. ff. ad leg. Aquil.

Toutesfois l'on doit remarquer, que quand nous auons dit, qu'il est permis de

poursuivre dans la terre d'autrui la beste qu'on a fait leuer sur la sienne, que cela se doit entendre seulement des lieures, mais non pas des bestes noires, comme d'un sanglier, & des autres males bestes, & mesmes des oyseaux, comme il est dit in l. 3. ff. de acquirendo rerum dominio: Car elles sont au premier qui les peut prendre, qui est vne distinction que le Jurisconsulte Caius a remarquée in l. naturalium. ff. eod. tit. où il est dit, (bien que contre l'advis de Fabianus) que *fera bestia ab vno vulnerata, & ab altero capta, capientis fit*, à cause de ce premier droit de la nature, qui donnoit au premier occupant toutes les choses qui n'estoient à personne: mais que l'on observe le contraire in venatione bestiarum non ferarum, qu'on adjuge d'ordinaire *persequenti, non capienti*: ainsi que ie l'ay veu souuent iuger au Parlement.

Mais pour faire tousiours paroistre d'avantage l'autorité que le Roy a sur la Chasse: c'est que par l'Edict d'Orleans, art. 137. Il defend à toutes personnes indifferemment, de tuer les bestes noires & rousses, que la loy appelle *feras bestias*, qui sont entrées sur leurs heritages; mais seulement de les chasser à huées, & avec des pierres sans les blesser: Et par l'Edict de

376 DE LA SOUVERAINETE' DV ROY,
Blois, art. 283. Il defend, tant aux nobles,
que non nobles, de chasser sur les terres
ensemencées, depuis le premier iour de
Mars, iusques apres la despoüille, à peine
de tous dommages & interests.

Finallement, comme le Prince peut per-
mettre la pesche en vn certain endroit de
la Mer, & la defendre en l'autre, par l'ar-
gument que l'on tire de la loy *venditor. ff.
comm. prædior.* où il est parlé de la pesche
des Thons, comme Plinè dit le semblable
de la pesche des Balenes, au Liure dix-
neuvième, chap. 15. & chap. 30. bien que
la pesche soit mise entre les choses qui
sont communes à tout le monde. De
mesme le Roy peut permettre la Chasse
en quelques Forests, & la defendre en
d'autres, pource que, comme nous auons
dit souuent, le Prince a toute puissance
sur les choses, qui de leur nature estoient
autre-fois communes.

Que

Que les Places fortes sont tousiours exceptées des alienations du Domaine de la Couronne ; & qu'il n'appartient qu'au Roy, de les bastir, les refaire, & les garder, & qu'on ne peut faire aucuns ourages publics, sans sa permission.

CHAPITRE V.

BIEN que la bien-vueillance des peuples, soit la plus assurée forteresse des Roys, *inexpugnabile munimentum, est amor civium*, dit Senèque à Neron : Neantmoins j'ay tousiours estimé que les fortes Places ne laissent pas de leur estre nécessaires, & à tout l'Estat, pour soustenir les efforts des ennemis estrangers. D'où vient que Tacite nommoit Crémone, *propugnaculum aduersus Gallos trans Padum agentes, & si qua alia vis per Alpes rueret*. Et Suétone nous rend tesmoignage que l'Empereur Auguste, ayant receu les nouuelles de la déroute de Varus, redoubla son estonnement, lors qu'il fut aduertty, qu'il n'y auoit point de forteresse entre la Germanie & l'Italie ; qui peust retarder le progrez des ennemis, s'ils eussent eu le dessein de passer les Alpes.

Bbb

Aussi lisons-nous, que les Romains dans leurs plus grands perils, ont tousiours mis toute l'esperance de leur ressource, en leurs fortes Places : ayans experimenté, que sans le Capitole, où s'estoient retirez les plus vaillans d'entre eux, quand leur ville fut prise par les Gaulois, ils eussent entierement esté perdus. Et c'est pourquoy Tite Live fait ceste remarque de la prudence de ce peuple, *Maiores nostri castra munita, portam ad omnes casus exercitui ducebant esse, unde ad pugnam exirent, quo iactati pugna receptum haberent.* Et nous pouuons dire, que la France seroit maintenant sous la domination des Anglois, sans la ville d'Orleans, qui se trouua assez munie & fortifiée, pour arrester le cours de leurs conquestes, lors que sous Charles VII. ils s'estoient rendus presque les Maistres de tout le Royaume.

Mais outre ceste notable consideration, les Princes sont quelques-fois obligez de faire bastir des Citadelles dans les principales villes de leur Royaume, pour maintenir leurs subjects dans le deuoir & l'obeissance : Car est-il rien au monde de plus volage, ny de plus inconstant en leurs affections, que la populace ? Charles le Sage ressentit les effects de ceste legereté,

durant la prison du Roy Iean son Pere: & s'il eust eu quelque Place forte dans Paris, pour y faire sa retraite, il n'eust pas esté forcé de voir tuer en sa presencé les principaux de son Conseil, & de souffrir vne infinité d'affronts: Et le Roy Henry III. n'eust pas esté contraint de prendre la fuite pour eiter la fureur du peuple, lors qu'il s'éleua contre luy, du temps des Baricades, si le Louure eust esté suffisamment fortifié, pour resister aux premieres impetuositéz de ceste émotion populaire. C'est pourquoy Dauid, le plus sage & le plus vaillant Prince de son temps, ayant recogneu le naturel arrogant du peuple Iudaïque, afin d'auoir vn refuge assés contre leurs rebellions & leurs reuoltes, il fit bastir dans sa nouuelle ville de Hierusalem vne Forteresse sur la montagne de Sion, qu'il appella *Munitam ciuitat. m. Dauid.*

Mais si les Princes veulent tirer de l'auantage de ces Places fortes, ils doiuent estre soigneux de les donner en garde à des Gens affidez, & qui ne dependent que d'eux: car autrement elles pourroient produire des effects du tout contraires, si elles venoient à tomber en la puissance de quelque Grand, ou d'vne personne mal-

380 DE LA SOUVERAINETE' DV ROY,
affectionnée à leur seruice. C'est pourquoy
nos anciens Roys, lors que forcez par la
necessité, ils ont vendu les terres du Do-
maine, ou qu'ils les ont alienez, sous vn
autre titre, ont tousiours excepté les for-
tes Places; soit qu'elles fussent situées sur
les frontieres, ou dedans le Royaume-
ayans estably ceste loy, que les Chasteaux
& les Forteresses sont inalienables, & in-
separables de la Couronne, & que per-
sonne que les Roys n'en doiuent auoir la
garde, s'estans reseruez ce droit pour vne
marque de leur Souueraineté.

En quoy ils ont imité la Sageſſe de
Salomon, qui apres auoir basti les Forte-
resses de Hezer, de Maggedo, de Betho-
ron, de Balaath, de Palmyra, se reserua le
soing de les munir & de les faire garder
par ses propres Garnisons, & n'en donna
iamais la iouyssance à pas vn de ses En-
fans, ny à aucun Prince de sa Cour: Et
bien que là mesme Escriture die que Pha-
raon donna en dot à sa fille, la Forteresse
de Gazer: ce ne fut neantmoins qu'apres
auoir esté démantelée, & ses murs abattus.
Car comme les armes, que nous tenons
en main, nous prouoquent facilement à
attaquer l'Ennemy: de mesme les Forte-
resses peuuent donner l'assurance aux

mal-contents, de se rebeller contre leurs Princes, lors qu'elles sont en leur pou-
voir: Dequoy ceux de la Religion preten-
due reformée nous ont donné, de nostre
temps, d'assez funestes tesmoignages, qui
n'ont iamais cessé de brouïller la France,
tandis qu'ils ont eu des Places fortes, &
des villes d'ostages en leur possession.

Aussi voyons-nous dans les Histoires,
que tous ceux qui ont osé entreprendre
de bastir des Forteresses de leur autorité
priuée, ont tousiours esté suspects aux
Princes Souuerains: Tesmoin ce que dit
Tacite, au Liure quinzième de ses Anna-
les: *Nero iubet praeuenire conatus Consulís; occu-
pare velut arcem eius, opprimere delectam iuuentu-
tem: Quia Vestinus imminentes foro ades, decorá-
que seruitia, & pari aetate habebat.* C'est pour-
quoy il fut depuis arresté par vne loy pu-
blique, que personne, de quelque condi-
tion qu'il fust, non pas mesmes les Com-
munautéz des villes, ne pourroient de
leur mouuement, & sans expresse per-
mission du Prince, fortifier aucune ville,
ny bastir ou rebastir leurs murailles. *Muros
municipales, nec reficere licet, sine Principis vel Præ-
sidis auctoritate, nec aliquid eis conjungere, vel
imponere,* dit Vlpian, in l. 9. ff. de rer. diuis.
Et d'auantage, il fut ordonné, que pour

382 DE LA SOUVERAINETÉ DU ROY,
oster tout sujet de soupçon , l'on de-
moliroit toutes les Places fortes qui
estoit basties aupres des villes , comme
dit l'Empereur, in l. *edificia. C. de operib. pu-
blic.*

D'où vient que comme le Capitole eut
esté brulé , durant l'absence de l'Empe-
reur Vespasian , & qu'on voulut deliberer
en plein Senat , pour trouver les moyens
de le rebastir , Vulcatius Tertulinus , Tri-
bun du peuple , en estant aduerty , vint
dans l'Assemblée , & rompit la delibera-
tion , ayant remonstré qu'estant question
de reparer vne Forteresse de telle impor-
tance, il estoit necessaire d'attendre la ve-
nuë du Prince. C'est pourquoy l'on remit
cét affaire à la discretion de l'Empereur,
qui depuis commit pour cés ouurage, Lu-
cius Vestius, homme d'autorité entre les
principaux de la ville.

Aussi void-on, que de tout temps les
Princes souuerains ont seuerement puny
telles entreprises, l'Empereur Theodose le
Jeune, ayant esté aduerty que Cyrus, Pre-
uost de la ville de Constantinople , auoit
pris la hardiesse de rebastir à ses despens
les murs , & augmenter l'enceinte de la
ville , sans luy communiquer son dessein,
& qu'il faisoit courir parmy le commun

peuple, cét Eloge en sa loüange : *Constantinus condidit, Cyrus renouauit* : Ne pouuant souffrir ceste insolence, il le degrada de son Office, & luy commanda de se faire Prestre : & puis apres il le pourueut d'un Euesché. Mais Domitian monstra bien d'auantage sa défiance, lors qu'il fit mourir Salustius Lucullus, de ce qu'il auoit inuenté la façon de faire des lances d'une nouuelle forme, & qu'il les auoit appellées de son nom, *Luculleas*. Et c'est sur ces exemples, qu'on a estably en ce Royaume ceste maxime d'Estat, que personne ne peut edifier de Chasteaux, ny aucun ouurage public, sans l'expresse permission du Roy.

Et bien que quelques Empereurs de l'Antiquité, n'ayent pas esté si scrupuleux : Et que mesme Auguste ne trouua point mauuais que Taurus, Philippus, & Balbus, employassent une grande somme de deniers, pour l'ornement de leur ville : *Quòd opes exundantes ad opera publica, ad ornatum urbis, & ad gloriam posterorum contulissent*, dit Tacite. Et que l'Empereur Claudius permit à quelques Seigneurs de mettre leurs noms, & d'éleuer leurs statuës sur les ouurages publics, qu'ils auoient fait construire à leurs despens, pour recognois-

fance de leur liberalité enuers leur ville:
 Et que Vlpian, *lib. 3. opinio.* aye mesme
 écrit : *Qui liberalitate, non necessitate debiti, re-*
ditus suos ad opera facienda concessit, munificentie
sua fructum de inscriptione nominis sui, operibus, si
que fecerit, capere per injuriam non prohibetur.
 Neantmoins ils ne donnerent ces permis-
 sions, que par vne faueur particuliere, &
 non pas pour tirer cela en consequence,
 ny pour en faire vne regle perpetuelle:
 Car nous voyons que les derniers Empe-
 reurs n'ont pas seulement trouué mauuais
 que l'on prist ceste hardiesse : mais encore
 ils l'ont estroittement defenduë par la
 loy 3. §. *ultimo.* la loy 4. & 6. *ff. de operib.*
public. & la loy *si qui Judices.* C. *cod. spe-*
cialement à ceux qui voudroient entre-
 prendre d'edifier des Villes, & des For-
 teresses, & de leur donner leurs noms:
 d'autant que cét honneur & ceste pre-
 rogative n'appartient qu'au Prince souue-
 rain, comme dit Fabius Piëtor, lors qu'il
 parle des villes de Hadrianopolis, de
 Theodosiopolis, & plusieurs autres, qui fu-
 rent edifiées par les Empereurs de mesme
 nom : Ce qui doit suffire, pour monstrier
 que non seulement les Forteresses, mais
 encores tous les ouurages publics ne peu-
 uent estre construits, reëtablis, ny mesme
 estre

estre gardez, que sous l'autorité du Roy.

Des droits qui appartiennent au Roy sur les mines & les metaux.

CHAPITRE VI.

ON a tousiours deferé cét honneur aux Princes, à cause de leur Souueraineté, de leur laisser la libre disposition de ce qui croist de plus rare, & de plus précieux dans leurs Prouinces. C'est pourquoy les Roys de Perse, ayans conquis l'Arabie & l'Ethiopie, se reseruerent vn particulier tribut sur l'Encens, l'Ebene, & l'Iuoire, qui estoient les plus excellentes & les plus riches marchandises de leur Empire. Les Roys de Iudée firent de mesme sur le baume, qui estoit reputé le plus excellent qui fust au monde. Aussi les Romains, apres auoir conquis ce Royaume, le conseruerent avec tant de soin & de curiosité, qu'il n'y auoit que le fisque qui receust le reuenu de la culture de ceste riche Plante: d'où vient que Pline traictant de ses proprietéz, dit que *Balsama nunc serit*

Ccc

386 DE LA SOUVERAINETÉ DU ROY,
fiscus. Les Roys d'Egypte retenoient pour
eux les plus belles Topazes, qui croissoient
en l'isle Ophiade. Et maintenant l'Empe-
reur des Tartares prend pour soy les plus
belles Turquoises, qui se trouuent en ses
pays, comme les Roys de Bisnaga, où sont
les plus belles roches de Diamans, se re-
seruent tous ceux qui excèdent le poids de
cent quinze grains.

Or comme les metaux sont estimez en-
tre les plus excellens chefs-d'œuvres de la
nature ; & principalement l'or, que l'on
peut dire estre la dernière operation de ce
flambeau du monde : dont tous les Phi-
losophes ont admiré la longue durée, la
pureté, & la résistance contre la violence
du feu, *Adeo ut non rubigo vlla*, dit Plin, *non*
arugo, non aliud, ex ipso. quod consumat bonitatem,
minuatur pondus.

Aussi voyons-nous que de tout temps
les Princes souverains ont retenu, non seu-
lement sur les Tresors d'or, mais aussi sur
les mines d'or, des droits particuliers qu'ils
appelloient *χρυσαίμμοι*, ainsi que l'Empereur
Valentinian l'ordonne, in l. 1. & 2. C. de
Metall. & *Metallar.* Et comme les an-
ciens Roys de Memphis, & plusieurs au-
tres auoient accoustumé de pratiquer en
leurs Royaumes : Et ces droits estoient

tellement estimez des Anciens, qui les mirent mesme du nombre de ceux qu'ils appelloient Royaux : Ce que l'on peut voir dans la Constitution de l'Empereur Frederic, *Qua sint regalia*.

Car bien que son texte ne parle que des droits que l'on prenoit sur les mines d'argent : neantmoins il n'y a point de doute que l'or, & les autres precieux metaux ne soient compris sous ce mot : d'autant que l'opinion de ceux qui ont dit que cét Empereur n'auoit parlé que des mines d'argent, pource que parmy les anciens Romains l'argent estoit beaucoup plus estimé que l'or : Et que pour ce sujet ils ne receuoient le payement de leurs subsides, qu'en argent, & non pas en or ; & qu'ils adoroient seulement les Dieux, qu'ils appelloient *Argentinum*, & *Æsculanum*, & non *Aurinum*, a esté rejeitée comme ridicule ; veu que cela ne fut pratiqué que du commencement de leur Empire, & non depuis leurs grandes conquestes : Aussi toutes les Constitutions des autres Empereurs, qui se lisent aux titres *De metallis* & *metallarijs*, aux Codes de Justinian & de Theodose, parlent nommément de l'or, de l'argent, & de tous les autres metaux.

Joint que ceste difficulté doit cesser

388 DE LA SOUVERAINETE' DV ROY,
parmy nous : d'autant que nos Ordonnances comprennent clairement toutes sortes de métaux : sçauoir est l'or, l'argent, le cuiure, le fer, l'acier, le plomb, le vif argent, le vitriol, l'alun, la couperose, le salpêtre, & le sel nitre, comme il se void dans les Ordonnances de Charles IX. de l'an 1563. & de 1567. par lesquelles il ordonne, que des mines de toutes ces substances, on luy en payera la dixième : Et l'on void que par vne Declaration postérieure que l'on fit à saint Germain, en Nouembre 1583. ce droit fut restreint sur l'or & sur l'argent.

Mais l'on peut demander sur ce sujet, s'il est permis indifferemment de chercher les minieres en tous lieux : veu qu'anciennement les Loix Romaines defendoient que l'on fist ceste recherche en Italie, comme Pline nous l'enseigne au Liure cinquième, chap. 20. lors qu'il dit : *Italiam metall. omnium fertilitate nullis terris cedere ; sed interdictum id vetere consulo Patrum , Italia parci iubentium.* Ce qu'il repete au Liure trente-troisième, chap. 4. où il traite amplement de la nature & de la qualité des métaux. Depuis neantmoins, ceste Ordonnance fut changée : & l'on permit de fouiller par tout, avec permission du Prin-

ce, comme il est dit *in l. nulla, in C. Theodos. de Metall. & Metallar.* Ce qu'ils ordonnerent, afin qu'on ne les fraudast point de leurs droits. Et de faict, si quelqu'un, par bonne fortune, auoit trouué vne mine, il estoit tenu de le denoncer promptement au Prince, à peine d'estre priué de son droit; ainsi que nous l'apprend la Nouvelle 31. de Leon le Philosophe: C'est pourquoy Zonare remarque que, comme sous l'Empereur Nerua vn nommé Atticus eust trouué vn thresor, il en aduertit aussi-tost ce Prince: de peur que s'il eust retardé d'auantage, il n'eust esté disgracié, & déclaré indigne d'en auoir sa part.

Mais tous ces doutes cessent en France, veu que par les Ordonnances susdites, & celles encores de Charles VII. & VIII. & de Louys XII. il est permis indifferemment de chercher, querir, & ouurer les mines en tous lieux, en recompensant neantmoins les propriétaires, au dire de gens à ce cognoissans. En quoy nous suivons l'opinion de la Glose, sur la loy *Cuncti*: & sur la loy *Quosdam. C. de metallar.* qui dit que cela se peut faire; *Inuito domino, propter vtilitatem publicam, aurum enim in sua natura querere iustitia est*, disoit Casiodore; pourueu que, comme j'ay dit,

390 DE LA SOUVERAINETÉ DV ROY,
le particulier soit indemnifié.

Et pour ne se pas tromper en la decision de plusieurs doutes, qui se peuuent rencontrer en ceste matiere, l'on doit remarquer qu'il y a vne grande difference entre l'ancien droit Romain & le nouveau : & mesme entre celuy de nos Ordonnances, & de quelques-vnes de nos Coustumes : Car par le droit ancien l'on tenoit que les mines estoient *privati iuris, & in libero privatorum usu, & commercio*, comme dit Vlpian, in l. 7. *fructus*. §. 13. *si vir*. ff. *sol. matr.* De façon que si elles estoient trouuées dans le fond d'un particulier, il en auoit la libre iouïssance, comme des autres émolumens de sa terre, disent les Jurisconsultes, in l. 3. & 4. ff. *de reb. cor. d. l. 7. §. si vir in fundo*. ff. *sol. matrim.* l. 13. §. *inde quasitum*. ff. *de usufr.* Et si on les descouuroit dans les lieux non occupez : c'est à dire, qui pour leur sterilité, & infertilité estoient de tout temps abandonnez ; comme d'ordinaire l'or, & les autres metaux, ne se forment qu'en des terres desertes, dit ce Poëte :

---- *habitat desertis montibus aurum,*

Elles appartennoient à l'Inventeur.

Ce que l'on pratiquoit aussi pour l'or & les autres metaux, que l'on auoit trouuez par rencontre sur la superficie de l'heri-

rage d'un autre, apres vn grand incendie; vne grande lauffe d'eaux, ou quelque grand éclat de tonnerre, comme il arriuoit fouuent fur de certaines montagnes de Galice, *Vbi fulgure terra præsciffa, quæ in his terris æfidua res est, detectum aurum, veluti deorum munus, colligitur*, dit Trogus;

Mais les Empereurs changerent ceste ancienne Iurifprudence, s'estans attribuez de certains droits fur toutes les mines, en quelques lieux qu'elles fussent trouuées; & fans aucune distinction. D'où vient que Tacite remarque que l'Empereur Tybere se mit en possession de toutes les mines qui se trouuerent dans les terres de Sextus Marius, qui auoient esté confisquées. Dont plusieurs ont inferé que les mines d'or que l'on trouuoit dans les terres du Prince, ou du fisc, appartenoient entierement au Prince, & que l'Inuenteur n'y pouuoit rien pretendre, que de son consentement.

Les Ordonnances de nos Roys ont imité celles de ces anciens Empereurs: Car l'on obserue presque la mesme chose par toute la France, excepté en quelques Coustumes, comme entre autres en celle d'Anjou, art. 61. qui veut que la fortune d'or, trouuée en mine, appartienne au Roy;

392 DE LA SOUVERAINETE' DV ROY,
& la fortune d'argent trouuée en mine,
appartienne au Comte, Vicomte, ou Ba-
ron, qui est obseruée pour ce regard,
pource qu'elle a esté emologuée en la
Cour, du consentement du Procureur Ge-
neral.

Mais l'on demandera, si l'on doit obser-
uer le mesme droit pour les Tresors? J'ay
parlé amplement de ceste question dans
mes Decisions. C'est pourquoy ie me con-
tenteray de dire à present, que comme
l'eau des sources & des riuieres, est plus
excellente, que celle que l'on reserue
dans quelque vase: que de mesme les mi-
nes sont beaucoup plus estimées, qu'une
somme d'argent, que l'on trouue en quel-
que cachette, qu'on appelle Thresor. C'est
pourquoy nous voyons que le droit que
le Prince souuerain prend sur les mines
est beaucoup plus vniuersel, que celuy
qu'il prend sur les Thresors: Car en quel-
que lieu que la mine se trouue: le Roy,
comme j'ay dit, y prend son droit: mais
non pas aux Thresors, que la pluspart des
Coustumes adjugent aux Seigneurs directs
& hauts-Iusticiers; si ce n'est qu'ils fussent
trouuez dans les terres domaniales, ou en
des lieux publics, appartenans au Roy, à
cause de sa Souueraineté, comme il est
dit

dit en ceste mesme Coustume d'Anjou, & traicté amplement dans l'Arrest celebre de l'an 1295. qui se lit au Registre intitulé *Olim*, qui adjugea à l'Abbé, & aux Religieux de saint Denys, quelques lingots d'or, qui furent trouvez en leur Seigneurie & haute Iustice.

Et l'on remarquera que la diuersité de nostre usage, & celuy du droit Romain, vient de ce que ce dernier ne recognoissoit que deux sortes de seigneurie, ou de propriété; l'une priuée, & l'autre publique: d'où vient que l'Empereur Adrian, au rapport de Spartian, disoit: *Si quis in suo thesaurum reperisset, ipse potiretur; si in alieno, dimidium domino daret, si in publico, cum fisco partiretur.* Et en suite de cela les Empereurs Gratian & Valent. ordonnerent, *ut si quis in solo proprio reperisset, integra id iure præsumeret; qui in alieno, loci dominum in quadrantem repertor admitteret l. 2. de Thesa. C. Theod.*

Mais nous auons parmy nous plusieurs sortes de Seigneuries, qui prétendent respectiuellement quelque droit sur les Thresors: le Seigneur haut-Iusticier, que *Joannes Faber*, & les autres appellent, *Territorij dominum*, comme le Comte ou le Baron, qui prend le tiers; le Seigneur de fief, qui comme par les Constitutions feudales, ne

Ddd

394 DE LA SOUVERAINETÉ DV ROY,
le possedoit que presque en qualité d'usu-
fruitier: aussi ne pouuoit-il rien pretendre
aux Thresors, non plus qu'un usufruitier,
qu'un mary, & un creancier, disent les
Docteurs, sur la loy *fructus*, ff. sol. matr.
Mais d'autant que par nos Coustumes,
Feuda vice patrimonij funguntur, & que le Sei-
gneur de fief est réputé comme propriétaire,
il prend aussi part au Tresor qui est trou-
ué dans sa terre: Et puis il y a le Seigneur
foncier ou censier, qui mesme y prend
son droit, comme l'expliquent quelques-
unes de nos Coustumes, & sur toutes,
celles d'Anjou & du Maine.

Et l'on doit encore obseruer, que les
Empereurs Romains furent en vne chose
beaucoup plus exacts: que nos Roys n'ont
esté iusques à present: Car si vn particulier
auoit trouué en son fond vne mine de
fer, il pouuoit la retenir à soy, mais il
n'osoit la mettre en œuvre, & principale-
ment en faire des armes, sans leur expresse
permission, comme il est dit *in l. ult. §.
magnus. ff. de publ. vect. & commiss.* Mais en
France, le Roy laisse la liberté à tout le
monde, de disposer de son bien à sa vo-
lonté. Il n'y a que le transport des metaux
hors le Royaume, qui est expressement de-
fendu, sans permission.

*Qu'il n'appartient qu'au Roy de leuer des deniers
sur ses subjects, par forme de Tailles,
Aydes, & Gabelles.*

CHAPITRE VII.

ARISTOTE dit, qu'il y a deux especes de Monarchies: l'une absolüe, qu'il appelle *παρασπλις*; & l'autre, dont la puissance est limitée. Celles des anciens Hebreux, & des peuples voy-
sins, estoient de la premiere espece: ainsi qu'il est aysé de le cognoistre par la description qu'en fait Samuel, lors que le peuple fit demander à Dieu vn Roy, comme auoient les autres nations. Et celles de Lacedemone; de nostre ancienne Gaule, & de la Germanie, estoient de la derniere sorte, à ce que remarque Tacite, quand il parle de leurs Roys, *In Germania & Gallia tum Reges erant auctoritate suadendi, non iubendi potestate.* Les premiers pouuoient de leur seule autorité, & sans le consentement de leurs subjects, imposer des Tailles, & leuer des subsides, lors qu'ils iugeoient estre necessaire pour le bien de leurs affai-

Ddd ij

396 DE LA SOUVERAINETÉ DV ROY,
res. Mais ces derniers n'auoient point ce
pouuoir, que du consentement de leurs
peuples, & pour des causes vrgentes &
raisonnables.

Et bien que le Royaume de France ayt
toufiours esté pleinement Monarchique,
παραλήν μαχαζα; dit Nicetas; neantmoins nos
anciens Roys se gouuernerent du commen-
cement avec tant de moderation, qu'ils le-
uoient fort peu de chose sur leurs subjects,
pource que les reuenus de leur Couron-
ne estoient alors suffisans pour entretenir
leur despense. Mais depuis que la guerre,
comme vn feu deuorant, a consommé la
pluspart du fond de leur Domaine, ils
ont esté contraints d'vser absolument de
leur autorité, & de leuer sur leurs peup-
les des Tailles & des subides; mesmes
sans leur consentement: qui est vn des
droits plus remarquables de la Souue-
raineté des Roys, & qui leur est si
particulier, que l'on a tenu toufiours
pour maxime, qu'il n'y a qu'eux qui aye
le pouuoir dans leurs Royaumes, de
leuer des impositions sur les peuples de
leur obeissance. En quoy nous auons
imité la loy Romaine, qui dit en termes
expres: *Vectigalia sine Imperatoris precepto, ne-
que Prasidi, neque Curatori, neque Curie consti-*

tuere, nec precedentia reformare, vel his addere, vel diminuerre licet, in l. 10 ff de publ. vectig & com. & qui est repetée in l. 3. C. vectig. noua institui non posse, & in l. vnica. §. 3. ff. de leg. Iul. Ambitus. D'où vient que les Iuifs, voulans faire mourir Iesus-Christ, prirent pour sujet de leur accusation, que contre ceste loy il auoit defendu au peuple de payer le tribut à Cesar, & qu'il auoit pris la qualité de Roy. Ce qui fût aussi objecté à Galeace, Vicomte de Milan, que l'on accusoit de crime de leze-Majesté, pour auoir imposé vne Taille sur ses subjects, sans la permission de l'Empereur: Et au Duc de Bourgogne, comme il se void dans les Registres de la Cour. C'est pourquoy l'Ordonnance d'Orleans, art. 136: reitere ces mesmes defences à toutes personnes, de quelque qualité & condition qu'elles soient: Iusques là mesme qu'on obserue à present, que, bien qu'un Gouverneur de Prouince, dans vne occasion pressante, puisse leuer des deniers sur le peuple: Neantmoins il doit aussi-tost en donner aduis au Roy, & obtenir de luy des Lettres de validation, autrement il se rendroit coupable du crime de leze-Majesté.

L'on a donné ce droit & ceste puissance

D d d iij

393 DE LA SOUVERAINETE' DV ROY,
aux Roys , afin qu'ils ayent des moyens
suffisans pour defendre l'Estat, & les peu-
ples que Dieu leur a commis, pour punir
les rebelles, & recompenser ceux qui ont
bien mérité du public. *Neque enim quies*
gentium, dit Tacite, *sine armis, neque arma sine*
stipendijs, *neque stipendia sine tributis haberi*
queunt. Ce qui est conforme à ce passage
de saint Augustin, au Liure 22. contre
Faustus, *Ad hoc tributa præstamus, ut propter*
necessaria, militi stipendium præbeatur. Qui est vn
droit qui leur est si legitiment deu, que
les Theologiens mesmes asseurent, qu'on
est obligé en conscience de le payer, comme
Bellarmin le traite en l'Apologie qu'il a
faicte pour sa responce au Roy d'Angleterre,
où il se sert, pour soustenir ceste proposi-
tion, de la responce que fit Iesus-Christ aux
Pharisiens, qui pour le surprendre luy de-
mandoient, s'il falloit payer le tribut à
Cesar, & qu'il leur repliqua, *Reddite Cæsari*
quæ sunt Cæsaris: ayant vsé de ce verbe signi-
ficatif d'une debte & d'une obligation.
Car ce sont des deuoirs que les peuples
sont naturellement obligez de rendre à
leurs Roys, & qu'ils doiuent payer volon-
tairement, & sans contrainte. Et ie croy
que si Aristote eust aussi bien descrit dans
ses Politiques les droits d'un Roy legitime,

comme il a fait les actions d'un Tyran, qu'il eust esté de ce mesme aduis.

Mais il faut qu'un Roy de ceste condition use discrettement de sa puissance: c'est à dire, qu'il doit mesurer & proportionner ses leuées selon les forces & le pouuoir de ses peuples, & qu'il prenne soigneusement garde, que les deniers qu'il en reçoit, soient vtilement employez pour le bien de ses affaires: Car autrement l'on pourroit dire de luy, avec Homere,

Δημοβόρος βασιλεὺς, ἐπὶ ὅτι δατοῖσιν αἰδώς.

Et mesme luy appliquer ce trait du Sage, *Leo rugiens, & ursus esuriens, Princeps impius super populum pauperem*, comme furent autrefois plusieurs Empereurs Romains, qui; bien qu'ils eussent plus de quarante millions d'or de reuenu tous les ans: néantmoins ceste grande somme de deniers ne pouuant assouuir leur auarice, ils inuenterent plusieurs infames moyens, pour tirer de l'argent de leurs peuples, afin de satisfaire à leurs débauches, & à leurs incroyables prodigalitez. Ils imposèrent des tributs sur l'ombre & sur l'air qu'on respire, comme dit Harmenopule en ce tiltre *πρὸς ζῆμιων ἀερίων*, dont parle Cujas, au Liure dixième de ses Observations: ils n'épargnerent pas mesme l'urine, sur laquelle

400 DE LA SOUVERAINETE' DV ROY,
ils impoferent vn tribut. Les Testamens,
& les dernieres volontez, qui doiuent estre
libres à tout le monde, n'estoient pas
exemptes des subsides: Car Iules Cesar
declara par vn Edict, que les Testamens
de ceux qui n'auoient rien legué à la Re-
publique, ou au fisque, seroient nuls, &
sans force. Et l'Empereur Auguste pre-
noit la vingtième partie des successions en
ligne collaterale, & des legs testamentai-
res, qu'il affecta pour la solde des gens de
guerre. Domitian rauissoit, comme vn
brigand, les biens des viuans & des morts.
Caligula imposa vne Taille sur les viures
que l'on vendoit dans les hostelleries: *Pro*
edulijs, dit Suetone, *qua tota vrbe venirent,*
certum statumque vectigal instituit: pro litibus
atque iudicijs vbicumque conceptis, quadragesima
summa de qua litigabatur; nec sine pana, si quis
composuisse vel donasse negotium conuinceretur: ex
gerulorum diurnis quæstibus pars octaua: ex capturis
prostitutarum, quantum quaque vno concubitu mere-
ret. Et l'Empereur Commodus prenoit de
l'argent de ceux qui estoient condamnez
à la mort, pour auoir la liberté d'élire le
supplice dont ils vouloient estre punis.

L'Escripture mesme remarque, que Sa-
lomon, quoy qu'enrichy de tant de belles
parties, fit de si rigoureuses exactions sur
son

son peuple, que bien que tous les ans il tirast de ses nauigations douze millions d'or de profit: neantmoins il leuoit encores vn si grand tribut, que, comme son fils, qui n'auoit pas la recommandation, ny les vertus de son pere, le voulut continuer, il donna sujet à la reuolte des dix lignées d'Israël; comme souuent, & pour ceste mesme occasion plusieurs semblables desordres sont arriuez en d'autres Estats. Car il n'y a rien qui aigrisse d'auantage les esprits des peuples contre leurs Roys, que les Tailles & les impositions immoderées. C'est pourquoy ils deuroient tousiours auoir en la pensée ceste sage parole que Spartian rapporte de l'Empereur Pertinax: *Sarius esse, inopem Rempublicam obtinere, quàm ad diuitiarum cumulos, per discriminum atque dedecorum vestigia peruenire.*

Dieu a tant fauorisé la France, que nous n'auons point veu en ce Royaume des exemples d'vne si monstrueuse auarice. Les principales leuées de deniers que l'on y pratique, sont les mesmes qui ont esté de tout temps en vsage dans les Estats legitimes, & les mieux policez: Car les Tailles, tant réelles, à qui sont subiectes toutes les terres roturieres, bien mesme qu'elles soient possédées par les Gentils-

Ecc

402 DE LA SOUVERAINETE' DV ROY,
hommes, les Ecclesiastiques, & les autres
priuilegiez, excepté les biens de la
premiere fondation des Eglises; que les
personnelles, que tous ceux qui sont ro-
turiens doiuent payer, si ce n'est qu'ils en-
soient exemptez par le Priuilege du Prince,
sont du tout semblables à celles que les Ro-
mains leuoient sur leurs peuples, comme il
se void *in l. ult. §. mixta. ff. de muner. in l. rescripto.*
§. ult. & in l. fin. §. patrimo. eod. & in l. filij. §. ult.
ff. ad munic. l. omnes. C. de ann. & trib. l. 2. C. de
muner. patr. Et ce fut saint Louys, qui pour
fournir aux frais de la guerre sainte, leua
le premier la Taille, par forme de subuen-
tion, sur tout le peuple roturier: Le Roy
Charles VII. suivit ceste mesme forme,
lors qu'on luy accorda de leuer deux mil-
lions de liures, pour subuenir à la despense
de la guerre qu'il auoit contre les Anglois,
& sans assembler les Estats. Et pource
que ceste guerre dura long-temps, ceste
leuée aussi continua plusieurs années. Ce
qui fut cause que le Roy Louys XI. sur
l'occasion de nouvelles guerres, qu'il fut
contraint d'entreprendre contre le Duc de
Bourgogne, non seulement la confirma,
mais encore l'augmenta iusques à trois
millions quatre cens mille liures. Louys
XII. surnommé, Le Pere du peuple, en

retrancha quelque chose; mais il pratiqua la mesme forme en la leuée. Le Roy François I. qui vint apres, l'augmenta iusques à quatre millions. Les Roys Henry II. François II. & Charles IX. continuerent la mesme leuée durant leur Regne; mais depuis elle s'est tellement accreüe, que c'est vne chose admirable, comme le commun peuple y peut fournir.

L'on peut aussi comparer les Aydes, dont nos Roys tirent vn grand secours, à ces impositions qui estoient en vsage parmy les Romains, & dont il est traité dans les tiltres des Pandectes & du Code de *vestig. & commiss.* Car ie ne suis pas de l'aduis de Budée, qui dit qu'elles ont esté establies sur l'exemple de ces presens que les peuples faisoient aux Empereurs, dont parle la loy vnique, *C. de oblat. vtor.* D'autant que l'on auoit accoustumé de les offrir au Prince, pour luy seruir de témoignage du ressentiment qu'auoit le public de l'heureux succez de ses entreprises.

Mais les Aydes sont de certaines impositions, qui se leuent sur toutes sortes de marchandises, toutes les fois qu'elles sont vendues, troquées ou échangées: &

404 DE LA SOUVERAINETE' DV ROY,
principalement sur le vin, le pied fourché,
le poisson frais & salé, & les autres choses
dont parlent les Ordonnances, qui ont
esté publiées sur ce sujet : Elles furent in-
troduittes par Charles V. durant la pri-
son du Roy Iean son Pere, pour payer sa
rançon. Depuis on a compris sous ce
nom d'Aydes, les traittes foraines, dont
les premiers Reglemens furent faits par le
mesme Roy Charles V. & successiuellement
par les Roys Louys XII. & François I.
comme il se void par l'Edict de l'an 1540.
Et d'autant qu'il y auoit plusieurs sortes
d'impositions sous ce nom de Traitte : le
Roy Henry II. les reduisit à deux seule-
ment : à sçauoir, les resues, le domaine
forain, & le haut passage pour vne, qu'on
appelle aujourd'huy, Domaine forain : Et
pour l'autre, La traitte & l'imposition fo-
raine.

Le Roy Charles IX. erigea depuis la
Douane de Lyon, pour les draps de soye,
d'or & d'argent, qui viennent d'Italie en
France, qui est la plus tolerable im-
position de toutes celles que l'on a establies;
pource que c'est proprement rendre le
luxue & la vanité tributaires. Et Henry III.
mit vn impost sur les bleds, les vins, les
toiles, & les pastels, qui se transportent

hors le Royaume, comme il se void par son Edict de l'an 1577. Et d'autant que l'on ne peut faire ceste traitte, sans l'auctorité du Roy, comme il est dit en l'Ordonnance de l'an 1571. qui porte defences à tous Gouverneurs, Capitaines des ports, & à tous autres, de la permettre, sur les peines y contenuës: elle est appellée pour ceste raison, *Traitte Domaniale*, pour vne marque precise de Souveraineté: & ces leuées sont semblables à celles dont il est fait mention au Liure quatrième, Des Loix Françoises, qui sont appellées, *Ius tractura vel transitura*: & dans les Loix des Lombards, *Tributum transitorium*: & par les Grecs, *Εξαγγιον*, & *Εισαγγιον*, & par la loy Romaine, *Portorium in l. lege censoria. ff. de verbor. signific.* pource qu'on prenoit tous ces droits, principalement aux ports & aux havres. Et l'on doit remarquer qu'on leue ces impositions sur les marchandises, qui non seulement viennent & sortent hors du Royaume: mais encorès sur celles qui vont & qui viennent des Prouinces, où les Aydes du Roy n'ont point de cours, comme la Bretagne, la Prouence, & les autres, qui en ce cas sont tenuës pour estrangeres.

Et quant à la gabelle qui se leue sur le

Ecc ij

406 DE LA SOUVERAINETE' DV ROY,
 sel, c'est vn droit qui est aussi tout Royal:
 car bien que les marais soient aux particu-
 liers, & que le sel que l'on y fait leur
 appartienne, comme il est dit *in l. magis pu-*
to. ff. de reb. cor. in l. forma. §. salina. ff. de cen-
sib. neantmoins il deuient puis apres *Iuris*
publici, sans que les particuliers le puissent
 vendre & acheter, que par l'autorité sou-
 ueraine du Prince, suiuant la distinction de
 la loy *Si quis. C. de vectigal.* C'est pourquoy
 ceste imposition est mise entre les droits
 Royaux, dit la loy *Inter publica. ff. de verbor.*
signific. & in cap. vno, qua sint regal. in feud. Et
 qui a esté en vſage, de toute Antiquité,
 comme nous l'apprenons de Plīne, *lib. 30.*
cap. 7. & de Tite Līue, *lib. 1.* qui disent que
 ce fut Ancus Martius, quatrième Roy de
 Rome, qui bastit vn certain Marché, pres
 du Tybre, pour y vendre seulement le
 sel, & qu'il defendit de l'exposer en vente
 ailleurs: & qu'en suite le Censeur Liuius,
 institua la Gabelle, pour subuenir aux frais
 de la guerre Punique, qui pour ce suiet
 fut depuis appellé *Salinator.*

Philippes le Long, ou, selon quelques-
 uns, Philippes le Bel, fut en France le pre-
 mier autheur de ceste imposition: & bien
 que du commencement il ne mit que
 deux deniers pour liure; toutesfois le sel

estant comme vn cinquième element, dont ny les hommes, ny les animaux, ne se peuvent passer, ainsi que le mesme Plin le discourt aux Liures septième & huitième & neuvième de son Histoire, l'on s'est aduisé de le charger de si grandes impositions, que maintenant on paye vingt-trois liures pour minot. Et ce qui est de plus rigoureux, c'est qu'en plusieurs contrées le sel se distribué par impost: tellement que l'on contraint d'en acheter par force, bien que l'on n'en aye point de besoin; & si il n'est pas permis de le vendre, ny de le donner à qui que ce soit, à peine d'une grosse amende.

Les emprunts, que les Roys font à leurs subjects aux occasions pressantes, ne sont aussi nouveaux: Car Plutarque recite en la vie de Camillus, que les Romains, ayans du tout épuisé leur espargne, du temps qu'ils assiegerent la ville de Vejes, les femmes Romaines portèrent tous leurs ioyaux aux Questeurs, pour fournir aux frais de la guerre. Et bien que de toutes ces leuées l'on tire des sommes immenses: Neantmoins le peuple a tousiours esté si fidelle & si affectionné vers leurs Roys, qu'il les a supportez iusques à present; avec vne submission, & vne patience in-

408 DE LA SOUVERAINETE' DV ROY,
croyable : si bien qu'on peut luy donner
la mesme loüange de fidelité, que donna
Cicéron au peuple de Sicile ; lors qu'en
l'Action quatriéme, contre Verres, il exag-
gere sa promptitude à s'acquitter de ses
deuoirs enuers la Republique : *Quando fru-
mentum, quod deberet, non ad diem dedit ? Quando
id, quod opus esse putaret, non ultro pollicitus est ?
Quando id, quod imperaretur, recusauit ?*

Et comme l'experience nous a fait voir
qu'il n'y a que les nouueaux subsides, dont
le commun peuple murmure : Aussi de-
uroit-on prendre garde de n'en point in-
troduire, que pour des causes apparem-
ment legitimes & necessaires : & suiure
l'exemple de l'Empereur Valentinian, qui
est eleué iusques au Ciel, par saint Am-
broise, de ce qu'il n'auoit iamais imposé
aucun nouueau subside sur les subiects de
l'Empire.

Mais le mal est, que depuis qu'une fois
ces impositions nouuelles sont establies :
c'est rarement qu'on les reuoque. Si bien
qu'on les peut comparer à ces Tresors des
Lacedemoniens, que Platon disoit estre
des Fosses à Lyons, qui receuoient tout,
& ne laissoient rien sortir.

Pour remedier à ces desordres il seroit
à desirer, que nos Roys voulussent imiter
l'exem-

l'exemple du Roy François premier, qui se voyant deliuré de tant de calamiteuses guerres, qui auoient affligé son Royaume, durant vne si longue suite d'années, fit dresser vn estat de la recepte de tous ses reuenus, & de la despense ordinaire & extraordinaire, qu'il auoit à supporter, qu'il lisoit tous les iours, afin de proportionner l'vne avec l'autre; & à mesure que la despense diminueoit, il deschargeoit d'autant son peuple: laissant toutesfois quelque chose de plus en la recepte, afin d'en faire vne épargne pour subuenir aux occasions: Ce qu'il pratiqua si heureusement, qu'il acquitta toutes ses debtes, & laissa dans l'Espargne, lors qu'il mourut, dix-sept cens mil escus, & vn quartier prest à recevoir.


Ce que, peut-estre, il auoit appris de l'Empereur Auguste, qui auoit tousiours en la main vn petit Liure, que luy-mesme auoit escrit, où estoit le denombrement de toutes les richesses de son Estat: combien de citoyens & d'alliez l'on pouuoit mettre en armes, combien il y auoit de Flottes & d'Armées sur pied, combien on leuoit de tributs & d'imposts en toute l'estendue de l'Empire, les frais necessaires, & les largesses qu'il estoit obligé de

410 DE LA SOUVERAINETE' DV ROY,
faire ; afin que s'il restoit quelque chose,
apres auoir fourny à toutes ces despeses,
il fust porté & conserué dans l'Espagne.

Si tous les Roys se propoisoient d'imiter ces exemples ; ils cognoistroient, avec bien plus de certitude, les necessitez de leurs Estats : ils ordonneroient leurs leuées avec plus de moderation, de iugement, & de douceur ; & ils ne donneroient point de subject à leurs peuples de se plaindre de leur gouuernement. Mais le plus souuent ils méprisent de se donner la peine de s'instruire de leurs affaires, ils s'en deschargent sur d'autres, qui n'ayans pas la mesme affection, que les Princes ont naturellement, pour le soulagement de leurs subjects, ils n'employent leur industrie qu'à inuenter de nouueaux moyens, pour tirer la substance du peuple, afin de faire paroistre à leur Maistre, que par leur bon ménage ils ont augmenté leurs reuenus. Et bien qu'ils foulent, & qu'ils oppriment les peuples sous le pesant faix des Tailles & des subsides : toutesfois ils affectent d'auoir la reputation de leur estre grandement fauorables, à l'exemple de ceux dont parle le Fils de Dieu, dans sainct Luc, chap. 22. *Et qui potestatem habent super eos, benefici vocantur.*

*Qu'il n'appartient qu'au Roy de donner immunité
& exemption de Tailles, d'Aides,
& de Subfides.*

CHAPITRE VIII.

 OMME il n'y a que le Roy qui puisse imposer des Tailles, & des Subfides, sur ses subjects : de mesme il n'y a que luy qui en puisse donner l'exemption & l'affranchissement ; suiuant la maxime, qui veut que personne n'aye l'autorité de disposer de la loy, que celuy qui l'a faicte & publiée : D'où vient que Saluste, au Liure deuxiéme de ses Histoires, appella le Priuilege, Loy, pource que l'un & l'autre prennent leur force & leur autorité d'un mesme principe. De sorte que toutes les exemptions & les immunités, qui sont comprises dans le droit Romain, & qui se lisent dans les tiltres, *De vacat. muner. & de iure immunitatis*, & ailleurs, n'ont point de lieu en France, si le Roy, de qui depend toutes sortes de graces & de faueurs, ne les donne & ne les confere.

Fff ij

Cela se pratiquoit dans la République Romaine, où il n'y auoit que le peuple qui eust la puissance d'accorder de semblables immunitéz : & il falloit encore que ce fust du consentement de tous les Ordres, & en l'Assemblée, qu'ils appelloient *Centuriata comitia*. Et depuis que la République fut changée en Monarchie, il n'y auoit que les Empereurs qui peussent donner ces Graces & ces Priuileges, comme nous en voyons vn singulier exemple dans Tite Liue, 38. où parlant de l'immunité que les Romains accorderent aux habitans d'Ilium, par le Traicté de Paix, qu'ils firent avec Antiochus, il dit que cela leur fut octroyé de l'authorité du peuple. Mais comme depuis il fut question de confirmer ces mêmes Priuileges, apres que la puissance souueraine fut deferée aux Empereurs, Tacite remarque, que l'Empereur Claudius leur donna ses Patentes, sans prendre l'auis de l'Assemblée du peuple. C'est ce que l'Empereur Theodose nous exprime plus clairement en la loy vnique, *C. de his qui à Princ. vacat. acceperunt* : où il defend à ses Officiers d'auoir égard à aucune exemption, *nisi adnotatione sua illam concesserit*. Dequoy l'on void plusieurs exemples dans les tiltres, *De excusat. muner. & de*

quibus muneribus nem. liceat se excusare. Ce qui fut tres-iudicieusement estably ; d'autant qu'il est iuste & conuenable, que le Prince souuerain ayt en sa puissance, non seulement les peines & les supplices, pour punir les melchans : mais encore les faueurs & les recompenses, pour recognoistre la vertu & les merites des hommes vertueux.

Mais les Roys doiuent prendre soigneusement garde, de ne point abuser en cela de leur puissance, & d'estre grandement retenus à donner ces Priuileges : Car soit qu'ils doiuent porter le dommage & la diminution de leurs reuenus, que causent ces exemptions, comme disent le Docteur Angelus *in l. si vnus. §. item si pactus. & §. sed si generaliter. ff. de pactis.* Et Balde au mesme lieu, & en la loy *inter debitores, eodem titulo.* & sur la loy *vacuatis, C. de decurionibus, lib. 10.* Soit que cela se remette sur les autres contribuables, comme la plupart en sont d'auis ; pource qu'autrement ce seroit donner vn frein à la puissance des Roys, comme dit Bart. *in l. 2. C. de apoth. public. lib. 10.* & Iean André *in c. peruenit. de immunit. Eccles.* & Boërius en sa Decision CCXIII. specialement lors qu'il n'est question que de priuileges temporels,

& qui finissent avec la personne, comme il est dit *in l. i. ff. de iure immunit.* Il est certain qu'en toutes ces rencontres, il en peut arriuer de notables inconueniens; pource que c'est diminüer d'autant les reuenus publics, dont le priuilege est tousiours preferable à celuy des particuliers; Ou c'est exposer le priuilegié à l'enüie des autres citoyens, sur qui doit retomber le faix dont il est deschargé: Car comme dit l'ancien Prouerbe, *Immunem ciues odere sui*, ce qui est conforme à ce beau trait de la loy *Omnes. C. Theo. de iustr. collat. beneficium quibusdam datum, plebis iniuria est.*

C'est pourquoy les Anciens n'eurent rien de plus odieux que ces exemptions & priuileges, tescmoin ce que dit Ciceron, *lib. 3. de legib. Tum lex praeclarissima, quae priuilegia tollit, maiores enim nostri, in priuatos homines leges ferri noluerunt, id est enim priuilegium, quo quid est iniustus: Iusques là mesme, que Isocrate en vne de ses Oraisons appelle vne semblable exemption, ὁμοῦ ἀπομνηστικῶς, vne loy extremement inique: D'où vient aussi qu'au Liure dixième du Cod. de Iustin. il y a vn tiltre expres, *De immunit. nemi. concedenda.* Ce que l'on deuroit pratiquer maintenant avec d'autant plus de*

sujet, que le peuple n'a esté de long-temps
 si miserable, ny si chargé de subliides, &
 que le nombre des exempts égale presque
 celui de ceux qui contribuent: Car outre
 les Ecclesiastiques, les Gentils-hommes,
 & les Commençaux, qui ont vne dignité
 annexée à leurs Offices, qui ne payent rien:
 tous les autres domestiques des Maisons
 des Roys, des Roynes, des Princes &
 Princeffes, les Officiers de la Connesta-
 blie, de l'Admirauté, des Monnoyes, les
 Gardes des Chasses, les Archers des toiles,
 les Concierges & les Jardiniers des Mai-
 sons Royales, & plusieurs autres Seigneurs:
 les Preuosts des Mareschaux, & leurs Ar-
 chers, iusques à vne certaine somme, les
 Esleus, & plusieurs autres sortes d'Offi-
 ciers, iouyssent encore de ces mesmes im-
 munitez. De façon quē tout le faix tombe
 sur la populace des champs, qui ne peut
 plus respirer sous la pesanteur de tant de
 charges & d'impositions. Ce qui deuroit
 faire desirer l'establissement d'une loy sem-
 blable à celle que fit l'Empereur Basile
 Porphyrogenete, & qu'il appella *Allilengyum*,
 par laquelle il ordonna, que pour soula-
 ger les pauvres contribuables, les plus
 riches payeroient pour eux, durant la ne-
 cessité de l'Estat, comme le rapporte Ce-


416 DE LA SOUVERAINETE' DV ROY,
drenus. Ou bien à ceste autre loy, dont
parle Tite Liue, au Liure troisiéme, qui
vouloit qu'en temps de guerre, tous les
priuileges, & toutes les immunitéz cessas-
sent, afin que tout le monde contribuast
au soulagement les vns des autres, en vne
commune misere. - Ce que les Atheniens
observerent si estroittement, que De-
mosthene en l'Oraison contre Leptines,
dit que, bien que les enfans d'Armodius,
& d'Aristogiton, pour auoir esté les au-
theurs de leur liberté, fussent exempts de
toutes sortes de Tailles: neantmoins en
telles occurrences, ils les faisoient contri-
buer comme les autres.

Mais au lieu de se seruir de ces remedes
charitables, parmy tant de calamitez, nous
ne voyons dans tout le plat pays, que
rigueur extreme; (Et i'oserois dire,) que
toute inhumanité, à l'endroit du menu
peuple. l'vse de termes vn peu rudes, mais
comme disoit vn certain Pere de l'Eglise,
Acerrime dolendum est, vbi pro omnibus dolendum.
Car apres que ces pauures gens ont esté
pillez & saccagez par les gens de guerre,
il faut encores qu'ils payent seuls toutes
les creuës qui se leuent durant les temps
miserables: D'autant que c'est alors que
tous les exempts font valoir leur priui-
lege,

lege, avec plus de puissance. On deuroit du moins considerer, que quand on leur a donné cette exemption, les tailles estoient si moderees, qu'il estoit fort aisé mesmes au plus necessiteux de les payer, sans auoir suiection de se plaindre; mais puis qu'elles sont à present augmentees de trente fois plus qu'elles n'estoient du commencement, seroit-il pas raisonnable ou de diminuer le nombre des priuilegiés au lieu de l'augmenter comme on fait tous les iours; ou de les faire porter durant la necessité de l'Estat, quelque partie de la charge, pour soulager les Payfans de la campagne, qui accablez de pauuretez & de disette sont de pire condition que les bestes, & ne meinent plus qu'une vie pleine de langueur & d'amertume? Mais il n'y a que le Roy, qui par sa prudence, & sa bonté, puisse arrester le cours de tous ces desordres.

De la difference qui est entre les biens-faits du Roy, & les priuileges qu'il octroye.

CHAPITRE IX.

 Ette question est vne dépendance de la precedente ; Car quelqu'un pourra demander , pourquoy i'ay mis en auant , que les priuileges estoient odieux , & qu'il les falloit plustost restreindre , que fauoriser ; Puisque la loy Romaine ordonnoit que les bien-fais des Princes fussent tousiours interpretez benignement : *beneficium Imperatoris , quod à diuina scilicet eius indulgentia profisciscitur , quàm plenissimè interpretari debemus , in l. 3. ff. de Constitut. Princip.* Et que nous auons de cela plusieurs exemples dans le droit Romain , comme en la loy 2. C. de bonis vacant. lib. x. Cod. & en la loy 43. ff. de vulg. sub. iusques là mesme qu'en leur faueur, l'on derogeoit à la reigle ordinaire, qui vouloit que l'on restreignist & resserrast les donations dedans leurs termes , & sans les estendre par interpretation , comme il est dit in l. cum de indebito inf. ff. de probat. & in l. si quis argentum §. sin autem C. de donat.

A quoy ie responds, que bien que les priuileges & les biens-faits des Princes ayent vne mesme origine, que neantmoins ils sont dissemblables de condition & de merite ; Car pour parler selon la verité, la pluspart des priuileges , que les Interpretes Grecs appellent fort à propos *ἰσχυρισμοί*, sont autant de violences que l'on fait aux loix publiques, dit elegamment la loy xlv. & les suiuanes ff. de legib. & in l. cxli. ff. de regul. iur. & qui ne s'otroyent iamais , qu'au preiudice, & au dommage des autres Citoyens , comme le discourt amplement Demosthene en l'Oraison contre Aristocr. & contre Timocrat.

Mais quant aux biens-faits que les Roys font pour vne fois & de leur bourse , ils sont bien d'une autre condition. Car ils prennent leur origine de la liberalité des Princes , qui est la plus digne vertu dont ils se puissent enrichir, pour se rendre recommandables parmy les hommes , & qui les fait semblables aux Dieux mesmes ; dit Pacatus en son Panegirique, *Principum nulla maior credi potest felicitas, quam fecisse felicem, & intercessisse inopia, & fortunam vicisse, & dedisse homini nouum fatum.* Dauiantage c'est par leur moyen, que les Rois

410 DE LA SOUVERAINETE DV ROY,
acquierent la bien-vueillance de leurs sub-
iects , & qu'ils lient les cœurs de ceux qui
les reçoient, d'une obligation plus estroit-
te à leur seruice ; *beneficium enim & gratia,
vincula sunt benevolentia.* Outre-plus ils ont
vne certaine vertu de faire naistre dans les
esprits vne honneste emulation , qui les
excite & les enflamme à meriter les mes-
mes faueurs , dont ils voyent que les au-
tres sont honorez par le Prince. C'est
pourquoy nous lisons que l'Empereur
Alexandre Seuer, pour exciter les coura-
ges de ses Courtisans à entreprendre de
generieuses actions, auoit accoustumé de
comblér d'honneurs & de bien-faits ceux
qui par leurs merites s'estoient rendus di-
gnes de participer à ses largesses : Et com-
me vn iour fust passé, sans que personne
luy eust rien demandé, il en fit reproche à
ceux de sa suite : voulant par cette plain-
te les exhorter tacitement, *ut digni efficeren-
tur, qui ex Principis liberalitate munera acciperent,*
dit Lampride.

Ces effects si vtils, que produisent les
biens-faits des Roys, ont esté cause, qu'on
les a tousiours autant fauorisez, que l'on
s'est efforcé de retrancher & d'abolir les
priuileges. D'où vient qu'ils ont meritè
toutes les prerogatiues, qui sont remar-

quees en la loy *cum multa, C. de bonis quæ liber.* que l'Empereur Theodose finit par ces paroles pleines de generosité : *ut enim Imperialis fortuna omnes supereminet alias, ita oportet & principales liberalitates culmen habere præcipuum* : & de les vouloir restraindre , ce seroit proprement ôter aux Roys les plus illustres moyens de faire esclatter leur grandeur & leur magnificence.

Mais ils doiuent prendre garde de ne point tomber dans l'excez : car la prodigalité fait autant haïr le Prince , que la liberalité le fait aymer par ses subiects ; elle attire sur sa teste toutes sortes de miseres, elle apporte avec soy la necessité , la necessité donne l'ouuerture à la violence, aux fausses accusations contre les innocens , aux confiscations , aux supplices , qui sont les moyens dont elle se sert pour exercer ses brigandages ; dequoy l'histoire Romaine nous donne plusieurs exemples , & entre les autres , de l'Empereur Neron , dont les largesses furent si profuses & si inconsiderées , qu'après auoir épuisé tous les tresors publics , il s'attaqua aux plus riches familles , leur ôta tous leurs biens , pour les donner aux plus perdus & aux plus infames de la ville de Rome. De façon que l'Empereur Galba voulant reme-

422 DE LA SOUVERAINETE' DV ROY,
dier à l'indigence de l'Estat que ces prodigalitez incroyables auoient causées, resolut par l'aduis du Senat, de redemander à ceux qui auoient eu part, en ces profusions, vne partie de l'argent qu'ils auoient receu; Iugeant que celuy-là n'estoit pas moins coupable du peculat, qui, sans suict & sans l'auoir merité, auoit receu en don des deniers publics; que celuy qui les auoit dérobez.

Et l'histoire remarque que cét Empereur ayant commis trente Commissaires pour faire ce recouurement, il n'en arriua qu'une risée; d'autant que tous ceux à qui Neron auoit donné, n'auoient plus rien de reste, *Nisi sola vitiorum instrumenta*, dit Tacite. Zonare escrit la mesme chose à l'Empereur Michaël, qui ayant reduit son Estat en pareille extremité, par ses largesses immodérées; son successeur Basile fut contraint d'en faire rendre la sixiesme partie.

Et nos Annales rapportent que la Chambre des Comptes fit le semblable du temps de Charles V I. ce qui donna le fondement à cette reigle fiscale: Trop donné, soit repeté.

Ce desordre incita depuis les Empereurs Romains de creer vn Officier, qu'ils appellerent *Comitem sacrarum Largitionum*, qui

présidoit à la distribution des dons qu'ils faisoient , avec charge de les faire payer , s'ils estoient raisonnables ; & de les moderer aussi , s'il y auoit de l'excez : Et mesme d'en dresser des registres publics , à fin de les leur presenter de temps à autre , pour cognoistre ce qu'ils donnoient , & qu'ils en deuissent plus retenus , comme nous l'apprenons de la loy , *Palatinos C. de palat. sac. largit.* de Cassiodore liu. VI. de Pline *in Epist. ad Traianum* , & de Hyginus *in lib. de limitib. agror.*

Mais le plus grand-mal qui arriue de cette prodigalité , c'est qu'avec le temps elle precipite le Roy dans la Tyrannie : Comme de fait il n'y eût iamais Princes plus prodigues que ce Neron , dont nous venons de parler , qu'un Heliogabale , qu'un Caligule , ny aussi de plus grands Tyrans. Car ils ne pardonnoient pas mesme aux choses les plus saintes & les plus sacrees , qu'ils rauissoient des Temples pour auoir dequoy fournir à leurs débauches , & à leurs despeses profuses.

La où au contraire , il n'y eut iamais Empereurs plus espargnants , que les deux Antonius , qu'Alexandre Seuer , que Trajan & que Vespasian , ny aussi de meilleurs Princes. Il ne faut iamais accoustu-


424 DE LA SOUVERAINETE' DV ROY,
mer les subiects à receuoir à tous mo-
ments des largesses & des liberalitez;
d'autant que puis apres ils ne se portent
plus au seruice de leurs Princes par affe-
ction, mais par l'esperance du profit; Ils
ne demeurent constans en leur deuoir,
que durant qu'ils participent à leurs pro-
fusions, se rendants semblables aux mous-
ches, qui suiuent le miel, dit Senecque,
au Corbeau qui suit la charongne, & au
larron qui poursuit le marchand. C'est
pourquoy Philippe de Macedoine voyant
que son fils Alexandre espuisoit indiffe-
remment ses finances à enrichir ceux de sa
suinte, luy disoit : *Qua stolidi ratio te ad hoc in-*
duxit, vt putares eos tibi fideles futuros, quos pecunia
corrupisses? nunquid hac agis, vt Graci te reputent
non eorum regem, sed ministrum & distributorem?
& profecto peior efficitur qui recipit: comme
Ciceron le rapporte au 2. de ses Offices:
Et dequoy nous auons veu vn exemple
deuant nos yeux en la personne de Henry
I. I. qui fut le plus liberal Prince de son
temps, & le plus mal seruy de ceux qu'il
auoit comblé d'honneurs & de richesses.

C'est pourquoy les Rois doiuent estre
grandement retenus, quand ils oëtroyent
des dons & des priuileges à leurs subiects;
puis qu'ils causent de si grandes ruines
dans

dans les Estats : Il faut que leur liberalité soit comme vn Sanctuaire , où personne ne puisse auoir accez que par la porte de l'honneur & du merite.

*Du Fisque , & de son droict de Proto-praxie ou
Preferance : Et d'autres Priuileges ,
qui luy appartiennent.*

CHAPITRE X.

'Est vne maxime que l'on a tenuë de tout temps, qu'il n'y a que le Prince Souuerain, qui aye le droict d'auoir vn Fisque, c'est à dire , vne bourse & vne espargne publique : D'où vient qu'Isidore au liure 20. des Origines, & les gloses de Palemon, le nomment *Promptuarium & Marsupium Caesaris*. Les Perses, & les Hebreux, *Gazam Principis*, comme le remarque Diodore le Sicilien au liure 17. de ses Antiquitez. (Aussi parmy les Romains il n'y auoit que l'Empereur qui peüt s'attribuer ce Priuilege. C'est pourquoy quand le Iurifconsulte Paulus parle en la loy penult. *ff. de Priuilegiis cred. de repub. creditr. ce, qua omnibus creditoribus chirographariis praefertur*, c'est de la Republique Romaine; que cela se doit entendre, c'est

Hhh

426 DE LA SOUVERAINETE' DV ROY,
à dire de l'Estat public de l'Empire, qui
auoit deux sortes de reuenus : l'un qui e-
stoit affecté pour subuenir aux charges de
l'Empire , qu'ils appelloient *Ærarium* : &
l'autre qui estoit destiné pour l'entretene-
ment du Prince: ce qu'ils nommoient *Fis-
cum*. Mais depuis que ces deux sortes
de Domaines furent meslez & confondus
ensemble comme ils sont maintenant en
France, toutes ces natures de deniers &
de reuenus furent compris sous ce mot de
Fisque.

Et bien que dans l'Antiquité Romaine,
il y eust de certaines Villes celebres qui
iouyssoient du droict de Fisque , ou de
Bourse commune , & du Priuilege de Pro-
to-praxie ou de Preference : comme celle
d'Antioche & de la Colonie d'Apamee ,
celles de Pont & de Bithinie : Toutesfois
elles n'auoient cette prerogatiue que par la
concession expresse du Prince, ainsi qu'on
le peut induire, de l'Epistre 13. que Pline
le leune escriuit sur ce subiect à l'Empe-
reur Trajan , *Quid habere iuris velis , & Bithi-
nas & Ponticas ciuitates , in exigendis pecunijs
quæ illis debentur , rogo Domine , rescribas. Ego in-
ueni à plerisque Proconsulibus concessam eis Proto-
praxiam , eamque pro lege valuisse , existimo tamen ,
pro tua prouidentia constituendum aliquid , quæ sunt*

ab alijs instituta , licet sapienter sint indulta , breuia tamen & infirma sunt , nisi illis tua contingat auctoritas. En France il y a plusieurs villes, qui par la permission du Roy ont vne bourle commune , mais cela ne se doit pas appeller Fisque : & si elles n'ont point le Priuilege de preference.

Et l'on doit remarquer que le Fisque, qu'auoient les Empereurs Romains, estoit composé des biens des criminels, des successions-cadueques, & de celles qui estoient laissées a des personnes indignes, des Tresors trouuez, des ventes de choses litigieuses, des peines stipulees par les contractés au profit du Prince, des amendes, & d'autres choses semblables; qui sont descriptes en la loy-1. *ff. de iure fisci*. Mais en ce Royaume, ce que nous appellons Fisque, comprend tout ce qui est deub au Roy, sous quelque nom, & tiltre que ce soit. Pour ce qui est des Priuileges, dont le Fisque iouyt, que nos Iuriconsultes appellent fort à propos *Exceptiones Regias*, ce sont les mesmes qu'auoit le Fisque Romain. Le principal consiste en la preference qu'il a sur tous les biens de ceux qui contractent avec le Roy; & qui luy sont obligez, bien que cela ne soit point déclaré par le contract, comme il est dit en

418 DE LA SOUVERAINETE' DV ROY,
la loy 2. C. *ex quibus causis pignus vel hyp. itur.*
ex. d'où l'on a tiré cette maxime que *Fiscus*
semper habet ius pignoris, par le moyen de
l'hypothecque tacite, que la loy luy donne,
& dont le plus grand fruit consiste
en cette preference contre tous les autres
creanciers chirographaires, bien qu'ils
soient les premiers en date; iusques là
mesme que si apres auoir fait la discution
des biens du debteur il se trouue insolua-
ble, le Fisque peut en vertu de ce Priuile-
ge, se faire rendre par le creancier chiro-
graphaire tout ce qu'il a receu aupara-
uant cette discution, comme il est dit, *in l. 5. C.*
de Priuil. Fiscii. & *in l. 18. §. ult. ff. de iur.*
fiscii. Mais l'on doit remarquer que le
Fisque ne peut se seruir de ce Priuilege de
preference contre les creanciers hypote-
caires qui sont plus anciens en date;
pource que la reigle commune veut que
celuy *qui in pignore prior est tempore, sit iure po-*
tior. Toutesfois c'est avec cette condition,
que bien que l'hypothecque du Fisque soit
tacite, qu'elle est neantmoins tousiours
preferee aux hypothecques expressees des
autres creanciers, si elle est la premiere en
datte: l'on doit remarquer neantmoins
que par le droit Romain, le Fisque estoit
preferé en de certaines rencontres aux

creanciers hypothecaires , bien qu'ils fussent plus anciens , comme par exemple quand le Primipile , qui auoit la charge des viures des armées , venoit à estre debteur du Fisque , à cause de l'importance du subiect , il estoit tousiours preferé à tous les autres creanciers , quoy que precedents , ainsi qu'il est dit *in l. 4. Cod. de Princip. lib. 2.* Et cette debte estoit si priuilegiée que l'on contraignoit le fils de la payer , bien qu'il eust renoncé à la succession de son Pere , la femme n'estoit point receuë à demander ses deniers dotaux , & que mesme l'on desnioit toutes sortes de compensations , comme il est dit , *in l. aufertur §. compensationem , ff. de iure fisci.* bien qu'il fust permis d'en vser contre le fisque en d'autres occasions.

Le fisque iouyt en France du mesme aduantage , contre ceux qui ont retenu les deniers qui estoient destinez pour l'achat des munitions de l'armée : iusques là mesme qu'on luy a donné la preference contre la femme , sur les biens affectez à ses deniers dotaux , sans y comprendre ses biens paraphernaux.

Je sçay que quelques Docteurs ont tenu que hors ces occasions que le fisque & la femme *in vicem æquo iure prebantur* , quoad

430 DE LA SOUVERAINETE' DV ROY,
tacitam hypothecam, suiuant la loy, *quamuis cod. de priuileg. fisci* & par l'argument qu'ils tirent de la loy, *Si fundum C. qui potior in pigno*. Neantmoins plusieurs autres ont esté d'opinion contraire, & ont soustenu que le fisque estoit tousiours preferable, d'autant que l'on fauorise tousiours le public:

Mais il me semble que ceux-là ont mieux rencontré, qui ont apporté cette distinction, que le fisque deuoit estre tousiours preferé aux choses onereuses, & non pas aux lucratiues, qui en ces occasions ne merite aucune faueur. D'où vient que Capitolin remarque que Marcus Antoninus, ne soustenoit iamais la cause de son fisque en de semblables rencontres. *Numquam*, dit-il, *Marcus Antoninus in causis compendii, fisco iudicans fauit.* C'est pourquoy Pline disoit à Trajan en son Panegir. *Qua præcipua gloria tua est, sapius vincitur fiscus, cuius mala causa est numquam, nisi sub bono principe.* Et c'est l'interpretation que l'on doit donner à la loy, *non puto ff. de iure fisci*, qui dit: *Non puto delinquere cum*, qui in dubiis questionibus contra fiscum facile responderet. Car en d'autres occasions, il n'y a point de doute que l'on doit tousiours iuger en faueur du fisque contre les particuliers, suiuant la disposition de la loy, *Imperat. ff. de re*

indic. bien qu'e plusieurs se fondans sur ceste loy *Non Puto*, soient d'avis qu'en nombre egal d'opinions, l'on doit tousiours fauoriser les particuliers contre le fisque.

Je rapporteray en suite, quelques decisions notables de plusieurs questions difficiles, qui ont esté agitees de mon temps au Parlement touchant ceste preference du Fisque. La premiere qui se presenta ce fut d'un certain, qui auparauant que d'auoir contracté avec le Roy, s'estoit obligé à vn particulier avec stipulation d'hypothecque sur tous ses biens, tant presens que futurs, ce debteur apres auoir acquis plusieurs possessions vint à deceder, le Fisque & le creancier particulier ayans fait saisir tous les biens du deffunct, ils tomberent en different à qui auroit la preference sur les biens que leur commun debteur auoit acheptez, depuis le contract qu'il auoit faict avec le Roy.

Car le creancier soustenoit auoir la preference, & se fondoit sur son contract, qui estoit en datte deuant celuy que le Roy auoit faict avec le debteur, & sur la stipulation expresse de l'hypothecque, tant sur les biens presens que aduenir, que la loy ne reprouuoit point.

A quoy le Fisque repliquoit que cette

432 DE LA SOUVERAINETE' DV ROY,
stipulation, sur laquelle le creancier a plu-
stost sa preference, ne pouuoit auoir son
effect que du iour que les biens auoient
esté acquis. Et que luy au contraire l'a-
uoit du iour de son contract; & que
partant il deuoit estre preferé. Cette que-
stion ayant esté fort agitée de part &
d'autre, enfin le Fisque emporta la prefe-
rence, par la distinction que ie fis en-
tre l'hypothecque tacite, que la loy don-
noit, & celle qui ne prouenoit que du
contract; qu'il estoit certain que le Fis-
que en vertu de l'hypothecque tacite que
la loy donnoit sur les biens que son déb-
teur a acquis, depuis l'obligation qu'il
auoit contractée avec le Roy, auoit la
preference, & que c'estoit ce que vou-
loit dire Vlpian; *Fiscum præuenisse causam pi-
gnoris*: en la loy 28. *si quis ff. de iure fisci*,
ce que l'on ne pouuoit pas dire de l'hy-
pothecque contractuelle que le creancier
auoit stipulé: pource qu'elle n'auoit point
d'effect sur les biens futurs, que du iour
de l'acquisition des biens, & que par con-
sequent le Fisque deuoit estre preferé. Ce
que l'on peut dire auoir lieu, aussi *in pupi-
lo*, *in dote*, & en toutes les autres rencon-
tres, ou la loy donne l'hypoteque tacite.

La seconde question que j'ay veu trait-

re

ter au mesme Parlement estoit , sçauoir si
 vne terre acquise des deniers du Roy , par
 vn Recepueur general des Finances , appar-
 tenoit au Roy : & s'il pouuoit de plain
 droit s'en emparer. Ceux qui tenoient l'af-
 firmatiue disoient , que puis que les pupil-
 les , & mesmes les gens de guerre iouys-
 soient de cette faueur suiuant la disposition
 dela loy 7. ff. *qui portior in pignore*. Et de la loy,
Si vt proponis. C. de rei vindic. Que l'on deuoit
 aussi l'accorder au Fisque , qui estoit d'au-
 tant plus priuilegié , que comme dit Plin
 le ieune , *oportet priuatis vtilitatibus publicas , &*
mortalibus aternas anteferrè. Ceux au contrai-
 re qui tenoient la negatiue , mettoient
 en auant , qu'il ny auoit point de loy ,
 qui determinast cette difficulté ; Et qu'il
 n'estoit pas a croire , que si les Emp.
 & tant de Iurisconsultes , qui les as-
 sistoient en leurs Conseils , eussent eu des-
 sein de donner ce priuilege au Fisque ,
 qu'ils en eussent faict quelque Ordon-
 nance expresse , comme ils l'auoient
 fait pour le Pupille , & pour le sol-
 dat ; n'ayans rien obmis de ce qu'ils a-
 uoient estimé estre necessaire pour fauori-
 ser le Fisque.

Dauantage ils disoient que la condition des
 Pupilles & des gens de guerre , estoit dif-

434 DE LA SOUVERAINETE' DV ROY,
ferente de celle du Fisque : Pource que
c'estoit le profit du pupille & des gens de
guerre , qui sont sujets à estre trompez
& volez, d'auoir leurs biens en fond; qui
ne peut se perdre, ny se dissiper si facile-
ment que les mailles & les deniers con-
tans. Et que pour cette raison , la loy
chargeoit les tuteurs de les employer en
achapt de terres , ou de maisons : Là où
au contraire c'estoit l'auantage du Fisque
d'auoir de l'argent , pour pouuoir sub-
uenir plus promptement & avec plus de fa-
cilité au depenses publiques, defrayer les
armées , & payer les soldats qui ne re-
çoient point leurs soldes en heritages,
mais en deniers comptans. Et que par-
tant il pouoit seulement demander ses
deniers , ou se pouruoir sur l'heritage en-
vertu de son hypoteque priuilegiée ; &
non pas s'en emparer : ce qui fut iugé de
la sorte contre ceux qui tenoient l'affir-
matiue.

J'ay veu obseruer encore , que le priui-
lege d'hypothèque tacite dont iouit le
Fisque , se peut ceder à celuy qui a payé
le Roy de ses deniers à l'acquit d'un au-
tre ; Car bien que par l'ancienne iuri-
prudence , il fut necessaire d'auoir vne
cession expresse par l'argument qu'on tire

de la loy *Soluendo*, ff. de negot. gest. & de la loy, cum alter C. de fideiuss. & de la loy. 1. C. de his-qui in prior. cred. locum succed. Depuis neantmoins pour faciliter les affaires du Prince, l'on a ordonné que la cession tacite estoit suffisante pour se preualoir de ce priuilege: Et que celuy qui auoit payé le fisque pour vn autre, s'en pouuoit seruir, pour se faire rembourser par les mesmes contraintes que le Fisque, comme il est dit in l. 2. ff. de cess. bonor. l. 24. §. 1. & 2. ff. de bon. auct. Ind. possid. Specialement quand celuy qui paye, est fideiussieur du debteur, ou detenteur d'hypothèque, comme il est dit in l. 28. ff. mandati. Neantmoins pour plus grande seureté de celuy qui paye pour vn autre, i'estime qu'il se doit faire subroger aux droits du Roy par le Iuge, vt hoc fisci priuilegium, ei à Iudice transcribatur, comme il est dit in l. 3. & ult. Cod. de priuil. fisci. Dauantage le fisque est tousiours preferé sur les Officiers comptables, pour la seureté des deniers de leur administration: Pource qu'ils seruent de gage & de speciale assurance des deniers du Roy: Iusques-là qu'il esuite contre le tiers detenteur de l'Office qui a esté pourueu par la resignation du

436 DE LA SOUVERAINETE' DV ROY,
debteur. Et l'on ne doit point recevoir ce resignataire en l'exercice de sa charge, qu'il n'ait fait apparoir du quit-tus de son resignant, qui est vne exception notable de l'article 95. de la Coustume de Paris, qui n'a point de lieu contre le Fisque: D'autant qu'on ne peut luy imputer aucune negligence, comme aux particuliers: Pource qu'il est contraint en ces affaires, *vi vicaria opera*. Et bien que le Roy aye donné sa provision au resignaire: Neantmoins cela se doit tousiours entendre sauf son droict:

Ce privilege du Fisque se communique aussi à ceux qui sont assignés sur ces mesmes Officiers: tant pource qu'ils succedent à son droict, que pource que s'ils ne sont point payés par les Officiers, le fisque demeure tousiours leur debteur. Toutesfois cela n'a de lieu que pour les deniers de leur charge: & non pas pour les amendes a quoy les Officiers ont esté condémnez pour quelque cause que ce soit: *in sortis enim quantitate, fisci conditio prior est; sed in eo quod Pana nomine adiectum est propria forma servanda est*, dit la loy vnique: *C. panis fiscal. credit. pref. lib. 10.* qui est la maxime de la loy, *in summa ff. de iure fisci*.

Et l'on doit observer que parmy les

Romains , toutes ces questions se traittoient pardeuant celuy , qu'ils appelloient *Præfectum ærario* , comme dit la loy, *Arrianus. ff. de Iure fisci* , ou deuant les Procureurs de Cæsar , quand de semblables differents se rencontroient dans les Prouinces. Et parmy nous , quand le Roy intente quelque procès pour les debtes de de son Domaine , il agit deuant le Iuge ordinaire ou aux Parlements. Et si les differents viennent pour des debtes d'aides , de tailles , de gabelles , ou de restes des Officiers comptables , ils se vident en la Cour des Aides. Et l'on doit remarquer que le Roy a ce priuilege , qu'en quelque lieu que ce soit qu'il agisse , il ne plaide iamais que sous le nom de ses Procureurs. Car bien que les particuliers se seruent de Procureurs en la poursuite de leurs affaires : Neantmoins c'est en leur propre & priué nom qu'ils plaident , & qu'ils sont condamnez. Ce qui ne s'obseruoit pas parmy les Romains ; d'autant que le droit des douze Tables , tout le monde estoit contraint de venir luy-mesme en iugement deffendre sa cause : Et personne n'estoit receu de plaider par Procureurs , si ce n'estoit que le peuple fust en cause , ou qu'il s'agit de

438 DE LA SOUVERAINETE' DV ROY,
la liberte d'vne tutele , *vel furii ex lege*
Hostilia , *eorum nomine qui apud hostes essent* ,
aut qui Reipub. causa abessent , comme Iu-
stinien le remarque au tiltre *de his per*
quos agere possumus. Les Reines & le Prin-
ce du Sang qui doit succeder à la Cou-
ronne , iouissent aussi du mesme priuile-
ge de plaider par Procureurs : Pource que
l'on a iugé que ce seroit chose indigne
& honteuse , de voir vn Roy & ses
personnes qui luy sont proches estre con-
damnés en leur nom. Ce que peut estre
l'on a introduit parmy nous , sur ce que
l'on prattiquoit à Rome , où toutes les
personnes illustres auoient cette mes-
me prerogatiue , tant en demandant ,
qu'en defendant , soit en matieres ciuiles
ou criminelles , suiuant l'Ordonnance des
Emper. Valent. Theodose & Arcadius , en
la loy *Quicumque* , *de Procuratorib.* Dequoy
la Nouell. 71 chap. 1. nous donne la
raison. *Ne cogantur si presentes litigauerint* , *aut*
sedere cum iudicibus dum iudicant , *aut stare rur-*
sus tanquam litigantes , *cum vtraque causa videat-*
tur incauta , *aut dignitatibus iniuriam sustinentibus* ,
aut Judiciali schemate indignè procedente ; c'est à
dire en vn mot , de peur qu'en la pro-
cedure , en la prononciation du iugement ,
& en son execution l'on ne fist quelque


acte qui peust bleſſer l'honneur de ces grandes dignitez. C'eſt pourquoy Pline le ieune reſmoigne que durant qu'il fuſt Tribun, il ſ'abſtint du bareau. *in Tribunatu*, dit-il, *abſtinui cauſis agendis quod deformè arbitrabar cui loco cedere omnes oporteret, his omnibus ſedentibus ſtare.* Et comme à Rome les Empereurs auoient de deux ſortes de Procureurs & d'Aduocats, les vns qui *καθολικοι* dicebantur l. 5. ff. de iure fiſci, & les autres particuliers; & que ceux là apres auoir ſeruy le temps qui eſtoit preſent par les loys, pour recompence de leurs trauaux eſtoient eleuez en la dignité de Comte du ſacré Conſiſtoire, qui leur ſeruoit comme de degré pour monter à des charges plus eminentes, ainſi qu'il ſeroit par tout le tiltre de *Officio Procur. Caſaris*. De meſme nos Roys ont des Procureurs generaux en toutes les Cours ſouueraines, & des particuliers dans les Prouinces, & les Bailliages, qui ſont ſubſtituts des autres. Et l'on voit que nos Roys pour authoriſer d'auantage leurs charges, & les encourager à ſ'acquitter dignement de leur deuoir, ont de couſtume de les honorer du tiltre de Conſeiller d'Eſtat.

Et l'on doit obſeruer, que leur interuention en toutes les cauſes fiſcales eſt tellement neceſſaire, que les ſentences qui

440 DE LA SOUVERAINETE' DV ROY,
font données sans eux sont nulles &
sans effect ; Ce qui est aussi veritable
pour les decrets, ou le Procureur du
Roy ne s'est point opposé, pour la con-
seruation de la debte du Roy ; suiuant
la disposition de la loy derniere , C. de
Aduocat. fisci, & de la loy 14. *De Appellat.*
C. Theodoziano : Pource qu'il n'est pas
raisonnable, que tandis que le Roy est
occupé à veiller pour le salut de tout
son peuple, que la paresse & la negli-
gence de son Procureur luy puisse nuire
& luy apporter vn tel dommage. Et
c'est pourquoy l'on a resolu, que mesme
la peremption d'instance, n'auoit point de
lieu contre sa Majesté.

*De la saisie Royale, & comme l'on entend ce qu'on
dit communément que le Roy plaide la
main garnie.*

CHAPITRE XI.

 'Est vne chose constante; qu'en deux cas il est permis au Prince de commencer par saisie, lors qu'il intente vne action contre quelqu'un. Le premier est, lors qu'en matiere feodale, il agit contre son Vassal, à faute d'homme, droits, & deuoirs non faits & non payez: Pource que s'estant re-reu le Domaine direct, il peut de luy mesme r'entrer dans sa chose, s'il n'en est pas seruy selon les conditions portées par son inuéstiture; & ce droict luy est commun avec tous les autres Seigneurs de Fief. L'autre est, quand il est question de reünir au Domaine de la Couronne, ce qui doit y retourner apres l'Apanage finy, l'usufruit, où le douaire esteint: Comme il est dit en l'Ordonnance de Moulins, de l'an 1566. art. 14. Et c'est proprement en ces deux rencontres, qu'on dit que

K K K

442 DE LA SOUVERAINETE' DV RÔY;
le Roy doit plaider la main garnie , quand
il arriue qu'on luy forme quelque opposi-
tion.

Mais hors ces occasions , si le Roy
auoit quelque chose à demander sur vne
terre, ou sur quelque autre bien : Il ne se-
roit pas iuste de commencer par l'execu-
tion , & d'en chasser celuy qui en auroit
la iouissance , comme il est dit *in l. prohibi-
bitum , & in l. defensionis facultas. C. de iure
fisci , lib. 10.* qui veulent que le Fisque sui-
ue les formes ordinaires de la iustice , *de-
fensionis facultas* , dit l'Empereur Constantin,
*danda est his , quibus aliquam inquietudinem fis-
cus. infert : cum bona eorumdem adhuc controuersia
pendente , describi fas non sit.*

Aussi certes , ç'a tousiours esté la gloi-
re des grands Princes , & vne des princi-
pales marques de la felicité de leurs re-
gnes , d'auoir assujecti leur Fisque aux re-
gles de la Iustice ; C'est pourquoy Pline le
ieune , voulant descrire les vertus heroï-
ques de Trajan , le louë principalement,
que de son temps l'on plaidoit contre le
Fisque & contre sa Majesté , avec la mes-
me assurance que contre les particuliers.
*Quod actori atque etiam Proturatori eius diceba-
tur , in ius veni , sequere ad Tribunal :* D'où
vient qu'ils establirent cette Saincte ma-

xime, *fiscus utatur iure privati*, & *parsi passis cum privatis ambulet*, dit la loy. 1. C. de *petit. hered.* la loy. *Quod placuit.* ff. de *iure fisc.* & la loy, *quoniam*, C. de *conueniend. fisc. debitoribus.* l. 10. Et de fait, en ce temps-là l'on trouuoit tres-mauuais, lors qu'on mettoit les pannonceaux ou les armes des Empe-reurs, sur les heritages des particuliers. Et l'on voit plusieurs constitutions, qui de-fendent expressement cette sorte de vio-lence : C'est pourquoy Sainct Gregoire escriuant à l'Empereur Constantin, prit sujet de se plaindre d'un certain Stepha-nus, de ce qu'au nom du Fisque il s'empa-roit des heritages des particuliers. *Et titu-lus imponeret indicta causa.*

Nos Roys n'ont pas esté moins rete-nus en cela, que les Empereurs : Car nous voyons que par l'Ordonnance de Philip-pes de Valois de l'an 1344. qui est inserée dans le stile du Parlement, qu'ils ne trou-uoient pas bon que leurs Procureurs Ge-neraux se missent en possession des heri-tages, auant que le procès fust entiere-ment iugé : *hoc in posterum valitura constitutione sancimus*, dit-il, *ut si Procurator noster amodo voluerit, vel mouerit litem super re quacumque con-tra possidentem, non turbetur possidens, nec ad manum nostram res litigiosa ponatur, nisi prius*

444 DE LA SOUVERAINETE' DV ROY,
causa cognita ; En quoy ils suiuiuoient exacte-
 ment les reigles communes de droit , qui
 veulent , que *litte pendente qui possidet , in sua pos-*
sessione turbare non debeat *ipr l. 1. §. sui autem C.*
communia de manumiss. & *in l. si Seruus, ff. quod*
cum eo qui in die , & in l. fin. C. de ord. cognit.
 Et qui deffendent sur tout de commencer
 par l'exécution : Pource que toutes les sai-
 sies & les sequestrations sont odieuses ,
 dit la loy. *Si cum nulla, ff. de re iudic.* & tout
 le tiltre de *prohib. sequestrat. pecu.* Aussi nous
 voyons que la Cour de Parlement a tou-
 jours reprouué cette violente façon de
 proceder : Specialement depuis ce so-
 lemnel Arrest de l'année 1298. Par lequel
 elle donna main-leuée au Comte d'Alen-
 çon de la terre de Montegu , qui auoit
 esté saisie sur luy , à la requeste du Procureur
 General du Roy , durant la question, si
 cette terre dépendoit du Roy , ou de luy :
 & dont il estoit en possession lors qu'on la
 faisoit.

Mais l'on pourra demander , si vn Pro-
 cureur du Roy voyant que quelqu'un pos-
 sède des droits , qui sont reseruez seule-
 ment au Prince à cause de sa Souueraine-
 té , ne peut pas d'abord les faire saisir , at-
 tendu l'incapacité notoire de celuy qui en
 a la iouissance ? L'on peut resoudre cette

difficulté, par la difference qu'il y a, entre les droits qui ne peuuent subsister qu'en la seule personne du Roy; Comme parexemple la regale, le dernier ressort, & les autres semblables, que les Docteurs remarquent in *l. Legatus. ff. de offic. Presid.* Et ceux que le Roy peut octroyer à d'autres; Car pour le regard de ceux-là, comme ce seroit à vn particulier, non seulement vne temerité, mais vn crime, & vn mauuais augure de s'en approprier l'vsage & la iouissance, ainsi que ces Anciens voulurent faire cognoistre, lors qu'ils condamnerent à la mort celuy qui s'estoit endormy dans la chaire de Cyrus. Et cét autre encore, qui pour sauuer de naufrage le diademe d'Alexandre, l'auoit mis sur sa teste. Aussi n'y a t'il point de doute qu'en toutes ces occasions, les Procureurs du Roy & tous les Officiers, ne soient bien fondés de faire tous leurs efforts, pour en oster la possession à ceux qui les ont vsurpés.

Mais quant aux autres droits, que le Prince peut donner à d'autres; comme le droit de leuer peages sur les fleuues & sur les grands chemins, d'edifier en vn lieu public, & les autres semblables: l'estime qu'en ces rencontres, l'on ne peut pas commencer par la saisie: mais que l'on

446 DE LA SOUVERAINETE' DV ROY,
doit auparavant appeller le detenteur
pardeuant le Iuge royal du lieu , a fin de
rapporter les tiltres en vertu dequoy il
iouit des droits contentieux ; & en cas de
refus , il est permis alors de proceder
par saisie.

Or que le Roy ne soit bien fondé en ce
cas de demander l'exhibition des tiltres,
cela ne reçoit point de difficulté ; Car bien
que telle procedure ne se pratique point
entre les particuliers, suiuant la disposition
de la loy , *cogi, C. de petit. heredit.* Toutesfois
quand le Roy agit luy-mesme, cela luy est
permis, comme estant vn des droits de sa
Souveraineté , ainsi qu'il est dit *in l. 1. & ff.
de eden.* Et d'autant aussi que ceux qui possie-
dent les choses qui dependent immédia-
tement du Roy , *videntur possidere contra ius
commune.* Et les Canonistes ont introduit
ces mesmes formes, lors qu'ils veulent agir
contre les Laïques qui detiennent les dix-
mes de l'Eglise : Pource qu'auant que de
passer outre au iugement du fond , on les
contraint de rapporter les tiltres , en ver-
tu dequoy ils sont en possession ; & en cas
de refus, on les depossede suiuant la dispo-
sition du chapitre *ad Decimas de restitut. spo-
liator.* Et le chap. *Ordinarij. de Offic. ordin. lib.
6.* La Cour de Parlement a tousiours esté

soigneuse de conseruer ce priuilege au Roy; comme elle fit paroistre lors qu'en l'année 1544. elle decerna vne Commission, pour faire appeller tous ceux qui leuoient des peages iur la riuiera de Loyre, à fin d'apporter dans certain temps les lettres, en vertu dequoy ils en iouissoient, à peine d'en estre priuez.

Hors ces cas singuliers, ie tiens qu'en toutes les autres rencontres, ou le Roy peut auoir quelques pretentions, comme d'hypothèque ou de semblables; il luy fera tousiours tres-glorieux, que ses Procureurs s'y comportent selon les voyes ordinaires de la Iustice, & qui ont accoustumé d'estre obseruées entre ses sujets, suivant cette gracieuse parole de l'Empereur Iulian, que Ammian Marcellin rapporte au liure 23. *Se aquare iura fisci cum priuatis;* qui est semblable à celle des Empereurs Theodose & Valent. in l. ult. C. Theodo. de appellat. *salua Majestatis nostræ reuerentia; ius nobis cum priuatis non dedignamur esse commune.*

*Des droits que le Roy a sur les biens vacans
par desherance ou autrement.*

CHAPITRE XII.

VN Ancien eut quelque grace de dire , qu'on voyoit bien des Roys sans Royaume: mais qu'on ne voyoit point de Royaumes sans Roys. L'on peut dire de mesme , qu'on void bien des Seigneurs qui sont sans terre , mais qu'il ne se void gueres de terres sans Seigneur. Car si tost que l'un l'abandonne , l'autre s'en saisit; s'il a un heritier , il luy succede; & s'il n'en a point , le fisque entre en sa place; c'est ce que nous appellons communément desherance; c'est à dire le droit qu'à le Roy de succeder à quelqu'un qui n'a point d'heritier legitime, ny testamentaire.

L'on a introduit ce droit parmy nous, sur l'exemple de ce qu'on pratiquoit à Rome; Pource que dès le temps de la republique , l'on faisoit vendre à l'encan les successions vacantes , & les deniers qui en prouenoient estoient portez
en

en l'espargne publique. Et depuis les Empereurs les appliquèrent à leur profit, *ut vacans & caducum patrimonium*, comme il est dit *in l. 1. §. Diuus ff. de iure fisci, l. 1. & 4. C. de bon. vacant. in l. penult. C. de Prapos. sac. cub.* & en plusieurs autres lieux, Strabon mesme fait mention de l'usage de ce droit, où il parle d'un certain Officier, qu'il appelle *ἰδιωλόγων*, qui estoit estably dans l'Égypte, pour rechercher les successions vacantes au profit de l'Empereur de Rome. Suctone nous en donne la mesme preuve, lors qu'il dit que l'Empereur Titus, ayant succédé aux terres, qui estoient demeurées sans maistres apres l'incendie du Mont de Vesuve, il les redonna à d'autres particuliers, pour reparer les villes qui auoient esté ruinées par ce grand embrasement.

Et qui est celuy qui ne sçache que le Roy a la mesme puissance, & jouit des mesmes droits dans son Royaume, que l'Empereur pretend luy appartenir dans l'Empire? Et que par conséquent sa Souueraineté luy donne le pouuoir de se mettre en possession des terres abandonnées, & qui demeurent sans Seigneur; comme font les Roys de Castille, de

450 DE LA SOUVERAINETE' DV ROY,
Portugal , de Polongne , de Hongrie ;
d'Angleterre , & tous les autres Princes
Souuerains dans leurs Estats , ainsi que
nous l'apprenons de leurs Ordonnances.
Et neantmoins les Officiers du Roy ont
esté si negligens à conseruer ce droit,
que sa Majesté maintenant n'en a la iouis-
sance , que dans les terres qui sont de
son Domaine , & dans les lieux où les
Coustumes le disent en termes exprés ;
Car par tout ailleurs ils ont laissé vsur-
per ce droit par les hauts Iusticiers ; avec
la mesme conuiuece qu'ils auoient to-
leré ces entreprises , pour les droits d'au-
baine & de bastardise ; Si la Cour de
Parlement de Paris n'y eût remedié par
son Arrest general de l'an 1585. Mais el-
le eust merité plus de loüange , si elle
eust ordonné la mesme chose , pour le
droit de des-herance ; & les autres droits
qui ont esté vsurpés par les hauts Iusti-
ciers , ainsi qu'elle l'auoit autresfois iu-
gé par vn Arrest de l'an 1292. qui se lit
reg. 2. fol. 101. en ces termes : *Quia filij*
Bassi , non inueniebatur aliquis heres de parte
Patris , pronuntiatum fuit , quòd bona mobilia
ipsius filij ex latere patris prouenientia , tanquam
vacantia ad dominum Regem pertinerent , & non
ad alium.

Cat de dire que la desherence soit vn des fruits , & des emoluments de la Iustice , c'est vne proposition ridicule ; pource que proprement les profits de la Iurisdiction , ne consistent qu'aux confiscations , & aux amendes , comme les Docteurs le traittent sur la loy *f. ff. sol. matr.* D'où vient que Ioannes Faber sur le §. *f. de rer. diuis.* & Benedicti sur le ch. *Raynurius* , verbo *Vxorem* , num. 370. reiettant cette raison , blasment de temerité & d'iniustice l'ysurpation que les hauts Iusticiers ont faicte de tous ces droits. Et specialement de celuy de desherence , comme estant tout Royal.

Voyons maintenant quand , & apres quels degrés de parenté le Roy le peut pretendre. La loy Romaine mettoit difference *inter agnatos & cognatos* : voulant que ceux-là succedaient iusques au dixiesme degré ; & ceux - cy iusques au septiesme ; comme dit Iustinian au §. *f. Instit. de cognator. successionem* ; Et ie croy que la raison de cette difference estoit , que ceux-là meritoient plus de faueur , que les autres : pource qu'ils conseruoient le nom des familles. Apres ces degrés , ils ne reconnoissoient plus de parenté : & le fisque de l'Empire recueill-

452 DE LA SOUVERAINETE' DV ROY;
loit la succession du defunct , fuiuant la
responſe de Modestinus , in l. non facile,
ff. de gradib. affin. & de Paulus lib. 4. ſentent.

Quelques cas ſont exceptés de cette
loy , où le fiſque n'attendoit pas vn ſi
long temps à ſe mettre en poſſeſſion des
biens vacants. Car en la ſucceſſion des
enfants naiz d'vn mariage inceſtueux ,
l'Empereur y ſuccedoit apres le troiſieſ-
me degré , l. ſi quis inceſtas C. de inceſt. nupt.
De meſme en la ſucceſſion d'vn ſoldat, qui
auoit eſté condamné pour crime capital ,
il ſ'emparoit des biens apres le cinquieſme
degré , l. 2. ff. de veter. & mil. ſucceſſione.
Comme pareillement en la ſucceſſion de
l'affranchy , les parents du Patron ne
pouuoient pretendre l'heredité apres le
cinquieſme degré , mais l'Empereur ſeu-
lement , dit Iuſtinian in §. multis , Inſt. de
ſucceſſ. libert. Mais en France nos Roys
ſe ſont relaschez de cette rigueur , &
traittent leurs ſujets avec tant d'humani-
té , qu'ils ne ſe mettent iamais en poſſeſ-
ſion d'aucune heredité , tandis que les pa-
rens du deſſunct peuuent monſtrer leur
ligne : C'eſt pourquoy en quelques cou-
ſtumes la deſherence eſt appellée ligne
eſteinte , & ligne faillic ; & en Norman-
die, deſcheance comme en Sicile excedentia;

Ce que l'on a encore interpreté si fauorablement , que sous ce nom de ligne, on a compris tant la paternelle que la maternelle : De façon que la ligne, dont les biens sont escheus, venant à manquer, l'autre ligne succede en sa place. Bien que cette pratique soit contraire à l'Arrest que nous venons de rapporter en Latin. Mais on a passé bien plus outre ; car l'on observe , que le mary ou la femme suruiuant, sont preferés au Roy , suiuant le tiltre *vnus de vir & vxor.* & cette parole d'humanité de Theodoric *proximos defunctorum ; nobis legaliter anteponis : quia in hoc casu Principis persona post omnes est* , comme il est rapporté dans Cassiodore *lib. 6. variarum. ep. 7.* Et l'on doit remarquer que le Roy venant à succeder par desherence , est tenu de payer les debtes , iusques à la concurrence de la valeur des biens , suiuant la loy *Marcellus §. fi.* & la loy , *recusare §. fisco ff. ad S. C. Treb.*

Et quant aux autres biens vacants par autre moyen que par desherence, & qu'on appelle *ἀκίνητα* , & *ἀκρίβοιμυα* , Il n'y a point de doute , que par les mesmes raisons ils deutoient appartenir au Roy. Que si les Coustumes, par la conuiuece des Officiers, les ont définies à sa Majesté ,

quelle raison y auoit-il de les désnier, à son exclusion ; aux hauts Iusticiers : veu que ces droits ne dependent en rien, ny de leur fief, ny de leur Iustice ? Il eust mieux valu ou les laisser à celuy qui les a trouuées, ou les rendre au propriétaire, ou à son deffaut les donner aux pauvres, selon l'aduis de plusieurs Theologiens rapportez par Couarruias §. 1. *reg. peccatum* 3. *parte*. Mais l'vsage ayant preuailu contre la raison, tous les hauts Iusticiers s'en mettent maintenant en possession apres certaines proclamations, & le Roy n'en iouit que dans les terres de son Domaine.

Et pour ce qui est des immeubles qui sont sans maistres ; chacun sçait qu'il y en a de deux sortes : les vns, qui s'appellent terres vaines & vaques, & qui n'ont point encores esté cultiuées ; Et les autres dont la culture a esté delaisiée & abandonnée. Pour celles-là, selon le droit de nature, elles estoient au premier occupant, suiuant ce mot de l'Oracle diuin : *omnis locus quem caleauerit pes vestri, vestri erit*. Mais depuis que les terres ont esté distinguées en fiefs, & que ces fiefs ont esté limités par territoires & finages, qui sont appellez *ciérea* par l'ancien Glossaire, la cou-

stume les a données au Seigneur du territoire, dans lequel elles sont comprises. Et le Roy ne peut rien pretendre, que sur celles qui sont dans l'estenduë des terres domaniales.

Et quant aux autres terres & heritages qui ont esté abandonnées, il y a de certaines coustumes; comme entr'autres celles de Langres, qui permettent au premier occupant de s'en saisir, si elles ont esté delaisfées sans culture durant trois années, suivant la loy, *qui agros, C. de omni agro deserto*: Neantmoins l'antiquité donnoit aux Princes Souverains, la puissance d'en disposer à leur volonté; comme nous le tesmoigne l'Ordonnance de l'Empereur Pertinax; qui declara que generalement toutes les terres inutiles & desertes de l'Empire, mesmes celles qui estoient sous les Roys reconnoissants l'Empire, seroient au premier occupant, à la charge de cultiver, dit Herodian *lib. 2.* Ce qui approche d'une autre Ordonnance de l'Empereur Vespasian, qui permit à vn chacun d'occuper *vacantes areas, cásque edificare*, sans que les propriétaires s'en peussent plaindre. La premiere fut faite en faueur de l'agriculture, & l'autre pour oster la difformité des villes: Mais à present les Sei-

gneurs de fief s'en faifissent par droit de Seigneurie directe ; & le Roy ne s'en met en possession que dans les terres de son Domaine. Et si ces terres là estoient abandonnées à cause des debtes créées sur icelles , on a de coustume d'establis vn curateur aux biens vacants , avec lequel le Roy , les Seigneurs & les autres creanciers peuvent debatre leurs droits.

Outre ces difficultez , il me semble qu'il est à propos de donner quelque éclaircissement à ce doubte qui se presente souvent , sçauoir , par quel temps l'on peut prescrire le droit de desherance & de biens vacquans contre le Roy. Il faut mettre difference entre les choses qui sont desia acquises au Roy , & les actions qu'il a pour les acquerir. Quant à celles-là , il n'y a point de doubte , qu'elles ne se peuvent prescrire , *vt alia res fisci , quia inde belli presidium , & pacis decus comparantur* , dit Tacite. Mais quant aux actions , il est certain qu'elles se prescriuent par vingt ans : si ce n'est qu'en quelques cas la loy eust raccourcy ce temps , suiuant la disposition de droit qui dit , *in omnibus fisci questionibus , exceptis causis in quibus minora tempora seruari specialiter constitutum est , xx. annorum prescriptio custoditur*. l. 53. C. de diuersis & temp. prescript. Et l'on


l'on doit remarquer que l'action qu'a le Roy , pour se faire adiuger les biens vacquants , est comprise en ceste exception: car elle se prescrit par quatre ans , suivant la loy 1. §. ff. de iure fisci, qui porte *Divus Pius, Cælio Amaranto rescripsit, vacantium bonorum nuntiationem, quadriennio finiri*: Et cette prescription ne commence que du iour que la vacuance est claire & certaine , comme dit Papinian en la loy 10. de *Diu. temp. prescript. quadriennij tempus, quod bonis vacantibus nuntiandis prescriptum est, non ex opinione hominum, sed de substantia vacantium bonorum dinumerabitur, id est, cum primum verè ceperunt vacare*: & puis il adiousté, *quatuor autem anni, post irritum testamentum factum & intestati possessionem, ab omnibus repudiatam, qui gradatim petere debuerunt, computabuntur*; De sorte que si le Roy n'exerce son action dans les quatre ans , du iour que la vacance a esté publique & connue, il ne peut plus l'intenter contre personne: Mais ie n'estime pas, que hors ceste exception des biens vacants, cette prescription de quatre ans puisse auoir de lieu, comme en toutes les autres denonciations ou delations qui se font au Prince, & dont le Jurisconsulte a fait seize especes en la loy 1. ff. de iure fisci, comme s'il estoit question d'un

458 DE LA SOUVERAINETE' DV ROY,
heritier indigne de la succession d'un cri-
minel , conuaincu de crime capital ; &
ainsi des autres : pource que la loy , n'ayant
parlé précisément que des biens vacants,
quelle raison y auroit-il d'estendre cette
prescription de quatre ans en tous les au-
tres cas ? C'est pourquoy le plus seur
fera de demeurer en toutes ces autres
rencontres dans la reigle des vingt ans,
suiuant la loy 13. ff. *De diuers. & temp.*
prescript. que nous auons rapportée cy-des-
sus.

*Des biens des condannez , & des droits que le
Roy a sur iceux.*



CHAPITRE XIII.

 A raison d'Estat , & la Souuerai-
ne autorité, qui ne se peut com-
muniquer à d'autres , sans dimi-
nuer beaucoup de sa Puissance,
veulent qu'il n'y aye que les Roys qui puis-
sent dans leurs Royaumes confisquer les
biens des condannez. Cela se pratiquoit
de la sorte à Rome , comme nous l'appre-
nons de la loy 1. C. *De bonis proscrip.* &

damnator. qui declare que c'est vn droit du tout Imperial, & pour cette raison elle en interdit l'vsage à toutes les villes de l'Empire. Et de fait il n'y auoit alors que ceux qui iugeoient *vice sacra*, comme le grand Preuost du Palais, les Vicaires, & le grand Preuost de la Ville, qui peussent confisquer par leurs iugemens, les biens de ceux qui auoient merité la mort : les Iuges inferieurs, n'auoient point cette puissance sans l'expresse permission du Prince, dit la loy vnique. C. *Ne sine iussu princip. Nulli iudicium liceat, exceptis qui in summa administrationis sunt positi potestate, proscriptiois tempestate totius substantia aliquem percellere, nisi ad nostras aures hoc ipsum referatur.*

Cela mesme s'est obserué en France durant les deux premieres races de nos Roys, comme nous le tesmoignent les loix Françoises, & les Capitulaires de Charlemagne. Car tout ainsi qu'il n'appartient ; qu'au Prince souuerain, d'auoir vn fisque : c'est à dire vne bource publique, de mesme aussi il n'y a que luy qui aye le droit de confisquer, comme il est diferement dit en cette loy, 1. C. *De bon. vacant.* C'est l'opinion des plus celebres Docteurs sur le tilre *De iure fisci*, & specialement de Balde, sur la loy 1. C. *de hæ-*

460 DE LA SOUVERAINETE' DV ROY,
*red. vel acti. vend. & sur la loy i.
C. de hered. instituend. & sur le tiltre de
privileg. fisci au Code : Et du Moulin sur
l'article 30. de la Coustume de Paris nu-
mer. 169. où il soustient que ius illud meri
imperij, & le droict de confisquer qui en
depend, est vn des plus riches fleurons
de la Couronne, & l'vn des principaux
droicts de son sacré Domaine : Ce qu'il
appuye de l'autorité de plusieurs autres
grands personages qui ont esté de ce mes-
me aduis, sur la loy quicumque C. de omni
agr. deser. & in l. 2. de iur. reip. & in l. con-
tra publicum C. de re militari :* Ce n'a esté
que du temps de Hugues Capet, que ce
droict a esté permis à ceux qui ont la
haute Iustice dans leurs terres : Car ce
Prince voulant captiuer la bien-vueillance
des grands du Royaume, pour d'autant
plus s'affermir en sa nouvelle conqueste,
il rendit les fiefs & les Iustices heredi-
taires & patrimoniales, & leur donna le
droict de confisquer les biens des con-
damnez, ayment mieux se relascher en
d'aucunes petites choses, que de perdre
la possession des plus grandes, & des
plus importantes. En quoy il fut suiuy par
le Roy Iean, qui durant ses infortunes, &
sa captiuité pour s'asseurer de l'affection des

peuples d'Aquitaine, & de quelques autres Prouinces, il leur remit le droit de confiscation; ce qui a toutesfois eu des effets bien differens: Car la remise que fit ce dernier diminua seulement en quelque chose le reuenu de son fisque: mais celle de l'autre a non seulement faict part aux subiects de la Souueraineté, mais encore elle leur a mis la puissance en main, pour s'esleuer contre les Roys, toutes les fois qu'ils veulent l'entreprendre.

Et bien que depuis les Officiers du Roy aient fait tous leurs efforts, pour remedier à cette faute, ayant souuent ordonné, que les Seigneurs hauts Iusticiers ne prendroient aucune part aux confiscations qui estoient adiugées pour des cas Royaux, & par les Iuges Royaux; neantmoins ce desordre a pris tellement son cours, que iusques à present il a esté impossible de l'arrester: De façon qu'il s'observe maintenant que les Seigneurs hauts Iusticiers prennent pour eux les biens tant meubles qu'immeubles; qui se trouuent dans l'estendue de leur haulte Iustice, du temps du iugement de confiscation; bien qu'il soit donné par les Iuges Royaux, & pour des cas Royaux. Il n'y a que le seul crime de leze Maiesté, qui face cesser les

462 DE LA SOUVERAINETE' DV ROY,
droicts des haults Iusticiers; car il n'est
pas raisonnable qu'ils prennent, part en la
reparation des offences, & des iniures que
l'on a faites à la Majesté Royale; ce crime
estant si priuilegié, qu'il fait mesme cesser
tous les droits successifs, & les substitutions,
comme le contient l'Ordonnance du 10.
Aoust 1539. qui a esté confirmée par plu-
sieurs Arrests.

Les hauts Iusticiers ne peuuent aussi pre-
tendre ce droit, sur les biens du Domaine,
qui sont dans leurs Seigneuries, & qui ont
esté confisqués sur les particuliers; Car c'est
vne maxime, que le Domaine ne passe ia-
mais entre les mains d'un autre, à cause
d'un crime qui auroit esté commis par ce-
luy qui le possedoit; mais en ce cas il ap-
partient au Roy, priuatiuement à tous au-
tres. Et ie me souuiens auoir veu dans le
Conseil du Roy, certains haults Iusticiers
auoir esté si temeraires, de soustenir que
les Greffes d'une Election & d'un Grenier
à sel, qui auoient esté establis dans des
villes de leur Domaine, leur deuoient ap-
partenir, en consequence de la confiscation
que l'on auoit adiugée contre celuy
qui en estoit propriétaire, dont ils furent
deboutés par Arrest: Pource que les Gref-
fes estans du Domaine du Roy, & sujets

seulement à la Justice Royale ; ils ne peuvent estre confisqués qu'au Roy, suivant la reigle que nous auons rapportée.

Je ne veux point entrer en discours , pour sçauoir , si ce droit de confiscation est fondé sur la Justice : Car puis que les loys diuines & humaines , & l'usage de tous les peuples l'ont approuué ; Il n'y a point de doute qu'il faut le tenir pour iuste ; encore qu'il semble que ce soit vne cruauté, de comprendre en mesmes peines l'innocence des enfans & des autres heritiers, & les crimes de leurs peres. Mais il y a beaucoup de choses. qui bien quelles paroissent iniustes & tyranniques au regard des particuliers, ont vn autre visage, quand on les considere au regard du Public , *haber aliquid ex iniquo omne magnum exemplum , quod contra singulos vtilitate publica rependitur.* Et tous les Politiques n'ont point trouué de plus puissant moyen , pour reprimer l'audace des meschants, & tenir les peuples en leur deuoir , que la confiscation des biens : car le crime de rebellion qu'Aristote appelle *ακατασία* , tirant son origine de l'Ambition , & de la conuoitise des hommes ; il n'y a rien qui puisse plus fortement assoupir la violence , & l'ardeur de cette passion , que la crainte de perdre non seule-

464 DE LA SOUVERAINETE' DV ROY,
ment les honneurs & les richesses qu'ils
proiettent d'acquérir par leurs temeraires
entreprises , mais encore les biens qu'ils
ont recueillis de la succession de leurs pe-
res.

C'est pourquoy les Romains , lors qu'ils
punirent la rebellion de ceux de Capouë,
qui vouloient s'egaler à eux , ils les priue-
rent de toutes les marques de Souveraine-
té , qui leur auoient donné le courage
& l'ambition d'en acquérir vne plus gran-
de ; *ne Senatus , ne plebis consilium , ne magistra-*
tus , sed sine consilio publico , sine imperio , & vt mul-
titudo nullius rei inter se socia , inhabilis esset, dit Ti-
te-Liue , d'où ce Poëte prit occasion de
faire ces vers , sur vne semblable rencontre :

Nec melius stultæ furor , atque superbiæ plebis
Puniri poterat , quàm tantæ vt causæ furoris
Eriperentur opes , vt quos opulentiæ rerum
Fecerat elatos , in se reuocaret egestas.

C'est aussi ce que Platon en son Ban-
quet veut enseigner , lors qu'il dit , que
Iupiter reprima l'audace des Geants , qui
voulurent escheler le Ciel , en les apauvri-
fant.

Mais peut-estre quelqu'un pourra dire
qu'au moins nous ne deuions pas estre plus
feueres que les anciens qui laissoient les
biens des condamnez à leurs enfans ; Si
ce

ce n'estoit en cas de crime de leze Majesté au premier chef, comme il est dit en l'aut. *bona damnatorum. C. de bonis praescript.* Et que par les Ordonnances de Charlemagne, il n'y auoit que les acquests, qui fussent subjets à confiscation, & non les propres; Ce qu'il auoit establi en Saxe, & en Hongrie, & on le pratique encores à present, de la sorte, à ce que tesmoigne Andreas Feritius en son discours qu'il a faict de l'homicide.

A quoy ie leur respondray qu'il n'y a point de doubte, que les Princes ne peuvent exercer vne vertu, qui les rende plus recommandables à leurs peuples, que la douceur & la clemence; mais ie ne voudrois pas qu'ils fussent contraints à faire ces offices d'humanité, par l'autorité de quelque loy qui frappe, comme l'on dit, sans recognoistre; pource qu'il me semble que telles faueurs sont mieux receuës des subiects, & les obligent dauantage à r'entrer en leur deuoir, quand elles viennent absolument de la volonté du Prince, qui sçait vser de ses graces, selon la consideration des personnes, du temps, & des affaires.

Personne n'ignore avec quelle douceur le Roy François premier traitta Louyse

466 DE LA SOUVERAINETE' DV ROY,
de Bourbon, sœur de Charles de Bourbon
criminel de leze Majesté ; car il luy remit
la iouyssance de plusieurs terres & Sei-
gneuries , qui venoient du costé de son fre-
re : En quoy il semble qu'il auoit eu des-
sein d'imiter l'humanité , dont vsa l'Empe-
reur Antonin le Philosophe , à l'endroit des
ensans d'Auidius Cassius , qui auoit esté con-
uaincu de pareil crime : Pource que bien que
sa femme l'incitast à les traiter avec toute
sorte de rigueur ; Neantmoins il modera
tellement la confiscation , qu'il leur redon-
na la moitié des biens de leur pere. Le
Roy Charles VII. ne fut pas moins clem-
ent à l'endroit de Louys , Neveu de Jean
de Luxembourg ; d'autant qu'il luy rendit
toutes les terres & les Seigneuries , qui
auoient esté confisquées sur son oncle, pour
crime de leze Majesté , excepté le Comté
de Guise. Le Roy Louys XI. fit cette mes-
me faueur au Sieur de Brezé , pour les ter-
res d'Annet & de Nogent le Roy , qui
auoient esté confisquées sur son pere, pour
auoir tué sa femme Charlotte, sœur naturel-
le du Roy. Ainsi le Roy Charles VIII. vsa
de cette mesme grace à l'endroit de Ma-
rie de Luxembourg , la laissant en posses-
sion de tout le bien de son ayeul , qui
auoit esté confisqué sur luy pour crime de

leze Majesté : Et non seulement nos Histoires , mais encores celles des Grecs & des Romains, sont pleines de semblables exemples.

Mais l'on peut encore demander , sçavoir , si ces dons & ces remises peuvent estre valables ; veu que par la maxime commune , ce qui est vne fois acquis à la Couronne , n'en peut estre iamais détaché : A quoy l'on respond premierement qu'il est sans doute , que le Roy peut donner des biens qui ont esté confisqués , comme ie l'ay veu souuent iuger au Parlement ; Et chacun sçait que les lettres de don du Marquisat d'Ancre, qui auoit esté confisqué sur le Marechal de Conchine , y furent verifiées purement & simplement. Mais il faut qu'en cela il y ait concurrence de deux choses : l'une que l'on en ait fait le don apres la condemnation ; & l'autre que les biens confisqués ne soient point encore reünis à la Couronne , soit par des lettres expresses , ou par vne iouyssance de dix ans continuels, & dont on aye compté en la Chambre des Comptes.

Car quant à la premiere , comme ce seroit vne temerité de demander des biens confisqués auant le iugement : Il seroit encore trop plus iniuste, voire tyrannique, de

468 DE LA SOUVERAINETE' DV ROY,
l'octroyer ; Aussi voyons-nous que les Em-
pereurs Valentinian & Theodose, l'ont ex-
pressément defendu , par leurs Constitutions
qui se lisent au tiltre *De petitionibus bo-
nor. sublat. lib. x. C.* Et quant à l'autre , il est
aussi certain , que bien que les terres con-
fiscuées soient mouuantes nuëment de la
Couronne, neantmoins elles sont tousiours
tenuës pour biens particuliers , & en la li-
bre disposition du Prince , iusques à ce
qu'elles ayent esté vnies au Domaine, par les
moyens que ie viens de dire , dont tou-
tesfois il faut excepter les terres , & les
Seigneuries ; qui sont tenuës à la charge
de reuerfion , ou comme l'on dit , à tiltre
d'apanage ; d'autant qu'il se resoult en-
tierement par la confiscation , & s'en
fait aussi - tost vne reünion parfaite
au Domaine , sans aucune autre forma-
lité. Et pour le regard des biens , qui sont
mouuants d'autre que du Roy ; comme sa
Majesté est tenuë d'en vuidier ses mains ,
suiuant la loy du Royaume , il peut aussi
les donner , & en disposer, comme bon luy
semble.

Il sera aussi remarqué que ces remises ou
restitutions, que les Roys font aux enfans,
ou aux autres heritiers des condamnés, ont
esté interpretées si fauorablement par les

Arrests de la Cour, qu'elles ne changent point ny l'Estat, ny la condition premiere des biens : De façon que les enfans ou les autres heritiers ne sont point tenus de prendre de nouvelles inuestitures, ny obligés à aucune nouvelle reconnoissance; estans réputés leur estre demeurés propres comme deuant, & sujets au retrait lignager, ainsi que Balde le traite *ad l. peculium est, §. penult. ff. de pecul.* Mais il en est autrement pour le regard des terres qui sont mouuantes d'autres Seigneurs. En quoy il faut encores distinguer entre les graces que le Roy fait auant le iugement de confiscation, & celles qu'il donne apres. Si la sentence est prononcée deuant, il n'y a point de doute, que les Seigneurs hauts Iusticiers, dont les terres sont mouuantes, ne les peuuent empescher, pource que *nondum ius eis quasitum*; & ne peuuent rien pretendre sur les biens, que du iour du iugement de confiscation : Et ie les ay veu souuent debouter de l'opposition qu'ils auoient formée à l'enterinement de telles lettres : Car on ne presume iamais, que le Roy face tort à personne, *dum vitur iure suo*, comme il est dit en la loy, *in re mandata, C. mand.* sur l'exemple de celuy, qui voudroit empescher que le Roy ne legiti-

470 DE LA SOUVERAINETE' DV ROY,
maist point vn bastard , à la priere du pere
naturel, sous pretexte que par ce moyen,
on luy feroit perdre l'esperance d'une suc-
cession, en quoy il se rendroit ridicule: mais
si le Roy donne cette grace apres la pro-
nonciation du iugement, il est certain qu'il
ne peut rien faire au preiudice des hauts
Iusticiers , ny leur oster ce qui leur est ac-
quis , non pas mesme l'amende , qui leur
est adiugée , comme dit Ioannes Faber sur
le §. *Cum autem Instituit. quib. mod. ius patr.
potest. soluit.* Accurse sur la loy 2. C. *De in
ius voc.* & Balde sur la loy f. C. *sententiam
rescin. non posse.* Si ce n'estoit qu'on fust aux
termes d'une abolition octroyée par le Roy
pour le bien de la paix , comme les Do-
cteurs le traittent sur la loy Gallus, §. *Et
quid si tantum ff. de liber. Et posth.* ou que le
Roy par ses lettres vst de termes de
pleine puissance , & en consideration de
seruices faits à l'Estat , & au public par l'im-
petrant ou ses ancestres : car en ce cas, les
hauts Iusticiers n'auroient aucune raison de
se plaindre : veu que la consideration du
public doit tousiours faire cesser l'intereft
des particuliers , comme le resoult le Do-
cteur Decius en son Conseil 101. nu. 2.

Dauantage l'on doit obseruer , què le
Roy , ou les hauts Iusticiers qui succedent

par confiscation , ne sont point obligés aux debtes du condamné, que iusques à la concurrence des biens , & à raison de ce qu'ils en amendent , comme les Iuriscultes le disent *in l. 1. §. an bona l. non intelligitur §. cum ex causa ff. de iure fisci. l. Tutoris C. ad leg. Jul. de vi public.*

Mais on a souuent demandé , si les hypothèques passent sur les biens confisqués, pour crime de leze Majesté, ou de felonnie , ou si elles sont esteintes par la confiscation ou commise : Quelques-vns ont tenu qu'elles estoient esteintes par la reigle vulgaire , qui dit que *resoluto iure dantis , resolvitur ius accipientis*. Et que sur cette maxime l'on a iugé , que le Roy iouyssant par droict de regale des fruiçts que possedoit l'Euesque dernier decedé , n'estoit tenu d'aucunes debtes , rentes ou pensions. Neantmoins nous voyons que le contraire s'obferue à present en faueur des creanciers : comme il fut iugé pour ceux de Charles de Bourbon , & de Gaspard de Colligni , bien que leur confiscation fust pour crime de leze Majesté. Ce que la clemence & l'humanité a introduit , suiuant la disposition du droit Romain , au tiltre du Code : *Panis fiscalibus creditores praeferri* , où l'Empereur Alexandre disoit , *rem suam perse-*

472 DE LA SOUVERAINETE' DV ROY,
quentibus pœna exactio postponitur : si ce n'estoit
que pour servir d'exemple , il fust dit que
les maisons d'un condamné seroient des-
molies , car en ce cas les creanciers ne peu-
uent s'exposer à l'exécution de ce iuge-
ment.

On peut aussi demander, si apres vne
sentence de confiscation qui a esté don-
née par vn Iuge Royal , il se trouue , que
le condamné n'ait point de biens dans la
Iustice du Roy , mais dans la Seigneurie
d'un hault Iusticier , qui en cette rencon-
tre profite seul de cette confiscation , sca-
voir s'il n'est pas tenu de payer l'amende,
qui est adiugée au Roy ; En quoy il n'y
a point de doute , pource qu'en cette con-
currence du Roy & des Seigneurs haults
Iusticiers , le Roy est tousiours preferable
pour l'amende qui luy est adiugée : Que
s'ils estoient plusieurs Seigneurs qui pro-
fitassent de cette confiscation ; Ils ne sont
tenus de l'amende qu'à proportion de ce
qu'ils en reçoivent , & non solidairement,
comme ie l'ay veu iuger en plusieurs rai-
sons , suiuant la responce du sçauant Do-
cteur Imola , *lib. 4. Consilior. 3. consf. 3.*

Finalemēt l'on peut demander si apres
vn iugement de mort & de confiscation,
le Roy remet la vie seulement , & non les
biens,

biens : si le bien que le condamné acquiert puis apres , appartient au Roy ; ou s'il en demeure paisible possesseur.

Ie me souuiens auoir veu iuger , que ny le Roy , ny le hault Iusticier n'y peuuent rien pretendre , suiuant la disposition de cette loy ancienne qui est couchée en ses termes au liure 4. chap. 89. des Loix Françoises : *Primum enim omnium de illis causis , pro quibus iudicati sunt , nullam postea repetitionem facere possunt : quia omnes res sue secundum iudicium Francorum in publico sunt renocatae : Et si quid , postquam ei vita est remissa , acquirere potuerint , in sua libertate teneant , & defendant.* Il en seroit autrement , si la mort auoit esté conuertie en vn bannissement perpetuel : d'autant que le criminel estant par ce moyen déclaré *seruus pœne* , il n'y a point de doute que tout ce qu'il peut acquerir par son industrie , appartient au Fisque.

Auant que de finir cè Chapitre , il me semble que pour pleinement satisfaire au Lecteur , ie ne dois obmettre de rapporter en ce lieu la resolution d'vne question celebre qui fut agitée dans le Conseil du Roy apres la condamnation du Marechal d'Ancre & de sa femme , qui contenoit la confiscation de tous leurs biens : Sçauoir si l'argent qu'ils auoient donné aux banques

474 DE LA SOUVERAINETE' DV ROY,
 de Florence, de Rome, de Venise, & de
 Gennes, estoit acquis au Roy, comme
 tous les autres biens qu'ils auoient en Fran-
 ce. I'eus l'honneur d'estre de ceux que
 l'on auoit appellez à ceste deliberation, où
 les opinions furent differentes. Car les
 vns disoient que le Roy ne pouuoit rien
 pretendre sur ces deniers, & se fondoient
 sur la decision de la loy 259. §. *territorium*, ff.
De verb. signif. qui dit, *territorium sic dictum esse,*
quod Magistratus ibi ius terrendi habeat, Que le
 Roy n'ayant point ce droit hors les limites
 de son Royaume, il ne pouuoit s'appropri-
 er les confiscations des biens qui es-
 toient situez sous la domination des Prin-
 ces estrangers: Et que partant ils esti-
 moient que le Roy ne pouuoit redeman-
 der les deniers dont il estoit question, &
 qu'ils appartenoient ou aux heritiers des
 condamnez, ou à leur deffaut, aux Prin-
 ces souuerains des lieux, par droit de ca-
 ducité ou desherence. Les autres au con-
 traire soustenoient, que le Roy auoit droit
 de les pretendre; pource que l'un des chefs
 de l'accusation des condamnez portoit,
 que sous de faux pretextes ils auoient sou-
 strait les deniers de l'Espagne, & qu'ils
 les auoient fait transporter en Italie; que la
 regle vulgaire du Droit disoit, *rei furta*

perpetuam esse auctoritatem , & que par consequent le Roy auoit droit de suite sur cet argent en quelque lieu qu'il fust.

Cette opinion me sembla la meilleure & la plus plausible ; A quoy j'adioustay , qu'outre ce crime , ils auoient encore esté accusez du crime de leze Majesté diuine & humaine : Qu'en ces rencontres tous les Princes souuerains estoient interessez comme en vne cause commune ; & qu'ils estoient obligez de se prester la main les vns aux autres , pour en tirer la vengeance , & en auoir la reparation , en tous les lieux où l'occasion s'en presentoit , & à la face de tout le monde.

Que ces crimes atroces estans commis contre le droit des gens , estoient également punissables par les loys de toutes les nations de la terre ; & que partant l'arrest qui auoit esté prononcé contre eux , par la plus celebre compagnie de l'Europe , deuoit auoir son effect en tous les pays où ils auoient des biens : Que c'estoit l'opinion du Docteur Balde , sur la loy *Mercales* , C. de *Commercij & Mercat.* & de Bartole , sur la loy *Mouentium* , ff. de verb. signif.

Dauantage ie dis , que comme le Roy , ou vn autre Prince souuerain , pouuoit re-

476 DE LA SOUVERAINETE' DV ROY,
cueillir vne succession qui luy seroit es-
cheuë dans la souueraineté d'un autre,
ainsi qu'il se pratique tous les iours ; &
qu'on a veu souuent arriuer en France ,
lors que le Roy d'Angleterre tenoit en
propre la Guienne ; d'autant que le droit
d'Aubeine, qui est le seul obstacle qui
pourroit les empescher de la pretendre, n'a
point de lieu entre les Princes souuerains ;
pource qu'ils sont tous freres & enfans du
Roy des Rois, qui les a establis ses Vicai-
res & ses Lieutenans, pour commander
aux peuples de la terre. Que de mesme
l'on pouuoit soustenir, que le Roy &
tous les autres souuerains auoient le pou-
voir, en suite de la confiscation qui leur
auoit esté adiugée, de s'approprier de tous
les biens de leurs subiets condamnez, bien
qu'ils fussent situez hors le destroit & l'en-
ceinte de leur Royaume, y estans appel-
lez, *vt successores bonorum*. Et de fait en suite
de ces raisons, & apres vne longue conte-
station : En fin le Pape, la Republique de
Venise, le Duc de Florence, & l'Estat de
Genes donnerent main-leuée au Roy qui
toucha tous ces deniers.

Fin du troisieme Liure.



DE LA
SOVVERAINETE
DV ROY.
LIVRE QVATRIESME.

*Des Seaux du Roy, de leur autorité, & de leurs
droicts : & en suite, de la dignité de Chan-
cellier & Garde des Seaux.*

CHAPITRE PREMIER.

TANDIS que les hommes ont
vescu dans leur premiere inno-
cence, l'usage des signatures &
des cachets n'estoit point co-
gneu dans le monde. La seule
parole ou le simple escrit, estoit le seul lien
de leurs promesses & de leurs obligations.
Mais depuis que les pariures & la perfidie
ont banny de la terre la candeur, la fran-

OOo iij

4-8 DE LA SOUVERAINETE' DV ROY.
chise , & la fidelité : La défiance s'est tel-
lement renduë maistresse des esprits , que
l'on a esté contraint d'inuenter les seaux ,
de créer les Notaires , & d'introduire plu-
sieurs autres moyens pour affermir les trait-
tez & les conuentions , & pour s'asseurer
de la foy & de la loyauté des vns des au-
tres. C'est dequoy se plaignoit autiesfois
Senèque : *Vtinam*, dit-il, *ne pacta conuenta im-*
pressis signis custodirentur , sed potius fides illa seruaret,
& æquum colens animus : sed necessarii a optimis præ-
tulerunt , & cogere fidem quàm expectare malunt.
O turpem humani generis fra-dis , & nequitia pu-
blice confessionem , annulis nostris pl. squàm animis
creditur. Ce que Pline exaggea au liure 3.
chap. 1. de son histoire , où loüant l'in-
nocence des premiers siècles : & blasmant
la malice des hommes de son temps , il
dit , *Quæ fuit illa priscorum vita ! qualis innocentia,*
in qua nihil signabatur ! At nunc cibi quoque , ac
potus annulo vindicantur à rapina. Les mes-
mes vices s'estans coulez dans le public ,
ont causé les mesmes effects , & les mes-
mes corruptions. Car du commencement
les Princes ne se proposans deuant les yeux
que d'exercer saintement la iustice , & de
procurer le repos & le bien de leurs sub-
iects , ils s'acquirent vne telle creance en-
uers eux , que leurs seules paroles estoient

autant de loys, *Verbo & nutu omnia gerebantur*, tout le monde leur obeyſſoit, ſans aucune contradiction. Mais depuis qu'ils changerent ce premier gouvernement, & qu'ils ſe relâcherent de leur ancienne vertu, leurs commandemens commencerent à eſtre ſuſpects à leurs peuples. L'on ſe rendoit difficile à les exécuter, & l'on feignoit qu'ils ne venoient pas de leur part; & l'on tâchoit d'éluder, par de ſemblables excuſes, toutes les nouveautez qu'ils vouloient introduire. C'eſt pourquoy les Roys, pour lever les occaſions de tous ces pretextes, obliger leurs ſubieſts à vne prompte obeiſſance, & empêcher les ſurpriſes, & que l'on ne ſuppoſaſt de faux commandemens au lieu des véritables; inuenterent cette nouvelle forme de ſceller de leurs ſeaux leurs lettres patentes, afin que perſonne ne pretendiſt plus cauſe d'ignorance de leurs volontez.

Nos Roys touchez de ſemblables conſiderations ont eſtably leurs Chancelleries: & pour donner plus de foy & de creance à leurs Edicts & à leurs commandemens, ils ont voulu que l'on obſervâſt trois choſes en la forme de leurs lettres pour eſtre authentiques.

La premiere, qu'elles fussent signées de leur main : ce que le Roy Louys le Gros ordonna de son temps, ainsi que nous l'apprend Budée sur la loy vnique, *ff. de Officio Praef. Prat.* Car auparauant c'estoit le Chancelier, que Gregoire de Tours, au li. 10. de son histoire, appelle Referendaire, qui signoit pour eux : comme il se peut coniecturer de ce lieu du mesme autheur ; où il r'apporte qu'Ægidius, Archeuesque de Reims, estant accusé d'auoir vsuré plusieurs terres du Domaine, il dit pour sa deffense, que le Roy les luy auoit données, & qu'il representa les lettres du don. Mais que le Referendaire Othon les ayans veües, il luy soustint qu'il ne les auoit iamais signées, & qu'elles estoient fausses, & par consequent de nulle valeur.

La seconde chose qu'ils ont désiré en leurs lettres, c'est qu'elles fussent contre-signées par l'un des quatre Secretaires d'Etat : que l'on peut comparer à ces Officiers dont il est fait mention au tître de *Primicerio & Secundicerio, & Notarijs lib. 12. C.* qui faisoient la mesme fonction sous les Empereurs. Leur integrité & singulier merite leur ont acquis cet honneur & cette creance dans le Parlement de Paris, que j'ay veu souuent, lors que quelques-uns ont pris
la

la hardiesse de maintenir de faulx leurs despèches en matiere de Benefices , qu'on les a tousiours declarez non receuables. Et l'on ne voit point dans nostre histoire , qu'il soit iamais arriué parmy eux vn semblable scandale, que commit vn Secretaire du temps de l'Empereur Alexandre Seuere, *qui cum falsum causa Breuem in Consilio Imperatoris retulisset, incisus digitorum neruis, ita ut scribere nunquam posset, est deportatus*, dit Lampride.

La derniere formalité qu'ils ont ordonné que l'on gardast en leurs lettres patentes; pour leur donner plus d'autorité, c'est qu'ils ont voulu qu'elles fussent scelees de leur grand Seau. que l'on peut comparer à cet anneau des Roys de Perse , dont ils se seruoient pour cacheter les lettres qu'ils enuoyoit aux gouuerneurs de leurs prouinces , & qui estoit la marque de la Royauté & de la puissance souueraine. C'est pourquoy Alexandre le Grand se voyant desesperé des Medecins , commanda aussi-tost que l'on portast son anneau sigillaire, à celui qu'il designoit son successeur. Nous lisons dans l'Ecriture Sainte , qu'Assuerus donna son anneau à Aman, & puis apres à Mardochée ; quand il voulut les honorer de son amitié, & leur donner le soin de ses affaires. Pharaon obserua la mesme cere-

482 DE LA SOUVERAINETE' DV ROY,
monie , lors qu'il crea Ioseph Viceroy de
toute l'Ægypte.

C'est le Chancelier de France qui a la
garde de ce grand seau , dont il scelle les
lettres de commandement , & de finan-
ces, & celles encore de Iustice , qui con-
cernent les affaires qui sont pendantes au
Conseil d'Estat , ou au grand Conseil. Et
toutes les expéditions qui sont scellées de
la sorte , sont executoires par tout le
Royaume. C'est pourquoy l'image du Roy
y est représentée , comme assise dans son
thrône , & tenant le sceptre en la main.

Outre ce grand seau , l'on se sert encore
de trois autres en ce Royaume. Le premier
est celuy des Chancelleries que le Roy a
erigées aupres des Parlemens , pour le sou-
lagement de leurs subjects : l'image du Roy
n'est pas empreinte sur ce seau , mais seu-
lement trois fleurs de lys , qui sont les ar-
mes que les Roys de France ont prises
pour leur marque particuliere : suiuant l'an-
cienne coustume de tous les Princes de la
terre , qui ont tousiours esté curieux de fai-
re grauer sur leurs seaux quelques deuises ,
pour se faire particulièrement recognoi-
stre. Ainsi nous lisons que Pyrrus Roy des
Epirotes , prenoit pour blazon l'image d'A-
pollon , accompagnée de neuf Muses. Qu-

Auguste Cesar fit graver sur son cachet, la figure d'un Sphinx, qu'il changea puis apres en l'image d'Alexandre. Que l'Empereur Commodus auoit pour signe, vne image d'une Amazone, qui estoit representée dans son anneau, & l'histoire est pleine de semblables exemples.

Les Maistres des Requestes gardent ce seau tour à tour, & l'on s'en sert pour sceller tous les actes de iustice, que l'on expedie dans tout le ressort du Parlement où il est estably, & principalement les restitutions, & toutes les affaires que le Preteur Romain expedioit *iure sui officij*. Car l'on a iugé qu'il estoit raisonnable, que dans vn Estat Monarchique l'on expediasst sous l'autorité du Prince tous les actes de iustice, dont les Magistrats prenoient la cognoissance dans les Estats populaires. C'est pourquoy l'on rejeta cet article, que les Estats d'Orleans auoient inseré dans leurs cahiers; par lequel ils demandoient que l'on remist au pouuoir des iuges ordinaires, tout ce qu'ils pouuoient executer en vertu de leurs offices, sans qu'il fust besoin d'aller à la Chancellerie.

Et l'on doit remarquer que toutes les lettres que l'on passe sous ce seau, ne sont executoires que dans le ressort de son Par-

484 DE LA SOUVERAINETE' DU ROY,
lement, si ce n'est que l'on s'en seruiſt en
l'abſence du grand ſeau : ce que l'on prat-
tiqua durant la priſon du Roy Iean ; car
l'hiſtoire rapporte, que l'on ſceloit toutes
ſortes, d'expediſions avec le ſeau du Cha-
ſſelet de Paris : Et en ces occaſions il eſt
executoire par tout le Royaume.

L'autre ſorte de ſeau, eſt celuy des Chan-
celleries Preſidiales, où ſont auſſi represen-
tées les armes du Roy, mais beaucoup plus
petites : Il eſt gardé par les Conſeillers Pre-
ſidiaux tour a-tour, ou par les officiers
qui ont eſté creéz exprés. Et l'on expedie
ſous ce ſeau les executoires decernés par
les meſmes Iuges, les reliefs d'appel, les
anticipations en ces meſmes ſieges, & les
ſentences Preſidiales ; c'eſt à dire celles qui
ſont données aux deux chefs de l'Edict.
Ce ſeau eſt executoire par tout le Parle-
ment où reſſortit le ſiege Preſidial.

La dernière ſorte de ſeau public, eſt ce-
luy que l'on appelle petit ſeau, à cauſe que
les fleurs de lys ſont plus petites que celles
qui ſont grauées ſur tous les autres ſeaux.
Ce ſont des officiers particuliers que l'on a
ſaiet hereditaires depuis peu, qui en ont la
garde. Il ſert à ſceller les contrats, les
ſentences, & les autres mandemens de iu-
ſtice. Et il eſt executoire pour les contrats

par tout le Royaume , & pour les sentences seulement dans le ressort des Juges : il est exécutoire aussi hors ces limites , par la permission que l'on obtient des juges des lieux. Et l'on doit remarquer que le Roy n'adresse jamais ces lettres qu'à ces officiers , pour les signifier puis après aux Juges des Seigneurs , qui en peuvent cognoître. Et qu'il n'appartient qu'aux Juges Royaux , à l'exclusion des subalternes , de cognoître du crime de fausseté, que l'on a commis au seau , & des différens qui arrivent pour les contrats, qui ont esté scellés du seau du Roy , quand on s'est expressément soumis à la juridiction Royale. Comme ie l'expliqueray plus amplement au chapitre où ie parleray des cas dont la cognoissance appartient aux officiers du Roy.

C'est le Chancelier de Franc , que Budée lors qu'il veut représenter la splendeur & l'eminence de sa dignité , appelle *legum præsidium : iuris æylum , morum institutorumque aram ; æqui bonique columen* , qui a le pouvoir & l'autorité de regler les fonctions de tous ces seaux , de prendre garde , que tous les officiers , qui en dépendent s'acquittent dignement de leurs charges , & qui a l'œil que tous les droicts & les emolumens que l'on

486 DE LA SOUVERAINETE' DV ROY,
en reçoit , soient fidelement mefnagez , &
pour l'exciter à se rendre foigneux à faire
obleruer cette police , les anciennes Or-
donnances luy donnent les confiscations
des officiers, qui ont esté condamnez pour
faulseté , ou pour auoir commis quelques
autres maluerfations au feau.

Plusieurs se font mis en peine, de recher-
cher l'origine de cette charge , & en quel
temps elle a esté establie en France. Quel-
ques-vns soustiennent , & entre autres Bu-
dée , sur le tiltre *De officio pref. Etti Prætorio*,
qu'il n'y auoit point encore de Chancellier
en France du temps de Philippe Auguste,
& que cette dignité estoit incogneue du-
rant les deux premieres races de nos Roys.
Mais ils se font grandement trompez. Car
nous voyons dans Hincmarus Archeuesque
de Reims , qui viuoit du temps de Charle-
magne , & Louys son fils , en l'année 800.
que les Roys auoient vn Chancellier qui
faisoit presque la mesme fonction , que ce-
luy d'à present. Il en parle de la sorte : *A-*
pocrisarius quem Nostrates Capellanium , vt Palatij
custodem appellant , omnem Clerum Palatij sub cura
& dispositione sua regebat , cui sociabatur summus
Cancellarius , qui à Secretis olim appellabatur , erant-
que illi subiecti prudentes , & intelligentes , ac fidelis
viri qui præcepta regia , absque vitio immoderata cu-

piditatis, vel venalitate scriberent, & secreta illis fideliter custodirent. Ceste dignité fut peut-estre erigée en France, à l'imitation des Empereurs Romains, qui auoient vn Chancellier à leur suinte : comme il se lit dans la Nouuelle 20. de Constantin Porphyrogenete, ou le nom de grand Chancellier *μεγαλοκαταλαί* est exprimé.

L'on tire l'etymologie du nom de cette dignité du mot latin *Cancelli*, qui signifie des balustres faicts en forme de rets, dont estoit enuironné le thrône du Prince, & le Chancellier estoit dans le mesme parquet où il receuoit les requestes que l'on presentoit au Roy, & scelloit les lettres en ce lieu eminent, en presence & en la veuë de tous les assistans, afin qu'il fust obserué de tout le monde, & qu'il ne fit point de fraude ny de tromperie au seau: d'où vient que Cassiodore parlant en l'Epistre 6. du liure II. à celui qui auoit esté pourueu de cette charge, luy disoit, *Respice quo nomine nuncuparis, latere non potest, quod inter cancellos egeris, tenes quippe lucidas fores, claustra patentia, fenestras ianuas.*

Les prerogatiues qui sont annexez à la qualité de Chancellier l'ont tellement releuée, qu'elle est maintenant la seconde dignité du Royaume; d'autant que c'est luy qui est le chef de tout le corps de la iusti-

488 DE LA SOUVERAINETE' DV'ROY,
ce. D'où vient que Paul Emile l'appellé
Juris Præfectum, il preſide dans les Conſeils
& dans toutes les Cours ſouueraines : Da-
uantage il eſt la voix du Prince, & c'eſt luy
qui dans les Eſtats, dans les aſſemblées, &
entre toutes les actions publiques où pa-
roïſſent les Roys, porte la parole pour
eux, & qui declare leurs intentions. Ou-
tre plus il a ce priuilege, qu'on ne peut le
priuer de ſa charge qu'avec la teſte, & ſans
luy faire premierement ſon procez, com-
me on le pratiqua à l'endroit du Chancel-
lier Poyet du temps de François I. Car
bien que le Roy puiſſe de ſon autorité ab-
ſoluë luy oſter les ſeaux, quand il iuge e-
ſtre à propos pour ſon ſeruiſſe : Neantmoins
le caractère de la dignité luy demeure iuſ-
ques à la mort.

Quant aux Gardes des Seaux, ils jouiſſent
des meſmes auantages que les Chancelliers
de France. Toutesfois le Parlement de Pa-
ris leur conteſte la preſceance; comme il ſe
voit dans la remonſtrance qu'ils preſente-
rent au Roy Charles neuſième, lors qu'il
fit ſon entrée dans Paris, pour empêcher
que le Garde des ſeaux de Birague ne l'en-
treprit ſur eux en cette ceremonie. De-
puis encore ils formerent la meſme oppoſi-
tion à Monsieur du Vair; mais avec beau-
coup

coup plus de subject, pource que Monsieur le Chancelier de Sillery estoit à la Cour, qui presidoit à tous les Conseils, & qui exerçoit vne partie de la charge.

Le iugement de rous ces differents, depend de la volonté du Roy, qui distribue les honneurs, ordonne les rangs, & regle les sceances de son Royaume, comme il iuge estre à propos pour le bien de ses affaires, & selon les diuerses occasions qui se presentent.

Je ne m'arrestteray point icy à rendre la raison, pourquoy il n'appartient qu'au Roy de sceller en cire jaune, d'autant que i'en ay parlé au dernier chap. du 2. liu. ny à monstrier que les emolumens du sceau sont du nombre des plus anciens droicts du Domaine de la Couronne, ny comme l'on en doit compter en la Chambre des Comptes, pource que cela est amplement expliqué dans les Ordonnances de Philippe le Long, de l'année 1320. de Henry II. de l'année 1551. & des autres Roys qui leur ont succédé.

Du Dernier Ressort ; & que c'est vn des principaux droicts de la Souueraineté.

CHAPITRE II.



Omme il n'y a que Dieu qui puisse reparer les manquemens , & remedier aux desordres qui arriuent dans les causes secondes , dont il se sert pour le gouvernement de cét vniuers ; Il n'y a aussi que le Roy qui represente en terre cette majesté diuine qui aye le droict de corriger les fautes des Officiers & des Magistrats qu'il a commis en sa place , pour rendre la iustice à ses subjets : Cè droict souuerain estoit appellé par les anciens , *extremum iudicium* ; ou dernier ressort : qui consiste au iugement des appellations , des requestes ciuiles , des propositions d'erreur , des contrarietez d'arrests , des euocations , des interdictions , & des reglemens de Iuges. Ce qui merite bien d'estre amplement expliqué ; ie m'efforceray de le faire en ce chapitre , avec le plus d'ordre qu'il me sera possible : Je traiteray premierement des appellations.

Du commencement elles n'estoient point.

en vſage parmy nous : car ny les anciennes loix Saliques , ny les loix Franciques , ny celles des Allemans, des Ripuaires, & des Bourguignons , n'en font aucune mention : Il ſe void bien par ces loix anciennes , que les Roys de ce temps-là , receuoient les plaintes qu'on leur faiſoit contre les Iuges , qui auoient dénié de rendre la Juſtice , ou qui par ignorance ou corruption auoient donné des iugemens iniuſtes : Mais l'on ne procedoit point par voye d'appel , mais ſeulement par requeſte & ſupplication.

L'eſtime qu'ils en vſerent de la ſorte pour deux raiſons : La premiere; pource qu'alors les plus importantes matieres eſtoient iugées par les Commiſſaires , qu'ils appelloient , *Miſſos Dominicos* , qui rendoient la Juſtice ſouuerainement , & perſonne n'eut oſé appeller de leurs iugemens, ſans bleſſer leur autorité & celle du Roy qui les auoit enuoyez : Et pour le regard des petites affaires qui eſtoient decidees par les Comtes, les Eſcheuins & leurs Lieutenans , ils auoient de la pudeur d'accuſer la conſcience de leurs iuges , pour ſi peu de choſe. La ſeconde, d'autant qu'ils eſtimoient que la voye d'appel , tant aux matieres ciuiles , que criminelles, eſtoit vn moyen pour

492 DE LA SOUVERAINETÉ DV ROY
destourner la Iustice, & multiplier les procès qu'ils auoient grandement en horreur.

Et de faict, à présent en toute l'Allemagne, & és Comtez de Metz, Toul, & Verdun, les appellations n'ont point de lieu en matiere criminelle, & en matiere ciuile, qu'aux choses qui excèdent la valeur de huiët cents liures en quelques lieux, & de douze cents liures en d'autres. Aussi nous apprenons de nos Liures que les appellations ne furent inuentées à Rome, que deux cents quarante & quatre ans apres sa fondation, & qu'elles ne furent introduites que pour gratifier le commun peuple, qui auoit en main la puissance Souueraine, comme Tite Liue le remarque au Liure 2. de son histoire; *Publius, Valerius, Publicola*, dit-il, *legem tulit in vulgi gratiam de prouocatione ad populum, aduersus Magistratus*. Et au Liu. 3. il adiouste, que cette flaterie enuers le peuple, vint à vn tel excès, qu'ils firent vne nouuelle loy, *Ne quis vllum magistratum crearet sine prouocatione, qui creasset, eum ius fasque esset occidi*: Et Suetone dit, que depuis que la puissance populaire fut transferée aux Empereurs, ils furent si curieux de conseruer ce droit; que mesmes ils receurent les appellations du Senat: Ce qui dura iusques à l'Empereur Adrian, qui fut le premier qui osta ce

desordre. Ces exemples ont eu tant de force sur les esprits de nos ancestres, que du temps de Philippes le Bel, comme disent quelques-vns, ils receurent l'usage des appellations : mais le dernier ressort en est demeuré au Roy; dont neantmoins il a laissé l'exercice tant à ses Parlements qu'aux autres Juges, à qui il a donné le pouuoir de iuger souverainement.

Quant aux requestes civiles, que l'on propose contre les arrests des Cours souveraines : Il n'y a point de doute, qu'elles ne soient aussi comprises en ce dernier ressort, pource que c'est au Roy qu'elles se presentent, & c'est de luy qu'il faut obtenir les lettres : Mais comme il n'y a rien à qui l'on doive porter plus de reverence, qu'aux arrests qui sont prononcez sous son nom sacré : L'on doit aussi prendre garde de se comporter avec vn grand respect, lors qu'on veut se pourvoir à l'encontre : de peur que l'on ne tombe dans le mesme blasme, que merita iustement Claudius Capito, dont parle Tacite : *Egit Claudius Capito irreuerenter magis quam constanter : ut qui. Senatusconsultum apud Senatum accusaret* : ce qui approche de ce que Cicéron disoit sur ce mesme subiect en l'oraison pour Cluentius, *Rem integram hominis non alieni, quamvis suspiciosam defendere, bu-*

494 DE LA SOUVERAINETÉ DV ROY,
manitatis esse putabamus: rem autem indicatam libe-
factare conari, impudentia: Aussi ne doit-on pas
proposer les requestes ciuiles par forme de
griefs: car ce seroit bleffer trop hardiment
l'autorité du Roy en la persōne de ses prin-
cipaux Officiers: mais par vne humble sup-
plication, fondée sur le dol & sur la surpri-
se de la partie, ou sur les autres moyens qui
sont permis par les Edicts & les Ordonnan-
ces, & qui sont pour la pluspart tirées de la
loy *Diuus, ff. de re indic.* Dont pareillement le
Roy en a laissé la cognoissance aux mes-
mes Iuges, qui ont donné les arrests. En
quoy l'on peut remarquer la difference
qu'il y a entre les Cours souueraines & les
Iuges inferieurs: car le pouuoir des Offi-
ciers subalternes est finy si tost qu'ils ont
donné leur iugement à qui ils ne peuuent
plus rien adiouster ny diminuer, comme
il est dit en la loy 4. *C. quomodo & quando iud.*
Mais les Magistrats souuerains peuuent
iuger tout de nouueau, en vertu des let-
tres de requeste ciuile, que le Roy
oëtroye.

L'on doit dire le semblable des propo-
sitions d'erreur, qui estoient ancienne-
ment le seul moyen de se pouruoir con-
tre les arrests des Cours souueraines: com-
me il est remarqué en l'Edict de Chantelou:

Elles ne doiuent estre fondées que sur l'erreur de faict, & non de droict, de peur d'offenser la reputation des Iuges : Il faut aussi obtenir des Lettres du Roy, qui ne les accorde iamais, qu'apres que les Maistres des Requestes luy ont donné leur aduis au Conseil sur les inuentaires du procez, qui leur sont communiquées: comme le contiennent les Ordonnances de l'an 1539. & celles d'Orleans, & de Blois.

Le Roy a de coustume aussi de renvoyer le iugement des erreurs aux mesmes Cours, où les Arrests ont esté donnez.

Il en est ainsi de la contrariété d'Arrests, qui ont esté rendus en diuerses Cours souveraines, entre mesmes parties, & en mesme matiere: pource que ces compagnies estans égales en puissance: le Roy par main souveraine en attribue la cognoissance au grand Conseil, excepté de ceux qui ont esté donnez en vn mesme Parlement: Car d'ordinaire l'on conuertit cette contrariété en vn moyen de Requeste ciuile: c'est pourquoy la mesme Cour en cognoist.

Mais quant aux derniers poincts, que nous auons aussi compris sous le dernier ressort: sçauoir est la cassation des Arrests,

496 DELA SOUVERAINETE' DV ROY,
les euocations, les interductions & Re-
glemens de Iuges, comme ils sont de plus
grande importance, que tous ceux dont
nous venons de parler; Aussi voyons-nous
que le Roy s'en est reserué la cognoissance
en son Conseil: Et principalement lors
qu'on luy demande la cassation d'un arrest,
que l'on soustient auoir esté donné contre
ses Ordonnances, contre son autorité,
contre l'vtilité publique, & contre les
droiëts de sa Couronne: car bien que cela
n'arriue que fort peu-souuent en ces com-
pagnies, dont la fidelité, la doctrine, le
iugement, & l'experience est recognue de
tout le monde: Neantmoins quand cela se
rencontre, il n'y a point de doute que le
Roy ne le puisse declarer nul, & le casser:
Imitant en cela l'exemple des Empereurs
Romains, qui outre qu'ils se reseruoient la
cognoissance de telles matieres, ils ne fai-
soient point encore de difficulté de casser
de semblables iugemens; mesmes ceux qui
auoient esté rendus par les grands Preuoits
de leur Palais, qui iugeoient seuls en der-
nier ressort, comme il est dit, *in l. omnes, C.
si contra ius vel vilit. public.* & c'est pourquoy
ils nommoient la Requeste qui leur estoit
presentee à eët effect *διδασκαλικον.*

J'ay veu obseruer qu'en ces occasions
l'on

l'on met difference entre le Parlement de Paris, & les autres Parlements & Cours Souueraines : Car s'il s'agit de casser vn Arrest du Parlement de Paris, & qu'il soit besoin d'ouïr les Presidents & les Conseillers qui ont assisté au iugement, pour rendre raison de leurs Arrests, cela se doit faire en la presence du Roy; Cette celebre compagnie ayant merité cette prerogatiue, de ne rendre conte de ses actions en general, qu'à la seule personne du Roy. Pource que c'est principalement en cette Cour, où il a estably avec plus d'éclat, le lit de sa Iustice. Mais quant aux Arrests qui ont esté donnés aux autres Parlements, & en d'autres compagnies Souueraines; cela se traite dans le Conseil d'Estat, ou Priué, bien que le Roy n'y soit pas present.

Et pour le regard des euocations, elles se iugent de mesme, dans le Conseil Priué du Roy; car elles ne se peuuent faire, que de sa Souueraine puissance, d'autant qu'elles sont vne espeece de priuileges qui se donnent contre l'ordre des Iurisdicctions, qui veut que chacun plaide deuant son Iuge naturel. l'vse de ce mot, pource que veritablement c'est vn ordre qui a esté estably par la nature mesme, comme disent les Docteurs sur le §. *Sed naturalia quidem iura in-*

ffit. de iur. natur. & sur la loy omnes populi, ff. de iust. & iure. D'où vient que Thucydide parlant des conditions de la paix que firent les Grecs, apres la guerre Peloponnesiaque, il dit qu'il fut expressement conuenu, *ut controuersia priuatorum à suis iudicibus, non autem alienis dirimerentur*; ce que Ciceron veut signifier, lors qu'en vne de ses actions contre Verres, il dit, *quod ciuis Romanus à Siculo petit Siculus Iudex datur: quod Siculus à ciue Romano, Iudex Romanus*. Aussi voyons-nous dans les loix Romaines, que les Empe-reurs n'auoient point accoustumé d'euo-quer en leur Conseil les causes des parti-culiers, si ce n'estoit en deux cas; quand les Iuges ordinaires denioient la Iustice, comme il est dit en l'Authent. *ut different. Iudices*, & en l'Auth. *De Quaestore §. super hoc*, ou bien lors que les vefues, les pupilles, & telles autres miserables personnes la de-mandoient, quand ils craignoient la trop grande puissance de leurs aduersaires. *Si pupilli & vidua, aliquæ fortuna iniuria miserabiles, iudicium nostra Serenitatis orauerint, praesertim cum alicuius potentiam perhorrescunt, cogantur eorum aduersarij examini nostro, sui copiam facere*, dit l'Empereur en la loy 1. C. *quando Imper. inter pup. & vid.*

Ce qu'ils faisoient pour obeïr au com-

mandement de Dieu , qui enjoint aux Roys , de prendre vn soin particulier de toutes ces personnes pitoyables , *defendite viduam , iudicate pupillo* , leur dit-il , par le Prophete Esaye ; A quoy se rapporte le *Can. regum* , le c. *si administratores* , & le c. *Principis* , 23. q. 5. qui sont la plus-part extraits du commentaire de Sainct Hierosme sur Hieremie , où les mesmes commandements de Dieu sont repetez. Hors ces occasions , tous ces Anciens defendoient les euocations , comme Ciceron le remarque en ses Epistres *ad Atticum* , & specialement où il dit , *euocari ex Insula Cyprios , nec licitum , nec iustum*.

Nos Roys n'ont pas esté moins curieux que les autres , à s'acquiter de ce deuoir , comme nous voyons par les Edicts de la Bourdesiere , de Chantelou , de l'an 1539. d'Orleans , & de Blois , qui ont expressement deffendu les euocations , si ce n'est à cause des parents & des alliés que les parties ont dans les Cours Souueraines , dans le nombre & les degrés , qui sont specifiez par les Ordonnances : ou que quelques Presidents ou Conseillers eussent fait leur propre des affaires qui se traittent deuant eux , comme s'ils auoient consulté , escrit , solicité , & fait les frais des poursuittes : Et

500 DE LA SOUVERAINETE' DV ROY.
qu'ils eussent aussi des parents & des alliés
en mesme degré , & en mesme nombre,
qui est porté par les Edicts. En quoy nous
auons esté plus rigoureux que les Romains;
Car ils permettoient aux Peres d'estre lu-
ges des causes de leurs enfans : aux enfans
d'estre Iuges de celles de leurs Peres : aux
maris de celles de leurs femmes ; & aux
Maistres de celles de leurs domestiques,
comme il est dit *in l. 6. ff. de recept. qui arbiur.*
et in l. in priuatis , ff. de iudic. se persuadants
que comme l'office de Iuge est tout public,
qu'ils se dépouilleroient aussi de toute af-
fection particuliere , quand ils viendroient
à rendre leurs iugemens en telles rencon-
tres. Dequoy l'on void des exemples de
plusieurs grands personnages , qui faisoient
gloire d'estre plus exacts & plus seueres
contre leurs parents & leurs alliés , que
contre les estrangers. Mais au contraire en
ce Royaume , les Ordonnances de nos
Roys ont deffendu qu'en ny les Peres , ny les
enfans , ny les gendres , ny les beaux-fre-
res , ny les oncles , ny les neveux , ny les
cousins germains , fussent Iuges des procès
tant ciuils que criminels , où leurs parents,
dans ces degrés auroient quelque interest;
Et elles veulent qu'en ce cas , sur la simple
requisition de la partie aduersé , que les

causes soient renuoyées, non pardeuant leurs collegues, mais pardeuant d'autres Iuges, qui ne soient point interessez : comme il est dit en l'Ordonnance de Blois art. cxxi. à peine de nullité des Arrests, où tels parents auroient assisté. Et c'est là dessus que les euocations pour les parentez ont esté introduites parmy nous ; Nos Roys ayant veu en plusieurs rencontres que l'affection du sang faisoit le plus souuent vne plus viue impression dans les esprits des Iuges, que celle du public & de la Iustice. Et bien que le Roy puisse de son autorité retenir la cognoissance des causes des parties, qui demandent leur euocation, neantmoins le plus souuent il la renuoye au plus proche Parlement, si ce n'est que toutes les parties en demandent la retention au Conseil, ou que le subiect de leur contention soit pour des droits qui appartiennent au Roy, dont l'on ne puisse cognoistre, ny auoir de l'éclaircissement qu'en son Conseil.

L'on peut dire la mesme chose des reglements de Iuges, sur les differents qui arriuent entre les Cours Souueraines, & les autres, qui ont le pouuoir de iuger sans appel. Ces reglements se traittoient cy-deuant dans le grand Conseil : mais maintenant le Conseil Priué du Roy en a retenu la co-

502 DE LA SOUVERAINETE' DV ROY,
gnoissance, pource que l'on a estimé, que
puis que le Roy estoit l'auteur de toutes
les Iurisdiccions de son Royaume, c'estoit
à luy de les regler, & d'interpreter leurs
pouvoirs, voire mesme de l'oster aux vns
par interdiction, pour la donner aux au-
tres, suivant la maxime commune de la
loy 58. ff. de indic. qui dit, *Iudicium soluitur*
versante eo, qui minus imperium habet: ce que
l'on ne doit faire qu'auec cognoissance de
cause, & pour de grandes occasions, d'au-
tant que l'auctorité du Prince doit tous-
jours se mesurer selon les regles de l'equité
& de la Iustice.

De la puissance du glaive que le Roy a sur tous
ses sujets.

CHAPITRE III.



Est sans doute que la puissance
du glaive, est la principale mar-
que de la Souveraineté Royale;
C'est pourquoy lors que nos an-
ciens Roys prenoient possession de leur
Royaume, on leur faisoit present d'une es-
pée de la part de leurs sujets, *velut imperij
insigne præcipuum*, dit Frisingensis; Ce qu'ils
auoient appris des Romains, qui tenoient
cette mesme coustume: Car leurs Histo-
riens rapportent, que si tost que Commo-
dus eust esté proclamé Empereur par les
soldats Pretoriens, en signe de la prise de
possession de l'Empire, ils luy presenterens
l'espée de Iules Cesar, qu'ils auoient prise
dans le temple de Mars, où elle auoit au-
trefois esté consacrée: Tacite dit la mes-
me chose, au liure 3. de son histoire; où
il raconte comment Vitellius se demit de
l'Empire entre les mains de Sabinus: *Vi-
tellius (inquit) exsolutum à latere pugionem Cæ-
cilia simplici Consuli in concione velut ius visa et*

R R r iij

L'espée seruoit d'une semblable marque parmy les Roys de Judée, comme les anciens Interpretes le tesmoignent, lors qu'ils expliquent ces paroles du 2. des Roys. chap. 20. *accinctus gladio dependente usque ad ilia.* Ce qu'ils confirment encores des ses paroles de l'Epitalame que composa Dauid sur les nopces de son fils Salomon : *accingere gladio tuo super femur tuum potentissimè*, où ils disent tous, que le glaive est le symbole de la puissance Souveraine des Roys : Mais ils adioustent, pourueu qu'il soit employé utilement : c'est à dire, pour faire la guerre aux Infidelles, pour conseruer les frontieres, pour defendre leurs Alliés, pour garder leurs personnes : & en fin pour punir les crimes, & les meschancetez des hommes.

Je ne parleray point icy du pouuoir qu'ils ont, de declarer publiquement la guerre à leurs ennemis ; pource que i'en ay traité cy dessus. Et quant aux forces qu'ils doiuent auoir prés de leurs personnes : le diray seulement, que bien que leur plus seure garde consiste en la bien-veillance, & en l'affection de leurs peuples ; toutes fois il importe, pour releuer d'autant plus leur Majesté Royale, qu'ils ayent tousiours des
gens

gens armez à leur fuite. C'est ce que les premiers Roys de Rome sceurent sagement pratiquer : car à fin de se rendre plus redoutables , & plus respectez par leurs subjects , ils auoient tousiours vne compagnie de gardes , qu'ils appelloient *Celeres*.

Les Empereurs establirent sur cét exemple, les soldats Pretoriens, qu'ils nommoient *Ostentionales*; d'autant qu'ils seruoient principalement de parade pour rendre leur Cour plus magnifique. Les Roys de Macedoine auoient de mesme à leur fuite vne compagnie de Caualerie qu'ils appelloient *Sacras Alas*. Ainsi les Roys de Perse auoient ceux qu'ils nommoient *Melophoros*, *id est mille selectissimos* : Ainsi les Roys de Iudée, se faisoient tousiours accompagner des plus vaillants hommes de leurs Royaumes , qu'ils appelloient *Celerhos*, & *Pheletos*. Salomon mesme en auoit soixante , dont il parle dans le Cantique. *Sexaginta illi fortes, qui custodiebant lectulum Salomonis*.

Ce qui est entierement necessaire aux Roys , pour exciter leurs subjects à les reuerer & à les craindre , pour dissiper promptement les tumultes & les seditions , qui peuuent s'esleuer à tous moments parmy le peuple , pour empescher que l'on n'attente sur leurs personnes sacrées; ce que nous

506 DE LA SOUVERAINETE' DV ROY,
auons veu souuent arriuer, par la negli-
gence de leurs gardes : Et en fin pour fai-
re retirer la populace, & la tenir en ordre,
quand ils veulent paroistre en public : ce
que les Anciens appelloient *Submotionem*.

Voyons maintenant en quoy consiste la
puissance du glaïue, quand elle a pour ob-
ject la punition des crimes : Nos Iuriskon-
sultes la nomment par Antonomasie, tan-
tost *Potestatem*, tantost *Merum Imperium* : Car
certes peut-on auoir vne puissance plus
absoluë, ny qui resseute dauantage sa Sou-
ueraineté, que de disposer à sa volonté de
la vie des hommes, & les condamner à la
mort par vn dernier iugement ; Aussi nous
lisons que du temps de la Republique Ro-
maine, il n'y auoit que le Dictateur, qui
eust cette prerogatiue par dessus tous les
autres Magistrats, comme il est dit *in l. 2. §. 1.
populo, ff. de orig. iuris* : Et bien que depuis
ce pouuoir fut donné *Triumviris capitalibus*,
c'est à dire aux trois Iuges criminels, neant-
moins ils n'estoient pas proprement sou-
uerains ; pource que l'on pouuoit appeller
de leur sentence à l'assemblée generale
du peuple.

De quoy l'on peut induire, que bien
que parmy nous, les Iuges subalternes
ayent quelque exercice de la haulte Iusti-

ce : toutesfois l'on ne peut pas dire, qu'ils aient proprement ce *merum imperium*, parce que l'on peut appeller de leur iugement; comme nos Docteurs le traittent sur la loy, *Et in maioribus*, C. de appell. Et bien que les Preuosts des Mareschaux iugent sans appel, neantmoins ils ne peuuent non plus s'attribuer cette puissance Souueraine, pource qu'ils ne font que Iuges extraordinaires, & que leur iurisdiction ne s'estend que contre les vagabons & les voleurs des grands chemins, comme il est dit en la loy, *Mulier*, ff. de capt. & postl. reuer.

C'est pourquoy il n'y a proprement que les Iuges Souuerains, & qui *vice sacra indicant*, qui puissent s'attribuer cette puissance, non pas en propriété, non plus que leurs offices; comme le Iurisconsulte Azon le voulut soustenir mal à propos deuant l'Empe-
 reur Henry VII. contre le Iurisconsulte Lothaire, qui maintenoit que cette puissance estoit inseparable de la Souueraineté du Prince; & que les Officiers n'en auoient que le simple exercice, comme n'estant que depositaires, ou simples usufruitiers de leurs offices: Qui est la plus certaine opinion, bien que la plus-part de nos Docteurs la combattent, mais sans raison: Car il faut tenir pour maxime, que bien

308 DE LA SOUVERAINETE' DV ROY,
que les Officiers soient maintenant perpe-
tuels, qu'ils achètent leurs charges, & que
les peines qui estoient autrefois prescrites
par les loix, soient desormais en leur arbi-
trage, qui sont quelques marques de pro-
priété: toutefois il est vray de dire qu'ils
n'ont que la simple execution de la puissan-
ce du glaive que le Prince leur donne,
quand il leur confere leurs charges. Et de
fait ne voyons-nous pas, que les Arrests
des Cours Souueraines, *qua iudicant vice re-*
gia, sont intitulez du nom du Roy, ce que
l'on ne pratiqueroit pas, si les Officiers
auoient quelque droit de propriété en cet-
te puissance?

Et bien que les Seigneurs haults Iusti-
ciers tiennent, que leurs Iustices leurs sont
patrimoniales, & qu'ils n'en doiuent que
l'hommage au Roy; Neantmoins il seroit
ridicule de dire, qu'ils eussent en proprie-
té cette puissance du glaive, veu qu'ils ne
cognoissent que des crimes communs, &
non pas des royaux. Et qu'il y a appel de
leurs iugemens: De sorte que leur co-
gnoissance est plustost de iurisdiction, que
de commandement; Ioinct que chacun
pour peu versé qu'il soit en nos antiquitez,
sait que toutes ces Iustices seodales, ont
esté vsurpées sur l'auctorité royale, & qu'el-

les n'ont emprunté leur force , que de la negligence des Officiers du Roy , qui les ont tolerées : comme il est arriué des dignitez feodales , qui par succession de temps sont deuenües Seigneuries patrimoniales , encore que du commencement elles ne fussent que simples offices à vie.

Or bien que les Roys, & mesmement les nôtres, ne iugent que fort rarement des crimes de leurs sujets : neantmoins l'on ne doit pas inferer , qu'ils se soient dépouillez pour cela de leur autorité Souueraine , non plus qu'on ne peut pas dire sans grande absurdité , que Dieu se soit priué de sa puissance , sous pretexte qu'il employe les causes secondes , pour le gouuernement & la conduite de cét Vniuers : Car les Roys s'abstiennent volontiers de cét exercice , d'autant qu'il leur est plus seant , d'estre arbitres des affaires ciuiles , que Iuges des crimes & des supplices , comme le tesmoigna Neron (& c'est la seule marque de bonté qu'il donna iamais en sa vie) lors qu'on luy porta signer vn iugement de mort , & qu'il dit , *vellem nescire literas* : Et dont Suetone nous donne vn autre exemple en la personne de Titus , qui fut enrichy d'vn naturel si doux , & si plein d'humanité , qu'il ne pouuoit s'empescher de ietter des

510 DE LA SOUVERAINETE' DV ROY,
larmes , quand il falloit qu'il fouscruist à
vn Arrest de mort. *Iustis etiam suplicis illachri-*
mabatur , dit cét autheur. Ioint qu'il seroit
à craindre , que les Roys se rendants trop
assidus à ces sortes de iugemens , ne deuinf-
sent avec le temps cruels & trop seueres ,
par l'accoustumance qu'ils prendroient à
ne voir espandre que du sang : comme il
arriua à l'Empereur Auguste , qui par cer-
te assiduité , deuint d'vne humeur si aigre
& si prompte , qu'en interrogeant vn iour
vn criminel , qui ne luy respondoit pas à
propos , de colere , il luy ietta au visage
vn canif qu'il tenoit en sa main ; ce qui
donna suieût à vn de ses familiers , qui
auoit obserué de loing cette action , deluy
faire tenir vn billet , où ces paroles estoient
escrites , *hinc recede , ô carnifex* : C'est pour-
quoy l'Empereur Theodose , pour obuier
aux inconueniens qui pourroient arriuer
de ces promptitudes , ordonna que l'on
suspendroit durant trente iours l'execution
du iugement de mort , qui auroit esté pro-
noncé de la bouche du Prince , comme il
est dit *in l. si vindicari*, C. de *Panis* , & qui est
grandement loüé par Sozomene au Liure
7. de son hist. Eccles.

L'on ne doit donc point douter , que le
Prince ne retiennet tousiours le droit de pou-

voir assister aux iugemens des crimes, quand bon luy semble ; & bien qu'il se décharge de ce soing sur ses Officiers, il seroit neantmoins à desirer qu'il assistast quelquefois à ces iugemens ; principalement lors qu'il a ce pouuoir sur soy-mesme de tenir vne iuste mesure, entre l'indulgence & la seuerité ; & qu'il peut pratiquer ce sage Conseil que luy donne S. Gregoire en ses Morales au Liure 20. & dont est tiré le canon, *Disciplina distinct. 45. miscenda est lenitas cum seueritate, faciendumque quoddam ex vtraque temperamentum, vt neque multa asperitate exulcerentur subditi, neque nimia benignitate soluantur.*

En suite de ce discours, l'on peut demander ce que l'Empereur Trajan vouloit entendre, lors que donnant l'espée Impériale à son Connestable: (car ainsi pouuons-nous appeller *Præfectum pratorio*) il luy dit, *hoc pro me vtere si benè impero, si male contra me;* s'il entendoit luy donner par ces paroles, la permission de luy résister, & de s'opposer à ses volontez, si dauanture il abusoit de son autorité, où bien s'il luy tenoit ce discours par vn excès de moderation, dont il faisoit gloire d'accompagner toutes ses actions. I'estime que l'on doit plustost donner cela à la modestie de ce grand Prin-

512 DE LA SOUVERAINETE' DV ROY,
ce , qui auoit mesme accoustumé de souf-
mettre toutes ses affaires au iugement du
Senat , & du peuple , voulant que leurs
decrets , fussent executez aussi bien con-
tre luy , que contre ses sujets.

Car il faut tenir pour maxime , que bien
que le Prince Souuerain , outre passe la iu-
ste mesure de sa puissance , qu'il n'est pas
permis pour cela , de luy resister : C'est le
Conseil que donne Sainct Pierre Epist. 2.

*Regem honorate , serui subditi estote , in omni timo-
re dominis , non tantum bonis & modestis , sed
etiam discolis : hoc est enim gratia , si propter Dei*

conscientiam sustinet quis tristitias , patiens iniuste.
C'est ce que le fils de Dieu nous a mon-
stré par son exemple , & que les anciens
Chrestiens ont pratiqué , qui ne voulurent
jamais se rebeller contre leurs Princes , bien
qu'ils fussent cruellement persecutez , ny
se mesler dans les factions qui se braf-
soient contre leur Estat. D'où vient que
Tertullian disoit en son Apollogie. *Vnde*
Cassij , & Nigri , & Albini ? vnde qui inter duas
lauros obsident Casarem ? vnde qui armati palatium
irrupunt , omnibus tot Sigerijs ac Pathenijs ? de
Romanis ny fallor , id est , non de Christia-
nis.

Je sçay neantmoins que plusieurs voulant
interpréter ces paroles de l'Enipereur Tra-
jan,

jan , vsent de distinction , & disent , que pour le regard des simples sujets , il ne leur est pas permis de faire aucune resistance aux volontez de leurs Princes , bien qu'ils exercent toutes sortes de violences en leur gouvernement : Mais quant aux principaux Officiers & Magistrats , qu'ils peuuent legitimement s'opposer aux commandemens du Roy , lors qu'ils les recognoissent estre iniustes ; ce qui est entierement absurde : Car tous les Officiers , bien qu'ils soient releuez en dignité , ne tiennent leur puissance que du Roy , & sont aussi bien ses naturels sujets , que tous les autres du peuples , Sainct Paul ayant dit en termes generaux , *Omnis anima sublimioribus potestatibus subdita sit*. Dauantage ce seroit renuerser tout l'ordre de la Monarchie , s'il estoit permis aux Officiers de resister aux Ordonnances du Prince , les rendre ses égaux , voire mesme ses Superieurs : Ce seroit aller contre le Precepte de l'Apostre , qui nous enjoint expressement d'obeir au Prince , *tanquam precellenti* ; c'est à dire sans aucune exception : si ce n'est pour les choses qui contreuiennent directement aux commandemens de Dieu. Ce qui nous est confirmé par l'exemple de Samuel , qui ne laissa pas d'honorer Saül , & de luy rendre

514 DE LA SOUVERAINETE' DV ROY,
toutes sortes de deuoirs , en la presence
mesme des plus grands Seigneurs du peu-
ple, bien que pour ses cruauitez , & ses de-
sobéissances , il eust esté maudit de Dieu,
comme il est dit en Samuël Liu. i. ch. 15.


Les Princes toutefois ne doiuent pas
abuser de leur autorité , encor que per-
sonne ne puisse controoller leurs actions ;
& qu'ils n'ayent point de Iuges au dessus
d'eux , qui les punissent de leurs fautes ;
D'autant qu'ils ont leur conscience qui les
bourelle , & leur reproche incessamment
leurs cruauitez , & leurs mauuais déporte-
mens : *Si recludantur Tyrannorum mentes , dit
Tacite, posse affici laniatus & ictus , quando ut
corpora verberibus , ita scuitia , libidine , malis con-
sultis , animus dilaceretur , quippe Tiberium non for-
tuna , non solitudines protegebant , quin tormenta pe-
etoris suasque ipse penas fateretur : Adeo facinora at-
que flagitia sua , ipsi quoque in supplicium verterant.*
L'histoire nous rapporte encore l'exemple
d'Alexandre , qui ayant tué de sa main Cli-
tus l'un de ses principaux Capitaines , & le
Philosophe Calistenes ; sous pretexte qu'ils
le reprenoient avec trop de hardiesse : Il
fut tellement touché puis apres de l'hor-
reur de cette cruauté , qu'il se voulut tuer
luy-mesme ; pour reparation de son crime.
Auguste ressentit les mesmes pointes apres

qu'il eut grandement outragé vn Gentilhomme, qu'il soupçonnoit entretenir sa fille : Car il eut vn tel regret de s'estre laissé emporter à cét excés de colere, qu'il fut trois iours sans manger. Vn de nos Roys ayant de sang froid tué vn Gentilhomme de sa propre main, fut tellement agité par les remords de sa consciencē, qui luy representoit à tous moments en la pensée l'horreur de cét homicide, que pour satisfaire à la Iustice Diuine, il affranchit de son obeissance les parents de ce Gentilhomme, & erigea sa terre d'uctot en Royaume. C'est pourquoy les Roys deuroient se remettre tous les iours deuant les yeux, qu'autant qu'ils ont de pouuoir sur les hommes, autant sont-ils seuerement punis de la Majesté Diuine, quand ils abusent de leur autorité : Et que la puissance du glauiue ne leur a esté donnée que pour la deffense de la Iustice, & non pas pour vser de violence enuers leurs sujets. Et que mesme il n'est pas seant à vn Prince de venger de sa propre main les iniures qu'on luy a faictes : si ce n'est que l'on attente à sa personne, où que ceux qui conspirent contre son Estat, soient montez à vn tel degré de puissance, qu'ils ne puissent s'en deffaire que par ce moyen extraordinaire.

Car alors il est neceſſaire de preuenir pluſtoſt le mal , que d'attendre qu'il nous ac- cable ſous ſon fais quand il ſera arriué. Comme Alexandre le ſceut ſagement pratiquer , lors qu'il tua luy-mefme Parmenion , ſur l'aduiſ qu'on luy donna qu'il vouloit brouiller ſes affaires : d'autant que en ſes rencontres , il faut quelquefois ſ'éloigner des formes ordinaires de la Juſtice: *Cætera enim maleſicia , dit Cicéron , Tunc proſequi poſſunt , vbi facta ſunt , crimen verò proditionis , niſi prohibeatur ne accidat , vbi euenerit , fruſtra leges implorari.*

*De certains droits , dont la cognoissance n'appartient
qu'aux Officiers du Roy.*

CHAPITRE IV.

omme la cognoissance des choses Saintes , n'appartient qu'à ceux qui sont particulièrement consacrés à la Divinité : De mesme l'on ne doit traiter les questions qui regardent & qui concernent les droits de la Royauté , que deuant ceux qui ont le caractère de personnes publiques , & qui ont l'honneur d'estre Officiers du Roy. C'est pourquoy les Empereurs Romains instituerent expressement tous ces Juges, dont il est faict mention dans les tiltres du Code , *Vbi causa fideles , & diuina domus hominumque eius agantur*, *De Officio Comitum sacri patrimonij*, *De Praeposito agentium in rebus*, *De Officio Com. rer. priuat.* Et *De Palatinis sacrarum largitionum*, à fin de cognoistre des differents qui arriuoient pour leur Domaine & leurs reuenus particuliers : Ils créèrent & establirent encore tous ces autres Officiers , qui sont nommez dans les Tiltres , *De Officio Praef. Praetorio* : Et de *Officio Proconsul. & legati*,

518 DE LA SOUVERAINETE' DV ROY,
à qui particulièrement ils attribuerent la
cognoissance des procez , que l'on inten-
toit touchant les droicts de l'Empire , &
de tous ceux qui importoit à la conser-
uation de l'honneur & de l'autorité Im-
periale.

Nous auons tousiours obserué ce mes-
me ordre & cette mesme Police en ce
Royaume : Car il n'y a que les Officiers du
Roy , qui ayent la puissance de cognoistre
de tous les droits que nous auons cy-de-
uant expliquez , & principalement de ceux
dont ie veux traiter en ce chapitre.

Ie parleray premierement de l'infraction
des sauuegardes que le Roy donne , dont
la cognoissance est particulièrement de la iu-
risdiction de ses Officiers ; Pource que com-
me il n'y a que le Prince Souuerain qui les
puisse octroyer , ainsi que le contient l'E-
dict du Roy Louys XII. de l'an 1512. art.
69. & celui du Roy François premier, fait
à Cremieu, art. 15. où l'on fait expresse des-
fenses aux Baillifs & Seneschaux , d'en de-
liurer aucunes : Aussi n'appartient-il qu'à
ses Officiers d'en cognoistre. Ce que l'on
prouue par l'argument que l'on tire ordi-
nairement de la loy 2. C. *Vt nemo primatus ti-
tulum prædijs suis, vel alienis imponat, & vela re-
gia suspendat.* Et particulièrement de ces

mots , qui y sont inserés , *si clarissimus, vel curialis , vel miles , vel clericus* , qui n'estoient iusticiables que des Officiers Imperiaux.

Or quand l'Ordonnance deffend aux Baillifs de donner des sauuegardes , cela s'entend de celles , qui sont conceuës en termes generaux , & qui ne specifient & ne denotent aucune personne particuliere. Car il n'y a que le Prince Souuerain qui puisse parler de la sorte , & donner vne protection indefinie , comme dit le Docteur Balde, sur le titre *De pace Constantia. vers. dispensationem* : Mais quant aux sauuegardes qui se donnent de partie à partie , & sur vn different particulier , & avec cognoissance de cause , tous les Iuges les peuuent accorder : Et c'est de celles-là dont parle la loy , *Iubemus, C. de prapo. sac. cub. lib. 12. la-fis implorandi praesidij facultatem denegari, non conuenit* , si ce n'est qu'il soit besoin de faire assister la sauuegarde , par la force , comme lors que le Roy donne des Exempts de ses gardes , pour la deffense de certaines personnes , & contre des particuliers ; ou pour la garde de leurs maisons , qui sont en litige : car en ces rencontres , il faut s'adresser directement au Roy , & les demander de sa grace, suiuant la disposition de la loy, *Cum sape, C. de erogatione militaris anno. lib. 2.*

Il n'y a aussi, que les officiers Royaux, qui puissent cognoistre des affaires de ceux que l'on appelle Bourgeois du Roy, qui ne sont qu'en la Prouince de Champagne: d'autant que depuis qu'ils sont aduoüez pour tels, ils ne sont plus responsables, pour les cas personnels, que pardeuant les Officiers du Roy, bien qu'ils demeurent dans les terres des autres Seigneurs haults Justiciers. Ce priuilege a pris son origine, dès le temps de nos premiers Roys, lors qu'ils donnerent des terres & des Seigneuries en fief à la Noblesse & à l'Eglise, & qu'ils se reseruerent de certains hommes de condition libre, que l'on nommoit pour cette raison *Fiscalini*, *Indominicati*, *Manfarii*: comme l'on en voit des tesmoignages dans Gregoire de Tours, *Aimoinus Monachus*, *Iuo Carnotensis*, & dans les Capitulaires de Charlemagne. Et bien que du commencement par l'Ordonnance de Philippe le Bel, ce priuilege fût reel; c'est à dire, que personne ne s'en peust seruir, qu'il ne demeurast au lieu de la bourgeoisie: Neantmoins peu à peu il est deuenu personel: de façon, que bien qu'ils n'ayent point leur domicile au lieu de la bourgeoisie, ils ne laissent pas neantmoins de iouir de leur priuilege, en s'aduoüant Bourgeois de Roy

Roy pardeuant le Iuge Royal.

Ce qui a quelque rapport à ces paroles
solemnelles des Anciens , *Ciuis Romanus
sum* , dont Cicéron parle en l'action 7. contre
Verres : Et plus encore à cette coustume ,
qu'auoient les anciens Saromathes ,
qui en memoire de ce qu'ils auoient esté
affranchis par leur Roy Zerim , quand quel-
qu'un les vouloit remettre en seruitude , ils
crioient à haute voix , *Zerim* : Et si apres
cette clameur l'on eust voulu continuer de
leur faire violence , ils l'imputoient à crime
capital , comme nous l'apprenons de Lu-
cian. Cela mesme s'obseruoit parmy les
Iuifs : Car si tost que celuy que l'on vou-
loit forcer , de faire vne œuvre seruite ,
auoit crié Ezechias , il le falloir laisser en
liberté , à peine de la vie , pour le respect
& l'honneur qu'ils portoient à la memoire
de ce vaillant & pieux Prince , qui auoit
déliuré la Iudée de la seruitude de ses en-
nemis. Et sur ce mesme sujet Philostrate
rapporte en la vie d'Apolonius , que ce-
luy qui auoit en son col , vn anneau où l'i-
mage de l'Empereur estoit grauée , l'on ne
le pouoit contre son gré traduire en Ius-
tice , que pardeuant les Officiers de Cesar.
Qui est vn signalé tesmoignage du grand
respect , qu'on a porté de tout temps , à la

312 DE LA SOUVERAINETE' DV ROY,
puissance Souueraine : Mais afin que per-
sonne n'abusast de ce priuilege de bour-
geoisie, il fut ordonné au Parlement, sur
mes conclusions, par Arrest du 2. May 1611.
que tous ceux qui se voudroient aduoüer
Bourgeois du Roy, seroient tenus d'aller
deuant des Notaires faire leur adueu, &
le faire signifier aux Iuges des lieux, où ils
seroient demeurants, afin d'éuiter les frau-
des & les tromperies de ceux qui vou-
droient abuser de ce priuilege.

Il y a encores vn autre droit Royal, qui
approche aucunement du precedent ; c'est
celuy des submissions que l'on fait au Iuge
Royal, qui de toute antiquité permet aux
particuliers de se submettre librement à la
Iustice Royale, *Propter eximiam illam & sin-
gularem regum præminentiam*, comme parle vn
de nos anciens praticiens : Mais comme
ce droit a souuent esté debattu, par les Sei-
gneurs haults Iusticiers, qui se plaignoient
que par ce moyen l'on aneantissoit leurs
Iustices qui leur estoient patrimoniales.
Pour faire cesser tous ces differents, on a
mis distinction entre les submissions, que
l'on insere dans les contractz ; & celles qui
se font *ex postfacto*, & tout exprés : Car
quant aux premieres, les arrests du Parle-
ment les ont confirmées ; pource qu'elles

font part des contractz, que peut estre l'on n'eut point passés sans cette condition, comme nos Docteurs le traitent, *in l. contraxisse ff. de iudic.*

Mais quant aux autres submissions, qui se font tout exprés, pour decliner la Iustice du hault Iusticier; encores que les parties qui les ont consenties, ne s'en puissent plus dédire: Neantmoins le Seigneur les peut vendiquer; pourueu que ce soit deuant la contestation de la cause: Car autrement ils ne seroit plus receuable; si bien qu'en cette occasion, l'on ne garde point en France la loy, *Privatorum consensu, C. de Iurisdic. omnium Iudicum.*

Autrefois on a tenu, que le Roy auoit la preuention sur les haults Iusticiers; pour ce que l'on presumoit, que le Roy en donnant la Iustice aux autres, ne s'estoit pas entierement priué de son autorité. Neantmoins l'on a iugé depuis, qu'il ne pouuoit pretendre ce droit sur les haults Iusticiers, que quand les coustumes des lieux le luy donnoient, excepté toutesfois en matiere de complainte, & de reinte-grande. Pource que comme c'est le deuoir & l'office des Roys, d'empescher que rien ne se commette par violence entre ses subjects; il ny a que leurs Officiers aussi qui

124 DE LA SOUVERAINETE' DV ROY,
doiuent cognoistre de ces sortes de diffé-
rents , sans qu'ils soient tenus d'en faire au-
cun renuoy. Et l'on doit remarquer qu'an-
ciennement & auparauant que les Parle-
ments fussent establis , & que l'on eust re-
glé les Sieges ordinaires , que c'estoit les
Officiers ou les Commissaires du Roy, sça-
uoir vn Compté & vn Prelat qui cognois-
soient des complaints & des reintegran-
des qui arriuoient en matiere Ecclesiasti-
que, & qui iugeoient tant le petitoire, que
le possessoire des benefices : Mais depuis
que la Jurisdiction Royale a esté séparée de
celle de l'Eglise , on a laissé le petitoire au
Iuge Ecclesiastique , & le possessoire aux
Officiers du Roy. En suite dequoy l'on a
tenu que toutes les complaints qui se for-
ment appartiennent au Iuge Royal : Et mes-
me le sequestre que l'on donne en matie-
re de benefices , comme il se voit dans
l'Ordonnance de Philippe le Bel.

Et quant aux matieres ciuiles & profa-
nes , l'on a obserué durant quelque temps,
que le Iuge Royal en cognoissoit par pre-
uention & en concurrence avec le subal-
terne , non Royal : Mais depuis que les
droicts du Roy ont esté mieux entendus, on
a distingué les complaints incidentes , d'a-
uéc celles qui se font pour le principal. Et

l'on a iugé que la cognoissance de celles-là, appartenoit aux Iuges des Chastellains, & des Seigneurs haults Iusticiers, pardeuant qui les instances principales estoient pendantes: Mais pour le regard des autres, que la cognoissance en appartient au Iuge Royal, comme estans plus importantes que les premières.

Anciennement aussi la cognoissance de tous les contrats, & les obligations que l'on passoit sous le scel Royal, appartenoit aux Iuges Royaux: Mais maintenant cela ne s'observe plus; si ce n'est que l'on aye fait les contrats & les obligations sous vn scel attributif de Jurisdiction, dont il n'y a que trois en France: celui de Paris; de Montpellier, & des foires de Champagne & de Lyon, où bien lors que le scel de telles obligations & contrats est maintenu de faulx.

Dauantage l'on a observé iusques à présent, que la cognoissance de certains crimes, a esté reservée aux Officiers du Roy, & particulièrement de l'assassinat, que nos ancestres appelloient *Meurtrum*; de l'Incendie volontaire; du rapt & de la fausse monnoye, comme il est porté par vne ancienne Ordonnance de Philippe le Bel, qu'il fit, pour restrindre la trop grande auctorité,

526 DE LA SOUVERAINETE' DV ROY,
que les Seigneurs haults Iusticiers s'estoient
attribuée, depuis le regne de Huc Capet.
De façon que l'on tient qu'en la conces-
sion generale, que le Roy oëtroye de la
hauté Iustice, la cognoissance de ces qua-
tre crimes n'y est point comprise, tant
à cause de leur atrocité, que pource qu'ils
offencent la Majesté Royale, plus que
tous les autres crimes, & qu'ils combattent
directement la seureté publique, que le
Prince est particulièrement obligé de main-
tenir, & de deffendre, contre la violence
des meschans.

Du crime de leze-Majesté.

CHAPITRE V.



LE Crime de leze-Majesté est encore vn cas, dont la cognoissance n'appartient qu'aux Iuges Royaux, & le Roy mesme en de certaines rencontres, & selon la qualité des criminels, assiste quelquefois en personne à de tels iugemens; comme quand il s'agit de faire le procès à vn Prince du Sang, ou à vn Pair de France: où bien il choisit des Commissaires exprés pour faire les procedures, & donner Arrest de mort contre ceux qui en sont atteints & conuaincus: Ce qui se pratiquoit de la sorte à Rome. Car il n'y auoit que le Consul, le Senat, & le Peuple qui eust la puissance de iuger du crime de rebellion & de felonnie contre l'Estat, & de deleguer des Commissaires pour l'instruction du procès: Et puis que l'occasion se presente de parler d'un crime si atroce, i'estimerois n'auoir point donné à mon courage son entière perfection, si ie ne representois en ce lieu, en quoy consiste l'enormité d'un si meschant acte, &

528 DE LA SOUVERAÏNETÉ DU ROY,
quelles peines il merite pour sa puni-
tion.

Mais afin que nous puissions traiter ce
sujet avec ordre, l'on doit remarquer en
premier lieu, que l'on commet ce crime
en trois façons, sçavoir est, lors que l'on
medit des actions du Prince; ou quand on
attente sur sa vie; où lors que l'on fait des
menaces & des coniurations contre l'Estat.

La premiere espece de ce crime a esté
condamnée par Moyse, quand il faiet cer-
te deffense au peuple d'Israel; *Principi populi
tui non maledices*, & par le ch. 84. des Apo-
stres, qui excommunie d'un horrible ana-
theme tous ceux qui y contreviennent.
C'est sur ce canon que Zonare dit, que
ce qu'on appelle communément iniure, à
l'esgard des particuliers: on le doit appeler
impieté, à l'égard du Prince Souverain.
Aussi voyons-nous que le Iurifconsulte en
la loy 1. ff. *ad leg. Iul. Majest.* dit que ce cri-
me approche du sacrilege, à cause que les
Princes Souverains estans les vicaires de
Dieu, ses viues images, ou plustost les
Pieux de la terre, comme les appelle l'Es-
criture Saincte, leur personne nous doi-
uent estre aussi recommandables, que
les choses Diuines & sacrées; C'est pour-
quoy les Perses adoroient leurs Roys com-
me

me des Dieux. Ce que remarque Quinte Curse, lors qu'il dit, *Persas prudenter reges suos, inter Deos colere; maiestas enim regis, salutis tutela est.* De sorte qu'on peut dire que quand l'on iniurie les Roys, l'on fait iniurie à Dieu mesme.

Mais ce qui accroist dauantage l'atrocité de cette sorte de médifance, c'est que d'ordinaire elle est l'auantcouriére de la rebellion & de l'attentat contre la vie du Prince: *Nusquam enim male fecerunt, nisi qui male loquuti,* dit Tacite: D'autant que c'est elle qui prouoque ceux qui l'escoutent à mespriser la personne du Monarque, à blasmer son gouvernement & ses actions: & qui aigrit les courages des subjets contre luy. Ce que l'on ne doit pas entendre seulement des iniures que l'on public contre sa Majesté par enuie, par haine, ou par animosité; mais aussi de celles qui se disent par maniere de brocard & de railleries, qui ont esté tousiours aussi seuerement punies que les autres: comme nous l'apprenons de l'histoire qui nous donne plusieurs exemples de ses punitions. Diodore rapporte que Denis de Syracuse s'estant enquis d'un nommé Antiphon, quel estoit le meilleur cuiure de la terre; & que celuy cy par ruse luy ayant fait responce que c'estoit celuy dont l'on a-

530 DE LA SOUVERAINETE' DV ROY,
uoit fait les statuës d'Armodius & d'Aristo-
giton, qui auoient autresfois chassé les Ty-
rans de la ville d'Athenes, il se sentit si vi-
uement picqué de cette repartie, qu'il le fit
tuer sur le champ. L'Histoire d'Italie ra-
conte vne semblable punition d'un Gentil-
homme, qui estant interrogé par le Duc de
Milan Sforce comme il se portoit, il luy
repartit qu'il estoit en fort mauuaise dispo-
sition, *Nam cum caput dolet, cetera membra do-
lent.* Voulant accuser par ces paroles la
mauuaise conduite de ce Prince. Dequoy
le Duc se tint tellement offensé, pource
que c'estoit en presence de l'Ambassadeur
de Venise que ce Gentilhomme luy auoit
donné ce trait de raillerie, que si ceux qui
se rencontrerent alors autour de sa person-
ne ne l'eussent retenu, il luy eust plongé
son poignard dans le sein, & depuis il luy
deffendit de se trouuer iamais en sa pre-
sence.

Vne semblable infortune accueillit Apu-
leia, petite fille de la sœur d'Auguste, qui fust
accusée de crime de leze Majesté, *quod [Tiberij]
matrem inlusisset*, dit Tacite. Le Poëte C. Luto-
rius Priscus fut condamné à perdre la vie,
pour auoir composé des vers lugubres du-
rant la maladie de Drusus, comme s'il eust
esté defia mort, *Fletus enim intempestiuus risus*

est. Agrippa le fils d'Aristobulus tomba dans ce même malheur, qui fust mis en prison par le commandement de Tibere; pource qu'estant à vn festin avec Caius, il luy auoit dict, que les Romains seroient vn iour bien-heureux de l'auoir pour Empereur, comme s'il eust voulu accuser le gouuernement present de son Prince. Je sçay neantmoins que plusieurs Roys de l'Antiquité ont fait gloire de mespriser genereusement les mesdisances, les mocqueries & les iniures, & qu'ils ont estimé *Maiestatem principis maiorem esse, quam vt cuiusquam contumelia minui possit*, Que Suetone loüe particulièrement la moderation de Iules Cæsar, qui ne se vengea iamais de ceux qui auoient mis en lumiere des libelles diffamatoires contre sa reputation. *Si qua dicerentur aduersus se inhibere maluit quam vindicare. Aulique Cecinna criminosisimo libro, & Pitholai carminibus laceratam existimationem suam, ciuili animo tulit.* Que Pline donne mille louanges à l'Empereur Trajan, de ce qu'il n'auoit iamais voulu permettre que l'on fit aucune recherche contre ceux qui auoient malicieusement inuenté des impostures, pour noircir son honneur & sa conduite, *quasi contentus esset magnitudine sua, qua nulli magis caruerunt, quam qui sibi maiestatem vindicarunt*: Et que les Empereurs Theod.

mus, & utrum pratermitti: an exquiri debeant, censeamus. C'est pourquoy l'on doit estre grandement retenu lors que l'on parle des actions du Prince, & se souuenir à tous momens, de ce precepte du Sage en l'Ecclesiaste 19. *Etiam in cogitatione tua regi ne maledicas, & in penetralibus cubiculi tui ne maledicas diuiti, quia aus celi deferet vocem ipsam, & habens alas annuntiabit verbum:* A quoy l'on peut rapporter le conseil que donnoit Ammian Marcellin aux courtisans de son temps, que lors que l'on parloit du Prince, ils deuoient imiter l'exemple des Gruës, qui passans par le Mont Taurus, mettent vne pierre dans leur bec, pour s'empescher de crier & d'estre recogneuës par les Aigles, qui les tuent si tost qu'ils les ont descouuertes, pour dire que sur tout, il faut se donner de garde, *dicere vel scribere in eum qui potest proscribere.*

Quant à l'attentat sur la vie du Prince, peut-il se trouuer vn cœur si endurcy qu'il ne souspire & ne fremisse d'horreur à cette seule parole? Peut-on se remettre en la pensee vn crime plus detestable, qui cause plus de defastres, & qui apporte plus de malheurs dans vn Royaume? tout le monde est interessé dans vn accident si lamentable, tout le monde en reçoit le contre-

334 DE LA SOUVERAINETE' DV ROY,
coup. Car comme le Prince est l'esprit qui anime le corps de la Republique, qui tient ses membres vnis les vns aux autres, qui maintient en paix tous les peuples de son obeïssance, qui fait regner la iustice: aussi depuis qu'on vient à le perdre, & que l'on attente à sa personne, *quæ omnium personarum sustinet*, toutes les calamitez que l'on se peut imaginer viennent fondre tout à coup sur les peuples, l'on ne voit plus que confusions, que desordres, que brigandages, que violences, que seditions, qui aboutissent en fin à la ruine & à l'entier bouleuement de l'Estat. C'est pourquoy l'on peut dire que ce crime comprend en soy toutes les autres plus horribles meschancez que peuuent commettre les hommes.

C'est ce que l'Empereur Theophile fit entendre à ceux qu'il condamna de souffrir le dernier supplice, pour auoir tué son pere Michaël: *Nam ei qui Christus quoque est (disoit-il) quia uidelicet vnctus, manus sacrilegas attulisti, neque estis solum homicida, verum etiam parricida, atque Imperatoricida*: Et les anciens l'auoient tellement en horreur, qu'ils punissoient la volonté de le commettre du mesme supplice que l'effect propre: comme il est dict in l. *Quisquis C. ad leg. Iuliam maiestat.*

Et bien qu'en tous les autres crimes, *pœnam cogitationis nemo patiatur*, dit la loy *Cogitationis*, *ff. de pœnis*, si ce n'est en l'inceste & au raiuſſement, quand il y a vne forte preſomption que l'accuſé a peu exccuter ſa mauuaife penſee ? ſelon la diſpoſition de la loy 1. *ff. de extraord. criminib.* & de la loy, *ſi quis non dicam*, *C. de Episcop. & Clericis*. L'on a de couſtume neantmoins lors que l'on ſoupçonne que quelqu'un a la volonté d'entreprendre ſur la vie du Prince, de ne pas proceder à la volée contre luy, l'on examine premierement la verité du fait, l'on prend garde ſ'il a eu cette penſee longtemps en l'eſprit, & ſi avec propos delibéré il a recherché les occasions de l'exccuter: c'eſt ce que le Iuriſconſulte Modellin veut dire, lors qu'il traite de ce ſubject: *non in occasione ob principalis maiestatis venerationem, ſed in veritate hoc crimen habendum eſt*. Car ce ſeroit commettre vne inſigne cruauté, que d'abuſer du reſpect & de la reuerence que l'on doit au Prince, pour tourmenter ceux qui ſont innocens. Dequoy l'on voit pluſieurs funeſtes exemples dans l'Histoire Romaine; & principalement de l'Empereur Tibere, qui ſous le moindre ſoupçon, condamnoit vn homme à la mort comme criminel de leze Maieſté. *Quod*

36 DE LA SOUVERAINETE' DV ROY,
quod maxime exitiabile tulere illa tempora, dit Tacite, cum primores Senatus infimas etiam delationes exercerent, alij propalam, multi per occultum, neque discerneres alienos à coniunctis, amicos ab ignotis, quid repens, aut vetustate obscurum, perinde in foro, in conuiuium, quaque de re locuti incusabantur. Et vn peu apres: Ne Fœmina quidem exfortes periculi i qua occupande Reipub. argui non poterant, ob lacrymas incusabantur. Necataque anus Vitia Fufij Gemini mater quod filij necem fleuiffet.

C'est pourquoy les Princes plus humains, ayans reconnu que sous le pretexte de ce crime l'on exerçoit plusieurs cruauitez contre les plus gens de bien de la Republique, ils abolirent la question ou l'accusation du crime de leze Majesté, & la confondirent dans les autres questions de *vi publica*, de *falsis*, de *reperundis*, de *sicariis*. Et ceux qui compilerent le Code Theodosian, insererent toutes les loys que l'on auoit faites contre les conspirateurs des Princes, dans le tiltre *De Sicariis*. Pline remarque en son Panegirique *maiestatis crimen singulare esse, & pænè vnicum crimen eorum, qui crimine carerent: ideôque eius metum à Trajano esse sublatum*. Capitolin rapporte la mesme chose de l'Empereur Pertinax: *Questionem maiestatis penitus tulit cum iureiurando*.

Ce qui se doit entendre des extensions iniustes que l'on faisoit de ce crime sur toutes

toutes les choses qui donnoient le moindre soupçon de mauuaise volonté contre le Prince , comme d'auoir jetté des larmes au lieu d'auoir monstté de la ioye , quand il luy estoit arriué quelque bonne nouuelle : de s'estre plaint du gouuernement : de n'auoir point iuré par le genie del'Empereur : d'auoir fait de l'eau aupres de sa statue : d'auoir battu vn esclauue deuant son image , d'auoir inseré dans sa genealogie le nom d'un parent qui eust autrestois esté condamné pour auoir attenté sur la vie du Prince ; comme il aduint au pauvre Iurisconsulte Cassius , que Neron fit mourir , pour auoir mis au nombre de sa lignée, le nom de cet ancien Cassius , qui auoit esté du nombre des meurtriers de Cæsar : & pour telles legeres occasions , qui ne seruoient que de funestes pieges pour faire tomber les plus illustres & les plus riches citoyens dans le precipice.

Nous ne lisons point dans nostre histoire des exemples de semblables cruautéz , si ce n'est que quelques-vns ont blasmé la rigueur qu'exerça le Roy Louys XI. contre le Medecin qui auoit ouuert de force la bouche du Roy Charles VII. son pere, pour luy faire prendre quelque médicament : Et de ce que luy-mesme auoit ban-

538 DE LA SOUVERAINETE' DV ROY,
ny de sa Cour, ceux qui l'auoient empefché d'approcher de la fenestre de sa chambre pour prendre l'air, lors qu'il tomba dans vne pasmoison quelques mois deuant sa mort; d'autant que, comme i'ay dict, *hoc crimen non in occasione, sed in veritate habendum est.* Et c'est pourquoy tout le monde a eu en estime la grande humanité du Roy Henry II. qui fit deffense de faire aucune poursuite contre le Comte de Montgommery, qui l'auoit blessé à mort tirant vn coup de lance contre luy. Mais lors que l'on cognoist la verité d'un si malheureux dessein, c'est alors que tous les hommes doiuent décocher contre ceux qui en sont coupables, tous les plus poignants traits de la rigueur & de la seuerité de la iustice.

Quant aux entreprises que l'on fait sur l'Estat du Prince souuerain, que les anciens appelloient d'un nom particulier *perduellionem*, c'est à dire hostilité, on le comprend maintenant sous le nom de crime de leze Maiesté, contre qui les Empereurs Arcadius & Honorius publierent ceste fameuse constitution: *Quisquis, C. ad leg. Juliam maiest.* lors qu'apres la mort de Theodose le Grand, Guildo mesprisant la ieunesse de ces deux Emperereurs, voulut vsurper l'Afrique dont il estoit gouuerneur. Mais ayant esté

prevenu, il fut tué à la premiere rencontre par son frere Mascezil, & l'on confisque tout son patrimoine à l'Empire. Et bien que l'on eust fait cette Ordonnance par l'aduis de Stilicon & de Rufin, qui contient toutes les rigueurs que meritent telles entreprises: Neantmoins ces deux grands personages se laissans aveugler par leur ambition, ils tomberent puis apres dans le mesme crime qu'ils auoient condamné & puny avec tant de seuerité & de tesmoignage d'affection pour la deffence de l'estat de leurs Maistres. Car Rufin Tuteur d'Arcadius, qui regnoit dans Constantinople, suscita Gainas Chef des Gots, & les Huns, contru ce ieune Prince, pour auoir vn pretexte de leuer vne armée, & de se saisir de l'Empire d'Orient. Et quant à Stilicon, qui estoit le Tuteur du ieune Honorius, qui auoit l'Empire d'Occident en partage, il practiqua les Vandales, les Allemans, & les Suedes, pour venir fondre avec vne puissante armée dans les Prouinces de l'Empire, afin que dans ce trouble il eust le moyen de preparer le chemin à son fils Eucherius, pour vsurper le trône de son Prince, & le chasser de son Estat. Mais le dessein de tous les deux ayant esté descouuert, ils furent condamnez à mort; Stilicon fut

340 DE LA SOUVERAINETE' DV ROY,
tué à Rauenne apres qu'on l'eust tiré par finesse de l'Eglise où il s'estoit réfugié : & Rufin fust mis en pieces par les soldats dans Constantinople. Et Orose rapporte au liure 7. chap. 37. de son histoire, que l'on attachâ la teste & la main de ce rebelle deuant la porte de la ville.

Nos loix de France contiennent les mesmes rigueurs, mais particulièrement l'Ordonnance de Blois, & quelques autres qui ont esté faictes depuis, nous designent trois cas, qui sont compris dans le crime de leze Majesté. Le premier est lors que l'on a intelligence avec les estrangers : le second, quand on sort du royaume sans le congé du Roy : Et le dernier, lors qu'on leue des gens de guerre, sans la commission du Prince. Le premier est fondé sur cette ancienne maxime, *subditis cum extraneis nihil commune debere esse, ne linguam quidem.* De sorte que les Carthaginois ayant recogneu qu'un nommé Suniator escriuoit des lettres grecques a Denis de Sicile, & que par ce moyen il luy communiquoit les secrets de Carthage; ils le condamnerent comme criminel de leze Majesté, & l'on inféra dans son arrest cette loy : *Ne quis Carthagenensis in posterum litteris Græcis operam daret.*

Quant au second, bien que le droit de

la nature donne le pouuoir à l'homme d'aller où il luy plaist. Toutesfois les loys de la Politique ont tellement restreint cette liberté, qu'en la pluspart des Estats & des Republiques bien policées, l'on a tousiours fait deffenses aux habitans de sortir du pais de l'obeïssance de leur Prince, sans passeport & sans son congé. Suetone dict que Iules Cæsar fit vne loy, par laquelle il deffendit expressément aux citoyens Romains : *ne quis ciuis maior annis viginti Italia abesset* : l'estime neantmoins que pour former en ce cas vn crime de leze Maïesté, que cela se doit entendre seulement des Officiers de la Couronne, ou des Princes, & des grands Seigneurs, qui d'ailleurs ont donné subiet de se défier de leur fidelité, & de soupçonner que ce ne fust pour prattiquer les estrangers, & les inciter à venir faire quelque entreprise sur l'Estat. Et c'est l'interprétation que l'on doit donner à cette Ordon. de l'Emp. Auguste, par laquelle il fit de tres-expresses deffenses aux Senateurs, *ne quis eorum peregrinaretur extra Italiam iniussu suo*, comme le remarque Dion. Et c'est en ce mesme sens que l'on doit entendre cette autre constitution, par laquelle il deffendit aux personnes consulaires d'entrer dans l'Ægypte, de peur que s'ils se fussent vne fois empa-

342 DE LA SOUVERAINETE' DV ROY,
rez d'une si riche contrée, ils n'empeschaf-
fent le transport des bleds, & des autres vi-
vres que l'on apportoit de cette Prouince à
Rome : D'où vient que Tacite au liu. 3. de
son histoire, remarque que l'Empereur Ti-
bere prit vne telle alarme, de ce que Ger-
manicus estoit entré dans Alexandrie sans sa
permission, que cela le fit resoudre à se dé-
faire de ce Prince.

Et quant au troisiésme, on l'a mis au
nombre du crime de leze Majesté, pource
que l'on ne peut faire d'action qui blesse
davantage l'autorité souueraine du Prince,
que d'oïer leuer des gens de guerre sans sa
permission, *sine probatoria Principis*; comme
parle la loy 17. *Neminem, C. de re mil. lib. 12.* &
ainsi que le traite Cicéron Phil. 1. où il
conioint *vim publicam, cum maiestate*; quia, dit-
il, *qui vim publicam adhibet, maiestatem ledit*: c'est
pourquoy Cæsar fust accusé de ce crime,
pource que sans le congé & le consente-
ment du peuple, il auoit leué cette legion,
qu'il appella depuis *alaudam*.

Les anciens estimoient toutes ces entre-
prises de si dangereuse consequence, qu'ils
les punissoient avec vne extraordinaire feue-
rité. Premièrement ils ordonnerent que tou-
tes sortes de personnes seroient receuës en
tesmoignage, encorcs qu'ils fussent notées

d'infamie, comme il est dit *in l. famosi*, *ff. ad leg. Jul. maiest.* Les esclaves mesmes estoient admis à déposer contre leurs maistres, & les affranchis contre leurs patrons; dit la loy *l. C. de quest.* Toutesfois cela ne s'observoit, que lors qu'il estoit question du salut du Prince, qui est le premier chef de ce crime, comme il est dit en la loy *penult. C. ad leg. Jul. maiest.* Les femmes estoient aussi receuës en cette accusation, témoin cette Fulvia, qui descouvrit la coniuration de Catilina, & dont Florus parle de la sorte: *Fulvia vilissimum scortum, sed parracidij innocens.*

Et sur ce sujet plusieurs de nos Docteurs, & entre autres Accurce & Bartole, soustiennent qu'un seul tescmoin est suffisant pour mettre à la question celui qui est accusé de crime de leze Maïesté, & que sa deposition à la force d'une demie preuve; puis que sur le tescmoignage de deux, l'on peut assoir un jugement de condamnation. Neantmoins ie ne puis estre de cet avis, si ce tescmoin ne fortifioit sa deposition d'indices, & de coniectures pressantes, & telles que les décrit Aristote en ses Rhetoriques: car comme dit l'Empereur en la loy *Iurisiurandi, C. de testibus, vox unus, vox nullius*: Et c'est un faux parallogisme; de dire,

la voix de deux est vne pleine preuue; donc la voix d'un seul est vne demie preuue: d'autant que la verité est de sa nature indiuisible, & que ce qui n'est plainement vray, n'est point veritable à demy, mais plustost plainement faux.

Dauantage ces anciens ordonnerent en consideration de l'horreur de ce forfait, & pour en descouuir plus facilement la verité, que toutes personnes de quelque qualité, condition, & dignité qu'elles fussent, pourroient estre appliquées à la question, & souffrir les mesmes tourmens que les plus vils du peuple: comme il est dict *in l. si quis alicui, & in l. nullus, C. de Questionibus*: bien qu'en tous les autres crimes on les en ait exemptez, suiuant la disposition de la loy *Milites, C. de Quest. & de la loy Diuus, ff. cod.*

Pour ce qui est des peines dont ils punissoient ce crime, elles estoient aussi rigoureuses que celles qu'ils auoient ordonnées contre les sacrileges, & contre les parricides: Et sur tout ils deffendoient que l'on donnast sepulture aux corps de ceux que l'on auoit executez, quand bien mesmes les parents les eussent demandez: comme il est dit *in l. 1. ff. de cadauerib. punitor.* Ce qu'ils auoient appris des loix des Atheniens, dont Thucydide fait mention, lors

lors qu'il dit, que les os de Themistocle furent enseuelis secretement par ses amis ; Probus dit la mesme chose en la vie de ce grand Capitaine. Et pour rendre leur memoire infame à la posterité, ils faisoient abatre leurs maisons, ainsi que le tesmoignent Ciceron, Varon, Pline, & Tite-Live : Mais ce qui estoit de plus rigoureux, c'est qu'ils faisoient mourir aussi les enfans des-condamnez, craignant que quelque jour ils ne suiussent l'exemple du crime de leurs peres ; ou, comme dit Ammian Marcellin liu. 28. *Ne ad parentum exempla subcrescerent.*

Ils passerent encore plus outre, car ils enuelopperent toute la lignée, les alliez, & les amis des coupables, dans vne mesme condamnation ; ce qu'ils practiquerent contre les parents de Sejan. Cette mesme seuerité estoit en vsage parmy les Macedoniens, dit Quinte Curce, au liu. 6. Mais cela fut depuis retranché par la loy *Sancimus*, C. de pan. laquelle bien qu'elle fut conçeuë en termes generaux, *ut peccata suos tenerent auctores, & ibi esset pana, ubi & noxia* : Neantmoins il n'y fut rien changé pour les enfans qu'ils croyoient estre plustost heritiers des vices de leurs peres, que de leurs vertus. Depuis toutesfois l'Empereur Arcadius touché de compas-

546 DE LA SOUVERAINETE' DV ROY,
 sion , voulut qu'on leur sauuaſt la vie ; il
 ſe contenta ſeulement de les priuer de la
 ſucceſſion de leurs peres : car bien que par
 la Nouvelle 134. §. *vl.* l'Empereur euſt permis
 aux parents, tant deſcendans qu'aux aſcen-
 dans juſques au troiſieſme degre , & à leur
 défaut au fiſque , de ſe porter pour heri-
 tiers , & de recueillir les biens de ceux qui
 auoient eſté condamnez pour d'autres cri-
 mes: neantmoins il excepta le crime de le-
 ze Maieſté , ou *κατοσιώπας* , & ordonna que
 les enfans , outre la perte de l'honneur , *in*
perpetua egeſtate ſordeſcerent , & *ut mors eis eſſet*
ſolatio , & *vita ſupplicio*. Dont depuis encore
 ce meſme Empereur en excepta les filles ,
 ayant voulu qu'elles peuſſent prendre dans
 le bien maternel leur Falcidie , *ad mediocrem*
alimoniam , en conſideration de l'infirmi-
 té de leur ſexe. Les femmes des con-
 damnez , pouuoient auſſi recouuer leurs
 deniers dotaux , & leurs biens particuliers,
 dit le §. *Uxores* , de la meſme loy *Quiſ-*
quis.

D'ailleurs auſſi ils ſe monſtrèrent ſi ri-
 goureux & ſi ſeueres contre ce crime, qu'
 ils firent tres-expreſſes deſſenſes ſur peine
 d'infamie , à toutes perſonnes de quelque
 condition qu'elles fuſſent , d'interceder
 pour ceux qui en ſeroient accuſez : *Notabi-*

les esse sine venia , qui pro talibus vnquam apud nos interuenire tentauerint , dit le texte de cette loy : D'où vient que Cicéron en l'oraison pro Sylla , parlant d'un Lecca, il dit, *coniuratus in hoc crimine , non solum leuitatis esse culpam , verumetiam quandam contagionem sceleris , si deffendas eum , quem obstrictum Patriæ suspicere.* Et parlant apres d'Antronius , il diët , *Eum non solum veteres amicos non deffendisse , sed etiam contra eum testimonium frequentes dixisse.* Et Tacite donne ce mesme témoignage , lors qu'il parle de la procedure que l'on fit contre Silanus. *Et ne quis necessariorum iuuaret periclitantem Majestatis crimina subdebantur , vinculum & necessitas silendi :* D'où vient aussi que Cicéron en l'oraison pour Rabirius , qui estoit accusé de crime de leze Majesté , remarque qu'un nommé Decianus fut condamné , de ce qu'en pleine assemblée il auoit osé pleindre la mort de Saturninus ; & qu'un certain Sextus Titus fut mis à mort , de ce qu'il gardoit precieusement en sa maison l'image de ce mesme Saturninus.

Dauantage ils tenoient pour coupables de ce crime , tous ceux qui auoient suiuy les chefs de la conspiration. *Id quod de predictis eorumque filijs cauimus , etiam de satellitibus , conscis , & ministris simili seueritate censemus ,* dit la mesme loy *Quisque.* Ils auoient neant-

348 DE LA SOUVERAINETE' DV ROY,
moins ceste coustume de leur prescrire vn
temps pour reuenir, & se mettre en leur
deuoir; comme ils firent Contre ceux qui
auoient conspiré de rappeler Tarquin dans
la ville; car apres auoir fait mourir les en-
fans de Brutus, qui estoient les principaux
chefs de la conspiration, ils donnerent
vingt iours à tous les autres pour retour-
ner en la ville, & qu'à faute de ce faire,
le temps estant expiré ils les declarerent
bannis à perpetuité, avec confiscation de
tous leurs biens, comme le rapportent
Tite-Liue au liure 2. Plutarque en la vie de
Publicola, & Denis d'Halicar au liure 5. Ce
qu'ils obseruoient d'ordinaire, lors que plu-
sieurs estoient accusez d'un mesme crime;
comme Pline le rapporte en l'Epistre qu'il
escrit à Trajan, où il parle de la recherche
qui se faisoit alors contre les Chrestiens.

Ce crime auoit encore cela d'extraordi-
naire, que l'on donnoit recompense à ceux
qui l'auoient descouuert, bien qu'ils fus-
sent du nombre des complices, comme
les Romains le practiquerent en la mesme
coniuration que les enfans de Brutus a-
uoient faictes, pour remettre Tarquin
dans son Royaume; car ils donnerent la
liberté, le droit de cité Romaine, &
vne grande somme d'argent à Vindex, es-

clau de Vitellius, de ce qu'il auoit reuelé le dessein des conjurez. *Isque primum dicitur vindicta liberatus*; dit le Iurifconsulte, *Pompo l. 1. ff. de orig. iur.*

En fin ce crime auoit cela de particulier, que bien que le coupable fust decedé auant sa condamnation, on ne laissoit pas de continuer la poursuite contre luy, comme s'il eust esté viuant, dit la loy *Meminisse*, & la loy *l. post diui*, ff. cod. *Nam ex quo sceleratissimum quis consilium capit, exinde quodammodo sua mente punitus est*, dit le Iurifconsulte Martian. En suite dequoy, non seulement l'on condamnoit sa memoire, mais aussi l'on confisquoit ses biens, & l'on reuquoit toutes les alienations qu'il auoit faictes depuis l'accomplissement de son mauuais dessein; bien que regulierement en tous les autres crimes toutes les procedures criminelles prissent fin par la mort de l'accusé, & que l'on conseruaft ses biens aux heritiers; suiuant la disposition de la loy *Aufertur*, §. *in reatu*, ff. de iure fisci. Et en France ce crime fait cesser toutes les substitutions, comme il est dict en l'Ordonnance de Moulins.

L'on a compris aussi dans ce mesme crime les rebellions des comunautéz des villes contre leurs Princes souuerains, qui

550 DE LA SOUVERAINETE' DV ROY,
ont tousiours esté d'autant plus odieuses ;
qu'elles ont vn plus grand nombre de
complices , & que l'exemple en est de plus
grande consequence : Et bien que quelques-
vns de nos Docteurs , & entre autres Ol-
drade , en ses conseils 65. 66. & 67. met-
tent en auant , qu'vne communauté n'est
point coupable de rebellion , s'il ne pa-
roist que le complot en ait esté fait d'vn
commun consentement , & par vne deli-
beration publique , & qu'autrement l'on
ne doit punir que les particuliers , & les
auteurs de la reuolte : Neantmoins l'on
tient que si l'occasion est si pressante , qu'-
on n'aye pas le loisir de faire ceste distin-
ction ; que le plus pieux , & le plus se-
uer remede est le plus assésuré. Ce que
Quintus Fuluius practiqua heureusement
contre les rebelles de Capoue , dont il fit
mourir quatre vingts , sans en parler à son
collegue , ny attendre les commandemens
du Senat : *Ita ad Capuam res compositæ consilio ab
omni parte laudabili , seuerè , & crudeliter in ma-
ximè noxios animaduersum* , dit Tite-Liue.

Le Roy Charles VI. imita cette action ;
quand il voulut punir la rebellion que fi-
rent les Parisiens durant son absence , sous
la conduite d'vn Hugues Ambriot Preuost
de Paris , & de maistre Jean des Marests ,

Aduocat General du Parlement : car si tost qu'il fut entré dans la ville, il en fit pendre sur le champ vn grand nombre aux fenestres, & aux gouttieres de leurs maisons, & decapiter trois cents des plus notables. Et pour ceux qui furent mis dans les prisons, il leur donna la vie à la priere des Princes du sang, à la charge qu'ils perdroient la moitié de la valeur de leurs biens. Il fit aussi defarmer tous les habitans, & priua le Preuost des Marchands, & les Escheuins de leurs Estats, & de leur Iurisdiction. Il y a des choses qui ne peuuent estre differrees qu'avec danger : *punire debemus, postea scribere, si sit seditio, vel alia iusta causa, quæ moram non recipiat*, dit vn de nos Iuriconsults, *in l. si quis §. si autem, ff. de iniust. rupt.* Hors ces rencontres, il sera tousiours meilleur de se contenter de punir les chefs, & de pardonner au reste du peuple.

L'on a tenu aussi de tout temps, que c'est vn crime de leze Majesté, de s'informer par l'art de l'Astrologie de la durée de la vie du Prince : Du commencement l'on punissoit ce crime de l'interdiction du feu & de l'eau ; comme nous l'apprenons d'Ulpian en ses fragments. Mais depuis en suite de la constitution de l'Empereur Constantius, on le punit de

moit, *quia ipsam pulsabat maiestatem*, dit le texte de la loy 7. C. de malef. & Math. C'est pourquoy Domitian, au rapport de Tacite, fit mourir *Pomposianus*, *quod imperatoriam Genesin habere vulgò ferebatur, quæ diem mortis illius indicaret.*

L'on doit remarquer que ces loix parlent seulement de ceux qui dressent ces Oroscoptes par vn mauuais dessein: & non pas des autres qui les font par vne curiosité innocente, & pour aduertir le Prince des dangers, qui le menassent, afin qu'il y pouruoye, & qu'il tasche de les éuiter: comme fit autresfois *Spurina* à l'endroit de *Iules Cesar*: & quelques *Caldéens*, en faueur d'*Alexandre*. Mais il faut luy donner ces aduis & ces aduertissemens en secret, & non pas les diuulguer: Ainsi qu'il s'obseruoit en la *Macedoine*, selon qu'on le peut coniecturer de ce lieu de *Quinte Curce*, où il dit qu'*Alexandre* se fascha grandement contre *Aristander*, de ce qu'il auoit publié les choses qu'ils luy deuoient arriuer: *Non Rex, inquit, sed priuatus sum, sacrificium vt faceres mandauit, quid eo portenderetur cur apud alium, quam apud me professus es? Erigyius arcana mea & secreta, te prodente cognouit.* *Tibere* ordonna la mesme chose, à ce que rapporte *Suctone*.

Les

Les anciens ysoient de ceste seuerité, pource que sous pretexte de ces predictions, plusieurs esprits foibles, ambitieux, & volages, estoient incitez à faire des conspirations, & à troubler le repos de l'Estat: comme il arriua à Lentulus, qui estoit de la coniuration de Catilina à Libo Drusus, dont parle Tacite au 12. de ses Annales, (& à nos iours au Marquis de Salusse sous François I.) C'est pourquoy depuis l'on deffendit absolument de faire aucunes natiuitez du Prince, soit en public, soit en priué, afin d'éuiter tous ces inconueniens; iusques là mesmes que par vn Edict public, les Mathematiciens furent entierement chassez de la ville. Ce que le mesme autheur remarque, lors qu'il dict, *Mathematici genus hominum potentibus infidum, sperantibus fallax, quod in ciuitate nostra, & vetabitur semper, & retinebitur*, taxant par cette derniere parole la sottise vanité des hommes, qui s'amusent à rechercher la cognoissance des choses futures: ce qu'un autre Autheur nommoit *vanissimum cuiusque ludibrium*. Et dont Auguste se mocqua, quand il fit publier luy-mesme son Horoscope, & grauer en sa monoye le signe du Capricorne, sous lequel il estoit nay.

L'on a compris sous ce crime, non seu-

A Aaa

554 DE LA SOUVERAINETE' DV ROY,
lement ceux qui enseignent cét art , mais
encores ceux qui le veulent apprendre :
d'autant que par cette blasnable curiosité
ils font paroistre ou leur mauuaise volonté,
ou quelque autre pernicieux dessein contre
l'Estat. C'est ce que veut dire Tertu-
lien au chapitre 35. de son Apologie. *Cui
opus est perscrutari super Caesaris salute , nisi à quo
aliquid aduersus illam cogitatur , vel optatur , aut
post illam speratur , aut sustinetur ?* Aussi voyons
que les Conciles , & principalement ceux
de Toledé v. & vi. ont expressement des-
fendu aux Chrestiens de s'addonner à l'A-
strologie iudiciaire , tant pour les conside-
rations que nous auons rapportées , que
pource que c'est offencer la maiesté diui-
ne , de vouloir penetrer dans ses conseils ,
& de s'enquêter de la durée de la vie des
hommes , dont il prolonge les iours , ou
les accourcit , selon qu'il l'a déterminé
dans le secret de sa prouidence.

Finalement l'on a compris sous ce mes-
me crime les iniures & les attentats que
l'on fait contre les personnes des Magi-
strats & des officiers , comme il est dict en
cette mesme loy *Quisquis* , que nous auons
tant de fois rapportée ; principalement
quand on les outrage pour auoir fait le de-
uoir de leurs charges : Car les Roys sont

alors offencez en leurs personnes , & c'est sur eux que le contrecoup rejalit. *Senatus enim pars Principis , & Princeps pars Senatus*, disent les Empereurs au même texte.

Joint que l'on a remarqué que ceux qui ont esté si temeraires que d'offencer les Magistrats , ont esté les plus audacieux à offencer la propre personne du Prince. Car le mespris des Officiers , est le premier degré de l'attentat contre les Roys : Et comme ce Gentil-homme Italien , lors qu'il voulut entreprendre sur la vie du Duc de Milan son Seigneur , afin que quand il viendrait à executer sa resolution, la Majesté qui reluit tousiours sur le visage des Princes ne luy donnast de la crainte , il s'accoustumoit tous les matins à donner deux ou trois coups de poignard dans le pourtrait de son maistre. Aussi voit-on le plus souuent , que ceux qui veulent faire la guerre à leurs Roys , & conspirer contre leur Estat , font le premier coup d'essay de leur audace & de leur temerité , contre les Officiers & les Magistrats , que nous pouuons dire estre les viues images de la Majesté du Prince.

*Qu'il n'appartient qu'aux Roys de donner
des remissions, des graces, &
des abolitions.*

CHAPITRE VI.

IOUT ainsi qu'il n'y a que Dieu seul qui puisse dispenser de ses loix, & faire misericorde à ceux qui les ont enfreintes & violées : De mesme il n'y a que les Roys qui sont ses images & ses Lieutenans en terre, qui puissent donner des graces & des remissions à ceux qui ont commis quelques crimes contre leurs Ordonnances. Les Magistrats, bien qu'ils ayent vne puissance absolüe en plusieurs choses, ils ne peuuent neantmoins vser de ce droit, sans entreprendre sur l'autorité Royale; d'autant que, comme dict Lactance, *au liure qu'il a faict de l'ire de Dieu. Voluntati seruiunt alienæ* : & qu'ils sont obligez de suivre exactement en la punition des crimes, les loix & les Edicts du Prince dont ils sont subjects. Iusques là mesme que Si-

mache qui estoit Preuost de la ville de Rome, disoit en l'une de ses Epistres, *corruptas eas videri sententias, quæ legibus essent mitiores* : Tant s'en faut qu'à Rome les Officiers eussent le pouuoir de pardonner à ceux qui auoient violé les loix.

Sainct Augustin en son liure du destin, soustient cette proposition, lors qu'il dit, *Imperatori soli licet reuocare sententias, & reum mortis absoluere, & ipsi ignoscere* : dont nous auons vn exemple notable, en la loy 1. C. de sent. pass. & rest. où il est dit que l'Empereur Antonin se laissant fléchir par les prieres des premiers Officiers de l'Empire; mesme du grand Preuost du Palais, il fit grace à Licianus, & qu'il vsa de ces termes : *restituo te in integrum prouinciae tuae* : & adiousta, *ut autem scias quid sit in integrum restituere, honoribus & ordini tuo, & omnibus ceteris te restituo* : Ce qui n'eust pas esté necessaire, si les Magistrats d'une qualité si eminente, eussent eu la puissance de donner des abolitions des crimes.

Aussi nous lisons que l'on a tousiours mis vne grande difference entre les condamnez à mort par la sentence du Prince, & ceux qui l'estoient par ses officiers. Car outre que la sentence de ceux-cy ne pouuoit estre changée, quand elle estoit vne

553 DE LA SOUVERAINETÉ DV ROY,
fois registrée , dit la loy *Quod iussit* , ff. de re
iudic. l. 15. *Panam. C. de Panis*. Elle deuoit
estre encore executée incontinent apres sa
prononciation : & le Senat estoit mesme
obligé d'obeir à cette Ordonnance , ainsi
que le monstre Tacite au liu. 11. *Sed non Se-
natui libertas ad panitendum fuit* : Ce qu'ils fai-
soient pour éuiter les importunez , les
corruptions , & telles autres pratiques :
Mais quant aux iugemens que l'Empereur
auoit donné luy-mesme , on auoit accou-
stumé d'en differer l'execution ; du com-
mencement , iusques apres le dixiesme
iour : Et depuis iusques à trente iours,
comme nous auons remarqué au troisiè-
me chapitre. Ce qu'Amian Marcellin liu.
quinze appelle *secundam deliberationem* , afin
que le temps qui addoucit les plus ardentes
passions des hommes , peust faire naistre
dans le cœur du Prince quelque effect de
sa grace & de sa misericorde.

Quant à l'vsage de ce Royaume , l'on a
toufiours aussi tenu qu'il n'y auoit que le
Roy qui peust donner les graces , les par-
dons , les remissions & les abolitions. Car
bien que nos Annales rapportent que le
Roy Charles VI. par ses lettres patentes
du 14. mars 1401. ait autresfois donné au
Chancelier de Corbie la puissance d'o-

estroyer des graces & des remissions: Neantmoins cela ne doit pas estre tiré en consequence: d'autant que le Roy estoit malade de l'esprit, & n'auoit aucune cognoissance de ses droicts, quand il luy accorda cette prerogatiue. Et l'on doit accuser l'ambition de ce Chancelier, d'auoir accepté ce pouuoir, qu'il sçauoit n'estre communicable à personne. C'est pourquoy Louys XII. ayant esté aduerty que les Coustumes de Henault & de Dauphiné donnoient aux Gouverneurs de ces Prouinces l'autorité d'oëstroyer des graces. Et que quelques Barons de Bretagne pretendoient estre en jouissance d'un semblable droict, il retrancha cét abus, & par vn Edict exprès il cassa & reuoqua tous ces priuileges.

Il semble qu'on deuroit établir le mesme reglement touchant le priuilege de S. Romain de Rouën: Mais d'autant qu'il a esté authorisé par des miracles, appuyé d'exemples semblables, & confirmé par nos Roys, ce seroit conscience de l'oster maintenant à l'Eglise: pourueu qu'elle n'en abuse point pour les crimes execrables: c'est à dire, pour sauuer ceux contre qui la lcy de Dieu a nommément prononcé des peines & des supplices: Car autrement l'on pourroit dire à ceux qui l'ont obtenu, qu'

où les affligez doiuent auoir leur refuge,
 & attendre le pardon de leurs fautes. Et
 que mesme plusieurs Princes ont esté ja-
 lous de se rendre particulièrement recom-
 mandables en cette vertu, ne faisans iamais
 rencontre de ceux qu'on menoit au suppli-
 ce, qu'ils ne leur donnassent la vie dequoy
 l'histoire nous rapporte l'exemple de Pto-
 lomée, qui s'estant apperceu de loing, que
 l'on menoit des criminels au supplice, dit
 à ceux de sa compagnie, *accedamus ut nostro
 interuentu ijs vitam largiamur.* L'on raconte la
 mesme chose de l'Empereur Auguste, qui
 estoit si clement & si plein de bonté, qu'il
 ne faisoit iamais rencontre d'un criminel,
 qu'il ne luy donnast la vie. D'où vient
 que Suetone rapporte, que pour éuiter les
 effets de cette grande douceur, ou plustost
 indulgence, les Magistrats n'enuoyoit
 point faire de semblables exécutions, lors
 qu'ils sçauoient qu'il deuoit sortir par la vil-
 le, & que mesme apres sa mort, l'on osta sa
 statuë qu'on luy auoit dressée dans la place
 où l'on exécutoit les condamnéz, de peur
 de bleffer la reputation de sa clemence, en
 faisant ces carnages deuant son image.

Mais pource qu'il importe au repos pu-
 blic, que les crimes soient punis; & que
 c'est pour ce subiect que les loix & les Ma-

582 DE LA SOUVERAINETE' DV ROY;
 gistrats sont principalement establis de
 Dieu : les Roys doiuent prendre soigneu-
 sement garde d'exercer cette vertu, avec
 vne grande discretion : car de pardonner
 des crimes enormes, ce n'est pas vraye-
 ment clemence, mais plustost vne iniusti-
 ce manifeste ; & vn sujet suffisant d'attirer
 sur leurs testes l'ire de la Maiesté diuine:
 d'autant que c'est l'impunité qui ouure la
 porte à toutes sortes de méchancetez &
 de crimes, c'est elle qui donne l'audace
 aux meschans, de commettre sans crainte
 toutes sortes de violences & de briganda-
 ges. Ce que saint Ambroise a bien re-
 marqué, lors qu'il dit, *Nonne etiam cum*
uni indulget indigno, ad prolapsionis contagium
prouocat vniuersos; facilitas enim venia, incenti-
uum tribuit delinquendi : dont l'on a com-
 posé le Canon *est iniusta* 23. quest. 4. C'est
 pourquoy Saluian Euesque de Marseille
 deplore la misere de son temps, à cause
 que l'on ne voyoit que des meurtres; prin-
 cipalement parmi la noblesse, *homicidia in*
nobilibus assidua, dict il, *spero & fiducia impuni-*
tatis, &c ie desirerois que nos Princes eussent
 tousiours deuant les yeux ce que nos An-
 nales rapportent de saint Louys, qui auant
 donné la remission à vn homicide qualifié,
 il la reuoqua aussi-tost, sur ce qu'ouurant

son Pſeautier pour prier Dieu , il tomba ſur le verſet , qui dit , *beati qui faciunt iudicium & iuſtitiam in omni tempore* : ſe ſouuenant auſſi de ce que Salomon diſoit qu'il n'y auoit point de viſtime qui fuſt plus agreable à Dieu , que de faire iuſtice d'vn meſchant homme.

Auſſi certes la clemence du Prince ne doit eſtre recommandable , que quand il remet ſes propres iniures : Car quel merite peut-il aubir, lors qu'il pardonne les iniures qui ont eſté faiſtes à d'autres ? Vſer d'indulgence enuers ceux qui vous ont offencé , aſſoupir avec generoſité les mouuemens de ſa colere qui portent à la vengeance, c'eſt veritablement meriter le nom de Clement ; c'eſt ce qui acquiert aux Roys vne gloire immortelle dans la poſterité : *nihil enim glorioſius eſt Principe impune laſo* , diſt Seneque : Ce que l'Empereur Antonin le Philoſophe confirme par cette ſage parole qui eſt rapportée par Vulcatius Gallicanus : *Nunquam placet in Imperatore vindicta ſui doloris , qua reſi iuſtior fuerit , acrior videtur* : Qui eſt la meſme choſe , que Liuia diſoit ſouuent à l'Empereur Auguſte , que la vraye clemence du Prince eſtoit de punir les iniures publiques , & de pardonner les ſiennes.

Le Roy exercera iustement aussi sa bonté, lors qu'il donnera la grace à quelqu'un, en consideration de la vertu de ses parents : Car alors il fera paroître en mesme temps, & son humanité, & sa gratitude en recognoissant le merite & les seruices que luy auront rendus ses anciens seruiteurs. C'est pourquoy *Ælian* au liure 5. de ses diuerses histoires, loue le Senat d'Athenes, d'auoir vsé de cette douceur à l'endroit du Poëte *Æschilus*, en faueur d'Amintas son frere, qui auoit perdu vne main, & receu plusieurs playes, en combattant pour le public, en la iournée de Salamine.

Tite Liue liure 4. dict le semblable de *Quinctius*, que l'on accusoit de s'estre mal conduit contre les *Veiens*, à qui le peuple donna la vie : sur ce qu'un de ses amis representa en pleine assemblée les grands & signalez seruices que *Cincinatus* le pere du criminel auoit rendus à la Republique; Dieux mesmes qui est le plus iuste vengeur des crimes se comporta de la sorte à l'endroit de *Salomon*, qui auoit adoré les Dieux estrangers de ses femmes & concubines, luy disant; *Quia habuisti hoc apud te, & non custodisti pactum meum, & praecepta mea, quae mandavi tibi, dis-*

rumpens scindam regnum tuum , & dabo illud seruo tuo , verumtamen in diebus tuis , hoc non faciam propter David Patrem tuum. Et c'est en quoy consiste vn des plus remarquables effects d'une iuste clemence : Car bien que d'ordinaire la consideration de la meschanceté du fils ne nuise point au pere ; ny celle du pere au fils , dict l'Empereur in l. *sancimus* , C. de *panis*. Neantmoins lors qu'il est question de pardonner , il est de la bien-seance , que le merite d'un pere fasse oublier la faute de son fils.

La consideration du sang & de la naissance doit aussi inciter le Prince à la douceur. Mais en telles rencontres les Roys les plus aduisez ont permis que les Juges fissent leurs charges iusques à la prononciation de l'arrest : & puis apres ou ils ont adoucy la peine , ou ils l'ont entierement remise : comme le practiqua le peuple Romain à l'endroit de Fabius , dit Tite-Liue au liure 8. où il introduit le Dictateur Papirius parlant en cette sorte : *vicit disciplina militaris , vicit imperij maiestas , non noxa eximitur Fabius , qui contra dictum Imperatoris pugnavit , sed noxa damnatus donatur populo Romano , donatur Tribunitia potestati precarium non iustum auxilium ferenti* : L'Empereur Mauri-

ce en vſa de la ſorte enuers vn nommé Germanus, qui eſtoit chargé d'auoir voulu aspirer à l'Empire. Car apres qu'on luy euſt prononcé ſon arreſt de mort, il luy pardonna. Arbaces ſe comporta de la meſme façon à l'endroit de Beſiſis, qui auoit commis le crime de peculat, diſt Herodote.

Le Prince fait cognoiſtre auſſi par vne meſme action ſa prudence & ſon humanité, lors qu'apres de grandes guerres ciuiles, & pour affermir la paix parmy ſes peuples; il abolit & remet les crimes, que l'on a commis durant la fureur de la ſedition: comme autresfois le practiquerent les Atheniens, lors qu'ils eſtablirent leur Amniſtie: Et parmy nous Charles VI. lors qu'en plein Parlement il declara le Duc de Bourgogne innocent du meurtre du Duc d'Orleans

Et en fin les Princes pour donner vn plus grand éclat à leur puissance, & ſe concilier en meſme temps la bien-vueillance de leurs peuples, ils peuuent continuer la couſtume, qui a toujours eſté gardée, de donner des graces & des pardons generaux à leur joyeux aduenement à la Couronne, à leurs premieres entrées dans les villes capitales, ou pour quel-

qu'autre resjouissance publique ; comme le faisoient les anciens Empereurs Romains ; dit la loy , *si interueniente* , ff. *ad Senatusconsult. Turpilianum* , & dont Suetone entend parler , lors qu'il dict en la vie d'Auguste , *diuturnorum reorum nomina aboluit* , id est , *tabulam pendulam* , *ubi elenchus erat reorum*.

○ Mais pour accommoder ce discours general à nostre vsage , l'on doit sçauoir qu'en ce Royaume le Roy ne donne des graces que pour les homicides fortuits , & inuolontaires , & qui arriuent plustost par hazard , que par dessein : Encores que la loy de Dieu les punit d'un bannissement qui duroit vn certain temps , ainsi qu'il est dit en l'Exode chap. 19. Et l'on voit dans Eustatius sur l'Iliade 10. que les Grecs , outre le bannissement d'un an , faisoient encores des sacrifices expiatoires qu'ils nommoient *καθάρσις*.

○ Le Roy donne aussi la grace à celuy qui a tué son ennemy en se deffendant contre ses attaques & ses violences , mais elle demeure sans effect , s'il n'y a preuue que l'on s'est comporté à ceste action , *cum moderamine inculpata tutele* ; dit la loy l. C. *unde vi* ; c'est à dire avec armes égales ; & à l'instant du combat , *in ipso astu* *utroque* , com-

588 DE LA SOUVERAINETE' DV ROY,
me dict Demosthene contre Aristogene.

Et quant aux remissions, le Roy les donne lors que l'on doute qui a esté l'agresseur, & si la rencontre a esté fortuite, ou premeditée. Le Scholiaste d'Euripide sur la tragedie d'Orestes, dict qu'il suffisoit à celuy qui en telles occasions auoit sans dessein tué son ennemy, de monstrier son espée au Soleil, & de protester par serment son innocence : Et l'Interprete de Sophocle sur la Tragedie d'Aiax, dict qu'il estoit absous de cet homicide, en lauuant simplement ses mains : sur quoy il semble que Tertullian ait jetté l'œil, lors qu'au chapitre 6. du Baptisme, il parle de l'eau lustrale & purifiante des Anciens.

Autresfois en ce Royaume, celuy que l'on auoit veu porter des armes en intention de tuer quelqu'un, estoit obligé d'obtenir remission, suiuant la disposition de la loy, *is qui cum telo*, C. de *sicarijs* : & du Capitulaire de Charlemagne, qui dict, *qui hominem voluerit occidere, & perpetrare non poterit, vt homicida habetur* : comme il se voit au liure 7. chapitre 10. Mais depuis l'on s'est departy de cét vsage, & l'on n'a plus tenu pour coupable que celuy qui auoit mis en execution son mauuais dessein,

dessein , suivant le texte de la loy 1. §. *quid absuit* , ff. *quod quisque iuris in al. stat. quid obsuit conatus* , cum iniuria nullum habuerit effectum. C'est pourquoy comme l'on a plus observé la loy *ius qui cum telo* ; aussi n'a-t'il plus esté besoin d'obtenir de remission : & l'on a laissé aux Iuges la liberté d'ordonner ce que bon leur sembleroit en telles rencontres , selon les circonstances du faict.

Et quant aux abolitions , comme elles procedent du propre mouvement du Roy , & qu'elles sont expédiées de son commandement absolu , elles ne sont point aussi sujettes à aucune cognoissance de cause ; Et la partie n'est pas recevable , de proposer à l'encontre aucuns moyens d'incivilité , ny d'obreption , ny de subreption : Et bien que pour les considerations que nous auons dictes cy-dessus , le Roy les octroye , pour des cas qui ne sont pas remissibles : neantmoins on excepte tousiours les cas execrables , comme ceux qui sont rapportez in l. 3. C. de Episc. au. dient.

C'est principalement au iour du Vendredy Sainct , où nos Roys tous les ans sont paroistre leur puissance & leur clemence tout ensemble : lors qu'en memoire de la Passion du Sauueur du monde , & de

la priere qu'il fit à Dieu son Pere , de ne point punir les Iuifs qui le menoient à la mort ; & du pardon qu'il accorda si liberalement au larron penitent , ils donnent avec plus d'indulgence les graces & les remissions : en quoy ils imitent l'ancienne pieté de la primitive Eglise , qui en ce iour mesme ouuroit les prisons aux accusez , & mettoit en liberté ceux qui auoient esté condamnez aux supplices. C'est ce que S. Cyprian nous enseigne au traitté de l'onction du cresseme , quand il dict , *hodie patent carceres , & damnati libertate donantur , seueritate deposita Iudices mansuescunt* : ils se trouuoient autresfois en personne en telles actions , mais maintenant ce sont les Chancelliers qui les soulagent de cette peine , & qui les donnent en l'assemblée , & par l'aduis du Conseil.

Dauantage l'on doit remarquer , que bien que la loy Romaine deffende de donner des abolitions du crime de peculat , comme il est dict *in l. 3. C. de aboliti* , pour ce que la Republique y est principalement interessée : Toutesfois elle ne se pratique point en ce Royaume ; car assez souuent & particulièrement apres vne recherche generale des Financiers , on leur donne vne abolition de leurs pilleries , en payant

quelque somme de deniers à quoy ils sont taxez. Ce qui est honteux à la France, où maintenant il est permis pour de l'argent de voler impunément le public.

Et pour ce qui concerne le r'appel de ban, & les commutations de peines, il faut aussi tenir qu'il n'y a que le Roy qui les puisse octroyer à l'exclusion de tous les officiers : d'autant que, comme dict Vlpian *in l. aut damnum*, §. 1. *ff. de penis. functi sunt suo officio* : Car si tost qu'ils ont prononcé leurs arrests, ils n'ont plus de puissance, il n'y a que le Prince seul, qui puis apres les puisse adoucir & changer.

Qu'il n'y a que les Roys & les Princes souverains
qui puissent traiter par Ambassadeurs : &
des droicts & priuileges des mesmes
Ambassadeurs.

CHAPITRE VII.

EN TRE les droicts de la Souue-
raineté, celui que nos Iuricons-
ultes appellent *ius legationis* ; c'est à
dire, le droict de pouuoir en-
uoyer aux Princes estrangers des Ambas-
sadeurs, est l'un des plus nobles & des plus
illustres : Car mesme anciennement il n'y
auoit que les Dieux qui eussent cette pre-
rogatiue, comme disent les Scholiastes sur
ce vers de Virgile :

Interpres Dium fert horrida iussa per auras.

Aussi Quinte Curce au liure 10. appelle ce
droict verè *regium*, quand il dict ; & *pristina*
quidem regia species manebat. Nam & legati gen-
rium, regem adibant, & copiarum duces aderant.
C'est pourquoy l'on a tenu de toute anti-
quité pour maxime d'Estat, qu'il n'y a que
les Roys & les Princes souverains qui puis-
sent traicter avec leurs voisins par des Am-
bassadeurs.

Ce que l'on obseruoit si estroittement à Rome, que le Senat ne voulut point donner audience aux deputez des Aetoliens, apres qu'ils les eurent subiuguez & reduits sous leur puissance, & leur fit response qu'estans deuenus leurs subjets, ils ne pouuoient plus auoir d'Ambassadeurs. Paul Emile practiqua la mesme rigueur à l'endroit du Roy Perseus apres l'auoir vaincu, car non seulement il refusa d'ouïr ses Ambassadeurs, mais encore il les fit emprisonner; pource qu'avec la perte de sa couronne, il auoit aussi perdu ce droit de souueraineté.

Et bien que Ciceron au liure 3. des fins dernières, & plusieurs autres mettent en auant, que durant les dissensions ciuiles, les contraires partis se seruoient d'Ambassadeurs pour traiter les vns avec les autres; & que les soldats mesmes vsoient de ce droit, & enuoyoient des Ambassadeurs pour porter leurs plaintes à l'Empereur, comme firent les légions mutinées de Pannonie incontinent apres la mort d'Auguste, qui esleurent le fils de Blesus, *ut ea legatione fungeretur*, dit Tacite, *peteretque militibus missionem ab sexdecim annis*: Neantmoins l'on ne peut rien conclure de ces exemples contre la maxime que nous auons

594 DE LA SOUVERAINETE' DV ROY,
proposée, pource que ce sont des cas particuliers, qui ne peuuent estre tirez en consequence, ny combattre la pratique generale qui s'observe entre les Princes souverains. Je sçay que nous lisons encore dans les tiltres *de legationibus*, qu'il estoit permis aux provinces de l'Empire d'envoyer vers l'Empereur des deputez qu'ils appelloient *legatos*, mais ce n'estoit que par sa permission, & le nombre ne pouvoit estre que de trois, comme il est dict *in l. 4. § fin. ff. de legatio*. C'est pourquoy il faut tenir pour constant que le droict d'Ambassade est vn droict particulier de la souveraineté.

Or comme il n'y a rien de plus vtile ny de plus necessaire que la fonction des Ambassadeurs, pource qu'ils sont employez pour assoupir les dissensions & les inimitiez des hommes, pour terminer les guerres que les Princes souverains se font les uns aux autres, & qu'ils sont choisis pour estre les arbitres des differents des peuples & des Roys. Aussi voyons-nous qu'ils ont esté tousiours honorez de tres-grands privileges, & respectez comme personnes saintes & sacrées, dict la loy *sanctum*, *ff. de rer. diuis.* & *l. f. ff. de legatio*. ce nom de Sainteté leur ayant esté donné à *sagmini-*

bus ; c'est à dire de la verueine qui estoit vne herbe qu'ils auoient accoustumé de porter pour se faire recognoistre. Nos ancestres portoient des baguettes en main lors qu'ils estoient enuoyez en ambassade ; d'où vient qu'Ammonius parlant de l'Ambassade que Gundoald enuoya au Roy Gontrand : il dit que les Ambassadeurs portoient des verges sacrées en leur main, c'estoit peut-estre des branches d'oliuier ; selon l'ancienne coustume des Latins , que Virgile décrit en ces vers :

Iamque oratores aderant ex vrbe Latina.

Velati ramis oleæ.

Et les Anciens leur portoient vn si grand respect , qu'ils estimoient que les Dieux mesmes s'interessioient & prenoient part aux iniures qu'on leur faisoit : L'exemple que nous en rapporte Suidas lors qu'il parle de Xerxes est memorable : car il dict que les Dieux furent tellement irritez contre ceux de Sparte , de ce qu'ils auoient jetté les Ambassadeurs de ce grand Roy dans vn puits , qu'ils remplirent puis apres de terre , pour satisfaire captieusement à la demande qu'ils leur auoient faite de leur terre & de leur eau , que pour punition de leur crime , ils les affligerent d'vne perte si cruelle , que la plupart des habitans

396 DE LA SOUVERAINETE' DV ROY,
de la ville moururent miserablement , &
ce fleau ne cessa point qu'ils n'eussent re-
paré leur faute , & obey au commande-
ment de l'oracle de Delphe qu'ils auoient
consulté sur ce sujet.

Et nous voyons dans l'histoire que l'on
n'a point entrepris de guerre avec plus de
chaleur , ny poursuiuy la vengeance d'au-
cun affront avec plus d'opiniastreté, que la
reparation des iniures que l'on auoit faictes
aux Ambassadeurs : C'est pourquoy *Quin-*
tilian disoit , *si ciuis pulsatus est , actio iniuria-*
rum est ; si magistratus maiestatis ; si legatus , bello,
& iuregentium agitur. Et nos Annales rap-
portent , que le Roy François I. ne prit
point d'autre sujet pour renouueller la
guerre contre l'Empereur Charles V. que
la vengeance du meurtre commis en la
personne de Fregose & de Ranconnet ses
Ambassadeurs , qu'il enuoyoit vers les Ve-
nitienſ.

Mais laissons ce lieu commun , pour re-
soudre vne question qui peut souuent arri-
uer ; sçauoir si vn Ambassadeur , pour a-
uoir commis quelques crimes , se rend iu-
sticiable du Prince vers lequel il est en-
uoyé. Plusieurs ont soustenu qu'il estoit
indigne de iouir de son priuilege , & en-
tre autres *Theodatus* dans *Procope* au li-
ure

ure de la guerre des Goths , où il dict ,
tamdiu legatos incolumes esse oportere , quamdiu ipse
legationis sue officium seruauerint. Les autres au
 contraire ont mis en auant , qu'il con-
 feruoit tousiours son priuilege , excepté
 pour le crime de trahison : Quant à moy
 j'ay tousiours estimé qu'en cette rencon-
 tre mesme , il estoit inuiolable , appuyant
 mon opinion sur deux exemples de ce sage
 peuple Romain , qui sont rapportez par
 deux auteurs des plus iudicieux de l'an-
 tiquité. Le premier est de Tite-Liue liure
 premier , où il parle des Ambassadeurs de
 Tarquin , qui durant leur sejour à Rome ,
 practiquerent plusieurs citoyens pour con-
 spirer contre l'Estat , & restablir leur mai-
 stre dans son thrône : *Proditoribus* , dict-il ;
exemplò in vincula coniectis , de legatis paululum
addubitatum est : Et quanquam visi sunt commi-
sisse , ut hostium loco essent , ius tamen gentium
valuit : voulant dire que bien qu'un Amba-
 sadeur fasse les actes d'un ennemy , neant-
 moins qu'il ne laisse pas de demeurer tous-
 iours sous la protection du droit des
 Gens : L'autre est de Saluste en son hi-
 stoire de la guerre Iugurthine : où racon-
 tant comme Bomilcar fit assassiner Massina
 par le commandement de Iugurtha , &
 comme il fut accusé par un des complices

598 DE LA SOUVERAINETE' DV ROY,
d'estre l'autheur de ce crime , il adiouste,
fit reus magis ex aquo & bono , quàm ex iure
gentium Bomilcar comes eius qui Romam fide pu-
blica venerat ; c'est à dire , que bien que
par les regles du droict commun , l'on
puisse faire punir vn criminel , au lieu où
il a commis le crime : neantmoins que
le droict des gens en excepte les Ambas-
sadeurs : premierement , pource qu'ils re-
presentent la personne du Prince qui les
a enuoyez. Secondement , pource que le
public peut receuoir plus de profit de
leur garder la foy publique , que de la
peine qu'on pourroit leur faire souffrir
pour la reparation de leurs crimes. Ioint
que l'on peut demander iustice aux Prin-
ces qui les ont enuoyez , comme firent
les Gaulois aux Romains , de ce que leurs
Ambassadeurs contre le droict des Gents,
s'estoient jettez dans les troupes de leurs
ennemis , pour combattre contre eux.

Et de faict comme Sforce Duc de Mi-
lan , eut contre cet ordre fait mourir l'Es-
cuyer Merueilles Ambassadeur du Roy
François I. sous pretexte qu'il auoit com-
mis vn meurtre , l'histoire de du Bellay
rapporte que le Roy se sentit tellement
offencé de cette violence , qu'il s'en plai-
gnit à tous les Princes Chrestiens , &

luy declara la guerre à feu & à sang pour venger vne telle iniure. Que si l'Ambassadeur a commis quelque faute qui ne soit pas de grande importance, l'on peut luy commander de se retirer & de retourner vers son maistre. Polibe rapporte que les Romains en vserent de la sorte en son endroit, pource qu'estant à Rome il donna l'inuention à quelques ostages de s'euader : Mais si vn Ambassadeur venoit à la force, pour surprendre vne place, ou faire quelqu'autre acte d'hostilité, avec port d'armes, il n'y a point de doute qu'en ce cas l'on peut impunément le tuer, non par forme de punition, mais par vne legitime deffense.

Mais l'on demande si ceux de la suite des Ambassadeurs doiuent iouir des mesmes faueurs ? Apres plusieurs aduis l'on a en fin resolu pour l'affirmatiue, suiuant cette formule tirée de l'ancien droict des Fecialiens : *Rex, facisne me tu regium nuntium populi Romani Quiritium ? vasa comitesque meos.* Et de fait la loy *Iulia*, ff. de vi publica, declare indifferemment coupables ceux qui ont fait iniure à l'Ambassadeur, ou à ses domestiques : & l'on a tellement estendu ses priuileges, que mesmes s'ils viennent à commettre quelque crime capital, l'on

600 DE LA SOUVERAINETE' DV ROY,
ne les peut prendre sans la permission de
leur maistre, qui peut de son chef en re-
tenir la cognoissance, les iuger & les fai-
re punir de son autorité priuée : com-
me fit le sieur de Ferrieres Ambassadeur
à Venise, à l'endroit d'un sien domesti-
que, qui auoit tué vn habitant de la vil-
le : car sur la plainte qu'on luy en fit, il
le condamna à estre pendu, & le fit exe-
cuer dans la court de sa maison.

Le sieur de Salignac Ambassadeur près
le grand Seigneur, suiuit cét exemple
à vne semblable rencontre : il me semble
neantmoins que l'Ambassadeur apres s'e-
stre informé du crime de son domesti-
que, feroit mieux de l'abandonner à la
iustice ordinaire, que de le iuger luy
mesme, veu que le criminel par son for-
fait s'est rendu indigne d'estre estimé du
nombre de sa famille.

Les meubles & l'equipage des Ambas-
sadeurs sont aussi priuilegiez, car ils ne
peuvent estre saisis pour leurs debtes. Ce
que l'on peut faire en cette occasion est
de les exhorter de satisfaire à leurs crean-
ciers, ou bien s'en plaindre aux Princes
qui les ont enuoyez : Que si l'on n'en
peut tirer raison, l'on peut se pouruoir
contre eux, leur charge estant finie, par

les voyes qui sont permises contre les debteurs , que l'on trouue hors de leurs territoires.

L'oseray dire aussi que l'hostel & la maison des Ambassadeurs doit estre inuiolable , & qu'il n'est point permis d'y entrer de force . & contre sa volonté , sous' pretexte d'y rechercher les criminels qui s'y sont refugiez , comme le deffunct Roy Henry IV. le fit assez paroistre quand il sceut qu'on auoit forcé la maison du sieur de la Rochepot son Ambassadeur en Espagne , & qu'on l'auoit pillée , pour auoir receu quelques François qui s'y estoient retirez : car ce Prince genereux qui ne sçauoit que c'estoit de faire injure , ny d'en receuoir de personne , ne cessa point de témoigner son ressentiment , iusques à ce qu'on luy eust donné toute la satisfaction qu'il desiroit , pour la reparation de cet affront & de ce mespris.

Je ne puis encore obmettre de dire ; que si en quelque occasion l'Ambassadeur doit monstrier son courage & sa generosité , c'est principalement quand il s'agit de conseruer son rang & sa seance : car il n'y a rien dont les Princes & les Estats souverains soient plus jaloux & plus cu-

602 DE LA SOUVERAINETE' DV ROY,
rieux que de la conseruation de cet hon-
neur. D'où vient qu'Arfaces Roy des
Parthes ayant esté aduertý que son Am-
bassadeur auoit quitté son rang à Sylla,
il le fit mourir, si tost qu'il fut de retour
de son Ambassade. Celuy de France n'aura
pas grande peine pour ce regard, car de-
puis Charlemagne, nos Roys sont en pos-
session d'auoir la presteance sur tous les
Monarques de la Chrestienté. Il n'y a
que le Roy d'Espagne qui depuis quelque
temps l'a disputée, sous pretexe qu'il est Roy
de plusieurs Royaumes, mais qui ne sçait
que la moindre de nos Prouinces vaut
mieux que deux ou trois de ces Royaumes
imaginaires: Ce n'est pas tant pour l'esten-
duë de l'Empire que l'on a donné cette
prerogatiue à nos Roys, que pource qu'ils
sont les Fils aînez de l'Eglise, c'est à dire,
les premiers Roys de tous les Chrestiens.
Et de fait le Pape Pie. IV. touché de ces con-
siderations, donna son iugement en faueur
de la France, lors que les Espagnols vou-
lurent faire cette entreprise.

Finalement l'on doit obseruer que nos
Roys sont si souuerains dans leurs Royau-
mes, que quand le Pape enuoye des Le-
gats en France, ils doiuent seiourner à
Lyon, sans passer plus outre, iusques à ce

que la Cour de Parlement de Paris ait veu leurs facultez, & leurs instructions, à fin d'en retrancher ce qui seroit contraire à l'autorité du Roy, & aux priuileges des Eglises de France. I'obmets icy toutes les choses qui concernent les mœurs, & la conduite des Ambassadeurs, car bien que cela importe à l'honneur & à la dignité du prince qui les enuoye, cela neantmoins ne touche point à sa Souueraineté, qui est le seul suiet de cet ouürage.

Des contractz , des traictez , & des confederations des Princes souverains ; & quand ils s'en peuuent departir.

CHAPITRE VIII.



E souſcriray volontiers à l'aduiſ de ceux , qui ont mis en auant que les contractz & les pactions des Princes Souuerains auoient la meſme force & la meſme vertu que les loix publiques ; ou que pluſtoſt elles eſtoient autant de loix & d'ordonnances. Ce qu'ils ont ſagement fait entendre aux Roys , afin de les exciter à garder ſainctement leur parole , & pour donner de l'aſſeurance à tous ceux qui traitent avec leurs Maieſtez. Auſſi certes entre toutes les vertus qui ſont les plus neceſſaires en vn Roy, il n'y en a point qui le rendent plus recommandable parmy les hommes , que la conſtance & la fermeté deſes promeſſes ; C'eſt ce que voulut ſignifier Nicocles dans Iſocrate , au troiſieſme diſcours lors qu'il dit

dict τοῖς λόγοις τοῖς ἰμοῦς, νόμους εἶναι νομίξειν : mais Dieu qui est le vray patron des Roys leur enseigne ce precepte avec bien plus d'energie , quand il dict de soy-mesme , *que procedunt de labijs meis , non faciam irrita* : Car avec quelle grace le Prince pourroit-il contraindre ses subjects à garder entr'eux la foy promise , que nous pouuons dire estre le fondement de la Iustice , si luy-mesme se joüe de la sienne ?

Or les traictez & les contractz que font les Princes sont de trois sortes , les vns concernent seulement leurs affaires priuées , & qu'ils contractent non comme Roys mais comme particuliers ; les autres regardent l'œconomie de leurs reuenus publics , & les autres sont plus vniuersels ; comme les traittez de guerre & de paix. Quant aux premiers , tous ceux qui ont traité cette question , disent absolument que le Prince , lors qu'il s'oblige non comme Roy , mais comme personne priuée , est non seulement tenu par le droit naturel , mais aussi par toutes les loix ciuiles de garder & d'entretenir ce qu'il a promis : & qu'il ne peut estre restitué en son entier , que pour les mesmes causes , dont les particuliers se peuuent seruir , pour estre releuez de leurs contractz : com-

E E c c

606 DE LA SOUVERAINETE' DV ROY,
comme Balde le dit in l. 1. ff. de Pactis, & qui
est l'aduis de ce grand Docteur Suarez au li.
3. ch. 35. n. 4. Pour ce qui est des seconds, il n'y a
point aussi de doute que par la mesme equi-
té naturelle & la raison ciuile, les Princes
ne soient obligez de les obseruer exacte-
ment, sans y pouuoir contreuenir sous
pretexte de leur souueraine puissance: com-
me tous les plus graues Iuriscultes le
soustiennent suiuant la disposition de la loy
1. ff. de constitut. Princ. de la loy, Cesar. ff. de
public. vect. & commiss. & de la loy penult.
C. de donaz. inter virum & vxor.

Toutesfois i'estime, que si l'on vient à
reconnoître que le Prince a esté deceu, &
que le contract qu'il a fait luy est manife-
stement dommageable, il en peut estre rele-
ué pour les mesmes causes que nous auons
touchées cy-dessus. Car comme le Tuteur
ne peut faire la cause de son pupille mau-
uaise, ny le mary contracter au prejudice de
sa femme, ny le Prelat au prejudice de son
Eglise: de mesme le Prince qui est le Tu-
teur & le Curateur de la Republique, ne
peut faire aucun contract qui soit domma-
geable à son Estat, & à ses subiects. De
façon que si par ses contracts il se trouue
lezé & deceu, outre la proportion ciuile
& naturelle, soit que cela arriue par dol

ou par erreur : il n'y a point de doute qu'il s'en peut departir , & mesme se faire rendre le dommage qu'il en a reçu , *cum & minor* , à qui le Prince est comparé , *etiam de maiore lucro amisso restitatur* , disent nos Iurisconsultes *in l. ais Prator* , §. *hodie* , & *in l. non omnia* , ff. *de minoribus* , spécialement quand le gain est si exorbitant , qu'on le peut appeller avec le Prophete Ezechiel au chap. 18. *iniquam superabundanziam* : & avec saint Hierosme , sur ce passage *super lucrum* : ainsi que ie l'ay veu observer au Conseil du Roy , contre vn personnage de qualité , que l'on condamna de rendre cent mille escus , qu'il auoit gaignez plus qu'il ne deuoit en vn party qu'il auoit fait avec le Roy : bien mesme que le traité portast , qu'il ne pourroit estre recherché de l'exécution de son contract , le Conseil ayant iugé , *fraudem illam* , *quasi furti speciem fuisse* : Et d'ailleurs qu'on ne pouuoit faire par aucune paction , *quin dolus praestetur* , suiuant la loy , *si vnus* , §. *illud* , ff. *de pact.* A quoy l'on peut rapporter ce que dict Isidore dans Gratian 22. quest. 4. *in malè promissis rescinde fidem ; in turpi voto muta decretum* , *quod incautè promissisti ne facias* , *impia est promissio* , *quæ dolo* , *adimpletur*.

Et l'on voit tous les iours que dans le

608 DE LA SOUVERAINETE' DV ROY,
 Conseil du Roy on casse les baulx' des
 fermes fiscales , si l'on cognoist par de
 nouvelles encheres qu'il ait esté trompé:
 Mais il est quelquesfois à craindre que
 sous pretexte de quelque vtilité , l'on ne
 rompe trop facilement ces traittez & ces
 contractz : car cela cause le plus souuent
 la ruïne des fermiers & de tous ceux
 qui se sont embarquez avec eux pour
 asseurer leur credit : comme il s'est veu
 par experience en la banqueroute de Fai-
 deau & de son associé , qui ont accablé
 sous leur ruïne plus de huiët cens fami-
 les. Ioinct que la plustpart de ces nou-
 ueaux encherisseurs ne viennent à la tra-
 uerse , que par l'attente qu'ils ont de se
 rendre plus exacts contre le peuple , & de
 faire par leur diligence si ie ne dis op-
 pression , que ce dont on ne receuoit que
 deux ou trois cens mille liures , il n'y a
 que cinquante ans , l'on en tire mainte-
 nant des millions : Ce qu'ils ne peuuent
 faire qu'avec de grandes violences. En
 quoy l'on void la difference qu'il y a en-
 tre ces derniers siecles , & celuy de ce
 bon Empereur Antonin , qui *Procuratores*
suos & modeste suscipere tributa iussit , & ex-
cedentes modum , rationem factorum suorum redde-
re precepit , nec unquam latatus est lucro , quo

provinciales opprimerentur. Mais l'on est venu à ce poinct, qu'on pratique trop curieusement le dire de cet ancien dans Thucydide : *Principi nihil iniustum, quod fructuosum.*

Ce que nous auons dict des baulx & des partis, se doit dire aussi de tous les autres contrats, où il se trouue que par erreur & par des clauses captieuses, inaccoustumées, & contre les bonnes mœurs, le Roy a receu quelque grand & notable dommage : ie dis notable, pource que s'il n'estoit que modéré, il ne seroit pas iuste d'en rechercher celuy, qui traittant avec le Roy sous l'esperance de quelque gain, s'expose à toutes sortes de hazards, de rigueurs, & de contraintes : d'autant aussi que tous les contrats que l'on fait avec les Roys, sont tenus & reputez estre de bonne foy, comme Balde le soustient *in tit. de pace Constantia. vers. si qua vero* : Et que passant ils se doiuent interpreter *ex aequo & bono* : Ce que vouloit signifier l'Empereur Auguste, lors qu'il disoit à ceux qui traictoient avec luy, *se bona fidei esse*, dict Suetone en la vie de ce Prince.

Et quant aux traictez que les Roys font ou avec leurs subjects, ou avec les

estrangez , soit pour la paix , soit pour la liberte du commerce , soit pour contracter des alliances : il n'y a point de doute qu'ils doiuent estre observez , avec d'autant plus de fidelité , qu'ils sont plus vniuersels & qu'ils regardent le corps de l'Estat : D'où vient qu'un ancien disoit , *fœderibus freti Græci Barbarique conuenimus , inimus commercia inuicem , & cum priuatis inimicitias , tum bella armæque deponimus , hoc vno tanquam communi bono omnes homines utimur.*

Aussi voyons-nous que pour rendre ces traittés inuiolables , les anciens auoient accoustumé de les asseurer par des sermens solempnels : *Sacramento adhibito , capitis consecratione , & obsecratione* : comme le remarque Cicéron en l'oraison pour Balbus. Mais il n'y a rien qui les fortifie dauantage & qui les rende plus durables que la bonne foy & la franchise. D'où vient que Euiycratides Lacedemonien , interrogé pourquoy leurs Euphores se rendoient si diligents à faire observer la foy que les particuliers s'estoient donnée les vns aux autres : *ut assuescerent* , diët-il , *cum hoste bona fide agere.* Car bien que tandis qu'on est en guerre , il soit permis d'vsér de ruses & de tromperies contre son ennemy : neantmoins *ubi fide , fœdere , pacto*,

inramento transigitur, ius gentium, ius publicum, ius diuinum praualeere oportet, dit Tite-Liue.

De façon que si sous le pretexte de quelques clauses ambiguës, ou non assez clairement exprimées, ou frauduleusement interprétées, l'une des parties vouloit indirectement quereller, tout ou partie des choses accordées par les articles de la paix: comme s'il faisoit bastir des forteresses aupres des frontieres qui auoient esté contentieuses, ou autres choses semblables: il n'y a point de doute qu'il seroit permis à l'autre de se departir du traité, & de reprendre les armes. Car comme disoit Cicéron en l'une de ses oraisons: *Post initam pacem, si quid est commissum, id non neglectum, sed violatum putatur, nec imprudentia, sed perfidia assignatur.*

Mais l'on demande, si le Prince a promis à ses subjects des choses qui luy sont dommageables pour faire cesser leur rebellion, peut puis apres s'en departir? C'est vne question qui a esté traitée par plusieurs autres; c'est pourquoy ie n'en rapporteray icy que la resolution: qui est, que la foy publique ayant vne fois esté donnée, on ne la peut plus reuoker qu'avec honte & avec blasme; non pour le respect de ceux à qui elle a esté promi-

traitté de paix, quand les subiects de l'un vont joindre leurs armes avec celles des ennemis de l'autre pour luy faire la guerre: à quoy l'on respond avec distinction, que si cela se faict de l'autorité du Prince par ses commissions expresses, & de ses deniers, c'est proprement recommencer la guerre: mais si c'est d'eux-mesmes, & sans commandement qu'ils y vont, cela n'est pas vne raison suffisante pour rompre le traitté, comme Tite-Liue le monstre clairement lors qu'il parle des *Ætoliens*, qui ne pouans viure que dans l'exercice des armes se mesloient indifferemment avec tout le monde, tantost avec leurs alliez, tantost contre leurs associez propres, sans qu'on s'en formalisast: *iuuentutem aduersus suos socios, dict-il, publica tantum auctoritate dempta, militare sinunt, & contrarie septuagies in vtraque parte Ætolica auxilia habent.* Aussi le mesme Tite-Liue dict que les *Cerites* estans accusez de ce que contre leur traitté ils enuoyent des troupes aux ennemis de leurs confederez, ils protesterent que ce n'estoit point de leur consentement que leur ieunesse alloit à la guerre, & qu'ils l'auoient fait *tantum suo non publico consilio.*

Finalemēt l'on demande si le Prince pour

FFff

614 DELA SOUVERAINETE' DV ROY,
auoir la paix , a cedé par contrainte à son
ennemy vne prouince ou vne ville de l'an-
cien domaine de sa couronne, qui de sa na-
ture est inalienable , peut se faire releuer de
ce traitté, & s'il est obligé de l'entretenir &
de l'observer. Cette grande question fut
agitée lors que l'on voulut executer le trait-
té que François premier auoit fait à Madril
en l'année 1526. spécialement pour le Duché
de Bourgongne ; & qui fut resoluë par la
distinction que l'on met entre les Royau-
mes qui sont possédez en propre , & ceux
qui le sont par vsufuict seulement : qu'au
premier cas le Prince en pouuoit disposer
par l'aduis de son Conseil , mais non en
l'autre , comme est celuy de France.

En sorte que l'on doit tenir pour vne ma-
xime d'Estat , que toutes les alienations que
le Prince auroit faictes en ces occurrences
sont nulles & de nul effect , bien qu'elles
eussent esté accordées par vn traitté de paix,
ou pour payement de rançon : iusques là
que nos anciens Docteurs, & mesmes quel-
ques Theologiens ont passé plus outre, ayans
tenu que celuy à qui la cession en auoit esté
faicte , ne pouuoit en conscience ny la de-
mander , ny la retenir , suiuant le chap. *fin.*
& le chap. *Vigilanti. de prescript.* & la loy,
Nunquam nuda ; ff. *de acquir. rer. dom.* Et que

ny la volonté du Prince alienant, ny la derogation par luy faite à la loy du Royaume, ny le serment qu'il auoit presté, ny l'occasion quelque fauorable qu'elle fust, ne donnoient aucune force à telles alienations; d'autant, disent-ils, que cette prohibition d'aliener n'a pas esté faicte en faueur du Prince., mais du Royaume & de la Republique : & que partant le Prince ne pouuoit rien promettre à leur prejudice. Dauantage ils adioustent que bien que pour de grandes causes & considerations on voulust soustenir que le Prince qui s'estoit obligé estoit tenu d'exécuter sa promesse, neantmoins que cette obligation ne lioit point ses successeurs; par l'argument qu'ils tirent du *§. f. Inst. quib. mod. testam. inf.* & de la loy *Princip. legibus*, *ff. de legib.* & par la maxime qui a tousiours esté obseruée, que le Prince ne peut assujettir ses vassaux & ses sujets à vn autre contre leur volonté.

Il est vray que plusieurs ont voulu mettre difference entre l'alienation de tout le corps d'un Royaume, & d'une partie d'ice-luy, & qu'ils ont soustenu qu'en ce dernier cas l'alienation du Prince pouuoit estre legitime, principalement quand elle tournoit au profit de l'Estat; mais cela ne peut estre receu en France : car puis que la loy y

616 DE LA SOUVERAINETE' DV ROY,
est generale pourquoy cette distinction ?
aussi que quand ces deux choses se rencon-
treroient , l'on ne pourroit tousiours venir
à l'exécution que du consentement des
Estats du Royaume : qui sont les raisons
qui ont conserué à la France le Duché de
Bourgogne, & la souueraineté de la Flan-
dre ; bien que celle-cy n'obeisse plus en ef-
fect à nos Roys.

Et quant aux confederations que font
les Princes ou les peuples libres les vns avec
les autres , soit pour le commerce ou pour
la guerre , avec des conditions égales ou
inégales , comme elles sont appuyées du
droict des gens : aussi se doiuent-elles en-
tretienir de bonne foy , comme importan-
tes non seulement à la dignité & à la repu-
tation de ceux qui les contractent , mais
aussi à la seureté & à la conseruation de
leurs Estats.

Mais l'on a depuis quelque temps agité
cette question , sçauoir si le Roy peut fai-
re alliance avec des Princes & des peuples
de differente religion : mon aduis est qu'il
faut mettre distinction entre les infideles,
& les schismatiques : que c'est impieté ma-
nifeste de contracter alliance avec les infi-
delles , & vnir ses armes avec les leurs
pour faire la guerre contre les autres Prin-

ces Chrestiens perſonne ne le peut reuouer en doute, ſ'il ne veut dementir ce grand Archeueſque de Reims Foulques, qui tint vn iour ce diſcours à Charles le Simple, que Flodoard rapporte au liure 5. de ſon hiſtoire : *Quis non expauſcat, vos inimicorum Dei amicitiam velle, ac in cladem & ruinam nominis Chriſtiani, pagana arma & fœdera ſuſcipere deteſtanda? nihil enim diſtat virum quiſ ſe paganis ſociet, an abnegato Deo idola colat.* Sainct Paul repete la même choſe en l'Epître ſeconde qu'il eſcrit aux Corinthiens, lors qu'il diſt : *Nolite iugum ducere cum infidelibus; quæ enim participatio eſt iuſtitia cum iniquitate; aut quæ ſocietas eſt luci ad tenebras; quæ autem conuentio eſt Chriſti ad Belial, aut quæ pars fidelis cum infideli, qui autem conſenſus templo Dei cum idolis?* Ce qu'il confirme encore en vne autre Epître, *non poteſtis fieri participes menſæ Domini, & menſæ demoniorum.* L'on doit dire la même choſe du commerce, que l'on ne peut ſ'associer avec eux pour le traffic & la negotiation, mais bien pour la ſeureté des marchands qui vont traffiquer en leur païs, comme fit Salomon avec Hiram Roy de Tyr : mais encore ie voudrois qu'on n'eût pour object en ces traitez que noſtre ſeule commodité, & non pas la leur, ſuiuant la loy 2. C. de commerc. & mercatorib.

Et quant aux autres qui reuerent le meſme Redempteur que nous , mais qui ont des opinions differentes en la Religion qu'il nous a enſignée , ie voudrois qu'on conſideraſt ſ'ils veulent ſe ſeruir de noſtre alliance pour accroiſtre leur religion , & affoiblir la noſtre : car en ce cas il n'y a point de doute que ce ſeroit impieté de joindre nos armes avec les leurs. Mais ſi c'eſt pour ſayder l'un l'autre en la commune deſſenſe de ſes biens , de ſes terres , & de ſes Seigneuries , ie penſe qu'on ne peut improuuer telles confederations , veu meſme que perſonne n'a iamais blaſmé Dauid de ce qu'en ſes afflictions il auoit eu recours à des peuples infideles , ny le Sauueur du monde de ce qu'il receut de l'eau de la main de la Samaritaine pour eſtancher ſa ſoiſ.

Quelques-vns obiectent le paſſage du Deuteron. chap 23. *Non quæres proſperitatem eorum , nec bonum eorum , ullis diebus vnquam :* mais qui ne voit que cela ſ'entend des Ammonites & des Moabites , contre qui Dieu auoit teſmoigné vne particuliere indignation , & qui auoit expreſſement commandé aux Iſraélites d'executer avec toute ſorte de ſeuerité la rigueur de ſa ſentence qu'il auoit prononcée contre ces peuples maudits.

Hors ces rencontres qui ne dira que lors que nous aidons ceux qui ont besoin de nostre secours, c'est proprement imiter cette bonté diuine, qui espand la lumiere du Soleil, & qui fait pleuvoir également sur les bons & sur les meschans, & que ce seroit borner à l'estroit la charité Chrestienne, si elle ne se pouuoit exercer que sur ceux de sa mesme Religion : c'est ce que veut dire Tertullian ; *Christus in omnes legem fraterna benignitatis extendit, neminem excludens in miseratione, sicut in vocatione.*

Mais i'adiouste cette condition, pourueu que cette alliance ne soit employée qu'en la deffense d'une bonne & iuste cause : & à la charge aussi qu'en concurrence de plusieurs associez, l'on preferera tousiours ceux qui sont de mesme religion, suivant ce precepte de S. Ambroise au 1. de ses offic. *Perfecta liberalitas fide, causa, loco, tempore commendatur; ut primum opereris circa domesticos fidei.* Et si les confederez se trouuent de mesme religion, i'estime qu'alors il faut preferer la plus ancienne alliance, *charior enim quæ antiquior* : ce que nous enseigne le Consul Romain par la responce qu'il fit aux Campaniens, *amicitias institui par est, ne quæ vetustior amicitia ac societas violetur.* Le Prince souuerain qui sera curieux d'observer

610 DE LA SOUVERAINETE' D'UN ROY,
ces regles & ces circonſtances en tous ſes
contracts & ſes traittez, ſe peut aſſeurer
qu'il attirera du ciel toutes ſortes de fa-
veurs & de proſperitez en ſes affaires, &
qu'il rendra ſon nom eternellement recom-
mandable à la poſterité.

Si

*Si le Roy est obligé de payer les debtes de son prede-
cesseur, & si apres les changemens qui arriuent
en vne ville les suruiuants sont tenus de payer
les debtes qui ont auparauant esté contra-
ctées au nom du public.*

CHAPITRE IX.

B IEN que pas vne de nos Ordon-
nances n'aye rien déterminé sur
toutes ces questions, neantmoins
nous tenons en France pour vne maxime
d'Estat que le Roy n'est point obligé de
payer les debtes de son predecesseur, sui-
uant vn ancien arrest de la Cour de Parle-
ment qui se lit au registre intitulé *Olim* de
l'an 1256. qui nous doit seruir d'un assésuré
guide pour nous demesler des difficultez
qui se rencontrent sur ce subject, pource
qu'il est fondé sur vne autre maxime, que
le Royaume de France est plustost successif
qu'hereditaire : c'est à dire, que ceux qui
succedent à la Couronne y viennent *ex lege*
Regia, & par le tiltre vnde *agnati*, comme
aînez & plus proches parents du deffunct,
& non pas comme heritiers.

G G g g

Car il faut mettre difference entre les Monarchies qui sont purement hereditaires, & celles qui sont deferées par la loy du Royaume: pource qu'en celles-là le successeur est tenu de payer les debtes de son predecesseur, d'autant que l'heritier *vice defuncti fungitur*, & qu'il est reputé la mesme personne, & subioyé en tous les droicts actifs & passifs du deffunct, comme le determine le Iuriconsulte en termes exprés: *Heredi & in heredem omnes competere actiones l. 51. §. non mirum, ff. de euct.* mais en celles-cy il n'est point obligé aux creanciers du Roy deffunct, pource qu'il vient à la Royauté de son chef, & non par le moyen de son predecesseur: C'est pourquoy le Iuriconsulte ayant remarqué la difference de ces deux sortes de successions, les oppose l'un à l'autre en la loy 73. du mesme tiltre: & en la loy 93. *ff. de solutionibus*, comme estans du tout differentes: attendu que *in successione iuris, defuncti obligationes non veniunt.* Le Roy Louys douzième se seruit de cette raison pour se deffendre contre les creanciers de Charles VIII. qui le vouloient contraindre de payer les debtes de son predecesseur, car il leur fit response qu'il n'estoit pas son heritier.

Dauantage cet Arrest est appuyé sur la loy du Royaume, qui ne defere à nos Roys que le gouuernement & l'administration de l'Estat, & ne leur donne que l'vsufruit de tous les biens de la Couronne, pour recompense des peines & des traux qu'ils prennent à proteger & defendre leurs peuples: de façon que comme l'vsufruitier ne peut estre contraint de payer les debtes de son predecesseur, ainsi que nos Docteurs le traitent, sur la loy *prohibere. §. plane ff. quod vi aut clam.* & plus amplement sur le chap. *intellect. de iureiurando.* De mesmes nos Roys ne sont point tenus des obligations du Roy defunct: car tout ainsi qu'ils ne peuuent vendre ny alienner le domaine de leur Couronne; de mesme ils ne peuuent l'engager au preiudice de leur successeur; estans en cela semblables au Tuteur, au Pilote, au Mary & au Pasteur de l'Eglise, qui ne peuuent durant leur administration charger le pupille, la femme, le nauire, & l'Eglise de debtes qui tournent à leur dommage, tesmoin le dire de ce sage Poëte,

neque enim quod Pastor inique

Gesserit, Ecclesia fas est in damna refundi.

Car autrement quelles dissolutions & prodigalitez ne feroient point les Princes mauuais mesnagers, s'ils n'estoient retenus par

624 DE LA SOUVERAINETE' DV ROY;
ce frein ? Et en quels termes seroient re-
duits leurs successeurs s'ils estoient respon-
sables de leur mauuaise conduite ? C'est ce
que Pline voulut faire entendre à l'Empé-
reur Trajan , lors qu'en son Panegyrique il
luy diët , *hac pro imperio nostro , in qua sint ver-
ba suscepta , opera pretium est , annotare : si bene
republicam ex utilitate omnium rexeris* : comme
fil eust voulu dire , que ny les traittez , ny
les conuentions , ny les promesses des Prin-
ces ne sont point obligatoires contre leurs
successeurs , si elles n'ont esté contractées
vtilement , & au profit de leur Estat.

De forte que bien que l'on die commu-
nement que les contractés du Prince doi-
uent estre tenus pour autant de loix , com-
me diët la loy penult. C. *de donat. inter vir. &
uxor.* & que rien ne doit estre de plus fer-
me , de plus stable , ny de plus assuré , que
la foy qu'il a donnée , dit la loy *inter claras* ,
C. *de sum. Trinit.* Neantmoins cela n'a lieu
qu'entre les contractans , & non pas entre
leurs successeurs , si ce n'est que les deniers
qu'ils ont empruntez ayent esté vtilement
employez au profit du Royaume : qui est
vne iuste & equitable exception de l'arrest
que nous auons rapporté cy-dessus , suiuant
l'aduis de tous nos Docteurs sur la loy 1.
C. *de constit. Princ.* & sur la constitution de

pace Const. in verbo, successorum : & sur le tiltre, Qui successores teneantur. in feud.

Car faisant autrement ce seroit commettre vne manifeste iniustice de tirer profit du dommage d'un autre, dont il arriueroit vn tres-grand inconuenient; pource que les Roys ne trouueroient plus personne qui voulust les secourir en la necessité de leurs affaires. C'est pourquoy les plus aduisez politiques ont mesmes soustenu, bien que l'entreprise pour l'execution de laquelle le Prince a contracté des debtes n'aye pas bien reüssi, que neantmoins son successeur est obligé de les payer : d'autant qu'il suffit qu'elles ayent esté empruntées pour subuenir aux necessitez de l'Estat, & pour maintenir son honneur & sa dignité; & que les euenemens des affaires ne sont pas en nostre puissance; ils dependent de la fortune qui leur donne vne bonne ou mauuaise yssuë, selon que Dieu l'a determiné en ses diuins Conseils : *Deus enim aleatorem agit in rebus humanis.*

L'on peut dire le mesme de toutes les autres debtes, qui ont esté contractées de bonne foy : car bien que selon la rigueur du droit le successeur Roy ne soit pas obligé de les payer, comme nous auons dict cy-dessus : neantmoins par les loix de la

626 DE LA SOUVERAINETÉ DV ROY.
charité, de l'équité, & de l'honneur, ils
sont tenus de descharger la conscience de
leurs predecesseurs.

Nos Roys sont si soigneux de conseruer
en cela leur reputation, qu'ils ont de cou-
stume de les acquitter quand leurs affaires
le peuuent permettre: en quoy ils meri-
tent la mesme loüange que le Poëte Cori-
pus donna autresfois à l'Empereur Iustin le
ieune pour vn mesme sujet.

Priscorum hoc vno vicio nouus omnia facta.

En suite de ce discours i'estime qu'il ne
fera point hors de propos d'esclaircir quel-
ques questions qui approchent de celle-cy,
& qui peuuent souuent arriuer, soit dans
le Conseil, soit dans le Parlement.

La premiere est, si vn notable change-
ment estant arriué à vne ville, ceux qui
viennent puis apres l'habiter sont obligez
de payer les debtes qui auoient auparauant
esté contractées au nom du public. Quel-
ques-vns ont tenu l'affirmatiue, & pour
soustenir leur opinion ils ont mis en auant
que comme les riuieres ne changent point
de nature, bien que leurs eauls se renou-
ellent à tous momens. Que la legion de-
meure la mesme, encore que ceux dont
elle estoit premierement composée soient
morts, & que l'on en aye mis d'autres en

leur place : & que c'est vn mesme Senat , bien que les officiers ayent en particulier changé plusieurs fois , dict le Iurisculte Alphenus en la loy *proponebatur* , ff. de iudic.

De mesme que le corps des habitans d'une ville subsiste tousiours , bien que la plupart soient ou morts , ou bannis , & chassiez ; & que l'on en aye fait venir d'autres en leurs places : Et partant que ceux qui ont succédé sont tenus d'acquitter les debtes que leurs deuanciers auoient contractées.

Mais pour ne se point tromper en la resolution de cette question , il faut mettre difference entre la ville qui a esté entierement rasée par la fureur de la guerre , & puis rebastie sur les mesmes fondemens , comme il arriua à Carthage , à Bisance , à Corinthe , & à plusieurs autres villes celebres : & celle qui n'a pas esté entierement ruinée , & qui subsiste encore en quelques vns des habitans qui sont restez. Pour le premier cas, il n'y a point de doute que ce n'est plus la mesme ville , & que par consequent ces mesmes habitans ne sont point obligez de payer les debtes anciennes. Pour le second il faut vser encore de distinction : car si la ville apres auoir receu cette ruine

a esté reftablie en fon entier, qu'elle iouiffe de mefmes priuileges, & que le changement qu'elle a receu n'eft arriué que par vne mortalité prefque vniuerfelle de tous les habitans, il eft certain que le corps de la ville fubfifte tousiours en ce qui eft refté des citoyens, & qu'ils peuuent efre contraints de fatisfaire aux anciens creanciers enuers qui la ville eftoit obligée auant cette calamité. Et c'eft de cette efpece dont veut parler le Iurifconfulte en la loy premiere, ff *Quod cuiusque vniuerſitatis nomine*, où il dit que *ſi ciuitas ad vnum redierit, poterit conuenire & conueniri.*

Mais ſi la ville pour punition de ſa deſobeiſſance a esté priuée de ſes priuileges, ſi l'on a abbatu ſes murailles, ſupprimé le Conſeil public, ou conſiſqué ſon patrimoine & ſes deniers communs, & que par vne grace ſpeciale l'on a permis à ceux qui ſont reſtez d'y continuer leur demeure, comme les Romains le praëtiquerent à l'endroit des Brutiens, qui auoient quitté leur party pour ſe jeter du coſté d'Hannibal : & l'Empereur Theodoſe enuers les habitans de la ville d'Antioche, qui auoient publié des meſdiſances contre l'honneur de ſa femme : ie n'eſtime pas en telles rencontres que ceux qui ſont demeurez puiſſent ſent

ient estre recherchez pour les debtes precedentes : Ce que l'on a iugé de la sorte dans le Conseil du Roy , pour ceux qui auoient suruescu la prise de la Rochelle : Car l'on disoit que puisque cette ville auoit perdu ses priuileges , & que la plus grande partie des habitans estoient morts , ou auoient esté bannis & chassez ; que ceux qui estoient restez ne faisoient plus de corps de ville , & n'estoient plus reputez que comme particuliers : & que partant ils n'estoient point obligez de payer les debtes que leurs predecesseurs auoient contractées au nom du public , suiuant la disposition de la loy , *Sicut , ff. Quod cuiusque vniuersitatis nomine* , qui dit , *quod debuit vniuersitas , singuli non debent*. C'est pourquoy le Roy les en deschargea , & s'obligea de les acquiter comme successeur par confiscation de tous les biens communs & patrimoniaux de cette ville rebelle.

L'or propose encore assez souuent cette question , sçauoir si quand vne ville a changé de gouvernement , si d'un estat populaire elle est deuenuë Aristocratique , ou d'Aristocratique , Monarchique , comme il arriua à la ville d'Athenes , lors que Pisistratte changea la forme du gouvernement que Solon y auoit establie ; les obligations qui

HHhh

630 DE LA SOUVERAINETE' DV ROY,
 ont esté contractées deuant ce change-
 ment sont esteintes, ou si ceux qui succe-
 dent sont tenus de les acquiter ? il semble
 qu'Aristote veuille persuader l'affirmatiue;
 pource que, dit-il, *eadem videtur esse ciuitas,*
quia iidem sunt ciues : Neantmoins Ciceron en
 ses Epistres *ad Atticum*, Xenophon au liure
 2. de l'histoire Grecque Cornel. Nepos
 en la vie de Trasibule, (où il parle de l'Am-
 nistie ou de l'abolition des choses passées)
 semblent estre d'aduis contraire : Qui a
 mesme esté suiuy par les Empereurs Ro-
 mains au tître *De infr. his, que sub Tyran-*
nis gesta sunt, lib. 15. C. Theod. Pource qu'ils
 disent que comme les choses materielles
 perdent leur estre si tost qu'elles sont pri-
 uées de la forme qui les animoit ; de mes-
 me depuis qu'un Estat vient à changer la
 forme de son gouuernement, il n'est plus ce
 qu'il estoit auparauant ; & que par conse-
 quent ceux qui viennent par apres, ne sont
 point obligez à payer les anciennes debtes
 de la ville. Toutesfois i'estime que cette
 opinion ne doit estre receuë que pour les
 emprunts que ceux de la ville ont faits
 pour paruenir à ce changement, comme
 les Romains le practiquerent pour le re-
 gard des debtes que Cesar auoit créés au
 nom de la Republique pour se maintenir

en son vsurpation : car ils les déclarerent nulles , & mesmes ils reuocquerent toutes les immunitéz qu'il auoit données durant sa Dictature.

Mais si les promesses ont esté faites pour d'autres causes , comme pour bastir vn temple , pour refaire les murs & les fortresses de la ville , pour reparer les chemins , ou pour acquérir quelque domaine dont elle continuë la jouissance : Il n'y a point de doute que l'aduis d'Aristote ne soit iuste , & que nonobstant ce changement les successeurs sont tenus de payer les debtes de ceste qualité , puis qu'elles ont tourné au proffit & à l'vtilité publique , dont elle refent encore les effects & la commodité.

En quels cas le Prince souverain peut disposer des biens des particuliers contre leur gré.

CHAPITRE X.



Velques anciens par vne honteuse & servile flatterie ont mis en auant que les sujets ne possédoient leurs biens, qu'à tiltre de preciaire & d'usufruiet. & que la propriété en appartenoit au Prince par droit de Souveraineté; se seruans pour soustenir cette fausse opinion de trois textes de nos liures, l'un tiré de la loy 3. C. de quadrien. *prasc.* où il est dit que c'est en vain que l'on met difference entre les biens du fisque, & ceux de l'Empereur, *cum omnia sint Principis*: L'autre est de la Nouvelle 105. sur la fin, où apres auoir parlé de plusieurs reglemens, elle dit, *omnibus autem à nobis dictis, Imperatoris excipiat fortuna, cui et ipsas Deus leges subiecit, legem animatam committens hominibus.* Et le dernier est pris de la loy, *Item si verberatum*, §. *item si*, ff. de rei vindicat. où il est dit que si dans vne repartition de terres que l'on a faite à des gens de

guerre, le Prince y a compris l'heritage d'un particulier, qu'il doit obeïr, & la ceder à celui à qui l'Empereur l'a assignée.

Mais qui ne void que ces autoritez sur quoy ils appuyent leur proposition sont si foibles, & tirées tellement par les cheveux, qu'elles se destruisent & se renuersent d'elles mesmes. Car quant à la premiere, il ne s'agit dans cette loy qu'ils ont rapportée que d'oster la difference qu'on mettoit entre ces deux sortes de biens du fisque, & de l'Empereur. Pource que, dit-elle, *omnia sunt Principis*; c'est à dire que l'une & l'autre espece de ces biens appartiennent au Prince. Et quant à la seconde, cela est tout visible qu'elle ne peut servir, que pour monstrier que le Prince n'est point obligé aux loix ciuiles, mais non pas pour dire qu'il soit propriétaire des biens de ses sujets. Et pour ce qui est du texte de la loy *si verberatum*, on n'en peut rien conclurre, pource que celui à qui l'on auoit osté l'heritage ne le possédoit qu'à tiltre de precaire, comme faisoient tous les soldats Romains, à qui l'on distribuoit les terres que l'on auoit conquises sur les ennemis; comme nous l'apprenons de Tite-Liue, & d'Apian / le-xandrin; c'est pourquoy ils n'auoient point sujet de s'en plaindre quand on les leur o-

634 DE LA SOUVERAINETE' DV ROY,
stoit en leur faisant quelque present, *Mor-
dico honoris gratia accepto*, dict le Iurifcon-
sulte.

Aussi voyons-nous que cette opinion
ayant pris son cours dès le temps de Ter-
tullian, les siecles ne manquans iamais de
semblables flatteurs, il la refuta courageu-
sement au liure de l'Idolatrie, lors qu'il dit,
si omnia permissa sunt Principi quid erit Dei? Se-
neque luy auoit tracé cette repartie, lors
qu'il dict, *omnia quidem Rex possidet imperio*,
singuli dominio; c'est à dire, que le Prince a
bien la iurisdiction sur tous les biens de ses
subjets, mais non pas la propriété, pour
en disposer contre leur consentement.

C'est là dessus qu'on a fondé cette re-
gle, que le Prince ne peut oster ny dispo-
ser du bien de son peuple pour sa commo-
dité particuliere contre leur volonté: com-
me il est porté par la loy 13. *ff. comm. prædio*,
l. 15. §. 2. ff. de rei vindic. Car bien que Sa-
muël aye dit que les Roys en pourroient v-
ser autrement, son intention neantmoins
n'estoit pas d'autoriser cet abus & cette
violence; mais il vouloit seulement repre-
senter au peuple quelles seroient les mœurs
des mauuais Roys. Ce que nous tesmoigne
l'exemple d'Achab, qui fut viuement repris
par Elie, de ce que par force il s'estoit em-

paré de la vigne de Naboth. Les Roys encore qu'ils ayent vne puissance absolue sur leurs sujets, toutesfois il ne leur est pas permis d'occuper iniustement le bien d'autrui, ny de chasser les propriétaires de leurs héritages. *Non accipiet princeps de hereditate populi per violentiam, & de possessione eorum*, dit cette souveraine Maesté dans le Prophete Ezechiel chap. 46. & non pas mesmes pour donner à leurs enfans, *ut non dispergatur populus meus unusquisque à possessione sua*, adioustelle.

Aussi lisons-nous dans Ciceron en l'oraison contre Rullus, que Lentulus ayant esté député par le peuple Romain pour acheter des particuliers les terres qui estoient enclauées dans celles qui appartenoint à leur Republique: il fut contraint de s'en retourner sans rien faire, pource qu'il ne se presenta personne qui luy voulut vendre son héritage, & que de les'y forcer ç'eust esté contreuenir au droit des gens: Ce que le Senat approuua, & loua sa procedure. Le Prince souverain sera tousiours estimé de se comporter de la sorte, à l'exemple de l'Empereur Titus, qui, comme dit Suetone, *abstinuit alieno, ut si quis unquam*.

Il y a neantmoins de certaines rencon-

636 DE LA SOUVERAINETE' DV ROY,
tres , où le Prince peut contraindre les
particuliers d'abandonner leurs biens au
public ; comme lors qu'il est necessaire du-
rant la guerre de fortifier vne place, d'élar-
gir ses fosses , ou d'ouurir quelque auenüé
pour la secourir : Et que l'on ne peut exe-
cuter ces choses sans abattre leurs mai-
sons , & prendre quelque partie de leurs
terres : ou que pour preuenir le siege de
quelque ville d'importance, il est necessaire
de brusler les faux-bourgs, & de faire le de-
gast des fruiëts du pays des enuirs. Il n'y a
point de doute qu'en ces occasions le Prin-
ce a la puissance de disposer des terres des
particuliers contre leur volonté : comme
Vercingetorix le fit entendre aux Gaulois,
quand il leur commanda de brusler leurs
maisons , & de gaster leurs bleds , pour
empescher les approches des Romains , *sa-
lutis causa* , disoit-il , *rei familiaris commoda sunt
negligenda*. Et l'on doit remarquer qu'en tou-
tes ces rencontres il n'y eschet aucune re-
compense , suiuant la maxime tirée de la
loy *Ædificia* , *C. de oper. public.*

Mais quand en temps de paix le Prince
ou le corps d'une ville ont besoin de l'heri-
tage d'un particulier pour accommoder le
public , il n'y a point de difficulté qu'après
une premiere semonce ils peuuent le con-
traindre

traindre de leur rendre : car comme les heritages priuez ont autresfois esté communs & publics , aussi sont-ils tousiours demeurerez tellement sujets au public , qu'il s'en peut seruir quand elles luy sont necessaires pour sa commodité. Et tant s'en faut que l'on puisse accuser cette contrainte d'injustice , au contraire on la doit appeller *conditionem ab ingrato* , comme tous les Docteurs le traitent sur l'aut. *res que* , *C. communia de leg. in l. vt gradatim* , §. 1. ff. de muner. & honor. l. vii. §. final. *C. de cad. toll.* Neantmoins il seroit iniuste voire tyrannique , d'vser de ce pouuoir sans payer le prix raisonnable de l'heritage dont a besoin le public , comme Ciceron nous l'enseigne en ce lieu de l'Epistre ad Atticum , où il dit , *vt forum laxaremus , & vsque ad atrium libertatis explicaremus , consumpsimus sexcenties H. S. cum priuatus non poterat transigi minori pecunia.* Et c'est pourquoy l'Empereur Auguste ne peut accroistre le lieu qu'on appella depuis *forum Angusti* , pource qu'il se trouua court d'argent , quand il fut question de payer les maisons des particuliers qu'il falloit abattre pour executer son dessein. En quoy l'on doit remarquer la difference qu'il y a entre le temps de guerre , & celuy de paix , pource que durant la guerre le public n'est

point obligé de recompenser les pertes des particuliers : Car que ne doit-on pas faire en ces occasions pour preuenir les funestes accidents dont le public est menacé ? *Respublica incolumis , & priuatas res facili saluas praestat , publica perdendo , tua nec quicquam seruis*, dit le Consul Lemnius dans Tite-Liue : mais en temps de paix puisque la iustice regne pleinement , il est iuste que le Prince ou la Republique indemnise les particuliers de ce qu'ils prennent sur eux pour accommoder le general. L'on ne doit pas mesurer ce droit de souueraineté selon la grandeur de la puissance absoluë du Prince , mais plustost selon la regle de la Royauté , qui inuite les Roys de profiter à tous leurs sujets , & de ne nuire iamais à personne. Aussi voit-on dans Suetone , que comme le peuple Romain eut supplié l'Empereur Tibere de donner la liberté à vn certain Comedien pour recompense de son industrie ; il ne voulut iamais faire cette action sans le consentement de son maistre , & qu'il n'eut esté payé de sa valeur : En quoy il fut imité par l'Empereur Adrian , qui bien que pressé par les clameurs du peuple d'affranchir vn esclau qui auoit bien reüssi sur le theatre , ne voulut iamais luy donner la liberté contre la volonté de son Seigneur.

Et nous lisons dans le Concile d'Orleans V. que comme vn Euesque eut conferé les Ordres de Prestre à vn certain esclaué, sans en auoir parlé à son maistre, il fut condamné par les Peres de luy en donner deux pour vn, pource que c'estoit violer le droit des Gens, que priuer quelqu'un de son bien sans son consentement. C'est pourquoy Dauid ne voulut point accepter l'héritage du Iébuséan Areuna, pour y faire sacrifice à Dieu, qu'après l'auoir remboursé de sa iuste valeur : *Nequaquam*, dict-il, *ut vis, sed emam pretio à te, & non offeram Domino Deo meo holocausta gratuita.* Car en vser autrement ce seroit attirer l'ire du Ciel sur sa teste, & encourir la menace du Propheete Esaïe, lors qu'il dit, *ut qui coniungitis domum ad domum, & agrum agro copulatis, ut auferatur aliquid proximo suo.*

De l'assemblée des Estats Generaux & Prouinciaux, & qu'elle depend de la seule auctorité du Roy.

CHAPITRE XI.



Plusieurs soustiennent que l'assemblée des Estats Generaux & Prouinciaux est incompatible avec la Souueraineté des Roys: & pour fondement de leur dire ils mettent en auant cette proposition, que dans les Monarchies le peuple doit estre entierement priué de la cognoissance des affaires, & n'auoir aucune part en l'administration de l'Estat: & que parmy les Romains si tost que leur Republique eust changé la forme de son gouuernement, les Empereurs supprimerent les Comices & toutes les assemblées generales du peuple. *Post imperium à Tiberio initum, dict Tacite, ita desierunt fieri comitia, vt nunquam postea Populo restituta sint, dequoy le Iurisconsulte Modestin rend la raison en la loy vnique, ff. ad legem Jul. de Ambi. quia ad curam Principis bodie omnia pertinet.*

Mais i'oseray dire que cette opinion ne doit estre receüe ny considerée que dans les Estats tyranniques & Seigneuriaux, où les Princes ont en horreur les assemblées publiques, pource qu'ils craignent tousiours que l'on ne conspire contre leurs personnes, & qu'ils ne veulent point auoir d'autres loix ny d'Ordonnances que leurs propres volonte: Là où dans vn Estat Royal comme est celuy de la France, tant s'en faut que l'assemblée des Estats affoiblisse ou diminue la puissance des Roys, au contraire elle l'autorise, elle la fortifie, & la releue au plus haut poinct de sa splendeur & de sa gloire.

Car en premier lieu comme parmy les Israélites, ainsi parmy nous les Estats ne se tiennent & ne se conuoquent iamais que par le commandement du Roy, en quoy consiste vne des principales marques de la Souueraineté Royale. *Quid enim maius est*, dict Ciceron au liure deuxiesme des Loix, *si de iure quarimus, quam posse à summis Imperiis, & à summis potestatibus comitia & concilia, vel instituta dimittere, vel habita rescindere*? Aussi nous voyons dans nos histoires, que nos anciens Roys auoient accoustumé tous les ans d'assembler leurs estats, pour se faire particulièrement recognoistre

642 DE LA SOUVERAINETE' DV ROY,
par leurs subjects ; Sigebert nous en donne vn signalé témoignage , lors qu'il dict , *Francorum regibus moris erat Kalendis Maij , præsidere coram tota gente , & salutare & saluari , obsequia & dona accipere.* Ce que nous confirme Amonius au liure quatriesme : *indixit placitum generale in loco nuncupato Bigorgio , ad quod propere conuenientibus cunctis Francia primoribus Kalend. Maij , rex folio residens aureo , hoc apud eos habuit exordium.* Et l'on appelloit ces assemblées *placitum* , *conuentum* , *mallum* , comme le remarque Ansegisus au liure 4. chapitre 28.

Dauantage en quel lieu leur Majesté Royale peut elle paroistre avec plus d'estat & de magnificence qu'en ces assemblées , où estans assis dans leurs thrônes , accompagnez de tous les Princes de leur Conseil , & des plus grands Seigneurs de leur Cour , ils font l'ouuerture des Estats , & comme les peres du peuple ils exhortent les deputez des Prouinces de conspirer avec eux à la reformation de leurs Royaumes , & de l'assister de leurs bons aduis , comme il se doit conduire pour retrancher avec plus de facilité les excez , corriger les abus , reestabli la iustice , & faire reprendre à toutes choses leur ancien lustre. Ce qu'ils proposent d'ordinaire avec des paroles si

puissantes & si persuasives, qu'ils touchent les courages les plus endurcis, & les excitent de travailler avec eux à l'exécution de si saintes résolutions.

Outre plus l'on n'entend en ces assemblées de la part des deputez, que des actions de graces, que des protestations d'obeissance, de submission & de respect envers leurs Maiestez. Et l'on y propose rien d'importance, que par forme de requestes & d'humbles supplications, sans s'attribuer le pouuoir de n'en résoudre. Dequoy l'histoire nous rapporte l'exemple des Estats, que le Roy Louys XI. conuoqua en la ville de Tours en l'année 1467. ou bien qui les eust appelez pour estre iuges des differents qui estoient entre luy & Monsieur son frere : Neantmoins leur résolution ne fust pas couchée en ces termes, nous ordonnons, mais que le Roy seroit supplié tres-humblement d'octroyer à Charles son frere, &c. Car les Roys ne sont point adstreints de suiure leurs aduis, si la raison naturelle, si la iustice ciuile, & si le bien & l'utilité de leur Royaume ne les y conuient : qui sont des circonstances qui font esclatter avec vn merueilleux lustre l'autorité Royale.

Mais ce qui rend ces assemblées d'autant plus recommandables, c'est qu'elles pro-

644 DE LA SOUVERAINETE' DV ROY,
duisent vne infinité de bons effects pour
le bien & la conseruation du Royaume ;
d'autant que c'est en ses Estats où il se fait
vne estroite liaison entre le chef & ses
membres , entre le Roy & ses subiects :
C'est là où il reçoit avec toute douceur
les plaintes de son peuple , & qu'il imite
ce sage modérateur de l'vniuers , qui ne
dedaigne point d'appeller toutes les na-
tions de la terre , pour examiner la iusti-
ce de ses actions , lors qu'il dict dans le
Prophete , *cogite omnes populos totius orbis ter-
rarum , vt inter me , & inter populum iudicent ,*
si quid à me fieri debuit , quod ipse non fecerim.
C'est là où l'on dresse & l'on public les Or-
donnances , qui estans semblables à ces
loix anciennes des Romains appellées *centu-
riatas* , que les Consuls proposoient en l'as-
semblée de toute la ville , sont receuës &
obseruées par les peuples avec beaucoup
plus d'obeissance & de respect , que celles
qui sont publiées en d'autres temps : En fin
c'est là où l'on regle la police , où l'on
pouruoit aux desordres , & où l'on reme-
die aux maladies les plus dangereuses de
l'Estat. Et c'est pourquoy nous lisons dans
nostre histoire , que durant les plus grandes
necessitez du Royaume , l'on a tousiours
eu recours à l'assemblée des Estats , com-
me

me au souverain remede, pour prevenir les malheurs qui menaçoient de ruine cette florissante Monarchie.

L'on peut dire la mesme chose des Estats Prouvinciaux, comme du Languedoc, de Bretagne, de Normandie, de Prouence, & des autres pais qui jouissent de la mesme prerogative que ces Prouinces de l'Empire, dont parle Pline au liure troisieme chapitre 2. & 4. de son histoire, qui pouvoient faire de semblables assemblées qu'ils appelloient *Conuentus*.

L'ordre que l'on tient en la conuocation de ses Estats est le mesme que l'on observe aux Estats Generaux. Car il faut auoir vne permission particuliere du Roy auparauant que de pouuoir legitiment s'assembler, & l'on n'y doit rien proposer que pour le seruice de sa Maiesté, & pour le bien & l'vtilité de la Prouince, suivant ce qui leur est prescrit par les lettres patentes qu'on leur a enuoyées. L'on y peut aussi resoudre de faire des remonstrances au Roy, touchant les affaires particulieres de tout le pays, & d'enuoyer des deputez afin de les luy faire entendre. Le Roy a de coustume de leur donner audience en presence du Gouverneur de la Prouince, & du Secretaire d'E-

KKKK

646 DE LA SOUVERAINETE' DV ROY,
stat qui en a la charge. Et puis apres il les
renuoye deuant son Conseil pour exami-
ner leurs cayers, ce qui se fait avec cette
ceremonie, le député general estant entré
dans la chambre assisté des deputez parti-
culiers de l'Eglise & de la noblesse, expo-
se le subiect de sa requeste : & tandis qu'il
parle le député du Clergé est couuert, mais
celuy de la noblesse de quelque qualité qu'il
soit ne se couure point, que lors que la re-
monstrance est acheuée. Et i'ay veu souuent
que le Roy prend à plaisir de leur donner
contentement, & de les renuoyer avec
toute sorte de satisfaction, quand les af-
faires generales de son Royaume le peu-
uent permettre.

Partant il est aisé de voir par la suite de
ce discours, que puisque l'on ne tient les
Estats que par la permission & le comman-
dement de sa Maïesté, que l'on n'y delibe-
re & l'on n'y resout rien que par forme de
requestes & de tres-humbles supplications,
& encore pour le repos & le bien general
de tout le Royaume : que ces assemblées ne
sont point contraires à la souueraineté des
Roys, ne diminuent point leur autho-
rité, & ne combattent en aucune fa-
çon les maximes fondamentales de la Mo-
narchie.

*Des Vniuersitez, & qu'il n'appartient qu'au Roy
de les fonder & les establir.*

CHAPITRE XII.

L n'y a rien qui nous releue d'auantage au dessus des bestes que la cognoissance des lettres & des sciences ; d'autant que c'est elle qui polit nos mœurs, qui nous retire de la barbarie, qui esclaire nostre entendement pour recognoistre la verité d'auec le mensonge, & qui nous instruit à parler pertinemment sur toutes sortes de sujets. C'est pourquoy Cassiodore au liure 3. de ses diuersitez, considerant les excellens effects qu'elle produict dans nos ames, luy donne cet eloge : *gloriosa est scientia litterarum, quia quod primum est in homine, mores purgat, quod secundum, sensum & verborum gratiam subministrat, ita utroque beneficio ornat & loquentes, & tacentes.* Aussi voyons-nous que ceux qui ont autrefois jetté les premiers fondemens des Republiques & des Monarchies ont eu tousiours vn soin particulier de l'establissement des Vniuersitez, pour y faire enseigner la ieu nesse en toutes sortes d'arts & de sciences.

KKKK ij

Et nous pouuons dire qu'entre tous les droicts & les prerogatiues que la souueraineté donne aux Roys , il y en a peu qui soient plus anciennes , que celle qu'elle leur a reseruée de pouuoir seuls establis & fonder des Academies dans leurs Royaumes. Car si nous recherchons de plus haut l'origine des lettres & de l'institution des Vniuersitez , nous trouuerons qu'elles ont presque commencé avec la Monarchie de Babylone , que chacun sçait auoir esté la plus ancienne de cet Vniuers.

Nembrod que les histoires prophanes appellent Belus , le premier Monarque de cet Empire , eut ce bon-heur , que sous son regne plusieurs bons esprits s'addonnerent à la speculation du mouuement des cieux , & particulièrement les Caldées , que Diodore Sicilien dict auoir tenu le mesme rang dans cet Estat que les Prestres parmy les Egyptiens , & s'estans rendus parfaicts par leur estude & leur industrie en la cognoissance des Astres , ils desirerent communiquer à leurs citoyens leurs secrets & belles inuentions : mais n'osans entreprendre ce genereux dessein , ny de faire aucune assemblée comme il estoit necessaire , sans la permission du Prince , ils s'adresserent à Belus , qui ayant sçeu

ce qui estoit de leurs intentions , non seulement leur oëtroya tout ce qu'ils desirerent de luy , mais encore il s'affectionna tant à l'estude , qu'il se rendit fondateur de la premiere Vniuersité du monde: ce qui donne subject à Pline de dire au liure 6. chapitre 26. de son histoire , qu'il a esté l'inuenteur de la science de l'Astrologie.

C'est de ce principe qu'est deriué le droit de souueraineté qu'ont les Roys de pouuoir fonder seuls des Vniuersitez dans leurs Royaumes. Car nous lisons que les Égyptiens qui disputent de l'antiquité avec tous les autres peuples de la terre , apres auoir esté enseignez par Abraham en la Philosophie Chaldecene, comme dit Nicolas Damascene dans Eusebe , ou plustost par Ioseph, ainsi que sainct Augustin le tesmoigne sur ce passage du Pseaume 104. où Dauid parle de l'honneur que reçeut ce sainct personnage du Roy Pharaon ;

constituit eum Dominum domus sue , & principem omnis possessionis sue : ut erudires principes eius sicut feneripsum , & senes eius prudentiam doceret : Et ils s'adresserent à ce Prince , & luy demanderent la permission d'ouurir des Escoles publiques , pour y enseigner toutes les parties des Mathe-

650 DE LA SOUVERAINETÉ DV ROY,
matiques , & la science des Hieroglyphi-
ques : ce qu'il leur accorda librement , &
ne voulant ceder en generosité aux Roys
de Babylone , il voulut luy-mesme estre le
fondateur de cette celebre Academie de
Heliopolis la premiere de l'Egypte. Et
nous voyons que les successeurs de ce Roy
furent tellement soigneux de la conseruer
en sa splendeur , que mesme vn d'entr'eux
qu'ils appellent Olymanduas , y fit bastir
avec vne magnificence toute Royale , vne
Bibliotheque , où il assembla tous les ou-
rages des meilleurs auteurs de l'antiqui-
té , pour le soulagement & la commodité
des Escoliers & des Professeurs.

Cette Vniuersité apres plusieurs siecles
fust transferée en Alexandrie par Ptolomée
Philadelphie , qui par ses liberalitez & ses
faveurs l'esleua iusques au comble de sa
perfection , à cause du grand concours de
plusieurs signalez personnages qui y abor-
doient de toutes les parties du monde , &
qui estoient defrayez & entretenus aux de-
pens du public dans ce lieu delicieux , qu'ils
appelloient *Museum* , où il y auoit vne Bi-
liotheque composée de soixante & dix
mille volumes , ou plustost de quatre cens
mille , comme disent quelques auteurs :
elle continua dans sa vogue long-temps a-

pres la publication de l'Evangile : & ce fut là où Dydimus , Origene , Dionysius , Athenodorus . & saint Athanase y enseignèrent successiuellement la Theologie.

Moyse , que nous pouuons dire estre le troisieme de l'Antiquité , qui s'est attribué ce droit d'establi des Vniuersitez , estant sorty de l'Egypte , institua ce fameux college des Docteurs de la loy , pour instruire la ieunesse , & leur expliquer les difficultez de l'Ecriture : mais les Israélites ayans esté reduits par plusieurs fois en seruitude incontinent apres qu'ils eurent conquis la Palestine , cette celebre compagnie se ressentit de la misere de cet esclauage , & fust presque aussi tost abolie qu'establie.

Mais Salomon le plus sage Roy qui ait iamais esté sur la terre , ayant pris les reines du gouuernement de son Royaume , remit sus cette compagnie , & luy bastit vn superbe college sur la montagne de Sion : dequoy Optatus Mileuitain nous donne vn ample tesmoignage au liure 3. contre Parmenion , *in vertice montis Sion , dicit-il , est non magna planities , in qua fuerunt septem synagoga , vbi populus Iudeorum conueniens legem per Moysen datam discere potuisset , vbi nulla lis audita est , nec ab aliquo celebratum iudicium , quia locus erat doctrina , non controuersia.* Et c'est ce que luy

651 DE LA SOUVERAINETE' DV ROY,
mesme veut dire dans ses Prouerbes , lors
qu'il feint que la sagesse s'estoit bastie dans
la forteresse de Hierusalem vn magnifique
Palais , esleué dessus sept colonnes où elle
inuitoit tous les hommes à ses magnifiques
festins. Car par les sept colonnes qui sou-
stenoient ce riche bastiment , il veut enten-
dre les sept synagogues où l'on enseignoit
autant de sciences differentes , & par ces
banquets où elle conuioit les hommes ,
il veut signifier les belles questions qui s'y
traittoient sur toutes sortes de subjects
pour l'instruction de la ieunesse ; il vse de
ces metaphores de pain & de vin , faisant
allusion à cette loüable coustume qu'a-
uoient les anciens de conferer des sciences
en leurs festins. D'où vient que S. Gre-
goire en ses Morales expliquant ce passage
d'Isaïe , *iustus in excelsis habitabit , munimenta fa-*
scorum sublimitas eius , panis ei datus est , aque eius
fideles sunt , dict que le Prophete par le pain
& l'eau veut représenter la sagesse & la do-
ctrine , dont ils estoient les symboles.

Cette célèbre Vniuersité ayant pour fon-
dateur & pour chef vn si sçauant Roy , qui
prenoit luy-mesme la peine d'y enseigner
son peuple, espandit incontinent les rayons
de sa lumiere par tout l'vniuers ; de sorte
que non seulement les peuples voisins ,
mais

mais encore les nations les plus esloignées venoient en foule pour se faire instruire , & pour entendre les admirables discours de ce sage Prince. *Veniebant de cunctis populis ad audiendam sapientiam Salomonis , & ab vniuersis regibus terra qui audiebant sapientiam eius ,* dict l'Escriture au troisieme des Roys chapitre 4.

Ceux qui receurent avec plus d'ardeur ces diuines instructions , ce furent les Pheniciens , qui se rendirent si parfaicts en toutes sortes de sciences , que depuis s'estans addonnez à la nauigation, ils porterent par toutes les parties du monde la cognoissance des lettres. Ce furent d'eux que les Grecs apprirent premierement l'Escriture : car il est certain que Cadmus leur enseigna cet art , & puis apres Thales le plus ancien des sept Sages de l'Antiquité , que Clement d'Alexandrie au premier de ses Stromates tesmoigne auoir esté Phenicien, leur donna l'intelligence des plus hauts poincts de la Philosophie.

La reputation de ce grand personnage excita Pythagore à se transporter dans le pais mesmes où l'on apprenoit de si beaux secrets , où il acquit yne si parfaite cognoissance de tous les mysteres de la Religion des Iuifs , de leur police , & de leurs

654 DE LA SOUVERAINETÉ DV ROY;
loix, que plusieurs des Anciens conferans
les preceptes de ce Philosophe avec les
sacrez commandemens de Dieu, ont esti-
mé qu'il estoit Iuif de nation. Sainct Am-
broise a esté de cet aduis, comme il se
void en l'Epistre 20. du 3. liure, où par-
lant de Pythagore il dict, *cùm ex Populo Ju-
daorum genus duxerit, ex eius disciplina deriuarunt
etiam magisterij præcepta, meritoque magnus apud
Philosophos habitus aequalẽ vix habuit.* Ce que
Clement Alexandrin confirme au liure 1. de
ses Stromates: *Quidam etiam, dict-il, existi-
marunt eum fuisse Ezechielem.*

Aristote & Platon animez par l'exemple
de ce grand Philosophe, entreprirent aussi
ce mesme voyage, & demurerent long-
temps non seulement en Egypte, mais en-
core en Syrie, où ils firent vn si grand pro-
grez en l'estude des saintes lettres, que
celuy-cy a merité d'estre appellé par Iustin
le Martyr, *Moysem atticẽ differentem*, & ce-
luy-là dans Eusebe au liure 4. de la pre-
paration Euangelique chapitre 3. confesse
auoir appris les plus belles difficultez de la
Philosophie d'vn Iuif avec lequel il confe-
ra long-temps. Depuis ces grands hom-
mes estans enrichis de si precieux thresors
vinrent en la ville d'Athenes, où par la
permission de la Republique, ils commen-

cerent à enseigner publiquement la ieunesse, & à donner la vogue à cette plus fameuse Vniuersité de l'Europe.

Il est aussi croyable que ces mesmes Phéniciens desireux de recognoistre toutes les costes de la mer Mediterranée descendirent dans le pays que nous appellons maintenant le bas Languedoc, & que durant qu'ils y firent du séjour à cause de leur commerce, ils confererent avec quelques bons esprits de cette contrée, & leur enseignèrent la Philosophie, & que mesmes ils descourirent au Roy Sarron, dont parle Berosé au liure troisieme de ses Antiquitez, les plus beaux secrets de leurs sciences.

Ce genereux Prince qui auoit estendu ses conquestes presque par toute la Gaule, desirant de retirer ses peuples des tenebres de l'ignorance, prit la peine de leur apprendre luy-mesme la cognoissance des choses diuines & de la Philosophie, & pour ce subject il fonda vne celebre Academie parmy les peuples que ce mesme autheur nomme Garumneos. Et ces disciples qui furent appelez Saronides du nom de leur Roy, estoient en si grande estime parmy les Gaulois, que l'on n'entreprenoit rien d'importance que par leur aduis, comme

Diodore Sicilien le tesmoigne au liure 6.^e de ses Antiquitez. *Cum de magnis rebus consulunt Galata & sacra faciunt, Saronides adhibent, & velut Deo propinquieribus, diuinas preces faciendas committunt.* Il adiousté qu'ils auoient composé des volumes entiers tant de leurs loix que de leur doctrine; mais que les Druides estans venus puis apres (qui auoient pour reigle de ne rien rediger par escrit) tous les ouurages de ces anciens philosophes furent accueillis de l'iniure du temps, & se perdirent par la negligence de ceux qui leur succederent.

Il est à presumer que l'Academie qu'establit cet ancien Roy fust celle de Tholose: car les plus anciens autheurs parlans de cette ville, l'appellent *Palladium*; Marital même luy donne cette epithete dans vne de ses Epigrammes:

Marcus Palladiæ non inficienda Tolosæ.

Gloria, quem genuit pacis amica quies.

A cette ancienne Academie succeda celle de Marseille, & quelques siecles apres celle de Lyon que fonda l'Empereur Caligula, comme l'on peut conjecturer des paroles de Suetone au chapitre 20. où il dict, que ce prince proposa des prix à ceux qui composeroient le plus elegamment quelques discours en Grec ou en La-

tin , & qu'il voulut que ceux qui auroient esté vaincus & mal réüssi en leurs compositions , les effaçassent de leur langue , ou qu'ils fussent plongez dans le prochain fleuve : ce que l'on practiquoit avec tant de rigueur , que Iuuenat qui viuoit du temps de Domitian , quand il veut décrire quelqu'un faizy de frayeur & de crainte , il le compare à l'Orateur qui doit parler à l'Académie de Lyon :

Palleat vñ nudis pressit qui calcibus anguem ,

Aut Lugdunensem rhetor dicturus ad aram.

Depuis l'Empereur Constantius qui chériffoit le sejour de la France plus que toutes les autres Prouinces de l'Empire , fit florir l'Vniuersité d'Autun , ayant attiré par ses liberalitez les plus doctes hommes de l'Vniuers , & entre autres cet eloquent Eumenius à qui il donna quinze mille escus de pension tous les ans , comme ce grand Orateur le confesse luy-mesme en l'un de ses Panegyriques. Ce qui resueilla tellement les esprits des François , & les excita avec tant d'ardeur à l'estude , qu'ils deuirent les plus eloquens hommes du monde : D'où vient que s. Hierosme appelloit la Gaule *Facundiam*. Mais les lettres ayans esté comme enseuelies dans les ruines de l'Emp. Romain , elle retomba bien tost apres dans son

68 DE LA SOUVERAINETE' DV ROY,
ancienne barbarie : & nos premiers Roys
ne respirans que la guerre & l'exercice des
armes negligerent la science des lettres ,
& d'entretenir les Vniuersitez de leur Ro-
yaume : Ce qui dura iusques à l'Empereur
Charlemagne , qui paroissant comme vn
nouveau Soleil dans le monde , dissipa les
nuages de l'ignorance , & r'alluma dans
les cœurs des François le desir de l'estude ;
par les grands honneurs dont il combla
les hommes de lettres , & par l'establisse-
ment de cette celebre Vniuersité de Paris ,
qu'il reigla avec tant de iugement & de
prudence , qu'elle a seruy puis apres de mo-
delle à tous les grands Princes & Republi-
ques de l'Europe , quand ils en ont voulu
fonder dans leurs Estats. I'en rapporterois
la liste si d'autres ne m'auoient desia soula-
gé de cette recherche , & si ce que ie viens
dire ne suffisoit , pour monstrier que de
toute antiquité il n'appartient qu'aux Prin-
ces souuerains d'establir des Vniuersitez.

Ce droit a pour fondement cette maxi-
me generale , que nul ne peut faire aucune
assemblée , ny eriger aucune compagnie
pour faire vn corps sans l'autorité du
Prince. Ce que l'on a iugé d'autant plus
necessaire , en l'establissement des Acade-
mies , qu'il est du deuoir des Roys de

prendre vn soin particulier de l'instruction de la ieunesse , & d'empescher que l'on ne leur enseigne point de maximes qui soient contraires à la Religion , & aux loix fondamentales de l'Estat : Ce que plusieurs esprits brouillons pourroient facilement entreprendre, s'il estoit permis à tout le monde d'ouurir des escholes de son autorité priuée , & sans la permission du Prince ou du Magistrat.

Aussi nous lisons que les Anciens considerans combien d'accidens & de malheurs pouuoient arriuer de cet attentat , ils auoient accoustumé de le punir avec toute sorte de rigueur. Les Crotoniates bruslerent tout vif Pythagore avec vn grand nombre de ses disciples , pource que sans leur congé il faisoit des assemblées la nuit dans sa maison pour instruire la ieunesse , s'estans imaginez qu'vn particulier ne pouuoit prendre cette hardiesse sans auoir le dessein d'aspirer à la tyrannie. De mesme les Atheniens condamnerent à mort Socrate , bien qu'il fust le plus homme bien de leur ville , pource qu'il s'estoit ingeré d'enseigner à leurs enfans des sciences incogneuës , sans en auoir eu commission particuliere du peuple. Le Roy qui regne à present sur nous , ayant

650 DE LA SOUVERAINETE' DV ROY,
esté aduertý que cet abus se couloit insensiblement dans la France, au grand dommage des Vniuersitez, par l'article 44. de ses Ordonnances de 1629. a deffendu à toutes personnes de faire lecture publique en d'autres lieux, que dans les Colleges des Vniuersitez à peine d'une grosse amende. En quoy certes il ne pouuoit donner à ses sujets de plus signalez tesmoignages de son amour & de sa bien-veillance enuers eux. Car les Princes ne peuuent faire ressentir à leurs peuples de plus vtiles effects de leur affection, que d'estre soigneux de les retirer de la barbarie, & d'empescher qu'on n'infecte les esprits de leurs enfans d'une mauuaise doctrine. C'est la marque qui les distingue des Tyrans; d'autant que les Tyrans, dict Platon, n'ont ordinairement d'autre but que de rendre leurs subjects ignorans, hebetez, & stupides, afin qu'ils n'ayent ny l'inuention, ny le courage de secouer le joug de leur seruitude, & de se reuolter contre leur tyrannie. Comme le practiquerent autresfois le cruel Pharaon enuers les Israëlites, Iulian l'Apostat enuers les Chrestiens, les Othomans enuers les Grecs, les Tartares & les Moscouites, enuers tous ceux qui habitent les Prouinces de leur obeïssance, s'estans persuadez qu'ils
ne

ne se pouuoient seruir d'un meilleur expedient, pour s'asseurer dans leurs conquestes, que de retenir leurs peuples plongez dans l'ignorance.

Là où au contraire les bons Roys & les Republiques bien ordonnées ont tousiours estimé que de faire instruire leurs subjects en toutes sortes d'arts & de sciences, & d'honorer ceux qui font profession des lettres, estoit le moyen le plus propre pour rendre leur gloire immortelle, & perpetuer la durée de leur Empire iusques à l'Eternité. C'est ce que Mæcenas le protecteur des Doctes hommes de son temps sceut sagement représenter à l'Empereur Auguste, lors qu'entre les Conseils qu'il luy donna, pour se maintenir long-temps dans la possession de l'Empire, il l'exhorta d'auoir vn soin particulier des escholes publiques, & de se monstrier liberal enuers les personnes de lettres. Ce qu'il pratiqua avec tant de magnificence, qu'il donna à vne seule fois deux cens cinquante mille escus couronne à Virgile, pour luy auoir présenté quelques vers qu'il auoit faicts en sa louange. Octauia ne fut pas moins liberale que son frere enuers ce diuin Poëte, car elle luy fit present de deux cens cinquante escus pour chaque vers, qu'il auoit

M M m m

662 DE LA SOUVERAINETE' DV ROY;
composez sur la mort de Marcellus, qui se
lisent dans le 6. de l'Æneide.

L'Empereur Vespasian bien qu'il fut ac-
cusé d'auarice en toutes choses, neant-
moins pour ce qui regardoit l'entretene-
ment des escholes publiques & le paye-
ment des Professeurs, il estoit si magnifi-
que, qu'il donnoit seulement à ceux qui
enseignoient la Grammaire iusques à deux
mille escus de gages. Et Pline remarque
qu'il assigna iusques à douze mille escus de
pension aux Docteurs de Medecine; en
quoy il fut imité par l'Empereur Antonin;
qui voulant exciter par les largesses les
bons esprits de son temps à faire des ou-
rages dignes de son regne, donna vn escu
au Poëte Oppian, pour chaque vers des
poëmes qu'il luy auoit dediez, qui se mon-
toient à plus de six mille.

Nos Roys n'ont pas esté moins affectio-
nez enuers les hommes sçauans, ny moins
soigneux de faire florir les Vniuersitez de
leur Royaume. Car sans parler d'auantage
de Charlemagne, qui s'est acquis pour ce
subiect vne louange immortelle parmy la
posterité. Nous lisons que le Roy Robert
faisoit tant d'honneur à ceux qui estoient
enrichis de la cognoissance des bonnes let-
tres, que mesme il procura le souuerain

Pontificat à son Precepteur Gerbert, qui fust appellé Siluestre II. Philippe Auguste suiuit les traces de ce grand Prince; d'autant que non seulement il cherissoit les hommes doctes, mais encore ce fust luy qui reforma l'Vniuersité de Paris, & qui la mit en vne telle reputation, que l'on y venoit de toutes les Prouinces de l'Europe pour y apprendre les langues & les sciences. Sainct Louys ne fust pas moins zelé pour l'auancement des lettres que ses predecesseurs, ce qu'il fit paroistre par le reestablissement de l'Vniuersité de Toloze, qui auoit esté supprimée plusieurs siecles auparauant par l'institution nouvelle de celle d'Orleans: & par le soin qu'il prit d'appaiser les Professeurs & les escholiers, & de les faire reuenir à Paris lors qu'ils abandonnerent l'Vniuersité pour auoir eu la Regente contraire en vne querelle qu'ils eurent contre les habitans de la ville. Philippe le Bel ne fust pas moins desireux de se rendre recommandable aux personnes de lettres que son ayeul: pource que non seulement il maintint l'Vniuersité de Paris & d'Orleans en ses priuileges, mais encore il l'embellit de plusieurs beaux bastimens & de riches fondations. Le College de Nauarre sert encore de tesmoignage de ses

64 DE LA SOUVERAINETE' DV ROY,
magnificences & de ses largeſſes. Philippē
le Long continua d'imiter la liberalité de
ſes anceſtres enuers ceux qui auoient acquis
quelque perfection dans les ſciences , d'au-
tant que l'hiſtoire remarque qu'il mettoit
tòut ſon ſoin à bien policer ſon Royaume,
& à faire florir ſon Vniuerſité de Paris, que
Petrarque teſmoigne auoir eſté ſous ſon
regne le delicieux ſejour des Muſes. Louis
XI. monſtra auſſi ſon zele à conſeruer la
pureté de la doctrine dans l'Vniuerſité de
Paris, qui commençoit à ſe corrompre
par les nouuelles opinions, que certains
Philoſophes qu'on appelloit Nominaux vou-
loient introduire: Car en l'année 1473. il
donna vn ſeuere arreſt contre eux, & or-
donna que l'on bruſleroit tous leurs eſcrits:
En quoy il imita le ſoin des anciens Ro-
mains, qui bannirent de la ville de Ro-
me certains nouueaux Rhetoriciens qui
vouloient s'ingerer d'inſtruire la ieuneſſe
ſans leur permission, comme le rapporte
Aule-Gelle au liure 15.

Mais le Roy François qui a merité le
ſurnom de Pere des lettres, a ſurmonté
tous ſes predeceſſeurs en magnificence:
qui voyant que l'Vniuerſité de Paris ſeſtoit
beaucoup relachée, & que l'eſtude des
bonnes lettres eſtoit entierement negligée,

& comme enseuëlie dans la Barbarie ; il establit ce fameux college des douze Professeurs Royaux en toutes sortes d'arts & de sciences , à qui il donna la charge d'instruire gratuitement la ieunesse de son Royaume , & pour exciter dauantage les escho- liers à se rendre capables en la cognoissance des arts & des sciences les plus releuées , il obtint du Pape Leon X. que ceux qui au- roient pris des degrez, soit de Maistres es Arts, soit de Bachelier ou Licentié en droict Ca- non, ou en Theologie , seroient pourueus des Prebendes, des Cures, & des autres be- nefices qui vacqueroient en certains mois de l'année ; ce qui a lieu par toute la France, mesme en Normandie , comme ie l'ay fait iuger autresfois contre le Cardinal de loyeu- se Archeuesque de Rouën , bien qu'il sou- flint que le concordat ne deuoit point auoir de lieu dans sa Prouince , tant pource que l'Archeuesque de Rouën ne s'estoit point trouué en l'assemblée des Euesques à Bourges , que pource qu'il auoit esté ainsi iugé par plusieurs Arrests du Parlement de Rouën : Mais le Parlement de Paris donna vn Arrest contraire , à cause de l'eminence de cette premiere Vniuersité de l'Europe , qui merite d'estre fauorisee en tous lieux , & que ces graduez ont succédé aux prouir-

666 DE LA SOUVERAINETE' DV ROY,
fions & aux mandats que l'on auoit accoustumé d'expedier *in forma pauperum*, comme il est dict *in cap. f. de Magist.* qui veut qu'on leur confere les benefices par preference, afin de leur donner le moyen de s'entretenir : Et l'on a tousiours tellement porté les graduez de cette Vniuersité de Paris, que quand ils viennent en concurrence avec les graduez des autres Vniuersitez, on leur adiuge la preference, bien que les autres soient plus anciens nommez : ce qui fut aussi iugé sur mes conclusions, suiuant ce qu'on practiquoit à Rome, où il n'y auoit que les Professeurs de cette ville & de Constantinople, *qui ibi solum comitiuam merebantur*, comme il se voit dans le tiltre *De Professoribus vrbis Roma & Constant.* au Code.

Toutes ces faueurs & ces prerogatiues seruirent d'un si picquant aiguillon pour resveiller les esprits des François, & les enflammer à l'estude, que iamais siecle ne produiét de plus doctes hommes en toutes sortes de sciences, ny en si grand nombre que l'on vit paroistre durant ce regne.

Mais depuis cette ardeur s'estant esteinte dans le sang des plus habiles Professeurs, qui furent immolez à la fureur des guerres ciuiles qui s'esleuerent sous les regnes sui-uans les Vniuersitez receurent vn tel

choc, que depuis elles n'ont peu se releuer ny se remettre en leur premiere splendeur, & maintenant elles sont en vn tel desordre, que si l'on n'y met promptement la main, on les verra dans peu de temps toutes desertes & ruinées.

Le souuerain remede que l'on peut apporter à la guerison de ce mal, c'est de reduire tous les Colleges particuliers des villes, à enseigner seulement les elemens des lettres iusques à la Grammaire : car si l'on practiquoit ce moyen, l'on verroit toujours vne grande affluence d'escoliers dans les Vniuersitez, qui par vne honneste emulation, qui se plaist tousiours dans la multitude, s'exerceroient les vns les autres à se rendre capables de leur profession. De là il arriueroit encore vn bien inestimable, c'est que les escoliers estans enseignez par de mesmes precepteurs, sous de mesmes loix & de mesmes maximes, il s'ensuiuroit par tout vne conformité de doctrine, qui est la chose que l'on doit le plus desirer en toutes sortes de professions & de sciences. Ioinct que plusieurs ieunes hommes de diuerses Prouinces y estans nourris ensemble dès leur premier age, ils apprendroient les mœurs les vns des autres, & contracteroient des habitudes, dont le public pour

668 DE LA SOUVERAINETE' DV ROY,
toit recueillir puis apres beaucoup de fruit
& d'utilité: Et c'est pourquoy les Empe-
reurs Theodose le Jeune, & Valentinien
III. ordonnerent, que l'on n'enseigneroit
la Iurisprudence en Orient qu'aux Vniuersi-
tez de Constantinople & de Berithe, com-
me il est porté par la loy 1. C. de *studii libe-
ral. urb. Rom. & Constantinop.* Je sçay que
ceux qui n'ont pas moyen d'entretenir
leurs enfans dans les Vniuersitez esloignées,
ne trouueront pas bon cet aduis, & qu'ils
diront que c'est les soulager d'une grande
despense, que d'establis des Colleges dans
leurs villes. Mais l'on peut leur dire que
ceux qui ne sont pas assez accommodez
pour soutenir la dignité des lettres, peu-
uent chercher de l'employ en d'autres con-
ditions dans la milice, dans la negociation,
dans l'agriculture, & dans les autres em-
ploys qui sont necessaires dans les Estats.
Ce que l'on deuroit souhaiter, car en ce
faisant les Vniuersitez ne seroient plus rem-
plies de gens inutiles & de desbauchez: &
l'on ne verroit plus tant de chicaneurs dans
le plat pais, ny tant de clercs faineants;
& tant d'autres sortes de gens, qui sous
pretexte qu'ils ont quelque petite cognois-
sance des lettres, se rendent audacieux, in-
supportables, & pleins d'artifices à mo-
lester

léster les simples & les ignorans.

Mais pour rendre ce remede vtile , il seroit à desirer que l'on pourueut à la recompense des Professeurs , qui apres auoir regenté vingt-cinq ans , meritent qu'on les soulage , & qu'on leur donne dequoy s'entretenir le reste de leurs iours. Car , comme disoit Tacite , *sublati studiorum precia studia sunt peritura*. Et l'on voit maintenant que faute d'auoir estably quelques fonds pour fournir à ces recompenses , la venalité s'est introduitte parmy les Professeurs du Roy , qui maintenant à la face du public vendent leurs chaires , à condition de jouir d'une partie des gages pour s'aider à viure durant leur vieillesse. Dequoy il arriue deux grands inconueniens ; l'un, que ces places ne sont plus données à ceux qui seroient trouuez les plus capables à la dispute , comme le porte leur institut : & l'autre , que ceux qui les ont acheptées se persuadans qu'ils ne sont obligez de faire des leçons , qu'à proportion du reuenu qu'ils retirent de leurs chaires , à peine lisent-ils deux ou trois mois l'année.

Je desirerois que pour oster tous ces defordres on reiglast cette Vniuersité , sur l'exemple de celle de Salamanque , qui jouit de trente mille escus de reuenu , dont vne

670 DE LA SOUVERAINETE' DV ROY,
partie est employée pour payer les gages
des Professeurs qui regentent actuelle-
ment; L'autre est destinée pour l'entretene-
ment des escholes, des bastimens, & pour
la despense du Recteur: & la troisieme est
reseruée pour les pensions des anciens
Professeurs qui ont regenté vingt ans du-
rant, & tous ceux-là composent le corps
de l'Vniuersité dont le Recteur est le chef:
& c'est deuant eux que l'on traite tous les
différens & les affaires qui suruiennent
pour le reglement des estudes..

Dauantage afin d'exciter les Professeurs
à s'acquitter dignement de leurs charges,
l'on deuroit estre curieux de maintenir les
Vniuersitez dans les priuileges & les pre-
rogatiues qui leur ont esté données pour
reconnoissance des seruices que l'on y rend
au public. En quoy certes nos Roys se
sont tousiours monstrez tres-affectionnez,
comme il se voit par les anciennes Ordon-
nances qui ont esté confirmées par celle de
Henry I V. de l'année 1394. & que l'on
auoit dressées sur l'exemple de celles des
Empereurs Romains, qui ont esté insé-
rées dans les tiltres du Code *De Professori-
bus in Vrbe Constanti. & de Professor. & Me-
dicis.*

Nous deuons esperer que le Roy qui re-

gne à present sur nous, & que Dieu a donné à la France pour la remettre en son ancienne splendeur, apportera quelque iour tous ces remedes pour faire refflorir les bonnes lettres & les Academies de la France, & qu'il prendra plaisir d'adiouster par ce moyen à ces beaux titres de Iuste & de Victorieux qu'il s'est acquis par sa valeur & sa probité, celui de Restaurateur des Vniuersitez de son Royaume.

*Des foires & des marchez publics, & qu'ils ne se
peuuent eriger que de l'autorité du Roy.*

CHAPITRE XIII.

NOSTRE vſage; en ce qui regardé le droit d'eriger des foires & des marchez, eſt different de celuy des Romains. Car par les Loix Romaines il eſtoit en la liberté d'un chacun de le demander, ou au Prince, comme il eſt dit aux tſtres, *De nundinis*; ou au Senat, comme Plinẽ le rapporte au liure 5. de ſes Epiſt. ou aux Conſuls, comme Suetone le teſmoigne en la vie de Claudius, où il dit que cẽt Empereur leur demanda la permission d'en eſtablir en ſes terres; ou bien aux Decurions, qui compoſoient le Senat des villes, pourueu que cẽ fut en la preſence du Gouverneur de la Prouince, comme il eſt porté par la Nouellẽ de Valentinian, *de Siliquarum exact.* Mais parmy nous il n'y a que le Prince qui puiſſe accorder ce priuilege: comme nous l'apprenons des anciennes Ordonnances de nos Roys, & ſpecialement d'un arreſt celebre, que j'ay veu & extraict d'un ancien Regiſtre de la

Cour fol. 90. en ces termes. *Quia feriam fecit sine autoritate Domini Regis, cum nullus in regno talia possit facere absque consensu vel mandato Domini Regis, dictum fuit Baillivo, quod cadere faceret feriam antedictam.*

Neantmoins les loix Romaines & les nostres conuiennent en cela, que les foires & les marchez publics ne se peuuent instituer que par l'autorité publique. Ce que l'on doit entendre, pourueu qu'il n'y ait point de Coustumes bien & deuëment emologuées en la Cour & avec le Procureur Général qui en disposent autrement comme est la Coustume d'Anjou, qui attribué nommément ce droit aux Chastelains par l'article 43. Et ie me souuiens de l'auoir veu interpreter si fauorablement pour eux, que comme le vassal d'un Chastelain de cette Prouince eut obtenu du Roy des lettres patentes, pour establir en sa terre vne foire tous les ans, & vn marché toutes les semaines, sur l'opposition que forma le Seigneur Chastelain, l'impetrant en fut debouté : mais hors cette Coustume il n'y a point de doute que personne quel qu'il soit, n'oseroit entreprendre d'vser de ce droit, sans l'expresse permission du Roy.

Car bien que les foires ayent esté esta-

blies pour la commodité commune des hommes, & qu'elles meritent d'estre favorisées d'une particuliere protection des Princes : toutesfois il importe à l'Estat que les particuliers ne s'ingerent pas d'eux-mêmes de les establir, sans la permission & l'autorité des Roys, à cause du grand concours de peuple qui s'y assemble : les foires estans *ἀγοαὶ καὶ μαρτύριαι*, dict Suidas. D'où vient qu'anciennement l'on festoit les iours que l'on tenoit les foires; & que c'estoit en telles assemblées où l'on publioit les loix & les Ordonnances; & où mesmes pour donner vn plus grand exemple, l'on faisoit les executions des plus signalez criminels, comme Eusebe le remarque au liu. 5. ch. 1. & 3. où il dit, que c'estoit principalement aux iours des marchez que l'on martyrisoit les pauvres Chrestiens.

Et qui ne sçait combien telles grandes assemblées peuuent estre suspectes dans vn Estat, si elles ne sont autorisées par le Prince. Ce qui est principalement considerable pour les grandes foires, où les estrangers abordent de toutes parts : comme sont les foires de Lyon, qui sont les plus anciennes & les plus celebres de l'Europe : & qui meritent bien, que sur cette occurrence nous disions quelque chose de leur anti-

quité, de leur progrez & de leurs priuileges. Leur establissement est si ancien, que Strabon, qui florissoit du temps d'Auguste en fait mesme mention au 4. liure de sa Geographie; où apres auoir remarqué que Lyon estoit la premiere Cité de la Gaule Celtique, il dit qu'il y auoit vne foire vniuerselle où plusieurs peuples de diuerses langues venoient traffiquer avec vne pleine franchise: & qu'au milieu de cette ville il y auoit vne plateforme, qu'il appelle *Aram*, qui estoit haut esleuée, où estoit escrit le nom de soixante nations, qui auoient accoustumé de s'y transporter tous les ans, & le lieu où elles se deuoient adresser pour leur traffic.

Elles durerent en leur vigueur iusques au temps que les Roys de Bourgongne s'emparerent de cette grande ville; car depuis elles furent transferées en Champagne & en Brie: Mais quelque temps apres les Bourguignons estans chassez, & Lyon estant remis en l'obeissance de nos Roys, elles y furent restablies iusques au temps des guerres des Anglois, qu'elles furent transportées à Geneue, où elles durerent iusques au regne de Louys XI. qui ayant recogneu combien ces foires estoient vti- les à ses peuples, les restablit à Lyon,

676 DE LA SOUVERAINETE' DV ROY,
comme en leur ancien domicile ; & pour
les rendre plus celebres , il augmenta gran-
dement leurs franchises & leurs immuni-
tez , comme le contient son Ordonnance
de l'an 1462. iusques là mesme , que par
vne declaration expresse il permit aux e-
strangers demeurans dans Lyon de pou-
voir faire leurs testaments , & où ils dece-
deroient *ab intestat* , que leurs heritiers suc-
cederoient , comme s'ils fussent morts en
leur propre pais : Toutesfois cette declara-
tion ne peut estre verifiée en la Cour , à
cause de l'opposition que le Procureur Ge-
neral y forma ; & fut arresté , que ce pri-
uilege n'auroit lieu , que pour les estrangers
allans & venans aux foires , mais non pas
pour ceux qui demeueroient perpetuelle-
ment en la ville de Lyon , suiuant la con-
stitution de l'Empereur Frederic , *omnes pe-
regriini* , C. *Communia de success.*

Et pour faire garder & obseruer toutes
les immunitéz , exemptions , Franchises &
priuileges de ces foires , le mesme Roy
crea vn officier exprés , qu'il appella Con-
seruateur & Garde des Foires de Lyon ;
pour cognoistre de tous les differents qui
arriueroyent entre les Marchands , pour le
faict de marchandise , & de tous les con-
tracts qui se feroient entre eux durant la
foire :

foire : En quoy il imita l'exemple des Atheniens , qui erigerent six Officiers , qui furent appelez *Thefmothetae* , pour estre luges de toutes les causes , qui arriuoiẽt entre les marchands pour le faict de leur traffic. Et Lucien rapporte en ses dialogues , que presque en toutes les villes maritimes de la Grece , il se trouuoit de ces sortes d'Officiers qui auoient vne pleine iurisdiction sur les nautonniers & mariniers , pour ce qui touchoit les affaires de la marine , à l'exclusion de tous les autres luges : ce qui semble auoir seruy d'exemple pour l'establissement des luges & Consuls , qui cognoissent des causes d'entre les marchands , & qui arriuent pour le faict de marchandise. Et ce Conseruateur des foires de Lyon a meritẽ particulierement d'estre luge Royal , tant en consideration de la grandeur de ces foires , qu'en faueur des marchands estrangers , qui aiment tousiours mieux que la iustice leur soit rendue sous l'authoritẽ du Roy , que par de simples officiers populaires.

Et comme la marchandise ne subsiste que par la bonne foy , qui fuit toutes sortes de ruses , de subterfuges , & de tromperies : aussi voyons-nous que par l'Edict du Roy François I. de l'an 1535. Il est en-

678 DE LA SOUVERAINETE' DV ROY,
joint à ce Conseruateur de faire la iusti-
ce le plus sommairement que faire se pour-
ra ; & veut qu'à cet effect il puisse procé-
der contre les debtors, leurs facteurs, ne-
gociateurs presents ou absents, iusques à
sentence & execution de garnison, & con-
signation des debtes, à quelques sommes
qu'elles se puissent monter, par prise de
corps & de biens ; nonobstant allegation
d'incompetance, & autres appellations, &
sans prejudice d'icelles : dont pour éuiter
les delaiz & les longueurs il en attribue
la cognoissance à la Cour de Parlement : &
mesme afin que les Marchands puissent fai-
re leur commerce avec toute franchise &
toute liberté. La mesme Ordonnance en-
joint au Conseruateur de tenir la main,
qu'il ne se fasse, pendant la foire, aucune
contrainte par corps, ny avec saisie de
marchandises, pour autres affaires que de
foire.

L'on doit aussi remarquer, qu'en faueur
de ces foires, & pour faciliter le trafic, le
Roy Louys XI. permit à toutes personnes
qui les fréquentent d'y tenir train de chan-
ge public ; & de pouuoir bailler, mettre
& enuoyer de l'argent par lettre de changē
en toutes sortes de pays, pourueu que ce
soit pour faict de marchandise, & durant le

temps des foires, comme le contiennent les articles 6. & 7. de l'Ordonnance de l'an 1462. Les affaires de change ont aussi plusieurs singularitez contre le droict commun; premierement pource que l'on peut prendre des interets plus forts que l'ordinaire à cause des guerres, de la difficulté des chemins, & de la rareté d'argent, qui peuuent se rencontrer: Secondement que par l'acceptation qu'on fait d'une lettre de change, on s'oblige au payement & par corps, supposant que c'est plustost une permutation qu'un prest, comme dict Balde au conseil 190. vol. 2. où il dict en outre, que le marchand qui accepte la lettre de change, *eo ipso* il la ratifie, sans pouvoir s'en dedire; si ce n'est que dès l'instant qu'on luy presente il interpose *contestationem contrarie voluntatis*, comme il le dict *in l. si absentes*, C. *si certum petatur*, et Angelus, sur la loy *filiusfamilias*, ff. *ad Macedonianum*, qui sont des faueurs qui ont esté accordées suiuant l'ancien vsage des Grecs, comme nous l'apprenons de Polux *in Onomastico*, où il appelle ces lettres-là *ἀρχαία ἀλλαγή*; ce que les Romains pratiquerent puis apres à leur exemple, comme Cicéron le monstre en la cinquiesme Action contre Verres: Et les Iuriscultes en la

680 DE LA SOUVERAINETE' DV ROY,
loy vxorem , §. legauerat , ff. de leg. 3. in l. penult. ff. de reb. cred. in l. 39. ff. de administr. Tuto.

Mais l'on doit remarquer que bien que ces foires soient declarées franches & libres : neantmoins il y a de certaines marchandises qui sont deffenduës dont on ne peut traffiquer pour les transporter hors du Royaume qu'auec permission expresse du Roy , comme sont les bleds , le pastel , les armes , les munitions de guerre , & les autres qui sont spécifiées par les Ordonn. & qu'elles appellent de contrebande : estant enjoint par icelles , tant aux Conseruateurs des foires , qu'aux maistres des ports de ne les laisser sortir sur les peines y contenuës ; qui est presque la mesme fonction qu'auoit cét ancien Officier Romain , qui s'appelloit *Comes merciorum* , dont fait mention la loy 2. C. *quæ res vendi non possunt* , qui auoit le soin de rompre & d'empescher le commerce des marchandises illicites , & principalement des draps d'escarlate , à cause qu'ils estoient reservez pour l'vsage des Empereurs et des premiers Officiers de l'Empire : et qui prenoit aussi garde qu'on ne transportast. aux nations barbares des vins , des huiles , des legumes , des armes , de l'argent et du fer , comme il

est plus amplement exprimé par tout le titre du Code. *Quæ res exportari non possunt.* Tout ce que ie viens de dire des foires de Lyon peut estre aussi estendu aux autres foires sollemnelles, qui ont esté erigées depuis dans ce Royaume; comme celles de Bordeaux, de Tholose, de Rouen, de saint Denys, de saint Germain des Prez, et des autres lieux, excepté pour quelques particularitez qui ont esté reseruées aux foires de Lyon, comme d'estre regies et conseruées par des Officiers particuliers, ce que n'ont pas les autres.

Et quant aux foires particulières, bien qu'elles dependent aussi de l'autorité du Roy, comme nous auons dict au commencement de ce Chapitre; neantmoins quand par sa permission l'on en veut establir de nouuelles, il faut qu'elles soient ordonnées en d'autres iours, que celles qui ont esté establies auparauant dans le voisinage: car autrement ceux qui iouissent des anciennes auroient droit de s'y opposer, suivant la maxime commune, qui dict, *nec iniuriar aut intempestiue quis ius suum exercere debet, quod in alienum vergat cum amulatione dispendium in l. si cui simplicius, ff. de seruitut. l. Lucio, ff. de aq. quorid.* C'est pourquoy la Cour de Parlement a de coustume, auant

que de proceder à la verification des lettres d'erection de foires & de marchez, d'ordonner que l'on informera, si à quatre lieuës à l'enuiron, & à pareils iours il y a d'autres foires & marchez. Cela neantmoins n'a pas de lieu pour les foires que le Roy voudroit establir dans les villes & les terres qui seroient de son Domaine, encore qu'elles portassent dommage à ceux qui auroient des foires voisines : comme autrefois il a esté iugé sur mes conclusions, pource que personne ne se peut plaindre du Roy lors qu'il vse de ses droicts souverains.

Qu'il n'appartient qu'au Roy de faire des reiglemens generaux pour la police du Royaume.

CHAPITRE XIV.



PAPPELLE icy police Les loix & les Ordonnances que l'on a de tout temps publiées dans les Estats bien ordonnez , pour reigler l'œconomie publique des viures que les anciens appelloient *Annonam*, pour oster les abus & les monopoles que l'on pourroit commettre dans le commerce , pour empescher la corruption des bonnes mœurs , pour retrancher le luxe , & bannir des villes les brelans & les jeux illi- cites ; ce qui a merité ce nom particulier de police : d'autant qu'il seroit impossible qu'aucune Republique peust long-temps subsister sans l'obseruance de ces vtils reiglemens ; C'est pourquoy nous voyons que les Princes souuerains ont employé tous leurs soings & toute leur diligence pour les faire exactement obseruer dans leurs Estats : comme nous voyons par les constitutions des Empereurs Romains , qui se lisent dans

OOO iij

684 DE LA SOUVERAINETE' DV ROY,
 les tiltres *ad leg. Iuliam de annona*, *De canone frumentario vrbs Roma*; *De frumento vrbs Constantinopolitana*; *De annonis ciuilibus*; *De pistoribus*; *De suariis & susceptoribus vini*; *De Nauiculariis*, seu *naucleris publicas species transportantibus*, & les autres semblables. Ce qui donne vn euident tesmoignage de leur zele enuers le bien public, & qu'ils ont tousiours pris vn soin particulier de mettre vn bon ordre dans le commerce, et de faire venir avec abondance toutes sortes de viures dans les villes capitales de leurs Empires. D'où vient que Symmaque voyant que par cette preuoyance du Prince toutes choses estoient vendues à vil prix dans Rome, disoit sur ce sujet, *Gaudeo victum populi Romani, non fato prouinciarum, sed voto Principis prouenire*. Suetone diët le semblable parlant de l'Empereur Claudius Cesar, *nihil non excogitauit, ad inuehendum etiam tempore hyberno commeatus: Nam & negotiatoribus certa lucra proposuit; suscepto in se damno, si quid per tempestates accidisset, nauesque mercaturæ causa fabricantibus ingentia præmia promisit*. Tacite remarque la même chose de Tibere; qui voyant que le peuple Romain se plaignoit de la cherté des viures, mit vn prix au froment, et regla la somme que l'acheteur deuoit donner pour chaque muid, pour exciter les marchands

chands à venir en plus grand nombre à Rome , outre sa taxe il leur donna gratuitement deux escus du sien. Neron ne se monstra pas moins affectionné que ces predecesseurs pour faire vendre toutes sortes de fruiçts à meilleur conte; car afin de contraindre les marchands à se deffaire promptement des grains qu'ils menoient au marché , il ordonna que tandis qu'ils vendroient leurs bleds ils seroient tousiours debout; qu'ils ne pourroient les vendre ailleurs que dans la place publique , afin que toutes choses estans en abondance , les achepteurs en eussent meilleure composition : Et que l'on ne feroit point de credit, pour empescher que la consideration du prest ne fit hausser la valeur du prix des marchandises. C'estoit le Prefect de la ville qui auoit la charge de faire obseruer toutes ces Ordonnances , comme il se voit dans la loy 1 §. *cura carnis* , ff. de *Officio Prefecti vrbi*.

Et lors que la puissance souueraine estoit entre les mains du peuple , les principaux Magistrats , & particulièrement les *Ædiles* raschoient à signaler le temps de leurs magistratures par l'affluence de toutes sortes de grains. Ce que tesmoigne Tite-Liue au liure 11. quand il dict , *Multa blandimen-*

PPP

ta plebi per id tempus ab Senatu data, annona imprimis habita cura, & ad frumentum comparandum missi alij in Volscos, alij Equos: Et le mesme au liure; 11. Ediles frumenti vim ingentem quod ex Africa Proconsul Scipio miserat; quaternis aris populo cum summa fide, & gratia diuiserunt: ce qui rendoit ce soin d'autant plus loüable, qu'il tournoit au soulagement du pauvre peuple que Dieu a donné aux Roys & aux Princes souuerains pour le principal object de leurs largesses & de leurs liberalitez. D'où vient que la distribution du pain que les Empereurs auoient ordonné que l'on donnast au peuple dans Constantinople, se faisoit sur les degrez du Temple qui estoit dédié au Genie ou Dieu tutelair de cette grande ville; vnde & panis ille gradilis dicebatur; se persuadans qu'ils ne pouuoient attirer sur eux les graces & les faueurs de cette diuinité par vne action plus meritoire, que par ces aumosnes, & par ces largesses publiques.

Le Roy d'à present n'a pas esté moins charitable enuers ses sujets que tous ces Empereurs; car pour subuenir à cette grande disette de bled qui espouuante tout le monde, il a traitté avec des marchands pour en aller achepter dans les provinces estrangeres, leur ayant fait aduance

d'une grande somme de deniers. Et pour leur faire entreprendre ce voyage avec plus d'allegresse & d'assurance, il s'est chargé de tous les perils & les hazards qui pourroient arriuer en leur conduite, avec vne concession d'une pleine immunité & exemption de toutes daces & d'impositions; ce qui seruira de tesmoignage à la posterité de son extrême amour enuers son peuple.

Aussi n'appartient-il qu'au Prince souverain de faire de telles liberalitez: car bien qu'en effect elles soient tres-loüables, neantmoins celuy qui les feroit au desceu du Prince se rendroit suspect à l'Estat. Tesmoin ce qu'Herodian remarque d'un Cassander, qui ayant fait un grand amas de bleds pour subuenir à la disette publique & le distribuer au peuple à bon marché, l'Empereur Commode en prit un tel ombrage qu'il le fit mourir, confisqua tous ses bleds, & les donna puis apres aux plus pauvres de la ville. Cela mesme rendit suspect aux Romains Spurius Melius, pour ce qu'il donnoit du bled au menu peuple, afin de l'auoir fauorable en l'execution de l'entreprise qu'il auoit tramée contre la Republique.

Mais voyons maintenant quels sont les droicts souverains que les Roys ont sur le

688 DE LA SOUVERAINETE' DV ROY,
 reglement de la police. Le premier est,
 qu'il n'y a qu'eux qui ayent le pouuoir d'e-
 stablir les poids & les mesures dans leurs
 Royaumes : dequoy les Empereurs Ro-
 mains se monstrent si soigneux, que mes-
 me pour empescher toutes sortes de trom-
 peries, ils ordonnerent par vne constitution
 particuliere de quelle façon il falloit ma-
 nier la balance quand on pensoit les mar-
 chandises, *quod infertur aqua lance & libramen-
 tis paribus suscipiatur, scilicet vt duobus digitis
 summitas lini retineatur, tres reliqui liberi ad sus-
 ceptorem emineant, nec pondera deprimant nullo
 examinis libramento seruato, nec aquis ac paribus
 suspenso statere momentis. l. 1. C. Theod. tit. de Pon-
 deratoribus.*

Nos Roys ont suiuy ces exemples, com-
 me nous lisons par leurs Ordonnances de
 l'an 1346. & 1349. & 1351. qui contiennent
 les reglemens generaux de la police du
 royaume, & entre tous les autres le Roy
 Henry II. par son Edict de l'an 1357. or-
 donna que tous les poids & les mesures
 seroient égales par tout le Royaume, &
 qu'ils se nommeroient poids & mesures du
 Roy : Et bien que les Seigneurs haults Ju-
 sticiers ayent empesché l'execution de cet
 Ediet, & que les Officiers du Roy par vne
 trop grande facilité se soient relâchez pour

les petits poids & les petites mesures : neantmoins pour ce qui est des grands poids & des grandes mesures , des aulnages & des jaugeages , on a tousiours tenu pour constant que ce sont des droicts de la Couronne qui ne peuuent appartenir qu'au Roy. Aussi nous voyons que nonobstant les oppositions des haults Iusticiers il a créé des Officiers dans toutes leurs terres , pour prendre garde que l'on ne commette aucun abus en toutes ces mesures.

Le second droict que le Roy a sur la Police , c'est qu'il n'y a que luy qui aye l'autorité de regler le grand commerce , qui consiste principalement aux contractz commutatifs & foeneratifs ; ce qu'Aristote descrit en ses Politiques , où apres auoir preferé l'agriculture à tous les autres arts , pource qu'elle n'aspire qu'aux richesses innocentes que l'on acquiert par son trauail , & que la terre donne à ceux qui la cultiuent , il dit que toutes les autres negociations qui se traittent entre les hommes , deuroient estre deffendues à cause des fraudes & des tromperies qui s'y commettent , si elles ne sont reiglées par les loix du Prince : comme nous en voyons des exemples au tiltre *De commerc. & mercator.* & en celuy

690 DE LA SOUVERAINETE' DU ROY,
De monopolis, & negotiatorum conuentu illicito. C.

Mais sur tout nos Roys ont esté soigneux d'empescher le cours des vsures, comme estans tres-pernicieuses à l'Estat, contraires à la Loy de Dieu, ennemies de la charité, & la ruïne du commerce & du peuple. C'est pourquoy ils establistent souvent des Chambres de Iustice pour faire la recherche de ceux qui s'addonnent à cet infame trafic, & les punir avec toute sorte de rigueur. L'on casse ordinairement leurs obligations, on les condamne au quadruple, & quelquesfois on les bannit & l'on confisque tous leurs biens.

Et d'autant que l'on met les reiglemens touchans les mestiers entre les plus importants de la police, pource qu'ils sont en la Republique ce que la main est au corps, & qu'ils sont tous les ouurages necessaires pour entretenir la vie. Aussi les Princes se sont particulierement reseruez ce pouuoir de les eriger en corps, de leur donner des statuts, & de leur octroyer des immunitéz & des priuileges, afin d'exciter les artisans à se rendre parfaicts en leur art, & seruir fidelement le public. Ce que les Empereurs Romains prattiquerent vtilement dans la ville de Rome, comme nous l'apprenons des tiltres *De excusationibus Artificum. De Mu-*

LIVRE IV. CHAPITRE XIV. 691
*rilegulis. De Fabricensibus. De Privilegiis procuratoris
urbis Romæ. De Collegiis & Chartopra.*

C'est aussi de l'office des Rois de retrancher le luxe , & la despence superflüe de leurs subiects : ce qu'ils doiuent faire avec d'autant plus de soin, que ces excez seruent de flammeches, pour allumer dans les cœurs des plus grands ces deux dangereuses passions , l'avarice & la vanité : celle-là les incite à rapiner de toutes parts , pour auoir dequoy fournir à leurs profusions : & celle-cy les porte dans l'ambition de paroistre au dessus de leurs égaux , d'où de là naissent les enuies , les querelles , & en fin les seditions dans les Estats. C'est pourquoy les Romains si tost qu'ils voyoient que l'on commençoit à se jeter dans les profusions & les bombances , ils faisoient en mesme temps de rigoureuses Ordonnances pour arrester le cours de ces abus , & de ces desordres : comme nous témoignent l'ancienne loy Appia , & les autres loix sumptuaires : Et tandis qu'ils les ont soigneusement gardées , leur Republique est demeurée florissante , & s'est tousiours accruë en puissance & en richesses : Mais si tost qu'ils negligerent de les obseruer , s'estans laissez persuader par les paroles dissoluës de cét ancien Tribun , qui leur tint

P.P p.p. iiii.

Vn iour ce discours en pleine assemblée.

Frani sunt iniecti nobis (Quirites) nullo perpetiendi modo : alligati & constricti estis , amaro vinculo seruitutis. Lex enim lata est , quæ nos frugi esse iubet. Abrogemus istud horridæ vetustatis rubigine absitum imperium : Etenim quid opus est libertate , si volentibus luxu perire non licebit ? ils commencèrent à degenerer de leur ancienne vertu , & s'abandonner à toutes sortes de dissolutions & de desbauches : Et leur profusion monta depuis à vn tel excez , que comme les plus gens de bien eussent exhorté l'Empereur Tibere de remettre en vigueur les loix sumptuaires , il leur fit response que le mal estoit trop enraciné , *vereri se , vt praua valida , & adulta vitia sunt , ne coercitio plus damni in rempublicam ferat* : L'exemple du Prince est le remede le plus propre pour retirer les peuples de toutes ces dépenses inutiles & superflües ; car il n'y a rien qui fasse vne plus viue impression sur les esprits des hommes que la bonne vie du Monarque , & cét ancien auoit raison de dire , *facilius esse errare naturam , quam Principem formare rempublicam dissimilem sui* ; C'est pourquoy les Empereurs Theodose & Valentinien voulants exciter les Romains à quitter leur luxe & leurs bombances ; ils commencerent par eux mesme à regler leur maison , & à retrancher toutes

toutes les superfluitez de leur table & de leur suite. C'est dequoy Pacatus les louë dans son Panegyriq; leur tenant ce discours, *Tua, Theodosi, epula mensis communibus parciores, locorum ac temporum fructibus instruuntur; hinc certatim in omnes luxuria pudor, & quiescentibus legum minus, subiit priuatim penitentia sui.* Et l'on remarque qu'il n'y eut rien qui toucha tant les cœurs des Thebains pour reformer leurs mœurs, & se reduire dans l'ancienne frugalité de leurs ancestres, que cette action d'Epaminondas, qui refusa d'aller à vn festin, où il auoit esté aduerty que le maistre de la maison auoit fait vne despense qui excéderoit de beaucoup son reuenu, *in ea re enim validior est emulatio quam pœna.*

Les Roys ne doiuent pas estre moins soigneux de deffendre les jeux illicites, que Varron comparoit à ces broüillards qui font tomber les fleurs, & qui corrompent les fructs des meilleurs arbres. Car de là vient la perte de la ieunesse, de là vient la ruïne & le bouluersment des familles, de là viennent les blasphemes, les querelles, les meurtres, la pauureté, & en fin le desespoir qui porte ceux qui sont atteints de cette fureur dans toutes sortes de meschancetez & de violences. C'est pourquoy les Romains pour preuenir tous ces desordres firent vne

694 DE LA SOUVERAINETE' DV ROY,
loy expresse, qui permettoit à tout le monde d'accuser publiquement celuy qui en feroit profession, & dont la peine estoit du quadruple, tant contre celuy qui auoit gaigné, que celuy qui auoit perdu. Ce qu'ils prattiquerent contre Licinius Lenticula, dont parle Ciceron en ses Philippiques, lors qu'il accuse Marc-Antoine de luy auoir donné sa grace apres cette honteuse condamnation; *Licinium Lenticulam*, dict-il, *de alea condemnatum, collusorem suum restituit.*

Les Empereurs ne furent pas moins curieux de faire obseruer cette police, comme il se voit dans les tiltres *De alea lusu*, & *de aleatoribus*. Iusques là mesme qu'ils introduirent plusieurs droicts singuliers contre ceux qui s'addonnoient à ces jeux illicites. Car premierement ils donnerent la permission de demander en Iustice l'argent que l'on auoit mis sur le jeu, & commanderent au grand Preuost de Rome, & aux Escheuins des autres villes d'en faire la poursuite, & de l'employer à la reparation des ouurages publics. Secondement ils ordonnerent que l'on ne pourroit opposer contre cette action aucune prescription moindre de cinquante ans, dict la loy 1. *C. de alea lusi. & aleator.* Dauantage ils denie-

rent à celuy qui auoit gaigné, la faculté d'agir pour recouurer son gain contre le perdant, comme il est dit *in l. periculi*, *ff. de Naut. fano*. Outre plus ils ordonnerent des peines rigoureuses contre ceux qui tenoient les Academies, & les condamnerent en de grosses amandes payables par corps, suiuant la disposition de la loy 1. & 2. *ff. de aleator*. Ils confisquerent aussi tous les lieux, où l'on tenoit les berlands, dict la loy 2. *C. cod.* & c'estoit les Ediles qui faisoient cette recherche, d'où vient que Seneque disoit, *loca Ædilem metuentia*. En fin ils permirent de destrober impunément, & de faire iniure à celuy qui receuoit les ioueurs en sa maison, comme estant plus punissable que les ioueurs mesmes.

Nos Roys n'ont pas esté moins soigneux de faire garder cet ordre dans leur Royaume; tesmoin les Ordonnances de saint Louys de l'an 1254. de Charles V. de l'an 1369. de François I. de l'an 1532. de Charles IX. à Moulins art. 59. & de Henry III. à Blois, qui contiennent les mesmes peines tant contre les ioueurs, que ceux qui tiennent les berlands; ayans de plus adiousté la cassation de toutes les promesses & les obligations qui auroient esté faictes pour le jeu: Neantmoins iusques à

696 DE LA SOUVERAINETE' DV ROY,
present toutes ces sainctes Ordonnances ont
esté negligées, voire mesprisees, à cause de
la liberté que les grands se donnent de les
violier & de les entraindre impunément : &
ce qui est de plus deplorable, c'est que non
seulement ils ne se contentent pas de prouo-
quer par leur exemple les autres à faire tou-
tes ces desbauches, mais encore ils mettent
sous leur protection ceux qui present leurs
maisons pour y retirer les ioïeurs : De fa-
çon que les Officiers sont le plus souuent
contraints de ceder à la force, & de
dire avec cet ancien, que les actions des
grands *magis reprehendi possunt quàm corrigi.*

L'on doit en fin obseruer que bien que
l'une des proprietéz de la Iustice soit d'estre
ferme & constante en ses Ordonnances &
ses Decrets : neantmoins cette reigle ne
s'observe point pour ce qui est des reigle-
mens generaux de la police, qui ne passent
iamais en force de chose iugée, mais qui
se changent & se varient selon les diuerses
rencontres des temps, comme ie l'ay plus
amplement discoursu en l'une de mes deci-
sions.

*Que les Roys sont subjects à la puissance & à la]
Justice de Dieu.*

CHAPITRE XV.

B IEN que nous ayons monsté par tous les discours de cet ouvrage, que les Roys ont vne souueraine autorité sur les hommes, sur la terre, sur la mer, & sur toutes les choses qui sont en cette plus basse partie de l'univers: Neantmoins ils ne laissent pas de dependre de Dieu, & d'estre subjects à sa souueraine puissance comme tous les autres mortels: c'est ce que le Poëte Tragique nous exprime elegamment en ces vers.

Regum timendorum in proprios greges.

Reges in ipsos, imperium est Iouis.

Ce qu'il semble auoir emprunté des liures sacrez, où ce grand Dieu est appellé dans le Prophete Daniel, *Deus Deorum & Dominus regum*. Car c'est luy qui est l'autheur de toutes les dominations de la terre; c'est luy qui fonde & qui establit les Royaumes; c'est luy qui les destruit & qui les transfere d'une famille en vne autre, qui les donne & qui les oste selon qu'il a déterminé dans

QQqq iij

698 DE LA SOUVERAINETE' DV ROY, ,
le secret de sa prouidence: c'est luy qui pre-
ferue les vns de la fureur des bestes farou-
ches , qui sauue les autres du milieu des
flots & des fleuves les plus rapides où l'on
les auoit precipitez , & qui retire les autres
de la poussiere & du milieu de la lie du peu-
ple , pour puis apres les esleuer dans les
throsnes , leur donner le commandement
souuerain sur vn grand nombre de prouinces,
& les faire fondateurs des plus celebres & des
plus puissantes Monarchies du monde , c'est
luy qui leur inspire de bons conseils pour gou-
uerner sainctement leurs Estats, qui les for-
tifie dans les perils , qui les assiste dans les
hazards, qui leur donne l'industrie de se
desmesler honorablement des affaires diffi-
ciles , & des occasions dangereuses qui se
presentent à tous moments dans leur admi-
nistration : En fin c'est de luy qu'ils rele-
uent, & c'est par luy qu'ils regnent absolu-
ment sur les hommes , ayant luy-mesme
prononcé cet Oracle *per me reges regnant , &
principes imperant.*

Mais cette dependance & cette subie-
ction des Roys à la Maiesté diuine paroist
auec bien plus d'éclat dans la rigueur des
peines dont elle les punit lors qu'ils s'esloi-
gnent de leur deuoir , & qu'ils abusent de
leur puissance. Car c'est alors qu'elle les hu-

milie , qu'elle les expose à la rîsee de leurs ennemis , qu'elle remplit leurs Royaumes de diuisions , & qu'elle excite mesmes toutes les creatures contre eux pour prendre vengeance de leurs crimes , leur disant dans le Prophete Hieremie , *Venite & congregamini omnes bestia terra , properate ad deuorandum pastores , multi demoliti sunt vineam meam , posuerunt eam in dissipationem.* C'est alors que comme vn furieux orage , dict Isaïe , que comme vn tourbillon de vent , que comme vn torrent impetueux , que comme vne inondation d'eaux qui desborde sur la campagne elle les abat , elle les terrasse , elle foule aux pieds leurs couronnes , elle les plonge dans toutes sortes de miseres & d'infortunes : & en fin elle les extermine de dessus la face de la terre , lors que par leur endurcissement dans leurs pechez ils se sont rendus indignes de ressentir les effects de sa clemence infinie. In illo tempore , dict le Prophete Ieremie , *eijcient ossa regis Iuda , & ossa principum eius , & expandent ea ad Solem & Lunam , & militiam celi quibus seruierunt : non recolligentur & non sepelientur , in sterquilinum super faciem terra erunt , & eligent magis mortem quam vitam , qui residui fuerint de cognatione hac pessimi.* Qui sont des punitions tres-rigoureuses , & des menaces bien effroyables pour partir

700 DE LA SOUVERAINETÉ DU ROY,
de la bouche de celuy qui est la douceur &
la bonté mesme : mais neantmoins d'autant
plus iustes, que les vices des Roys offensent
dauantage sa Majesté, & sont beaucoup
plus de dangereuse consequence que ceux
des particuliers. Car les deffauts de ceux-
cy ne sont cogneus que de peu de person-
nes, mais les mauuaises actions des Princes
& des Potentats de la terre sont confide-
rées de tout le monde, & donnent vne
hardiesse aux subiects de les imiter & d'en
faire de semblables : Elles corrompent in-
sensiblement les bonnes mœurs, elles ban-
nissent la pudeur, l'integrité, & toutes les
autres vertus du milieu des hommes. *Ad*
Principum enim mores sese vt plurimum effingere so-
lent ij, qui in ipsorum imperio sunt. Ac proinde
quales fuerint duces, tales quoque eos à quibus gu-
bernantur esse necesse est, dict saint lean Da-
mascene.

Aussi les histoires saintes & prophanes
sont pleines d'exemples de cette haute ius-
tice que Dieu exerce sur les Roys lors
qu'ils se montrent ingrats enuers luy, &
qu'ils s'oublient de leur deuoir. Je ne par-
leray point des persecutions que receut Da-
uid de son fils Absalon, pour auoir com-
mis vn seul adultere, ny de la folie en la-
quelle tomba Salomon pour auoir estably
l'idolatrie

l'idolatrie parmy son peuple, ny des miseres & des langueurs que souffrit Manasses, ny de la mort horrible d'Achab, de Iezabel, & de toute sa race, pour auoir massacré les Prophetes du peuple d'Israël, ny de cette maladie extraordinaire d'Antiochus, qui fut rongé des vers pour auoir pillé le Temple de Hierusalem, ny des morts violentes d'un Caligula, d'un Neron, d'un Caracalla, d'un Commodus, d'un Helio-gabale, & de semblables monstres du genre humain; pource que ces punitions de la Justice Diuine sont cogneuës de tout le monde. Je m'arrestteray seulement à quelques exemples qui sont arriués dans les siècles qui nous approchent de plus près. Ceux qui ont leu l'Histoire des Turcs sçauent en quelle puissance estoit monté Baiazet premier de ce nom; incontinent apres la mort de son pere, il vainquit les Bulgares, il conquesta la Thessalie, la Macedoine, l'Armenie, par tout où il rencontroit ses ennemis il les mettoit en fuitte, & en remportoit de signalées victoires, qui luy acquirent en fin le surnom de la foudre des armées.

Après tant d'heureux succez il s'oublie, & croyant que toutes choses luy estoient permises, il s'en alla attaquer sans subiect

R R r r

702. DE LA SOUVERAINETE' DV ROY,
quelques Seigneurs Turcs qui s'estoient e-
stablis dans l'Armenie , & qui auoient ser-
uy la famille Othomane de leurs biens &
de leur vie pour l'esleuer sur le thrône , &
la rendre maistresse d'vn si riche & si puis-
sant Empire. Eux se voyans si mal trait-
tez apres auoir rendu de si grands seruices,
ils se jettent entre les bras de Temir ou
Tamerlan , implorent son secours , & ma-
nient si bien l'esprit de ce grand Capitaine,
qu'ils le porterent à declarer la guerre à Ba-
jazet , il vient avec vne armée effroyable,
toute l'Asie luy fait joug , il rencontre son
ennemy , le deffait en bataille rangée , le
prend prisonnier , l'expose à la rizée de son
armée , & puis apres le fait enfermer dans
vne cage comme vne beste farouche : &
toutes les fois qu'il vouloit sortir de son
Palais , il faisoit amener Bajazet , & se ser-
uoit de son corps comme d'vn marche-
pieu pour monter à cheual. Qui ne sera-
rauy d'estonnement lors que l'on conside-
rera vne cheute si deplorable que celuy qui
auoit dompté les plus vaillantes nations de
l'Europe , qui auoit deffait l'Empereur Si-
gismond , pris le fils du Duc de Bourgon-
gne avec la fleur de la noblesse Françoisse,
qui s'estoit rendu maistre d'vne partie de la
Hongrie , estre deffait en vn seul combat ,

& tomber dans vn abaissement si honteux, que d'estre tous les iours foulé aux pieds, & servir de joiyet à l'insolence de son ennemy : Que les coups de cette Divine Iustice sont pesans , & combien ces paroles de Seneque sont veritables : *Quod regnum est cui non parata sit ruina & proculcatio , & Dominus , & carnifex : nec magnis ista intervallis diuisa , sed hora momentum interest inter solium & aliena genna.*

Mais sans nous arrester à la recherche de ce qui s'est passé dans les siecles de nos peres , jettons les yeux sur les malheurs qui sont arriuez au Roy d'Espagne & à l'Empereur , pour auoir iniustement attaqué Monsieur de Mantouë. Celuy-là depuis cette entreprise n'a faiët que des pertes signalées ; il a veu enleuer ses flottes & son or du Perou , il a veu deffaire ses troupes par ses ennemis presque sans coup frapper, & au lieu de prendre les villes de ce pauvre Prince qu'il assiegeoit avec toute sa puissance , & avec ses meilleurs Capitaines , il a perdu malheureusement les siennes. L'Empereur a eu du commencement quelque aduantage en cette iniuste guerre , il s'est rendu maistre de tout ce qu'il a attaqué , il a deffait les forces des Venitiens , il a triomphé de la prise de Mantouë ; mais la fortu-

704 DELA SOUVERAINETE' DV ROY,
ne le vouloit flatter pour vn peu de temps,
afin de luy faire plus viuement ressentir la
rigueur de la iustice diuine. A peine auoit-
il fait allumer les feux de ioye pour tant
d'heureux succez , à peine commençoit-il
à iouir du bon heur de ses victoires , que
le ciel décoche ses traits contre luy. Le
Roy de Suede touché par les remonst-
rances & par les plaintes de plusieurs Sei-
gneurs d'Allemagne , que l'Empereur auoit
despoüillez , passe la mer pour les venir ie-
mettre dans leurs Estats , mais avec des for-
ces si petites au regard de celles de l'Empe-
reur , que tout le monde se mocquoit de
cette entreprise. Neantmoins comme
Dieu l'auoit choisy pour estre le ministre de
sa vengeance , il eut vne si fauorable des-
cente , que sans coup frapper il se rend
maistre de toute la Pomeranie. Quelques
troupes Imperiales viennent pour empes-
cher ses progresz , il les terrasse , il prend
Francfort sur la Lodere malgré toute leur
resistance , il deffait le Comte de Tilly , &
par l'heureuse yssue de ce sanglant combat,
il s'ouure le chemin iusques dans le cœur
de l'Allemagne ; & comme Dieu auoit ren-
du l'Empereur maistre absolu de tout ce
grand pays par le gain d'vne seule bataille ,
il a permis aussi que pour punition de ses

iniustes vsurpations, il ait esté chassé de toutes ses conquestes par la seule perte d'un autre. Je r'apporterois encore d'autres semblables accidents qui sont arriuez de nostre temps, mais celles que ie viens de dire sont assez suffisantes pour la preuue de ma proposition.

Le meilleur conseil que les Roys puissent prendre pour euitter ces desastres & ces cheutes honteuses, c'est de garder la moderation dans les prosperitez, de ne point abuser des aduantages que Dieu leur donne au dessus de leurs ennemis, de se remettre deuant les yeux, que l'abaissement & le mespris vont tousiours à la suite de l'arrogance & de la superbe; qu'il n'y a point de puissance si redoutable, ny d'Empire si bien assésuré, qui puisse resister aux violences de la fortune, & de repasser souuent en leur esprit ceste belle parole de Tacite: *Cuncta mortalium incerta, quantoque plus adeptus sis, tanto magis te in lubrico censeas.* Outre plus ils doiuent estre soigneux de dompter cette inclination vitieuse des hommes, qui les porte insensiblement dans la licence & la tyrannie, lors qu'ils voyent que toutes choses obeïssent à leurs volonte; & d'auoir tousiours en la pensée ce serieux precepte d'un ancien Pere de l'Eglise, *Regis*

706 DE LA SOUVERAINETE' DV ROY,
norma Deus est, voulant dire que les Roys
estans les images viuantes de ce grand mo-
derateur de l'Vniuers, ils deuoient prendre
peine de l'imiter en toutes leurs actions, &
que comme cette souueraine bonté semble
n'auoir point d'autre object, que d'espan-
dre continuellement sur les hommes ses
graces & ses faueurs. Que de mesme les
Roys ne doiuent point auoir d'autre but
ny d'autres desseins en l'esprit, que de ren-
dre leurs peuples heureux, & de les faire
jouir de toutes sortes de felicitéz. Ils peu-
uent s'asseurer que s'ils sont curieux d'ob-
seruer tous ces conseils, que Dieu fera
toufiours de leur costé, qu'il fera prospe-
rer toutes leurs entreprises, & qu'il les ren-
dra toufiours victorieux & toufiours triom-
phants.

Que s'ils reuoquent en doute la verité
de ses promesses & de ses recompenses :
qu'ils jettent les yeux sur tout le cours de
la vie du Roy qui regne à present sur nous;
ils verront que pource que dés son ieune
aage il a chery la iustice, que Dieu a rete-
nu dans le deuoir & dans l'obeissance la
plus saine partie de ses subiects, bien que
plusieurs esprits seditieux se soient efforcez
par leurs artifices de les desbaucher de leur
deuoir, & de les faire reuolter contre sa

Maieſté. Ils verront que pource qu'il s'eſt monſtré touſiours plein de zele pour la deſſeſſe de la religion, & qu'il a ſeruy d'exemple d'une parfaite pieté à tous ſes peuples, que cette diuine bonté luy a fait cette particuliere faueur, de l'auoir choiſy apres tant de Roys, pour terrasser le party de l'hereſie & de la rebellion dans ſon Royaume. Ils verront en fin que pource qu'il ſ'eſt dompté ſoy meſme, qu'il a vaincu ſes propres paſſions, & qu'il a fait abſolument regner la chaſteté dans ſon ame, que ces paroles prophetiques de Salomon au chapitre 30. des Prouerbes ont eſté accomplies en ſa perſonne. *Gallus ſuccinctus lumbos ſuos : Non eſt Rex qui reſiſtat ei* : Car s'ils conſiderent toutes les guerres qu'il a genereuſement entrepriſes, ils recognoiſtront que le Dieu des armées, le Dieu fort, & le Dieu Tout-puiſſant l'a viſiblement accompagné aux plus dangereuſes occaſions, a combattu pour ſa deſſeſſe, luy a fait r'emporter de ſignalées victoires, & l'a fait en fin glorieuſement triompher de tous ſes ennemis. La reduction du Bearn, ſi toſt qu'il parut avec ſa ſeule ſuite dans cette Prouince nourrie depuis tant d'années dans une perpetuelle deſobeiſſance. La ſubite déroute de Soubize aux Iſles d'Oleron au

feul bruit de ses armes , le secours de l'Isle de Ré , la fuite des Anglois , la prise de la Rochelle qui estoit comme la source de tous les mal-heurs de la France , la reddition des plus fortes places du Languedoc & de la Guienne , le penible passage des plus hautes & des plus affreuses montaignes des Alpes , toutes retranchées par les ennemis , & garnies de troupes aguerries , qui estoient capables d'arrester dans ces destroits les plus puissantes armées de la terre. Le secours glorieux de Casal , la deliurance de ses alliez , la paix & la-liberté de l'Italie , leur serviront de tesmoignages visibles , que Dieu n'oublie jamais de favoriser les Rois qui ne s'oublient point parmy les grandeurs & les pompes de la Royauté.

Plaise à la diuine bonté , & c'est par ce vœu que ie finiray mon ouurage , de continuer d'espandre sur nostre Prince ses saintes benedictions , & de luy faire la grace de le fortifier si puissamment dans ses saintes resolutions , qu'il puisse demeurer tousiours semblable à luy mesme : c'est à dire , tousiours pieux , tousiours iuste , tousiours clement , afin qu'il continuë de trauailler à la reformation de tant de desordres & tant d'abus qui s'appent insensiblement

ment

LIVRE IV. CHAPITRE XV. 709
ment les fondemens de cette Monarchie ;
& qui empêchent que ses peuples ne
jouissent des fruits de tant de victoi-
res qu'il a glorieusement remportées sur
ses ennemis , tant dedans que dehors le
Royaume.



F I N.

SSss



CH O S E S O B M I S E S.

AV Chapitre, Qu'il n'est permis aux Princes du Sang & grands Seigneurs du Royaume de se marier sans le congé du Roy, à la pag. 61. il faut mettre apres ces mots, *Et nous apprenons de nos Annales*, Que Philip-pes le Bel ayant esté aduertty que Guy Comte de Flandres auoit accordé sa fille au fils du Roy d'Angleterre sans sçauoir auparauant sa volonté, il le fit venir à sa Cour, & luy remonstra qu'estant son 'vas-sal il n'auoit peu promettre sa fille ny la marie avec l'ennemy de la France sans son consentement, à quoy il adiousta plusieurs reproches, & le menaça de le punir comme criminel de leze Maiesté, s'il ne se de-partoit de ceste alliance, & pour plus gran-de feureté il retint la fille à sa Cour, dont quelques annees apres elle mourut de de-plaisir.

Au Chap. de la Regale spirituelle, pag. 128. on a obmis de mettre ces mots, La quatorziesme est, qu'il se fait ouuerture à la Regale lors qu'un Euesque ou Arche-

uesque est promu au Cardinalat à cause de la residence que les Cardinaux doiuent auprès du Pape; aussi les Canonistes les appellent, *Assessores Papa: Pars corporis Papa, & Apostolici coadiutores*. Iusques là qu'ils tiennent que pour ceste raison l'Euesché & l'Archeuesché sont incompatibles avec le Cardinalat, d'autant que les Euesques doiuent de leur part vne residence personnelle en leur Diocese, comme il est dit en l'Authent. *de Episcop. & Cleric. & in cap. multa de Prab.* Je sçay bien que quelques-uns ont voulu mettre difference entre les Cardinaux qui ont vn tiltre, & ceux qui n'en ont point; & que ceux-là estants plus estroitement obligez de resider à Rome faisoient vacquer leurs Eueschez & Archeueschez; & non pas les autres, comme estants supernumeraires. Mais les Arrests de la Cour ont passé par dessus ceste distinction, pource qu'il n'y a point de doute que les Cardinaux, bien qu'ils n'ayent pas de tiltre, ont neantmoins pareille charge, & dignité que les Titulaires: car ils doiuent tous esgalement resider en la Cour de Rome, & au Consistoire; Ioint aussi que l'office de Cardinal est beaucoup plus illustre & plus important que celuy d'Euesque & d'Archeuesque; & de fait

SSss ij

le chapitre *Per venerabilem*, *Qui filij sunt legit.* dict que les Cardinaux *sunt Sacerdotes leuitici ordinis*, qui *Domino Papa*, in executione *Sacerdotalis officij*, *coadiutores existunt*, & *iudicant cum eo inter sanguinem & sanguinem*, *Lepram & Lepram.* Et c'est pourquoy le Pape Innocent III. in cap. *Bona de postul. Pralar.* declare nulle l'election que le Clergé de l'Eglise de Rauenne auoit faicte de la personne d'un Cardinal pour estre leur Euesque, dequoy il ne rend point d'autre raison, *quam quod eiusdem Cardinalis presentia assistens ad Sedem Apostolicam utilior sit, quam si resideret in Ecclesia Raucennensi.*

Page 160. apres ces mots, *qua pretium habent*, mettez, joinct que le Conseil d'Estat ayant cité estably sur l'exemple de celuy des Empereurs Romains, qu'on appelloit *consistorium Principis*, & *curia principis*, est-il pas raisonnable que les Conseillers d'Estat jouissent des mesmes prerogatiues & des mesmes auantages, que ceux qui auoient l'honneur d'entrer dans les conseils de ces anciens Princes & qui estoient *ut comites dicerentur*, *ut cingulum gestarent*, *ut ius sedendi cum omnibus iudicibus haberent*, *ut mitti in Prouincias possent.* *Titulo de Comit. consist. C. lib. 12. l. Proximos. C. de Proximis Sacros. scrip. l. 2. de officio diuersorum iudicum l. 1. C. de Mandatis principum.*

Page 525. ligne 20. apres ces mots , mainte-
nus de faux , faut mettre , on doit tenir le
semblable pour tous les autres droicts du
Roy , & que leur cognoissance en appar-
tient à ses officiers , selon l'attribution qui
leur en est faite par les Edicts & les Ordon-
nances. En quoy on ne doit pas com-
prendre les choses qui concernent l'admini-
stration & le gouvernement de l'Estat ,
dont la cognoissance est reseruée à la seule
personne du Roy , sans qu'aucun autre s'en
puisse entremettre que par son ordre & sa
commission , suiuant la loy fondamentale
de la Monarchie , qui veut que le souue-
rain commandement reside en la personne
d'un seul , & l'obeïssance en tous les autres:
Qui est vne des raisons mystique pourquoy
les Empereurs Romains imputoient à crime
de leze Majesté , si vn autre qu'eux eust
osé mettre *in Larario suo fortunam Imperij Du-*
ctricem & Rectricem , comme Dion le remar-
que.

Page 698. ligne 11. apres ces mots , Mo-
narchies du monde , faut adiouster , com-
me l'Escripture Saincte & les anciennes hi-
stoires recitent estre arriué à Moÿse , Cy-
rus , Romule , Thesée , & à plusieurs au-
tres.

TABLE DES MATIERES.

A.

- les **A**înez sont preferez à leurs cadets en la succession du Royaume. pag. [28.](#) & 30
excellence du droit d'Aînesse. page [29.](#)
- les Roys de France ne peuvent deshenter leurs aînez, ny ceux qui doivent succeder à la Couronne, & pourquoy. [p. 31](#)
en quel aage l'on pouuoit entrer dans les charges parmy les Romains. [p. 37](#)
- que les Roys dès leur ieune aage sont aussi capables de grandes choses que ceux qui sont hommes tout faits, & plusieurs exemples. [p. 39](#)
- Apanage donné aux enfans de France au milieu du Royaume, & pourquoy. [p. 53](#)
- Appellations comme d'abus, leur vtilité, quand introduites. [p. 80](#)
- Amortissement ce que c'est. [p. 101](#)
pourquoy estably. [p. 103](#)
- Appellations des Juges des terres des Euesques se releuent par deuant les Officiers du Roy, & pourquoy. [p. 106](#)
- Auguste assidu à rendre la iustice. page [152](#)
- Anneau d'or marque d'honneur parmy les anciens. [p. 104](#)
- Aubeine, & d'où ce droit a pris son origine. p. [219.](#) [see effects.](#) p. [220.](#) & 221. qui sont ceux qui en sont exempts. [p. 222](#)
- Ambassadeurs exépts de ce droit. [p. 227](#)
- Admiral de France. [p. 275](#)
charge maintenant supprimée. [ibid.](#)
- Monsieur del' Aubespine de Verdonne Maistre des Requestes. [p. 280](#)
- Astinomus ce que c'est. [p. 288](#)
- Aristotele. [p. 299](#)
- Argens, ce qui sont. [p. 305](#)
- Acquereur du Domaine ne jouit que de la Seigneurie vile. [p. 331](#)
- Argér plus estimé par les Romains que l'or. [p. 387](#)
- Aides quand introduictes en France. [p. 403](#)
- Aduocats Generaux & leurs charges. [p. 419](#)
- Amandes adiugées au Roy sur les biens confisquez doment estre payées par preference. [p. 472](#)
- Argent donné à la banque de Venise reuient au Roy, lors que celuy qui l'a donné est condamné pour crime de leze Majesté. [p. 473](#)
- Appellations, & quand elles ont commencé en France [p. 490. 492](#)
- Attentat sur la vie du Prince crime

TABLE DES MATIERES.

horrible. [p. 534](#)
 Astrologie iudiciaire desſendüe. [p. 534](#)
 Autel de Miſericorde à Athenes. [p. 560](#)
 Abolitions en quel cas le Roy les accorde. [p. 582](#)
 Ambaſſadeurs, & leurs priuileges. [p. 592](#)
 droit de traiter par Ambaſſadeurs n'appartient qu'aux ſouuerains. *ibid.*
 iniures faiſtes aux Ambaſſadeurs vengées avec toute ſorte de rigueur. [p. 596](#)
 ſçauoir ſi vn Ambaſſadeur eſt iuſtifiable du Roy vers lequel il eſt enuoyé. *ibid.*
 Alliance, & en quels cas les Roys Chreſtiens la peuuent faire avec les heretiques & les infidelles. [p. 606, 618](#)

B.

Bat Duché, & ſa [conditiõ. p. 73](#)
 releue du Roy en hõmage & en reſſort. *ibid.*
 Bourgeoisie, comme elle s'obtenoit à Athenes, & à [Rome. p. 118.](#)
 & [219.](#)
 Baſtards reputes indignes de poſſeder les charges parmy les anciens. [p. 230](#)
 Qu'il n'appartient qu'au Roy de les legitimer. *ibidem*
 Baſtards nais d'adultere peuuent tenir des offices, mais non pas ſucceder à leurs peres. [p. 233](#)
 Baſtards doiuent eſtre recogneus par leur vertu. [p. 296](#)
 Baſtards ne prennent point leur

droict d'aiſneſſe. [p. 239](#)
 Baſtards des Gentils-hommes doiuent tailles. [p. 243](#)
 Braſſage, ce que c'eſt. [p. 259](#)
 Biens faiſts des Roys touſiours fauorables, enquoy ils different des priuileges. [p. 419, 420](#)
 Bourgeois ce que c'eſt. [p. 520](#)
 Belus fondateur de la premiere Vniuerſité du monde. [p. 648](#)
 Bibliotheque d'Alexandrie. [p. 650](#)

C.

Charles le Sage ne voulut point ceder à l'Empereur ſon oncle. [p. 21](#)
 la Conſanguinité ſinit au ſeptieſme degre. [p. 35](#)
 ce qui ne s'obſerue point en la ſucceſſion du Royaume de France. *ibid.*
 Cours ſouueraines ne peuuent faire d'Edict ny de loy. [p. 73](#)
 Conciles tenus de l'autorité des Empereurs. [p. 79, & 80](#)
 Conciles ne ſe peuuent celebrer que par le conſentement du Pape. [p. 85](#)
 ſe doiuent tenir de dix ans en dix ans. [p. 86](#)
 vtilité des Conciles. [p. 87](#)
 Cafata, vne ſorte de tribut des Eglises. [p. 100](#)
 Conſtantin donnant Rome au Pape ſ'en reſerue la ſouueraineté. [p. 103](#)
 Congregations, on ne peut les eſtablir ſans la permiſſion du Prince. [p. 115](#)
 Confirmation de l'Eſlection des Prelats appartient de toute antiquité

TABLE DES MATIERES.

tiquité à nos Roys.	p.131	si les possesseurs du Domaine ont droit de chasse.	p.372
Collation des benefices pourquoy accordée à nos Roys.	pag.135.	s'il est permis de chasser sur l'atterre d'autrui.	p.373
& 136		<i>Comes sacramentum largitionum</i> ; ce que c'est.	p.422
ils Conferent de plein droict, & les autres Patrons nomment seulement.	ibid.	Confiscation, il n'y a que le Roy qui puisse confisquer.	p.438
peuvent Conferer la premiere prebende qui vient à vacquer apres leur ioyeux aduenement à la Couronne	p.139	quand accordée aux hauts Iusticiers.	p.460
Commissions, & qui sont celles que le Roy peut donner sans aller contre l'ordonnance.	p.149	ils ne peuvent le pretendre sur les biens du Domaine.	p.462
leur effect, & quel rang tiennent les Commissaires.	150	nos Roys ont vſé modérément de cedroict.	p.466
Comtes autrefois Iuges en France sous les Ducs.	p.153	le Roy peut donner les biens confisquezz.	p.467
Conseil Priué quelle est sa fonction.	p.157	Chancelier, & quelle est sa charge.	p.485
Conseil estroit, quelle est sa fonction.	p.158	Contrarietez d'arrests en quoy elles consistent.	
Conseillers d'Estat, leur fonction, leur dignité, leur grade.	p.159. & 160	Complainte, & sa cognoissance, appartient au siege Royal.	p.514
Cardinal de Richelieu.	p.166	Crime de leze-Majesté en quoy il consiste.	p.527
Chemins en la protection des Dieux.	p.185. & des Roys. p.186	Conspiration contre l'Estat comment punie.	p.539
Censeurs auoient le soin des chemins à Rome	p.187	Clemence vertu Royale.	p.560
Chemin Royal, & sa description	p.191	doit estre exercée avec discretion.	p.581. 582
Clarigatio ce que c'est	p.198	Consuls Iuges des Marchands, pourquoy establis.	p.677
Cire iaune est particulièrement reservée pour le sceau du Roy, & les particuliers n'oseroient s'en servir en leur sceaux.	p.301	Charge, & ses privileges.	p.679
Chasse, & son antiquité.	p.363	Contracts & confederations des Princes souverains.	p.604
que le Roy peut la defendre.	p.364.	en quels cas ils s'en peuvent departir.	ibid. & p.607
365		Charlemagne fondateur de l'Université de Paris.	p.658
accidens qui sont arrivez aux Roys en chassant.	p.368		

TABLE DES MATIERES.

D

enquoy **D** Oilaire des Re-
 consiste le **D** nes de Frâce. p. 48
 Donations faictes au profit de l'E-
 glise nulles. p. 101
 Donations immenses faictes aux
 Eglises nuisibles à elle-mesme
 & à l'Estat. p. 105
 retranchees par les successeurs de
 Louys le Debonnaire. ibidem.
 Decimes quand en vſage en Fran-
 ce. 111
 ils se leuent du consentement du
 Pape. p. 102
 inegalité des Decimes blasmables.
 p. ibid.
 par qui elles doiuent estre payees.
 p. 103
 qui sont ceux qui en sont exempts.
 ibidem.
 Ducs & s'estoient eux qui ren-
 doient la iustice autrefois en
 France. p. 153. & 154
 ils conduisoient aussi les armées.
 p. 165
 Deniers publics, & à qui appar-
 tient leur maniment. p. 167
 Droit annuel & les malheurs qu'il
 cause. p. 187
 Domicile. p. 229
 Domicile du Roy dans la ville ca-
 pitale du Royaume. p. 314
 Domaine du Roy consiste en terre.
 p. 321
 d'où il a pris son origine. p. 322
 quels sont les cas où il est permis
 d'aliéner le Domaine de la Cou-
 ronne. p. 324. 325
 comment se fait l'union des terres
 du Roy au Domaine. p. 328. 329

Duchez & leur trop grand nom-
 bre preiudiciables à l'Estat. p. 331
 Domaine ne se peut prescrire. p. 337
 quels cas sont exceptés de ceste re-
 gle. p. 345
 Doilane de Lyon quand introduit.
 te. 404
 Desherance ce que c'est. p. 448
 apres quels degrez le Roy le re-
 cueille. p. 451. 452
 par quel temps il se peut prescrire
 contre le Roy. p. 456
 Debtes du Roy & s'il est tenu de
 payer les debtes de son prede-
 cesseur. p. 621
 les habitans d'une ville ruinée, &
 puis rebastie sont tenus de payer
 les debtes de leurs predecesseurs.
 p. 626

E

E Mpire d'Allemagne est
 composé d'un partage d'un
 fils de France. Est Aristocratique
 l'Empereur peut estre depose.
 20. 21.
 ſçauoir si en vn Royaume l'Esle-
 ction est preferable à la succes-
 sion. 25. 26.
 Enfants, & quels proufils ils appor-
 tent aux Roys leurs peres. 49
 Enfants de France, & leurs priuile-
 ges. 50.
 Edicts doiuent estre faicts de l'a-
 uis des plus gens de bien. 71
 Ecclesiastiques sont iusticiables du
 Roy. 88. & ſuiuant.
 Euesques ont ce priuilege d'estre
 iugez par les Iuges deleguez du
 Pape : plusieurs exemples de
 cela. 91. 92

TABLE DES MATIERES.

doient obtenir permissiõ du Roy auparauant que d'appeller de- uant le Pape. 93	Estats Generaux compatibles avec les Monarchies, leur vtilité, 640. 641. 642
En cas de crime de leze- Majesté, les Euesques peuuent estre iu- gez par les Iuges seculiers. 93	Estats Prouinciaux quels ils sont. 645
Ecclesiastiques ne cognoissoient des causes des Laiques, que cõ- me arbitres. 93	
Eglise peut posseder des immeu- bles. 102	
Ecclesiastiques doiuent contribuer aux charges de l'Estar, & com- me cela se doit entendre. 109	
Eslection aux benefices fort vñitee en France. 132	
pourquoy ostee. ibidem.	
Eslection des officiers, quand ostee en France. 146	
Estrangers, & qu'il n'appartient qu'au Roy de les naturaliser. 215	
Estrangers bannis de Rome, d'A- thenes, & de Sparte. 216.	
217	
Estrangers incapables de tenir des offices en France. 210	
le Roy leur succede. 221	
Estrangers esleuez quelquefois aux charges, à cause de leur vertu. ibidem.	
Escoliers exempts du droit d'Au- beine. 228	
Encausum, ce que c'est. 311	
Ecclesiastiques ne peuuent vendre leurs bois sans permission du Roy. 358	
Euocations où se iugent. 497	
Espee symbole de la souueraineté. 503	
	Estats Generaux compatibles avec les Monarchies, leur vtilité, 640. 641. 642
	Estats Prouinciaux quels ils sont. 645

F

les Femmes sont incapables de succeder au Royaume de France, & pourquoy? 31. 33	
Femmes de Lacedemoine commã- doient à leurs maris. 32	
les Celtes auoient vñe puissance absoluë sur leurs femmes. ibidem.	
sont incapables de la succession des Fiefs. 33	
leurs enfans sont de mesme condi- tion. 34	
les femmes sont ambitieuses de leur naturel, & de cela plusieurs exemples. 43	
les Femmes peuuent estre Regen- tes en France. 45	
Fils aîné de France, bien qu'il ait le nom de Souuerain, n'est pas neantmoins Souuerain. 51. 56	
les Freres des Roys, bien qu'es- gaux de naissance, doiuent obeis- sance au Souuerain, comme les autres sujets. 52	
les Fils & freres des Roys, <i>non sunt</i> <i>solius legibus.</i> 54	
qu'il est de la bien-seance de les employer dans les affaires. 57	
François ne sont tenus d'aller plai- der à Rome. 99	
François Premier enuoyé descou- uir la terre de l'abrador. 268	

TABLE DES MATIERES.

François negligent la nauigation.	doit garder quand on en veut
ibidem.	establi de nouuelles. p. 681.
Fleues sous la protectio des Roys,	Foy doit estre exactement gar-
& leur vtilité. p. 177	dee aux alliez. p. 612
Exemples de ceux qui ont entre-	dire d'Eucicratidas Lacedemonien
pris autrefois de les vnir les vns	sur ce sujet. ibidem.
aux autres. p. 179.	si le Prince est tenu de la garder à
le Roy a la Seigneurie du canal des	ses sujets rebellés. p. 611.
fleues. p. 180	
Fiefs n'estoient point autrefois luc-	G.
cessifs. p. 313	
Forests, & leur vtilité. p. 348	les An- G Ermaines eslisoiēt leurs
les Anciens bastissoiēt leurs Tem-	ciens Roys. p. 15
ples dans les Forests, & y faisoiēt	Gouuerneur du Dauphiné & ses
leurs sacrifices. p. 349. 350	prerogatives. p. 146
trois sortes des Forests en France.	Guerre, il n'appartient qu'au Roy
p. 352	de la declarer. p. 162. 163
il n'estoit permis qu'au Roy d'a-	& de conduire les armées. p. 164
uoir des bois de haulte fustaye.	peut commettre à qui bon
p. 355	luy semble la conduire de ses
les François iuroient <i>super accipere</i>	troupes. p. 166
<i>& spata.</i> p. 370	Gouuerneurs des Prouinces peu-
Fer & son transport defendu.	uent escrire au Parlement en
p. 394.	corps
Fisque ce que c'est, & de ces primi-	Gardenoble appartient au Roy en
leges. p. 425	Normandie. p. 318
les villes n'ont point droit de Fis-	Greffes sont du Domaine. p. 335
que en France. p. 427	Grurie & Grairie ce que c'est. p. 354
de que's biens il est composé.	Gabelle, son origine; & en quoy
ibidem.	elle consiste. p. 406
Fisque preferé aux creanciers &	Garde des Sceaux, leur sceance.
Chirographaires, mais non pas	p. 488.
aux hypothecaires. p. 428	Gardes du Corps sont nécessaires
preferé à la femme sur les biens af-	au Prince. p. 105
fectez pour son Domaine. ibid.	Graces & remissions ne peuuent
en quels cas il doit estre preferé à	estre donnees que par le Roy.
la femme. p. 430	p. 556
en quelles Iurisdiccions le Fisque	en quels cas il les octroye. p. 587
plaide. p. 437	H
Fisque n'est point preferé par les	H Omage se doit rendre en
bons Princes. p. 442	personne. p. 10
Faires, & quelles formalitez l'on	Hommes sont tous esgaux & cō-

TABLE DES MATIERES

ment cela se doit entendre. p. 202.
Hypotheques sçavoir si elles pas-
sent sur les biens confisquez.

p. 471

Horoscopes du Prince defenduës.

p. 551

Heliopolis Vniuersité de l'Egypte.

p. 650.

I

I Oas Roy de Judée. p. 77

Jurisdiction Ecclesiastique esta-
blie par Charlemagne. p. 95

les Roys la peuvent restreindre.
ibid.

restreinte en France sous Louys
Hutin. p. 96

De quels cas elle peut cognoistre.
ibid.

ne peut cognoistre que des cas co-
muns. p. 97

peut degrader vn Prestre. ibid.

peut implorer le bras seculier aux
cas atroces. p. 98

Institution des Euesques est *In f-*
mere diuini. p. 131

Iustice, & la rendre, est la plus noble
fonction des Roys. p. 151

Isles qui s'esleuent dans les fleues
appartiennent au Roy. p. 281 282

Jurisdiction des eaux & forests en
quoy elle consiste. p. 361. 362

Immunitéz, & il n'y a que le Roy
qui les puisse donner. p. 411

odieuses parmy les Anciens. p. 414

Jurisdiction, & quels sont ses fruits.
p. 451.

Juges ne peuvent charger leur sen-
tence quand ils l'ont vne fois
donnée. p. 157. & 158.

Iustice diuine sur les Roys & plu-

sieurs exemples de cela. p. 705
706

L

L Oix Romaines n'ont point de
lieu en France. p. 22

Le droit Romain ne s'obserue
point en Espagne. p. 23

avec quelle ceremonie les Anciens
publioient leurs loix. p. 23

Loy Salique. p. 24.

Loix fondamentales de l'Estat, & qu'il
n'y a que les Roys qui les puisse
faire. p. 65

matruaisies Loix cause de la ruine des
Estats. ibid.

Roys d'Israel transcriuoient les
Loix diuines de leur main. p. 66

il est dangereux de changer les Loix
anciennes. p. 67

en quel cas on les peut changer. p.
68

il n'appartient qu'aux Roys de chā-
ger le sens des Loix. p. 69

Les particuliers ne peuvent faire de
Loix dans leurs familles. p. 73

Louys le Debonnaire donne Ro-
me au Pape. p. 104

Lettres patentes, & leur authorité.
p. 201

Lettres de naturalité, ses effects. p.
212

Largeesses immoderées de Neron
redemandées par Galba à ceux
qui auoient participé, & d'autres

exemples de cela. p. 422

nuisibles à l'Estat. p. 424

Lettres patentes doivent estre si-
gnées de la main du Roy. p. 480

& icellées du grand Sceau. p. 481

Lettres de cassation d'Arrest où el-

T T t iij.

TABLE DES MATIERES.

les s'obtiennent.
Lyon Vniuersité.

496
436

M

Monarchie de deux sortes.
395

Mediſance contre le Prince, punie
de mort. 518

Mefpriſee par les bons Princes. 531

Monarchites illicites. 680

Monarchies hereditaires, en quoy
elles different de celles qui ſont
deſcendues par ſucceſſion, & ce
qu'opere ceſte difference. 621

Moyſe n'a point leu de ſubſides
ſur ſon peuple. 5

les Roys de France ſont Majeurs
deſl'aage de quatoize ans. 38

Mariage libre à tout le monde, ex-
cepté aux Princes & grands Sei-
gneurs du Royaume, & pour-
quoy? 59

Comte S. Paul puny, pour ſ'eſtre
marié ſans le conſentement du
roy, & pluſieurs autres exem-
ples. 61. 63

Monafteres, & qu'il eſt defendu de
les baſtir ſans le congé du Prin-
ce. 116

Moines, & deſenſes de ſe faire
tel ſans le congé du Roy. 118

Miſſi Dominici, quels eſtoient. 153
Mandemens & reſcripts quand ils
ſe peuuent eſtendre en d'autre
cas. 198. 199

Marchandiſe, ſon vtilité. 127

Marchands forains exempts du
droict d'Aubeine. 216

Monnoye eſt diſte à *roy*. 244
droict de battre monnoye eſt vn
droict ſouuerain. 245

crime de leze-Majeſté, que de fai-
re la monnoye de ſon autorité
priuee. 246

les Eueſques faiſoient battre de la
Monnoye autrefois en France. 247

Louys Hutin oſta cet abus. 248

en quelles occaſions le Prince peut
aſſoiblir la Monnoye. 249. 250
inconueniens qui arriuent du chā-
gement de la Monnoye. 253. 254

Mer commune inſques à l'Empe-
reur Juſtinian. 261

quand, comment, & par qui la Mer
a eſté occupee & deuenue par-
ticuliere. 263. 264

quels droicts le Roy a ſur la Mer.
270

Macellum, ce que c'eſt. 289

Marchandiſes de ceux qui veulent
frauder le peage à qui elles ap-
partiennent. 295

Marque quel droict ceſt. 297.
ſuuiantes.

qu'il n'appartient qu'au Roy de
l'oſtroyer. 302

qui ſont ceux qui en ſont exempts.
303

Mines, & quels droicts les Anciens
prenoient ſur elles. 386

quels droicts prend le Roy ſur elle.
388

il eſt permis de les fouiller par tout
en France. 389

N

L'On ne pouuoit auoir des Na-
uires en mer ſans le conſen-
tement du Prince. 61

Nomination des beſoſices, & de-
puis quand elle appartient à nos
Roys. 129

TABLE DES MATIERES.

en quel cas les Roys peuuent nom-
mer eux-mesmes aux benefices.

130

Natalium restitutio, ce que c'est.

204

Noblesse, & il n'y a que le Roy qui
puisse annoblir. 205

il annoblit en deux façons. 205

Noblesse vendue en France. 210

que les personnes viuants de leur
bien sont nobles. *ibid.*

Annoblis doiuent indemniser le
Roy. 112

Noblesse & ses priuileges. *ibid.*

Naturalité. p. 212. 213

Naufrage & droit de bris, & sca-
uoir si c'est vn droit legitime.

274. 275

○

Officiers, il n'y a que les Roys
qui puissent les instituer dans
leur Royaume. 141. 142. 143

Officiers estoient annuels ancien-
nement en ce Royaume. *ibid.*

ils estoient aussi esleus par ceux de
leurs corps, & puis présentés au
Roy. 144. & 145

Obeissance marque de subjection.
188

Officiers ne doiuent obeir aux
commandemens iniustes. *ibid.*
& 189

qu'ils doiuent faire remonstrance
au Roy, & comment. 195

en quels cas ils doiuent obeir aux
lettres du Roy. 200

quels offices annoblissent ceux qui
les possèdent. 206

Ostracisme, & quand le Roy en
peut user. 317

P

quel est l'of- Prince. 3

fice du la paix compagne
la iustice. 8

Potentats d'Alemagne & d'Italie,
ne sont pas souverains. 11

Priuileges des Reines de France. 47

Police de l'Eglise, & sa cōseruation
appartient aux Roys. 76. 77

Preîtres exempts de tailles parmy
les Anciens. 110

Prestres, & leur nombre determi-
né par les Empereurs, pour ser-
uir aux Eglises. p. 118

Pythagoriciens. 120

Patronage, & se peut maintenant
aliener. 137

le fondateur doit se reseruer expre-
sément ce droit, à quoy le Roy
n'est pas astringé. 138

l'on ne peut créer des Pensions
sur les benefices qui sont du pa-
tronage du Roy sans son congé,
ibid.

Parlement de Paris, & ces preemi-
nences. 156

Par quels Roys ils a esté choisy
pour estre Iuge de leurs diffe-
rents. *ibid.*

Paix il n'appartient qu'aux Roys
de la conclure. 167

Pauvreté propre à cultiuer la ver-
tu. 182

President de la Vacquerie. *ibidem.*

Pauvres bien que foibles sont le
soustien des riches. 203

Peage que le Roy prend sur les
fleuves, & pourquoy? 184

Peage, & qui sont ceux qui en sont
exempts. 296

il estoit défendu parmy les Ro-

TABLE DES MATIERES

main de courre la poste sans la permission du Prince.	p. 307	Pheniciens amateurs des lettres	p. 653
Pannonceaux, & qu'on ne les peut mettre sur les heritages des particuliers sans la permission du Roy.	p. 310	Pythagore estimé Iuif par les Anciens.	p. 654
Pourpre destinee pour les Souuerains.	p. 312		R
Pastis non compris dans le Domaine.	p. 334	Royauté que c'est.	p. 1
Prescription de cent ans en quel cas elle n'est pas receuë pour le Domaine.	p. 341	sa description par Dion Chrysostome.	p. 2
Places fortes & leur vtilité.	p. 377	<i>Est cura salutis alienæ.</i>	p. 3
font inalienables.	p. 380	Roys, & pourquoy ils ont esté créés.	p. 3-7
il n'est permis à personne d'en bastir.	p. 381	Roys de France, & leur loüange.	p. 6
Prinileges sont odieux.	p. 418	Roys de Naples, de Sicile, d'Arragon, d'Angleterre, de Hierusalem, ne sont pas Souuerains, & pourquoy.	p. 10
différence entre les prinileges & les bien-faicts.	ibid.	les Roys de France sont pleinement Souuerains.	p. 12
Protopraxie ou droit de preference priuilege du fisque.	p. 426. 427	il ne dependent point du S. Siege pour le temporel.	p. 13. 14
ce peut ceder à un tiers	p. 434	ils ne dependent point de l'Empire	p. 15. 16. 17. & les suivantes
Proposition d'esreur ce que c'est.	p. 494	le Royaume de France n'est point electif.	p. 25
Puissance du glaue en quoy elle consiste.	p. 503	différence du Roy & du Tyran.	p. 27
elle n'appartient qu'aux Cours souueraines.	p. 507	les Roys appelez Disciples de Iupiter.	p. 40
Princes ne doiuent abuser de leur authorité, ont Dieu pour iuges	p. 514	les Reines doiuent auoir des lettres patentes verifées au Parlement pour estre declarées Regentes.	p. 46
Pardon s'octroye ou pour la consideration des parents, ou du pere ou aux loyeux aduenemens des Roys.	p. 584. 585. 586	les Reines <i>non sunt soluta legibus.</i>	ibidem.
Peculat crime irremissible parmy les Romains.	p. 590	les Reines n'ont point de communauté de biens avec leur maris.	p. 47
Police ce qu'elle signifie.	p. 683	Roys ne se doiuent mesler des choses pures spirituelle de l'Eglise	
combien les Romains estoient curieux de la faire obseruer.	ibid. & 684		

TABLE DES MATIERES.

glise.	78	les Reines, & celuy qui doit succe-	
la fonction des Roys & des Pon-		der à la Couronne, iouissent aussi	
rites est separee.	ibid.	de ce priuilege.	438
Roys peuent contraindre les E-		Ressort que c'est vn droit sou-	
uesques de tenir leurs Synodes.		uerain.	490
81.82.83		& en quoy il consiste.	ibid.
les Roys peuent presser les Papes		Requeste ciuile, en quoy elle con-	
d'assembler les Conciles gene-		siste.	493
raux.	85	Roys ne doiuent iuger les causes	
Regale temporelle, ce que c'est.		criminelles, & pourquoy ?	509.
107		510	
Roys de France comparez aux		Rebellions des communautéz,	
Roys de Iuda.	111.112	comment punies.	550
Roys de France pouruoient aux		S. Romain de Rouën, & son priui-	
benefices, & comment.	113	lege.	559
Regale spirituelle n'appartient qu'à		Remission, en quel cas le Roy la	
la propre personne du Roy. ibid.		donne.	588
Regale n'est point comprise dans		Roys de France ne peuent rien	
les droits qui sont vnus à l'apa-		ceder ny aliener ce qui appar-	
nage des fils de France.	124	tient à la Couronne, & pour-	
plusieurs maximes remarquables		quoy ?	614
en la regale. ibidem. & suivantes.		roys ne peuent prendre par force	
Roys de France sont Chanoines		le bien de leurs sujets, & refuta-	
des Eglises Cathedrales de leur		tion de l'opinion contraire.	632.
Royaume.	139	633	
Roys appelez Iuges autrefois.	151		
ils doiuent faire respecter les Ma-			
gistrats.	161		
Roys succedent aux bastards nais			
d'inceste.	240		
Romains soigneux de fortifier les			
riuages des fleues.	278		
il n'appartient qu'au Roy d'escrire			
au Parlement en corps.	308		
Roys exemptes de subir la rigueur			
de la iustice, quand bien ils de-			
uiendroient ennemis de la pa-			
trie.	315		
Roys de France ne peuent estre			
excommuniez.	318		
le Roy ne plaide iamais que par			
Procureur.	437		

S

Sceptre, ce qui signifie. 2
 Souueraineté, ce que c'est, & sa
 marque. 9
 il n'y auoit que ceux du sang royal
 qui peussent succeder à la Cou-
 ronne de Lacedemone, d'Epire,
 & de Sidon. 36
 Souueraineté est incommunicable.
 42
 Synodes se doiuent tenir de trois
 en trois ans. 80
 leur vŕage testably par Charlema-
 gne. 84
 Silunnus Patriarche de Constan-

V V u u

TABLE DES MATIERES.

tinople.	84	Terre Salique, c que c'est.	7
Serment que les premiers Presidents font entre les mains du roy, ne se doit reuerer à la Cour.	147	Terres Ecclesiastiques sujetes à la souveraineté du roy comme les autres.	100
Socrate se disoit citoyen du monde.	215	Testament vls, pour lesquels on laissoit quelque chose aux Eglises.	101
Seigneurage, ce que c'est.	259	Temp'lers.	120
Seigneurs qui ont droit de peage sur les chemins sont responsables des vols qui se font de iour.	290	Terre autrefois commune à tout le monde.	261
Seigneuries du royaume releuent du roy.	323	Tiers & danger, ce que c'est.	356
Saisies royale, ce que c'est, & en quel cas elle est receüe.	441	Thresor trouué, & quel droit le roy prend sur luy.	393. 394
Saisie sont tousiours odieuses.	444	Taillies, & qu'il n'appartient qu'au roy de le leur sur son peuple.	396
en quel cas le Procureur du roy peut saisir auant la contestation de la cause.	445. 446	pourquoy ce droit luy a esté accordé.	398
Successions vacantes, appartiennent au roy.	449	Taillies imposees sur l'vrine, & sur l'air.	400
Seaux & leur origine.	477	sur les testaments, sur les procez.	399
de trois sortes en France.	481	S. Louys leua le premier la Taille.	401
Sauuegarde, & la cognoissance de leur infraction appartient au siege royal.	519	Traicté Domaniale, ce que c'est.	405
Submission en Iuge royal, ce qu'elle opere.	521	Thesmotetes officiers des Atheniens, quels ils estoient.	677
Sortir hors du royaume sans le congé du roy, c'est vn crime de leze-Majesté.	541	Tholose Vniuersité.	658
Science, & son vtilité.	647		
Salomon fondateur d'une vniuersité en Iudee.	651		
Sanonides, quels parmy les Gaulois.	655		

T

T Hrofine de Salomon appellé Turris, pourquoy? 7

V

V ierges exemptes du supplice. 70
 Vaillance, vertu royale. 162.
 Venalité des Offices, raisons pour & contre. 177. 178. 179
 quand introduitte en France. 183
 desordres qu'elle cause. 186
 Varch ou Varesche, ce que c'est. 274.
 Viocuri quels offices sont. 287

TABLE DES MATIERES.

Voleurs des grands chemins seu- rement punis par les Anciens.	189	il n'appartient qu'au Roy de les fonder.	648
Victoires doit estre attribuee au Roy seulement.	313	il est deffendu d'enseigner ailleurs que dans les Vniuersitez, & pourquoy.	660
Vniuersité, & leur origine.	648		

Fautes suruenues à l'Impression.

P Ag. 5. lig. 19. lisez. pressez. pag. 17. lig. 24. toll. virg. p. 23. lig. 5. au lieu de
l'Empereur lisez l'Espagne, pag. 26. lig. 2. celles lisez celui, lig. 4. ostez
que p. 46. lig. 18. ostes le mot Grec *adi*, p. 59. lig. 5. ignorez lisez igno-
rans. p. 60. lig. 10. ostez de mettez la punktion. p. 74. lig. 22. qu'il, lisez, il, p.
112. lig. 18. emporta, lisez remporta. p. 119. lig. 11. au lieu de par des, lisez
aux p. 160. lig. 11. puillance, lisez iouissance, pag. 268. lig. 11. entrees, lisez
contrees, p. 277. lig. 7. qu'ils, lisez qui se, p. 281. lig. 12. disoient, lisez disent,
p. 331. lig. 16. a. lisez auoit, p. 337. lig. 1. ses, lisez leurs, p. 380. lig. 4. alienez,
lisez alienees, p. 422. lig. 17. 2. liz. de, p. 431. lig. 4. tolle punctum, lig. 11. sti-
pule, lisez stipulee, p. 437. lig. 14. mettez par, p. 445. lig. 15. tolle punctum,
p. 454. lig. 2. delnier, lisez donner, lig. 6. l'inuentaie, lisez l'inuenteur, lig.
19. vaques, liz. vagues, p. 504. lig. 6. des, liz. de, p. 527. lig. 21. courage, liz. ou-
rage, p. 528. lig. 24. Pieux, lisez Dieux, p. 528. lig. 8. menaces, lisez me-
nees, p. 535. lig. 11. tolle, & sect. & punctum, 539. lig. 2. confisque, lisez con-
fisqua, p. 537. lig. 15. au nombre de sa lignee, lisez dans sa Genealogie, p.
591. lig. 11. tolle car.

Extrait du Priuilege du Roy.

PAr grace & Priuilege du Roy, il est permis à Jacques Quesnel, Marchand Libraire à Paris, d'imprimer ou faire imprimer vn liure intitulé, *De la Souueraineté du Roy, diuisé en quatre Livres, Par Messire C. le Bret, Conseiller ordinaire de sa Maieité en ses Conseils d' Estat & Priné: Auec deffences à tous Libraires, Imprimeurs, & autres personnes, de quelque condition qu'ils soient, d'imprimer ou faire imprimer, vendre ny debiter ledit liure autre que de l'impression dudit Quesnel, pendant le temps & espace de neuf ans, à compter du iour qu'il sera acheué d'imprimer, à peine de confiscation des exemplaires saisis, de cinq cens liures d'amende, & de tous despens, dommages & interets, nonobstant oppositions ou appellations quelconques: Clameur de Harau Chartre Normande, & autres choses à ce contraires, selon qu'il est plus amplement contenu en l'original. Donné à saint Germain en Laye le dixiesme iour de Decembre 1630. Par le Roy en son Conseil, Signé,*

LE LONG.

ET ledit Quesnel consent & accorde que Toussaints du Bray aussi marchand Libraire luré à Paris, iouysse du present priuilege par moitié, pour le temps porté par iceluy, suiuant l'accord fait entr'eux.

Acheué d'imprimer ce 10. Mars 1631.



101.

102.

103.

104.

110.

118.

139.

